









CAROLI SCRIBANI
E SOCIETATE IESV
MEDICVS
RELIGIOSVS
DE ANIMORVM MORBIS

ET CVRATIONIBVS.
Dom. Profen. rom.



BIBLIOTHECA NAZ.
ROMA
VITTORIO EMANUELE

ANTVERPIÆ
Apud Heredes MARTINI NVTII
ANNO M. DC, XVIII.



THE NEW YORK PUBLIC LIBRARY

ASTOR LENOX TILDEN FOUNDATION

275 D.C. 1.1

1921

1921

1921

1921



1921

1921

1921

ADMODVM REVERENDO

D O M I N O

A C P A T R I

ANTONIO DE WINGHE

ABBATI LÆTIE NSI

ORDINIS S. BENEDICTI.

S Popondi. non fallo si-
dem. & non Christianum
tantum, sed & Religiosum
Medicum mitto, animorum mor-
bos, damna, remedia narrantem.
Ridebit aliquis ab hesterna schola,
nupera arteria Medicum tironē. at
mihi satis est, votis Tuis Tuorumq;
respōdisse. Et nescio, an non maior,
promptę parentiæ, quàm prudentis
imperij laus sit. etiam inscitiam
ostentasse decus, si imperaueris. &
nō clarior gloria, infantiam quàm
eloquentiam prodidisse ad impe-

ria? in illa, è solo obsequendi studio, sperari laus potest, contemptus ab infantia: in hac facilis obedientia est, quæ laudem imperat. nec magnum est, in amico imperio ceruices submisisse gloriæ, magnum est contemptui submisisse. hoc volui, illud non potui. laudem an merear, iudicij erit tui. Hoc dicā: parui, & imprudentiam prodidi. De morbis scripsi, non in expertus morborum, remediorum ignarus. addidi tamen remedia: non quæ ægros alienos animos expleant, aut medeantur malis; sed quæ ægræ scriptoris huius menti commoda arbitrabar. Et sanè in morborum varia implicatione aliquid mihi largiendum, cùm morborum genus omne pectore hoc circumferam. densius his obsessus, quàm audax de genu pugnātis Magni Macedonis,
in

in Sudracarū oppido, clypeus, totam hostilium telorum siluam circūferens. vt non iniuriā fides haberi possit morborū experientissimo, & ex se magistro. remedia ab alijs, ac magno in primis Claudio Aquauia veriū quàm à me didici: vt cui crudi adhuc stent morbi. certiora à Tua Tuorumq; manu exspectabo, è Blosianis, nō Galeni aphorismis. quod si feceris, & margines libelli huius, expertissima manu tua medicamentis oppleueris; næ ego fortunatus, qui pellendis his animæ meæ morbis, testata medicabula repererim, certam valetudinē promittentia. Bea me hoc munere, & in omnem posteritatem habebis Tuū, nouo hoc Tibi munere æternū pignus. Vno hoc volumine tres libros clausi. primus Superiorum morbos, secundus infe-

riorum, tertius vtrique communes
amplectitur. Nemo indignetur.
meos nō alienos enarraui morbos.
famæ huius dominus, famam pro-
degi. & quis vetet morbos suos om-
nium in circo oculis spectandos,
emendandos, præbere? nō erubesco
ad aliorum aures, qui nō erubui ad
oculos magni Dei. nec pudet aperi-
re, quod nō puduit perpetrare. no-
xia enim verecundia est, quæ malū
in interitum celat. felix confessio
quæ in medelam mala prodit. hoc
feci. & toto hoc volumine mētem
legendam tradidi. nihil excuso. nec
si velim, possem. habeo nimis ocu-
latum testem & iudicem pectoris
huius, morborū, vulnerum. quibus
faucia mens hæc Samaritanum ex-
spectat, vinumque & oleū, è paterna
manu, matris vberibus; vt & vini
acrimonia faniem tergat, & oleum
fun-

fundētia vbera demulceant. vt nouus homo, post vulnera, morbos, mortem rediuiuus; valentia membra, sanguinis, coloris, & succi boni plena, diuinæ gloriæ, proximorum-que salutis sacræ. precibus hoc Tuis Tuorumque spero. nec difficile erit, è diuite Blossiana nube, in emarcidos hos animæ meæ campos fecundum imbrem depluere, & è locuplete illius apotheca nobilissima medicamenta, valetudini in integrum restituendæ depromere. Ita facite magni Patris magna soboles, dignissimi omnes tanti Parentis educatione; & calidis vestris ad Deum orationibus animæ huius morbos pellite, valetudinē reddite. ita æternū vos tueatur magnus Deus: spiritumque noui Eliæ vestri Blossij, in nouos vos Elisæos, dupla felici fœneratione diffundat.

AMICO LECTORI.



MORBOS enarro. non quales annorum experientia doctus in alijs obseruaui, sed quales Viri varijs retrò seculis eruditione ac pietate non postremi multis sparsim voluminibus, pro re nata vulgarunt, qualesque in vario Religiosorum aliorumque hominum genere succrescere posse arbitrabantur quæ omnia in unum hunc librum, tanquam in unum fasciculum conieci, quò promptius ad manum cum essent mala, essent & remedia: neque tam mala cognoscerentur quæ sunt, quàm quæ temporum procursu, & Religionibus ad deuexam caniciem, tanquam ad capulare quoddam senium properantibus, suboriri possent. In futurorum ergo magis anteambulam præcautionem, quàm in presentium subsidium hæc scripsi. Sed neque in omnes cadere hæc mala possunt, neque eadem omnibus medicamenta admouenda. quedam hîc etiam inter curationes præscripta, quæ cum non vltimarum Religionum institutionibus pugnant; qualia sunt locorum ac Superiorum mutationes. multa
deinde

deinde quæ in solidum ignorata, ut sepositi
designatiq̃ue certi per annum dies solis spiri-
tualibus animorum exercitationibus donan-
di, recollectiones, annuæ votorum renouatio-
nes, binæq̃ue per diem conscientiarum disqui-
sitiones, particulares etiam vitiorum virtu-
tumq̃ue diurnæ discussiones, aliaq̃ue generis
huius non pauca. Enarrare tamen ista volui,
ut quibus hæc non ignota, prodesse possent in
medelam; quæ imitari etiam possent, quibus
in hanc diem ignorata. Nemo verò morbo-
rum numerum miretur. quantos Hippocrates,
Galenus, alijq̃; medicorum, corporum morbos
tradiderunt? quanti q̃ue super hæc exurgunt
indies, veteribus, omnibus adeò retrò sæculis,
ne nomine quidem cogniti? Non minores ani-
morum sunt. audeo. plures etiam, quo latior in
animo quàm in corpore campus, ac patentior
area est. Jam ut nemo meritò reprehendit
medicos, morborum in vario sexu genera re-
mediaq̃; pertractantes, laudat potiùs; cùm in
morborum nos cognitionem, fugam, medica-
tionem manu quasi ducant: nec quisquam in-
dignatur scribentibus, tanquam morborum
suorum denuntiatoribus; amat magis, ut pe-

riculorum monitores. Sic neminem iure offendi posse arbitror, si animorum mala non tam quæ sunt, quàm quæ subnasci possunt, remediaque enarrauerim. nullorum hîc vulnera propalare animus fuit: sed in fugam & tutelam, quæ succrescere tanquam in fecundissimo xizaniarum solo, possent mala, designavi, & antidota venenis addidi. ut indignari nemo possit, conatum potiùs laudare; & docto prudentique suo calamo, rudem hunc meum & imperitum, polire & erudire. quod totis animis voueo, repositurus in beneficium, quidquid à quocunque amico calamo subministratum fuerit. summa etiam plerumque capita veriùs tetigi, ac malorum superficiem quandam rasi, res per capillum veriùs trahens, quàm toto corpore pertractans. accedent doctæ manus, quæ publico bono, gaudio meo, fusius hæc certiusque prospectanda dabunt. addentque è felici ingenio, fortunataque experientia sua plura in cognitionem & medelam. quo magis venerabor colamque æterna beneficium memoria, centupla in cælis à Deo retributione remetiendum.

SYLLABVS CAPITVM

LIBRI PRIMI.

CAP. I. **I**gnoratio in Superiore muneris sui. fol. i.

II. Ignoratio domesticarum rerum ac personarum.	6.
III. Ignoratio morborū subditorum suorum.	13.
IV. Ignoratio spiritualiter medendi.	18.
V. Neglectus in curandis suorum morbis.	26.
VI. Impatientia in inferiorum curatione.	32.
VII. Acerbior correctio.	38.
VIII. Paterna gubernationis neglectus.	46.
IX. Exigua cura interni spiritus.	54.
X. Remissio in gubernando.	60.
XI. Facilitas & indulgentia nimia.	68.
XII. Dissimulatio in suorum malis.	77.
XIII. Studium placendi sibi subditis.	84.
XIV. Nimia in suorum aliquem fiducia.	90.
XV. Prinata necessitudines & amicitia.	97.
XVI. Defectus boni exempli.	104.
XVII. Executionis defectus.	110.
XVIII. Disciplina neglectus.	115.
XIX. Neglectus valetudinis suorum.	125.
XX. Nimia in hospites parsimonia.	132.
XXI. Inutilium personarum admissio & retentio.	140.
XXII. Negligens institutio novitiorum.	145.

LIBRI SECVNDI.

I. <i>Auersio à Superioribus.</i>	160.
II. <i>Neglectus obseruantia erga Superiores.</i>	166.
†. <i>Curiosior inuestigatio imperfectionum Superiorum.</i>	668.
III. <i>Simulata & tecta conscientia explicatio & redditio.</i>	172.
IV. <i>Curiositas in indagandis, qua gubernationem tangunt.</i>	179.
V. <i>Obedientia neglectus.</i>	184.
VI. <i>Obedientia è solo metu profecta.</i>	191.
VII. <i>Excusationes.</i>	197.
VIII. <i>Intercessiones.</i>	203.
IX. <i>Laborum fuga. otij amor.</i>	208.
X. <i>Studiorum neglectus.</i>	215.

LIBRI TERTII.

I. <i>Orationis neglectus.</i>	221.
II. <i>Ariditas & in oratione distractio.</i>	237.
III. <i>Neglectus lectionis spiritualium librorum.</i>	247.
IV. <i>Examinis diurni neglectus, aut perfunctoria conscientia discussio.</i>	253.
V. <i>Tepiditas in ijs qua spiritum tangunt.</i>	264.
VI. <i>Mortificationis neglectus.</i>	284.
VII. <i>Regularum etiam minimarum neglectus.</i>	291.
VIII. <i>Silentij transgressio.</i>	301.
IX. <i>Aberratio ab instituto in rebus pijs.</i>	310.
X. <i>Auersio aut vniuersim ab instituto, aut ab aliquibus institutis proprijs.</i>	317.
XI. <i>Aemu-</i>	

XI. <i>Aemulationes etiam in rebus piis, & institu- ti propriis.</i>	322.
XII. <i>Amor sui.</i>	328.
XIII. <i>Dictorum factorumq; suorum commenda- tio, reliquorum damnatio.</i>	341.
XIV. <i>Ambitio, speciosorum munium prosecutio, viliorum fuga & contemptus.</i>	349.
XV. <i>Delectus munium & locorum.</i>	357.
XVI. <i>Nimia in unam alteramue nationem pro- pensio.</i>	364.
XVII. <i>Nimia cum uno alteroq; familiaritates.</i>	374.
XVIII. <i>Familiaritas & gratia quasita externo- rum, Principumq; virorum.</i>	380.
XIX. <i>Affectus in parentes, in sanguine iunctos.</i>	390.
XX. <i>Commendationes ad Ecclesiasticas aut sacu- lares dignitates & munia.</i>	397.
XXI. <i>Paupertatis neglectus.</i>	403.
XXII. <i>Sinistritia in cibo, potu, vestitu, reliquisq; corporis commodis.</i>	412.
XXIII. <i>Neglectus munditiei & modestie reli- giose.</i>	418.
XXIV. <i>Saculares mores, risus, ioci, minusve reli- giose recreationes.</i>	425.
XXV. <i>Conviniarum frequentia.</i>	433.
XXVI. <i>Munerum acceptatio & largitio.</i>	444.
XXVII. <i>Adulatio.</i>	452.
XXVIII. <i>Politica agendi ratio.</i>	459.
XXIX. <i>Sulici mores.</i>	472.
XXX. <i>Clan-</i>	

XXX. Clancularia agendi ratio.	479.
XXXI. Simulata amicitia, occulta odia.	485.
XXXII. Secretorum violatio.	490.
XXXIII. Infidus animus, alieni explorator & delator.	497.
XXXIV. Ingratus animus beneficiorum immemor.	506.
XXXV. Nimia ad externa diffusio.	513.
XXXVI. Castitatis neglectus.	522.
XXXVII. Nimia fiducia sui in rebus agendis, feminarumq; consuetudine.	530.
XXXVIII. Feminarum familiaritas quocunque pretextu, confessionum, instructionum spiritualium, boni temporalis, aegritudinū.	538.
XXXIX. Frequentes & proluxa feminarum confessiones.	550.
XL. Feminarum visitationes.	558.
XLI. Sociorum fuga & vitatio.	564.
XLII. Indeliberata agendorum resolutio & executio.	574.
XLIII. Diffidentia.	585.
XLIV. Dissensiones.	592.
XLV. Detractiones.	603.
XLVI. Delationes è suspicionibus nata.	612.
XLVII. Credulitas nimia in delationibus.	620.
XLVIII. Nimia commendationes & depressiones.	626.
XLIX. Apprehensiones & suspensiones.	632.
L. Pusillanimitas.	644.
LI. Impatientia in aduersis.	660.

C E N S V R A.

H*ic liber, medicus animæ, affectionumque
curator, ab Admodum R. P. Carolo Scri-
bani Societatis Iesu per Flandro-belgicam Præ-
posito Prouinciali conscriptus, virtutes inserens,
vitia extirpans, dignissimus est, qui typis excu-
datur, ut Religiosus quisque eum præ manibus
& ob oculos semper habeat. Quod censui 9. No-
uembris, anno 1617.*

Egbertus Spitholdius S. T. L. Canō-
nicus & Plebanus Antuerpiensis.

Summa Priuilegij.

ALBERTI & ISABELLÆ CLARÆ
EUGENIÆ, Archiducum Austriæ,
Ducum Burgundiæ, Brabantia; &c. Sere-
nissimorum Belgicæ Principum priuilegio
cautum est, nequis *Medicum Religiosum de*
animorum morbis & curationibus, auctore R. P.
Carolo Scribani Societatis IESV, præter He-
redum Martini Nutij Typographorum
Antuerpiensium voluntatem, in Belgio
intra sexennium imprimat, aut alibi im-
pressum in has Inferioris Germaniæ ditio-
nes importet, venalémue exponat. Qui
secùs faxit, confiscatione librorum, & alia
grauī pœna multabitur, vti latiùs patet
in litteris datis Bruxellæ, 4. Decembris,
anno 1617.

Signat

Steenhuyse.

LIBER PRIMVS.
SUPERIORVM MORBI
E T
CVRATIONES.

CAPVT I.

Ignoratio in Superiore muneris sui.

INC ingens illud malum ;
cùm Superior non tam consti-
tutionum, regularum, ordina-
tionumque instituti sui, quàm
iudicio suo gubernationem moderatur: vt
non tam vocationis sue, quàm nouæ con-
gregationis & Religionis institutio meritò
videatur, è Superioris placitis nata. Variæ
ex his principiis consuetudines nascun-
tur, liberior in non paucis, in aliis rigidior
disciplina ; in magnis sæpe grauibusque,
& à quibus Religionis nomen bonum
pendet, laxior plerumque ; in minimis
noueque ferè excogitatis strictior seu-
riorque ; vt iam à primæuo spiritu & vo-
catione vix aliud præter inane nomen re-
liquum sit : cùm quæcunque in speciem
pia bonaque amplectimur tanquam in-
A stituti

stituti propria. Grauis error, eoque magis, quò sub pietatis prætectu teneriores animas, simplicioreſque aliorum ab inſtituto pellit.

Sanè vt non omnium morbis eadem medicamenta, nec omnium valetudini eadem victus potuſque ratio; ita nec omnium vocationi eadem vitæ genera, aut pietatis exercitia muniaque conueniunt. Sanctæ ſunt variarum Religionum exercitationes, ſed non omnes omnibus Spiritu ſancto dictatore præſcriptæ aut imperatæ ſunt. Sua cuique Religioni ſunt munia, ſui termini, quos egredi non ſit conſultum.

Et certè labetur ſæpe Superior, qui inſtituti ſui, munerisque ſibi impoſiti ignarus, ſuo iudicio propoſitas difficultates decernet, & in grauiſſima ſe Religionemque discrimina coniiciet, incertuſque ſæpe rerum, dubius hærebit, ſollicitumque anxiumque pectus trahet; nec ſe explicabit ſine inſigni iactura nominis etiam ſui, ſalutiſque aliorum; mirabiturque ſe eò deductum, vt per præcipitia ſalus ipſi ſperanda ſit, cùm conſucto ſe itinere excluſum viderit, ſeroque, & non-proſutura pœnitentia errorẽ ſuum ingemiſcet, conſequeturque vt aut imperiti, aut fatui, aut

temerarij, aut improbi nomen obtineat, audietque non rarò hostis Religionis, qui eam placitis è cerebro suo fabricatis, in alienam à veteri semitam conetur impellere.

Et sanè cùm nihil stolidius sit, quàm ignoratæ artis scientiam profiteri, vt si quis curationū ignarus medicum se venditet; ita omnium stolidissimum est, Religionem, quam ignores, præ te ferre. Neque enim in vno errore stabit hoc malū: error enim vnus errorem trahet, donec ad inextricabilem errorum labyrinthum deducatur, è quo se extricare nulla arte aut prudentia queat. Hinc est illud Gregorij: *Nulla ars doceri præsumitur, nisi intenta meditatione prius discatur. ab imperitis ergo pastoribus magisterium pastorale suscipitur in magna temeritate, quoniam ars artium est regimen animarum.*

*In Past.
par. 1.
cap. 1.*

Plurimum deinde illi de sapientiæ opinione decedet. atque hinc auctoritas illi apud suos minor, minorque veneratio erit: nec rarò erubescet, cùm rogatus hallucinabitur, aut ab inferioribus errorem suum discet, non sine insigni ignorantiae suæ rubore.

Et quid vniuersim sperari ab eo boni possit, qui ignarus impositi sibi muneris

est? quomodo illud, nomenque suum tuebitur, aliis imperabit, dubitantibus consulat, labantes eriget, ægris medebitur, afflictos solabitur, prospiciet tempori, præcauebit damna, irruentibus se malis opponet, aut propulsabit noxia, cum ferè ab hoc nocitura potiùs metuenda, quàm profutura speranda sint? & si quid feliciter euenerit, fortuitis magis casibus, quàm certæ scientiæ tribuendum sit?

Iam quid expectare prudenter ab eo possumus? nihilo plus quàm ab imperito nauclero secundum cursum, ab ignaro auriga felicè ac inoffensum progressum, ab imperito medico valetudinè bonam, ab indocto architecto, penicillo, calamo, doctum, elegans, eruditum opus.

Et certè quicumque muneris sui scientia destituitur, etiam prudentia agenda-rum rerum regula destitui necessum est: qua qui caret, quantis necessariò se difficultatibus induat nemo non videt. vnde fit, vt nihil certo consilio ac ratione; omniaque dubio euentu peragantur. perimentia proinde sæpe pro salutaribus, noxia pro profuturis, venena pro medicamentis propinantur. & cum contraria ferè contrariis curentur, amica hîc amicis præbentur mala, tanquam si in fomentum,

tum, non in malorum depulsionem remedia porrigantur. Neque enim potest muneris sui ignarus, personarum, temporum, locorum, rerum, in omni prudenti gubernatione necessariarum rationē habere: sed de errore in errorem necesse est illum labi. Quo fit ut infortunatissimum ferè exitum sortiatur, cum tam fatuis merèque fortuitis consiliis agatur.

Remedia.

EX instituti accurata cognitione pendenda. hæc verò ex frequenti constitutionum, regularum, tam communium, quam singulorum officialium, ordinationum, instructionum, historiarumque instituti lectione paranda.

Iuuabit plurimum conferentiarum frequens de rebus instituti propriis iteratio: deque iis maximè, quæ aut nocitura in primis, aut profutura videbuntur: de praxi etiam & executione rerum ad Religionis integritatem potissimum necessariarum.

Proderit etiam frequenter cum iis agere, qui aut longa rerum experientia, aut assidua lectione instituti ut peritissimi, ita amantissimi sunt, illorumque sibi vi-

tam imitandam proponere qui in omni virtutum genere, instituti quæ ac primæui spiritus amore, omni ætate floruerunt.

Magis etiam si in dies singulos, aut sanè alternos, seponat horam vnā, aut sanè mediam: qua & singulorum subditorum sibi officia, conditiones, mores, propensiones, virtutes, vitia, animi quæ morbos & curationes, & impositi sibi muneris partes omnes, seriò secum tacitus perscrutetur: quid nimirum res, quid concreditæ sibi personæ deposcant. quibus tueri augeri quæ res domestica; quibus foueri prouocari quæ primæui Religionis spiritus; quibus pro instituti ratione promoueri proximorum salus possit. quorum omnium sedula ac non perfunctoria cogitatio, magnum Superiori lumem præbebit, ac in commissi sibi muneris cognitionem inducet.

CAPVT II.

*Ignoratio domesticarum rerum,
ac personarum.*

HInc ingentes agendarum rerum imprudentiæ nascuntur, & graues in gubernatione errores, quos nullo remedio corrigas, damna quæ non in vnā al-

terámue personam, sed in corpus vniuersum decurrentia; cum aut committuntur munia, quibus non possunt, aut res deliguntur noxiæ.

Neque quisquam prudenter præesse potest, aut præcauere nocitura, aut futura deligere, cui non domestica omnia personæque perspectæ fuerint: errores enim ex hac ignoratione necessum sequi grauissimos, cum prioribus dissentanea sæpe imperentur, aut sanè minùs commoda, aut mutuo pugnancia.

Ille securè procedit, nec facile poenitenda committit, quem nihil domesticarum rerum fugit, & non magno negotio deuitat mala, & prouidet nocituris, ac præoccupat etiam antequam veniant, quem nullæ domesticæ res latent; aut certè remedia illi prompta & ad manum sunt, qui & suorum in hanc aut illam partem propensas voluntates, vires, eruditionem, ingenia, mores, domesticaque res omnes perspectas habet. Neque enim ille de facili committet aut non committenda, aut quibus non tutò potuit: scit res personis, personas rebus metiri. contra qui hæc ignorauerit, in ingentia sæpe discrimina suos conijciet, nomenque bonum corporis totius: vt qui ad indignationes,

De vita
contēp.
lib. 2.
cap. 2.

De Sa-
cerdotio

æmulationes, potum, arrogantiam, carnem propenso eâ imponet, quæ quasi apprehensa manu trahunt ad illa, ad quæ natura non modò ducebat, sed reluctantes etiâ potenti trahebat impulsu, quasi si quis præcipitio proximum, & tantum non prolabentem protrudat. Bene de hac re Prosper: *Præpositi speculatores sunt, quia speculantur actus hominum, & qualiter quisque vivat diligenter explorant: quos bonos probaverint, honorando confirmant; quos deprehenderint vitiosos, arguentes.* & Chrysostomus: *Multa pastori opus est diligentia: sexcentis etiam, ut ita dicam, oculis, ut rectè undique humani animi habitum circumspicere possit.*

Certè vel minima etiam ignorasse gravium in gubernatione errorum causa est. ille prudenter præesse potest, quem nullæ domesticæ res latent. magnæ illæ aut parvæ sint, plurimum ad prudentem gubernationem conferunt: cùm minimæ etiam aliæ atque aliæ intercurrentes circumstantiæ, alia atque alia consilia deponcant; maximæque sæpe res, & à quibus plurimorum salus felicesque infelicesque exitus, à minimorū cognitione pendeant. Nihil ergo illum fugiat cui commissa aliorum gubernatio, si sapienter præesse velit. nec aliorum tantum industriæ verbisque.

solisq̃ue auribus suis fidat, oculos admo-
ueat certissimos rerum testes, ac propè fal-
li nescios. vnde fiet vt domesticos omnes
serios sedulosq̃ue concreditorum sibi offi-
ciorum administratores cōsequatur, cūm
scient sua omnia perspecta Superiori esse,
nec falli illius aut circumueniri diligentia
posse. Quæ res incredibile est quàm leui
negotio omnes in officio contineat. cūm
ita natura comparatum sit, vt nisi filialem
aliquem metum amoris in gubernando ad-
moueris, non magna de felici prudentiq̃;
gubernatione sperare possis. amari in im-
perio magnum est. Sed ferè indulgentia
amorem comitatur. iunge filialem timo-
rem, & prudētis imperij leges expleueris.
ac licet sua sit amoris veneratio, nisi altera
à timore veneratio accedat, non postre-
ma obsequendi promptitudo labascet,
plurimumq̃; de imperij felicitate decedet.

Personarum etiam ignoratio in imma-
nia præcipitia Superiorem adiget. quid e-
nim tutò ignoto committet? aut quam
rem prudenter illi credet, cuius vitam,
mores, animorum propensiones ignorat?
non ad singula propè imperia trepidabit
suorum ignarus, deq̃ue incerto dubioq̃ue
perpetuò euentu sollicitus? cui deinde fi-
det, cūm ignoto fidere stolidum sit, & ipse

suorum ignoratione laboret? solus exequi omnia non potest; ignotis sua Religionis, que sapienter credere non potest, externis domestica cōmittere non expedit: quò se vertet inter hæc constitutus Superior? nisi vt anxiam semper mentem trahat, aut fortuitis omnia euentibus committat. in vtroque miser. nam aut semper timere, aut omnia fortuitis permittere miserrimum & infelicissimum vitæ genus est, quod infortunato plurimùm exitu clauditur.

Remedia.

Vigilans Superiorum cura, & in omnē partem intentio, vt omnino nihil illum fugiat. Consequetur hoc magna & intenta suorum obseruatione, diligenti examine redditionis conscientia; aliorum etiam, maximè qui iudicio & solertia valent, auditione, sententiarumque inuestigatione: iudiciorum enim variorum disquisitio in magnam inducet Superiorem suorum cognitionem.

Conandum deinde, vt ea ferè per se Superior peragat, quæ magnam adferre notitiam solent; qualia sunt

Litterarum omnium, siue illæ mittantur, siue ad suos dentur, accurata lectio.

Omnium

Omnium qui ad portam euocant, cognitio, ne externorum quisquam, quantum frequentia, & loci ratio permittit, Superiore infcio, quinquam conueniat.

Ne ad vllius externi ædes, non confcio antè Superiore, quisquam accedat.

Ne extra consueta tempora ad templū euocentur inconfulto Superiore.

Credi non potest quàm ingenti rerum harum cognitio Superiori, in omnem benè gubernandæ familiæ rationem excubanti, præsidio sit. Non magna quis hæc arbitrabitur; sed ea tamen sunt, à quibus omnis prudens gubernatio depēdet, quibusque neglectis, propè impossibile est, prudentem gubernationem posse subsistere, quibusque stantibus, facilis omnis gubernatio est.

Idem reperies in omni republ. regno, militia; quorum salus in rerum personarumq; accurata cognitione vniuersa vertitur. quæ res semper coëgit summos Reges, & prudentia, & rerum gestarum gloria claros, ad largissimas etiam pecuniarum profusiones in hostium consiliis dignoscendis. At verò non minùs necessariam esse domesticorum subditorumque cognitionem, quàm externorum consiliorum, nemo non videt; cùm ab horum
igno-

ignoratione, aut perspecta scientia, plus etiam rei publ. bonum, quàm ab hostili dependeat. Vt enim semper periculosiora domestica mala, quàm externa sunt; domesticum ferrum & venena, quàm hostilia: ita cognitio illorum magis etiam necessaria est, minoreque damno inimica, quàm domestica consilia ignorantur.

Curabit deinde Superior, vt omnium sibi subditorum officialium, muniumque singulorum, accuratam cognitionem habeat. Obeat ipse sæpe domum, ac infirmorum etiam non rarò collustret operas, locaque muneribus illorum accommodata: temporarias etiam domus suæ rationes penitus perspectas habeat, vt nihil illum earum fugiat, datique acceptique rationes omnes ipse dispiciat ac memoriæ imprimat, vt & iudicium de iis ferre, & prospicere tempori possit.

Nemo facile credat, quantum intentus sic in omnem partem Superioris oculus & domesticos in officio contineat, & damna præcaueat, & profuturis prospiciat, ac Superiorem quasi iuris sui faciat, ac extra quandam suorum tutelam ponat.

CAPVT III.

*Ignoratio morborum subditorum
suorum.*

EX qua prouenit, vt aut malis adhibere remedia non possint, aut non adhibeant idonea, aut etiam contraria, plurimosque in variorum munium impositione, vltro, ignarique periculis obiciant vocationis & animarum. nam quæ remedia in morborum ignoratione sperari possint, nisi fortuita, ægros plurimum perimentia? profutura nimirum, aut interemptura, prout fortuito casus tulerit.

Proficiscitur hæc in Superiore ignoratio è suorum neglectu, & ignaua quadam commissorum sibi cura, ex ingenti animi tepore, ac languore spiritus, è pusillanimitate & animi deiectione, & è quodam muneris sui frigore; dum res nec seriò tractat, nec zelo in eas fertur, & superficie quadam contentus, non descendit ad interiora; quasi satis sit præfuisse.

Nascitur non rarò eadem ex non ritè reddita conscientiae ratione. fit hoc, cum minùs confidèter inferiores Superioribus sese aperiunt, vel quia duriores illos nacti sunt,

sunt, vel quia minùs secretos, vel quia laborum fugientes, & à quibus auxilia desperent.

Neque vltima ignorationis huius causa è varia Superiorum occupatione nascitur; vt cùm adeò grauibus, tamque variis distinentur, vt totos illos alia negotia occupent: quibus obruti, nec respirandi tempus habent, nec eis ratio suorum cognitioni incumbendi suppetit; cùm nimirum vel ordinariis concionibus vacant, vel toti scriptionibus inhærent vel externorum salutis, consiliisque dandis obruuntur, vel in ualitudine denique perpetua detinentur: quæ nisi in viros perpetuò sibi præsentis, quique oculos inter medias negotiorum aliarumque occupationum moles, in domesticos sibi que concreditos, intentos semper teneant, inciderint; periculum omnino est, ne densissima suorum ignoratione laborent.

Et quam curationem morbis suorum adhibebunt tales, quibus ipsa ægritudo, ægritudinumque causæ in solidum ignoratæ sunt? pericula, damnaque, & valida morborum incrementa veriùs metuenda sunt, quàm noxiorum à talibus mitigationes aut depulsiones sperandæ. Neque enim quicquam ignoratione morbi grauius,

uius, magisquæ meritò metuendum in curatione accidere potest, neque quod præsentius mortem acceleret.

Remedia.

VT in medico inualetudinem cognouisse propè curasse; ita ignorasse, ægrum propè peremisse est. Prima proinde omnis periti medici cura est, morbum, causas, incrementa, statum intellexisse: è quibus medicationis spem non magno negotio concipiat, periculaquæ depellat. neque sanè longè petenda remedia: quæ ferè cuique experto ad manum sunt. Mali cognitio difficillima est. Hanc qui consecutus fuerit, facilem sibi ad reliqua viam sternet. Idem vsu venire solet in animorū morbis, cognouisse propè curasse est, imò sola non rarò explicatione fugatur morbi, vt verè Cassian. *Illico vt patefacta fuerit cognitatio maligna, marcescit.* Nec difficile est Superiori virò humanarum rerum experto, cognita depellere, aut anteuertere quæ nouit mala: vt tota ferè curationis spes metusquæ à morbi cognitione aut ignorantione pendeat.

Hanc cognitionem partim seria longa-
que obseruatione suorum, partim aliorū
denuntiationibus, partim ægri confessio-

ne discet Superior: nam & ipse intentum in omnem partem oculum habebit, mores, verba, socios, consuetudinem, propensionesque obseruabit, maximè recreationum tempore, videbitque in quæ se profundat, quorum familiaritate ac narrationibus delectetur. proniorène in cibum, potum, continentiam, mulierum consuetudinem, sæculi an religiosos mores, in fabulas aut serias piasue sermocinationes. Ferè enim in illis in latentia peccatoribus vitia se ac virtutes produnt. index animi oratio est.

E fociis deinde maturioribus facile reliquorum mores intelliget. neque enim in adeò mutuè innexo contubernio, latere diu bona malaque possunt: cum omnium plerumque oculis auribusque intima quæque obiiciantur. ad quæ si accedat ægri ipsius sincera, tamquàm patri ac medico resectio, nulla difficultate, cui-cunque etiam grauissimo occurri malo potest.

Prima proinde Superioris cura erit, suos paternis monitis factisque, ad malorum tempestatumque quibus premuntur ac iactantur nudas explicationes excitare: vt & aperire audeant, & patris verique ac condolentis medici manum experiantur.

tur. Semel enim amicam dexteram, maternaque in Superiore vbera experti, faciles proutque ad omnem ægritudinis confessionem decurrent. quod ubi Superior consecutus fuerit, ludus illi gubernatio erit: ingens enim ex hac mutua fiducia ostentatione amor nascitur. cum vix fieri possit, ut qui paternum in se Superioris animum senserit, non prout profusoque in ipsum pectore feratur. neque quidquam promptius est, quam ad illius medici opem confugere, à cuius benigna doctaque manu remedia accepimus. Patrem proinde se & medicum exhibeat Superior, & ultro fatentem, malaque sua ingenti fiducia explicantem inferiorem experietur, & facilem ad curationem viam reperiet: cum & obsequentem ægrum suum habebit, & mali vim magnitudinemque intelliget. Paterna proinde in omnes adhibenda sollicitudo, quam etiam subiti persentiscant, quo facilius morborum quibus iactantur genera, in Superioris, tanquam patris, ac benignissimæ matris ac medici, sinum deponant.

Maiores autem in Superioribus paternorum affectuum ostentatio, si in eos fuerit, qui fidentiùs se suaque omnia, ægritudinumque genera aperuerint, occasionem

causamque sinceræ refectionis reliquis præbebit.

Examinanda etiam seriò constitutio inferiorum, quales antè fuerint, quales in præsentiarum sint, quos morbos aliquando passi, quæ medicamenta adhibita, quo successu.

Secreti demum infracta observatio, omnium eorum, quæ filiali à subditis affectu, apud Superiorem tanquam verum animarum parentem reposita sunt, plurimum hîc valebit. Dici non potest, quantum hæc res confidentiam excitet, prouocetque inferiores, ad vniuersos, quibus iactantur, morbos, cum quadam etiam animi voluptate retegendos.

CAPVT IV.

Ignoratio spiritualiter medendi.

EX qua quàm ingentia & meritò timenda mala proficiscantur, nemo paullo prudentior non videat. Nam quauis magna pars speratæ valetudinis à morborum cognitione pendeat; curationis tamen ignoratio, medicamentorumque inscitia, inter prima ægrum perimentia adnumeranda sunt. qua qui tenetur, non rarò nocitura propinabit, exasperabit malum,

lum, irritabit non tollet noxios humores, interitumque accelerabit.

Atque hinc mœrores nascuntur, & graues in ægro melâcholiæ, cùm sentit malis quibus opprimitur, non remedia, sed malignitatem prouocantia adhiberi. quare imperitiam medici sui damnat, malaque ex illa nata: inclementesque illius manus, & medendi ignaras detestatur. nam licet fors ab animo clementis medici & patris profiscantur, si ab imperito & mederi nescio veniant, à tyranni potius & iudicis quàm patris prouenire arbitrabitur. vnde fastidia nascuntur, & nauseantis animæ infelix tepor, gemitus & lacrymæ, & dura imo ducta suspiria, oblocutionumque passim ac querimoniarum ingentes acervi, medicum suum accusantes, nec tam inscitiam in illo, quàm hostilem animum damnantes.


Quid? quòd crescant in egro mala, cùm ex vno plurimùm errore enascantur alij, morbi que è morbo, tamquam è fœcunda fontis vnius vena varij torrētes, prosiliāt: vt consultius sit ægritudinem vniuersam ignauo aut hostili etiam animo neglectā iacuisse, quàm ignaram medendi manum admouisse: minusque peccet qui exuto omni patris affectu, seueri vbique iudicis

dexteram, ferrumque & ignem adhibet, quã qui medicationis imperitus fortuita, & in incertum casura, aut obfutura ad-mouet. Contingit enim non infrequenter vt imperitia medici, leuissimus morbus & paruo medicabilis, ad malorum extrema ægrum deducat:& qui sibi, naturęque benignitati relictus, sola nonnunquam mora curari poterat, inscitia medici in vltimam desperationem protrudatur. tantum in omnem partem peritia imperitia-que valent; vt mors vitaque in prudentis imprudentisue medici manu posita sit. Quanti viueret si in doctum medendi incidissent? quanti in Religione omni æuo stetissent, si medendi peritum Superiorem nacti fuissent? ceciderunt, non tam mali magnitudine, quàm indocta illius manu. Quanti in ipsa miseram sibi que aliisque vitam trahunt, nec mentis tantum, sed & corporis viribus prostrati iacent, in gloria morte ingloriam vitam signantes, sola imprudenti Superioris medicatione, omni spe melioris valetudinis deiecti: ita in corpus etiam animo medendi imperitia transit. cùm illius ferè mala in corporum se ægritudines profundant, & hæ ex illis, tanquam è matris utero nascantur. Hinc non rarò videmus in omnem vitam, len-
tam

tam plurimos animam, in corpore mille morbis oppresso, trahentes: quos vna Superioris medendi peritia leui attactu, sub morborum initium, curare poterat. accessit imperita manus, & efferauit malum, & euertit quidquid erat spei valetudinis bonæ, & ad nulla ætate aut arte medicanda ægrum suum deduxit. Nam licet peritior postmodum accedat manus, eò tamen non infrequenter malum deductum est, vnde ad meliora reuocari nulla prudentia aut dexteritate possit. principes nimirum partes insedit malum, & potissima quæque depastus est morbus, vt à nulla quantumuis docta manu sperari prudenter remedia possint.

Remedia.

E Serio diligentique meditationum studio, piorumq; librorum frequentata lectione, vsuque rerum experientiaque peritia paranda. Optimus ferè ille est, qui ex se magister plurima tulit, de genu non semel pugnavit, hostemque post liuores, vulnera, sanguinem, toto tulit corpore, ab arena & sanguine animos mutatus: qui que exemplo suo didicit non eadem omnibus pugnarum & victoriæ genera præscribenda esse: alia enim at-



que alia pro varia hominum conditione documenta tradenda sunt. faciet hoc peritissimè, qui ex se didicit curationum genera ex morborum diuersitate pensanda sed & pro ratione constitutionū, ac temporum etiam discrimine aliarumque circumstantiarum, medicamentorum genera adhibenda. Neque enim eadem omni tempore, & loco, omni que ætati, & constitutionibus, aut omnibus singulisque omnia conueniunt. Iam varia morborum qualitas varia etiam curationum genera postulat; cū è variis circumstantiis medendi ratio pendeat, illæ autem innumerae propè sint. Necessum proinde Superiorem virum esse prudentem, prouidum, singula circumspectantem, disquirentem ægritudinum causas, morbum ipsum, ægri constitutionem, quæ etiam in eo sperari, quæ timeri possint. Prudenter in hanc sententiam post Nazianzenum Gregorius: *Non una eademque exhortatio cunctis congruit, quia non cunctos par morum qualitas astringit. Sape namque alijs officiunt, quæ alijs prosunt: quia & plerumque herba quæ hac animalia enutriunt, alia occidunt; & lenis sibilus equos mitigat, catulos instigat; & medicamentum quod hunc morbum imminuit, alteri vires iungit; & panis qui vitam fortium*

*In proleg. Passt.
par. 3.*

robo-

roborat, paruulorum necat. Vt meritò incla-
met: Ars est artium regimen pastorale. quis au-
tem cogitationū vulnera occultiora esse nesciat
vulneribus viscerum? & tamen saepe qui nun-
quam spiritualia praecepta cognouerunt, cordis
se medicos profiteri non metuunt: dum qui pig-
mentorum vim nesciunt, videri medici carnis
erubescunt.

In Pa-
stor.
par. I.
cap. I.

Quid? quòd & ipse, in quo versatur, lo-
 cus, domesticiq̃ue, & contubernales ali-
 quid adferant momenti iustæq̃ue consi-
 derationis, vt omnia omnino Superioribus
 in remediorum applicationibus accuratè
 expendenda, nihilq̃ue indiscussum relin-
 quendum sit: & sæpe à tenuissimis rebus
 remedia petenda sunt. à locorum enim,
 sociorum, Superioris, muneris mutatio-
 ne, aliisq̃ue longè his inferioribus, magna
 aliquando sperari possunt. plurimum ve-
 rò interest, temporis rationem habere,
 constitutionisq̃; ægriantis animi; ne tur-
 bata, nec satis composita mente, aut et-
 iamnum exasperata, curatio admovea-
 tur. Componet illius priùs animum Su-
 perior, furoresq̃ue primos, efferatasq̃ue
 procurssiones vt ignarus præteriet: at vbi
 depulsis Aquilonibus resederint animo
 fluctus, quibus iactabatur, manum admo-
 uebit paternam, licet iudicis postea opus

foret; in qua tamen nunquam patris personam exuet: vt dum ager patitur iudicem, sentiat patrem; plusque adeò semper medicamenta habeant patris, quàm iudicis, etiam cùm iudicis nomen induendum erit.

Hom. 5.
ad pop.
Ant.

Proderit etiam in primis magnos viros audisse, aut legisse, qui suo, aut aliorum exemplo edocti, varia vt morborum, ita curationũ genera norunt. Habemus híc monentem Chrysostomum: *Contraria contrarijs curare medicorum filij iubent. ex crapula ergo nata est febris? inedia morbum corrigunt. ex tristitia quis infirmus est? letitiam huic aptam medicinam esse ducunt. Sic & in anima agritudinibus fieri oportet. Iram torpor excitauit? industria hanc repellamus. Habemus Gregorium: *Celestis medicus singulis quibusque vitiis obuiantia adhibet medicamenta. Nam sicut arte medicina, calida frigidis, frigida calidis curantur: ita Deus noster contraria opposuit medicamenta peccatis, vt lubricis continentiam; tenacibus largitatem; iracundis mansuetudinem; elatis preciperet humilitatem.**

Homil.
32. in
Euang.

Frequens deinde ac diligens per diem consideratio plurimum momenti adferet. qua dum commissum sibi gregem serio Superior voluit, variaque in singulis mor-

mor-

morborum genera, varias etiam medelarum excogitat formas, nullis aut industriis aut laboribus parcit, quò ægrienti subueniat, morbum leuet, monitis, precibus, lacrymis; durioribus etiam, si morbi genus duriora postulat: ad quæ tamen nonnisi mitioribus tentatis, & necessitate coactus descendat, memor se esse patrẽ.

Animos insuper ad curationem necessum adferre magnos, qui nec magnitudine, nec morborum difficultate terreantur: vt ingenti in Deum spe fretus, nusquam de ægroto desperet Superior. frustra enim medicinam cogitat, qui illam à desperatione inchoauit. Audere, victoriæ initium est.

In spiritalis denique medicamenti præscriptione conandum, vt quà suauitate ac benignitate, quà variis in affectum amoremque prouocantibus æger medico concilietur, amareque incipiat, fidemque dictis adhibere. Sic fiet, vt morbi magnitudinem indicanti fidem adhibeat, & medicamenta, licet acerbiora, lubens admittat; maximè cùm sibi persuaferit, ab amore hæc nata.

CAPVT V.

Neglectus in curandis suorum morbis.

NAscitur hic ex ignauo quodam Superiorum tepore, dum aut promouendi instituti, aut propagandæ Dei gloriæ, aut salutis ac perfectionis subditorum zelo carent.

Ex emendationis quadam desperatione, dum aut robori suo diffidunt, aut de suorum virtute desperant, aut difficultatibus territi, manum curationibus admo-
uere formidant: qua benignitatis specie nihil crudelius inueniri potest. augentur enim & recrudescunt per interualla morbi, & extremis periculis proximus est qui
Prou. 19. patitur. bene Sapiens: *Erudi filium tuum, ne*
Pro. 29. *desperes.* & alibi: *Correctio tribuit sapientiam.*

Quòd remedia in omnibus molliora, & extremam tantum cutem tangentia ad-
moueant, nusquam verò ad malorum radices manum mittant, contenti palliata quadam medicatione, imitantes eos qui exteriori stibio & purpurissa intus latentem foeditatem contegunt, quique candido linteo., nulla alia medicatione obuoluunt vlcera, non cogitantes eruptura illa aliquando maiori damno, aut
vici;

vicina quæque ac intima demum corporis pestilenti sanie sua in similem malignitatem pellectura.

Hinc fit primò, vt inferiores dum non persentiscunt mala, quibus in dies magis magisque immerguntur, labantur in deterius, & antè lapsum, quàm periculum aut præcipitium sentiant, sera post ruinam medicatione.

Secundò, vt persuadeant etiam sibi inferiores, bene secum agi, & regia se incedere via, cùm videant nulla Superiorum accedere monita, communi illa persuasione ducti, qua plerique arbitrâtur eâ à Superioribus probari, quæ non improbantur; nec morbos iam esse, quibus nulla medicamenta admota, sed signa aut vestigia valetudinis bonæ.

Et non iam patres, sed hostes tales esse, nemo non videat, qui cogitauerit ex hoc Superiorum neglectu, quæ priùs leui medicationis attractu curari poterant, ita incrementum mala, vt ferro & ignibus postmodum opus sit; & qui initio sui sine dolore, ac quasi inter somni delicias curari morbi poterant, mora ipsa exasperatos, omnem paternam manum magnitudine sua vincentes, non nisi iudicis vstione & sectione medicari posse. Hinc illi inter
dura

dura hæc medicamenta, eiulatus & lacrymæ, Superiorum suorum neglectum, barbaramque in nimia clementia indulgentiâ accusantes. Sanè tales plurimis exitio fuere, & desertæ auctores vocationis; neque enim ad extrema hæc malorum venissent, si vigili cura morborum principijs serio Superiores inuigilassent, & in semine suo, aut tenero adhuc frutice, paternis zizania manibus ab agro Dominico auertissent: at ubi incuria excrescere illa in validas arbores passi sunt, non nisi à securibus & flamma remedia speranda sunt.

Atque hinc magnorum sæpe ingeniorum, non sine ingenti Religionis damno, excidia nata sunt: quæ quo maiora sunt, eo ferè validiùs admittunt noxia, imbibuntque altiùs & potentiùs; credas in fœcundum solum semina iacta fœneraria redhibitione. quibus si manum admoveris, dum adhuc herbescunt zizania, semenque bonum pro maligno inseueris; nullo negotio & illa viceris, & centupla fœneratione Domini aream horreaque beabis.

Et mihi ferè hi Superiores similes videntur iis qui oceani tēpestates, dum adhuc minantur, & eminus fluctus denuntiant, contemnunt, nec antè de portu fugaque cogitant quàm ubi irata intumuisse maria,

ria, irasque fremitusque suos vomentia
 fenserint; cum hinc tanquam sideribus col-
 lifuri iaculantur & excutiunt, ibi immani
 hiatu vado tanquam sepulcro recondi-
 turi præcipitant ratem; scopulis nimirum
 illisi, de salute & fuga meditantur, tabulam
 circumspectantes, dum frustra iam por-
 tum littoraque neglecta sperant. antè
 oportuit, neglexerunt: rationem redditu-
 ri Domino commissi sibi gregis, animas-
 que pro animabus suorum posituri, seue-
 rissima aliquando Iudicis sententia ferien-
 di. ita monet Prosper: *Superior sanctè vivere* *De vita*
debet propter exemplum: certus quòd ei nihil *còtemp.*
sua iustitia suffragetur, de cuius manu anima *lib. 1.*
pereuntis exigitur. & quid ei proderit, non pu- *c. 10.*
niri suo, qui puniendus est alieno peccato?

Remedia.

A Seria Superioris in omnem partem
 intenti vigilantia petenda sunt; nul-
 li parcendo, quàm monendo, quàm blandè
 suauiterque vulneris morborumque loca
 pertractando, leniendo, fouendo: grauio-
 ra & acriora, si qua necessitas exigit, me-
 dicamenta adhibendo; nusquam malis in-
 dormiendo, aut tenuitatem vulneris neg-
 ligendo: certus à minimis initijs ad sum-
 ma

Bern.
in ser-
mone de
S. Ioan.
Baptist.

Lib. 3.
de vita
cōtemp.
c. 23.

De Ci-
uit. lib.
1. c. 9.

ma deueniri, & à tenuissimis vnguis frictu
ad mortem properari. *Nemo vitia palpet, pec-
cata dissimulet nemo. nemo dicat, Nunquid cu-
stos fratris mei ego sum? est enim consentire. si-
lere cum arguere possis: & scimus quia similis
pœna facientes maneat & consentientes.* Bene

*Prosper: Si peccantem video, & non solum non
arguo, sed etiam ei peccanti consentio, participē
me eius damnationis efficio: & in omnibus pec-
cantibus pecco, quando eos quos scio peccasse vel
peccare, quadam crudelis animi malignitate non
increpo. In Superiore maxime hoc locum
habet, qui non solius caritatis, sed iustitiæ
legibus ad suorum monitionem & corre-
ctionem tenetur. quo grauiorem etiam
vindictam Domini manum vereri merito
debet. Hinc illud Augustini: Quia in re non
utiq; parem, sed longè grauiorem habent caus-
sam, quibus per Prophetam dicitur: Ille quidem
in peccato suo morietur, sanguinem autem eius
de manu speculatoris requiram. Ad hoc enim
speculatores, hoc est populorum prepositi, consti-
tuti sunt in Ecclesiis, ut non parcant obiurgando
peccata.*

Illud interim in curationibus caueat,
ne à potentioribus illas ordiatur, cum à le-
nioribus remediatio inchoanda sit. quòd
si quando, ut in obduratis morbis euenire
solet, ad grauiora remedia decurrendum
fuerit,

fuerit, meminerit illud Augustini: *Molestus est medicus furenti phrenetico. & pater indis-* *Ad Bo-*
nifac.
plinato filio; ille ligando, iste cadendo, sed ambo
diligendo. Si autem istos negligant, & perire
permittant: ista potius falsa mansuetudo crude-
lis est. & Gregorij: *Qui non corrigit resecanda,* *In regi-*
stra.
committit: & facientis culpam habet qui quod
poteſt corrigere, negligit emendare. Sanè si pa-
 trem in omni suorum correptione Supe-
 rior se ostenderit, non grauàtè de manu
 patris etiam vſtiones perferet filius, certus
 à paterna manu ignes ab amore nasci. ad
 quos non nisi in extremis, & post mitissi-
 ma tentata decurret. vbi viderit mali ma-
 gnitudinem minora vincere, descendet
 inuitus ad maiora: descendet tamen. cùm
 melius sit per hæc filium viuere quàm sine
 his perire.

Pari deinde cum subdito conatu radi-
 cibus extirpandis manum admoueat, pa-
 ternè tamen semper, nec nisi in extremis
 malis iudicis personam induat. certè, *si non* *Prosp.*
ſup. c.
23.
ex iactantia, sed ex misericordia, & cum qua-
dam pietate compatiens animi caſtigamus, &
illi nos ſentiant non minùs peccatis ſuis moueri,
quàm noſtris; aut in bonum ſtatum reformati,
nobiſcum Deo gratias agent; aut ſi adhuc eos in
peccato tenet peccandi dūlcedo, & ſalutem ſuam
nobiſcura eſſe cernentes, malum reddere pro bo-

nus decet Superiorem laboribus succumbere: etiam de genu pro filio pugnabit, si pater est; corpusque vitamque pro filij salute obiciet. nam sudorem lacrymasque spargere, vulgare est: sanguinem proinde lubens profundet, si qua necessitas occupauerit, quando nimirum in illum locum deductam rem viderit, ut aut pereundum filio, aut sanguis parenti fundendus sit: eoque magis, quo periclitantis de salute filij sollicitudo omni meritò patri vitâ carior esse debet. ab hac enim temporaria, & non multò post peritura, à filij spiritali vita, aut morte, æterna pendent.

Quòd si oculos Superior ad se reflexerit, morbosque, quibus aliquando iactus, aut iactari etiamnum posset, vota que sua, quibus illis leuari calidè exoptauit, maximè malis sæuiantibus, & extrema minitantibus, medicamenta que ad quæ non frigidè respexit; faciliè poterit, exemplo suo doctus, ingenti non tantùm commiseratione, omni indignatione seposita, sed & prompto alacriq; animo benignam facilemque curationi manum admouere; memor votorum suorum, regulaque illa communi ductus, qua monemur ea & sollicitudine, & amoris ac benignitatis ostentatione, curam ægrientium habere,

C

qua

qua similibus malis pressi, nostri ab aliis haberi volumus.

Iuuabit etiam illa cogitatio, quòd nihil stolidius omnium iudicio reperiatur, quàm cum medicus, paterque ægroto indignatur filio, & pro medicamento asperiora propinat verba. Quis enim nõ arbitretur, non patrium hoc, sed barbarum esse peccatum, quod in mediis febrium ardoribus, malisque præcordia exedentibus, pro consolatione & medela, exardescit in ægrum filium? quasi non expleat feritatem illius morbi sæuitia, nec satis indignationi suæ litatum sit, nisi morbi asperitatem asperioribus etiam verbis augeat. Idem accidit Superioribus, qui interna febri iactato filio minas & indignantiâ verba pro medicamento propinant: quò enim hæc spectant, nisi vt crescat morbus, & præcipitio proximum filium vltro impellat pater, qui eripere poterat?

Et Superiorum hæc in suorum morbis indignatio, nihil est aliud, quàm ingens mali exasperatio: nam ferè ad extrema ex hac profiliunt; & quod leui attactu, mollihusque frictionibus curari malum poterat, ignibus & securibus tentatur.

Accedit, impatientiam animum conturbare, prospectumque salutarium medi-

dicamentorum auferre; obuia proinde, ac fortuitò oblata arripiuntur, nocitura plurimùm magis quàm profutura; consequiturque non rarò medendi salutisquæ quædam desperatio, & ex hac totius curationis neglectus. Hinc est illud Sapientis: *Impatiens operabitur stultitiam. Et, Qui patiens est multa gubernatur prudentia; qui autem impatiens est, exaltat stultitiam suam.* Et, *Vir iracundus prouocat rixas, qui autem patiens est mitigat fuscitatas.*

Prou. 33

Pro. 14.

Prou. 15

Sequuntur inde graues in inferioribus animorum à Superioribus alienationes, indignationes, oblocutiones, detractiões, animus ad imperata inuoluntarius, ad spiritalia nauseabundus, torporque spiritus totius, mœrores denique ac melancholiæ graues, ad certum interitum ducentes.

Ingens denique diffidentia nascitur, & cùm de parentis affectu desperent, iudicisque auersentur, antè immoriantur malis, quàm vt ea indignabundo iudici, imprudenti medico, inclementi patri aperiant: *neque enim audent ei necessitatem suam aperire*, nisi in vltima desperatione, cùm omnem manum medicam malum superat, cùm nihil iam superest, præter mortem certam miserrimamque.

Bonan.

de 6. alia

cap. 5.

Audiant verò duriores hi Superiores in
 fuorum malis, grauter querentem Do-
 minū: *Quod infirmum fuit non consolidastis,*
quod agrotum non sanastis, quod confractū est
non alligastis, quod abiectum est non reduxistis,
quod perierat non quasistis: sed cum austeritate
imperabatis eis, & cum potentia. Audiant mo-
 nentem: *Porta illos in sinu tuo, sicut portare*
solet nutrix infantulum. Audiant etiam D.
 Bernardum: *Vt quid grauatis iugum vestrum*
super ceruices discipulorum, quorum vos potius
iugum portare debetis? ponite onera, producite
vbera, pectora lacte pinguescant. Et cū sit
 propriū officium pastoris docere virtutes, si vi-
 tiosos negligit, quos docebit? si medicus fugit
 agrotos, quos curabit? si fortis tiro declinat im-
 petentes se, quomodo assequetur triumphum
 gloria? si negotiator negligit merces in quibus
 magna lucretur, quomodo poterit ditari?

Remedia.

GLoriæ consideratio, quam è filij ere-
 ptione Superior apud Deum homi-
 nelque sperare potest ac debet.

Obligationis, qua inferiori, tanquam
 filio parens, obstringitur, cuius cura illi à
 Domino demandata, cuiusque animam
 à Superiore seuerè Deus exigit.

Vti-

Vtilitatis, laborantis filij, & corporis vniuersi ex illius curatione, sperata.

Gratitudinis consideratio, perpetua-
que periculis crepti grata memoria &
recordatio.

Quòd si ad se oculos Superior reflexe-
rit, ad morbos, delictaque sua; perfacile
ei erit, indignationem ponere, impatien-
tiam exuere, clementiam & longanimi-
tatem induere. si enim iusta aliqui di-
gnaque in illum indignatione vsus fuisset
Deus, quoties grauior aliqua offensio in-
tercessit, in quibus non iam ignibus arde-
ret? Utatur proinde in delictis morbisq;
suorum ea moderatione, patientia, beni-
gnitate, quam à parente & iudice Deo
suo expectat: memor elegantis in hac re
sententiæ Augustini: *Bonitas facit amabi-*
lem disciplinam, & disciplina efficit inculpa-
bilem bonitatem. bonitas sine disciplina deli-
etorum mater est: & disciplina sine bonitate
tristis quedam amaritudo viuendi. scientiam
autem sibi postulat Dauid, ut nouerit sapienter
distinguere qui sint termini bonitatis, & quam
debeat habere disciplina mensuram: ne fortè aut
nimia remissionis vitio bonitas inconsulta fæ-
detur, aut disciplina durior ipsa sui austeritate
crudelescat. Memor etiam illius Sapientis:
Vir iracundus prouocat rixas, & qui ad indi-

Hom. 4.
inter 50

Pro. 19.

gnandum facilis est, erit ad peccandum procli-
 uior. Quare modestè, maturè & benignè ad
 Bon. de singula respondeat, & impetum feruoris reprimat,
 6. alis. ne in voce aut vultu, seu moribus impa-
 cap. 5. tientiam ostendat. tunc enim magis proficit per-
 patientiam, & tandem deuincit, quos impetuo-
 Pro. 15. sè agendo prouocaret. teste Sapiente (Responsio
 mollis frangit iram, sermo durus suscitatur furorem.)
 vix enim commotio commotione sedatur. Impatientsia enim
 Prælati & Superioris confundit quæ promouere poterat bona.

CAPVT VII.

Acerbior correctio.

Moral. **D**ui Gregorij Magni verba sunt: Qui
 lib. 20. præest, ea se circa subditos mensura moderetur:
 cap. 3. quatenus & arridens timeri debeat, & iratus amari;
 ut eum nec nimia latitiae vilem reddat, nec immoderata
 seueritas odiosum. saepe enim subiectos frangimus,
 dum plus iusto vigorem iustitiae tenemus: qui profectò
 vigor iam iustitiae non erit, si se sub iusto modera-
 mine non custodit. ut benè Iuo: Immoderatus
 Epi. 81. rigor disciplina quos corripit non corrigit, sed
 in laqueum diaboli precipitanter impellit. qui
 si frequentetur, obdurescit subditorum animus,
 callumq; seuerioribus factis monitisque obducit: in consuetudinem dein-
 de

de ac tanquam in naturam acrimonia vertitur, totusque homo denso quasi sopore aut nebula inuoluitur, ut nec profutura quidem videat.

Speratus deinde fructus omnis perit, dum subditi sibi persuadent, ex indignatione quadam animi, perturbatione, alienatione, aut adnato quopiam aut accersito odio monita nasci potius, quam ex commiseratis, aut patris, aut benigni medici affectu, aut emendationis aut perfectionis studio.

Exurgit deinde melioris spei, aut rei, aut amoris loco, exacerbatio, & à Superioribus vehementior alienatio, querimoniis, oblocutionibus, ac non raro etiã detractionibus permista.

Vilescit denique Superior apud suos; plurimumque illi de nominis æstimatione decedit, non apud suos tantum sed & apud alios. neque enim imperiosior fauiorque illa ratio domesticis limitibus continetur; decurrit per regna, nec raro ad externos. quæ res non leuiter propagationi diuinæ gloriæ, religionis, ac proximorum salutis impedimento est. Semel enim cõcepta de Superiore opinio ubi inualuit, excindi vix potest; ut iam non nisi cum muneris abdicatione deponi possit.

Et quid à tali Superiore sperari potest, omnium ab illo suorum animis alienatis? Sanè coacta imperia diu stare non possunt, minùs etiam incrementa sumere. illa ætatem sentiunt, diuiteque crescunt augmento, quæ amore ac beneuolentia continentur.

Et in coactis, seruorum ac mancipiorum more, imperantis oculo deseruiunt; mens imperia auersabitur: ac si clàm esse res possunt, negliguntur: sin sæuiora imperia cogant, cum fastidio peraguntur, & tanquam de superficie imperata raduntur, nec vltra extremam præceptorum cutem itur.

Accedit, pudore posito, effrons iam animus, cuius teneram frontem acrior correctio indurauit, & depudere docuit, verecundia omni exuta; nec vltra, publicè an palàm increpes, colorem mutabit; stabit interritus, saxo quàm homini similior; & ferè seipsum in duritiem animat; credes cataphractus; & armis vndique cinctum: ita aduersus acriora imperia firmavit pectus. incudem arbitreris, malleis densè subactam, & repercutientem verbera, adeoque & verbere duriores, quasi ab illo robur mutuatur.

Et grauis in Superiore error est, ab vstulan-

lantibus medicationem inchoare. à mitioribus curatio instituenda est, nec ad illa veniendum, nisi vis mali molliora respuat: ac tum etiam cautè & prudenter ad ignes aut nouaculam eundum: vt sentiat æger, non voluntate medici, sed mali necessitate ad illa trahi. conandumque quantum fieri potest, vt ipse æger non illibenter acriora patiatur; non quòd hæc amet, sed quòd salutem, quam videt sine his non posse parari, desideret. quod vbi Superior tanquam medicus persuaserit, non magno negotio vltro incurret in duriora, ferrumque & ignes si non amabit, feret tamen salutem consequendæ.

Verùm magna opus dexteritate & efficacia, potenti que persuasione; ac nisi patris senserit manum, non domini, aut sæuientis iudicis, nequidquam sudabitur. quòd si verum parentem senserit, inducet filij affectum, nec quidquã illi iam atrox, quod à veri patris sibi venire persuaserit dextra; ac plus etiam ab amica huius manu amabit verbera, quàm acriora à iudice verba, aut ab amarulento vultu indignantia monita, imò quàm ab indignabundo ore e mentita oscula.

Vnde in omni correctione primò se amare, patrem esse, nec aliud quàm filij

salutem velle, inuitum deinde ad duriora venire ostendat: excitetq; in subdito filialem affectū, & confidentiæ magnæ fortes imprimat aculeos: operā suam spondeat, commisereatur laboranti: quòd si lacrymas ille profuderit; misceat, si potest, suas: ac quasi consilium petens, roget, quod ægro in tanto malo remedium, occurrat: addat deinde aliquid de suo: ac si maiora ille proponat, moderetur & mitiget, & non magno labore rem omnem ad felicem exitum deducet. Bene in hanc sen-

*In c. 6.
epist. ad
Galat.*

Nunquam alieni peccati obiurgandi suscipiendum est negotium, nisi cum internis interrogationibus examinantes nostram conscientiam, liquido nobis coram Deo responderimus, dilectione nos facere. quidquid enim lacerato animo dixeris, punientis est impetus, non charitas corrigentis. Dilige & dic quod voles. nullo modo maledictum erit, quod specie maledicti sonuerit, si memineris senserisq; te in gladio verbi Dei liberatorem hominis esse velle ab obsidione vitiorum. & alibi: Pie cauteq; vigilandum est, ut cum aliquem reprehendere vel obiurgare nos necessitas coegerit, primum cogitemus, utrum tale sit vitium, quod nunquā habuimus, vel quo iam caremus. si nunquam habuimus, cogitemus & nos esse homines, & habere potuisse: si verò habuimus, & non habe-

*De
serm.
Dom. in
monte.*

habemus, tangat memoriam communis fragilitas, ut illam reprehensionem aut obiurgationem, non odium sed misericordia pracedat: si autem cogitantes nosmetipsos inuenerimus in eo esse vitio, in quo est ille, quem reprehendere parabamus; non reprehendamus, neque obiurgemus, sed tamen congemiscamus, & non illum ad obtemperandum nobis, sed ad pariter cauendum inuitemus.

Remedia.

MOnemur à Magno Gregorio: *Sunt* Moral. lib. 13. cap. 12.
nonnulli ita districti, ut omnem etiam mansuetudinem benignitatis amittant: & sunt nonnulli ita mansueti, ut perdant districti iura regiminis. unde cunctis rectoribus utraque summopere sunt tenenda, ut nec in disciplina vigore benignitatem mansuetudinis, nec rursum in mansuetudine districtiorem deserant disciplina: quatenus nec à compassione pietatis obdurescant, cum contumaces corrigunt; nec disciplina vigorem molliant, cum infirmorum animos consolantur. regat ergo disciplina vigor mansuetudinem, & mansuetudo ornet vigorem, & sic alterum commendetur ex altero, ut nec vigor sit rigidus, nec mansuetudo dissoluta. & alibi: Neceſse est ut quisquis sanandis Pastor. par. 2. c. 6.
vulneribus praeſt, in vino (Samaritani exem-
plo)

plo) morsum doloris adhibeat, in oleo mollitiem
 pictatis: quatenus per vinum mudentur putri-
 da, per oleum foueantur sananda. Miscenda er-
 go est lenitas cum seueritate, faciendum quod-
 dam temperamentum ex utroque, ut neque
 multa asperitate exulcerentur subditi, neque
 nimia benignitate soluantur. sit itaque amor,
 sed non emolliens: sit rigor, sed non exasperans:
 sit zelus, sed non immoderatè sauiens: sit pietas,
 sed non plus quàm expediat parcens: ut dum se
 in arce regiminis iustitia clementiaq; permi-
 sceant, is qui praeest corda subditorum & ter-
 rendo demulceat, & tamè terroris reuerentiam
 demulcendo cōstringat. & antè: Curandum
 ut rectorem subditis & matrem pietas, & pa-
 trem exhibeat disciplina: atque inter hac solli-
 cita circumspēctione prouidendum, ne aut di-
 strīctio rigida, aut pietas sit remissa.

Proderit in hac re frequentata hæc co-
 gitatio; Memento regere, ut regi voles;
 nec quidquam in alio experire, quod in
 pari delicto in te nolles. Sepone personam
 iudicis, indue patris; amari malis, quàm
 timeri; neque quidquam metu peragas,
 quod amore possis, memor verborū Pro-
 sp. sent. 163 sperī: In domo iusti etiam qui imperant, eis ser-
 uiunt, quibus videntur imperare. quia non do-
 minandi cupiditate imperant, sed officio con-
 sulendi: nec principandi superbia, sed prouiden-

di beneficentia. Benè Isidorus: *Qui delinquē-* *Lib. 5.
de sum.
bono.*
tem superbo vel odioso animo corrigit, non e-
mendat sed percutit. quidquid enim proteruus
vel indignans animus protulerit, obiurgantis
furor est, non dilectio corrigentis.

Iuuabit diligens personarū & morborū
consideratio, prudentium medicorum
more; neque enim omnium conditio
morbusque eadem medicamenta admit-
tit. & grauissimus error illorum est, qui in
omni populo, persona, ætate, morbo,
tempore, eadem medicamenta adhiben-
da censent. lenia enim quidam maximo
admittunt fructu, dura noxio ferè euentu
hauriunt; potentioribus alij exstimulandi
sunt, mollia contemnunt, adeoque exa-
speratur his suauibus malum & irritatur,
frustraneo ac nocituro etiam euentu.

Magna proinde cautione, ac prouida in
his circumspeditione opusest: minus tamē
vniuersim delictū est in mitioribus, quā in
acrioribus peccare: & facilius in illis venia,
& promptior emendatio est. quòd si quē
viderit conatum superandis malis adhibe-
re, manum illi porrigat qualem lapso sibi
aut labenti porrigi vellet, memor Sapien-
tis: *Ne spernas hominem auertentem se à pecca-* *Eccli. 8.*
to: neque improperes ei. memento quoniam o-
mines in correptione sumus. & Apostoli: *Si præ-*

Ad Ga-
lat. 6.
occu-

occupatus fuerit homo in aliquo delicto, vos qui spirituales estis, huiusmodi instruite in spiritu lenitatis, considerans teipsum, ne & tu tenteris. talem nimirum, teste Bonauentura, satisfactionem imponite, per quam agnoscat pondus reatus sui; ita tamen clementer, sicut tibi met velles alium compati, si tali peccato delinqueres.

De 6.

alis c. 7.

CAPVT VIII.

Paternæ gubernationis neglectus.

Illam nisi Superior quâ verbis & externa beneuolentiæ ostentatione, quâ rebus potissimum ipsis ex sincero, non simulato paterno affectu natis, ostenderit, ita vt inferior reipsa patrium in se Superioris animum persentiscat, sibi que penitus persuadeat, tali in se Superiorem affectu duci; frustra filialem erga se subditorum amorem affectumque sperabit. vt certissima in inferioribus affectuum regula è Superiorum affectu petenda sit: qui si per omnia patrius sit; filialem etiam in subditis expectet. si sacularem, politicum & despoticum dominatum sapiat; similem in subdito affectum speret; famulitiamque potius obsequentiam, quam filialem; mandatorumque executionem,

à ti-

à timore magis, quàm ab amore natam. nam cùm in Superiore non sentiat inferior patris animum, sed domini, fit vt feruilem, non filialem affectum reponat.

Atque hinc quanta nascantur incommoda & difficultates, nemo paulo prudentior non videat. Suboriuntur enim vtrimque diffidentia, & dum solo exteriùs placendi studio subditus ad imperata rapitur, superficie potiùs tenus mandata exequitur: ac si celari facta sua posse putat, aliorsum potiùs, & ad ea, quæ à Superioris voluntate alienissima sunt, ducitur.

Sequuntur deinde vtrobiq; pro re nata suspiciones varia, animorum alienationes, murmurationes, tecta vtrunque consilia, ac simulationibus omnia plena. Quòd si pergat Superior in hoc neglectu, neglectum in inferioribus excitabit obseruantia ac venerationis in se debita. neque enim hæc sperari potest, filiali amore à paternæ gubernationis neglectu extincto. Exurgunt deinde solertissimæ in inferioribus, minimorum ac abditissimorum in Superiore defectuum inuestigationes; carpendi nimirum ac reprehendendi in eo quem auersantur studio, pro-uocati. ita quæ beneuolentia, patriusque amor

amor ac profusio, natuſq; ex his affectus tegere ſolet mala, indignatio auerſioque è paterno neglectu, ac gubernandi duritie nata, palàm aperit, & omnium oculis obiicit, adeoque & in virtutibus ipſis improbanda numerat. ita ſubdola & ingenioſa omnis alienatio eſt, in laudibus damnanda reperit. decurriturque tandem in apertum oblocutionum ac detractio-num campum: nec uſquam, nec ulli altiſſimè etiam deſoſſæ rei parcitur; ac nec apud exteros quidem ac Religionis hoſtes. milleque excogitantur & inueniuntur modi, iugum à paterno imperio alienum excutiendi. bonis artibus non licet, decurritur ad malas: cùm ſatis ſit dominum excuſſiſſe. nam cùm ſentiant ſe filiorum loco non haberi, non agnoſcunt Superiorem patrem. & cùm dominum nolint; nomenque hoc omne auerſentur, ut qui in paternam ſe vltronea traditione tutelam, non in hominis imperia coniecerint; ſit ut nullum molitionum finem faciant, donec ſe alienis in Superiore à paterna gubernatione legibus exemerint.

Denique fruſtra apertam conſcientiæ reſectionem ſperabit Superior talis. ignorabit ſuorum morbos, labeturque grauiter in ſpiritualium medicamentorum ap-
pli-

plicatione, in personarum designatione, in munium distributione, ac in vniuersa commissi sibi gregis cura. nam cum interioris hominis ac conscientiae nuda quædam sinceraque in subdito explicatio filialem confidentiam præsupponat, hæc verò paternum in Superiore affectum; fit vt, si hoc Superior careat, nullis persuasionebus induci inferior possit, vt se tanquam patri filius aperiat, cuius patrium in se affectum non experitur. & cum semper vereatur iudicem, aut dominum, non facile se æger vt patri, aut medico explicabit: teget potius omnia, & se animamque in perimentia discrimina coniiciet, quàm vt in Superiore, iudici ac domino, vulnera & quibus iactatur pericula aperiat.

Nascitur verò hic paternæ gubernationis neglectus, aut ex ambitiosa dominandi libidine; aut è mentis quodam fastu, dictorum factorumque suorum augusta æstimatione, aliorum contemptu & neglectu; aut ab innata quadam asperitate, morositate, fastidio, ac nauseantis animi tædio, dum nil alienum placet, displicent omnia, eoque magis quo magis domestica; aut ab animo humanarum misèriarum immemore, menteque commoueri nescia, & malorum in se ignara, aut

cæco amore sui rerumque suarum abrepta. vt omnino optādum sit inferiori, Superiorem consequi probatum per omnia, qui & mala tulerit, & sub aduersantibus ingemuerit, de genu pugnauerit, mixtumque puluere sanguinem fuderit, remediaque ex se didicerit, factus ex se ipso medicus, dux & magister; quo compati, mederi, anteuertere mala, occurrere venientibus, aut illata pellere sciat: qui que è malis periculisque suis reliquos metiatur: qui nihil putet esse negligendum, nulli securè indormiendum, nullumque quocunque etiam ex cespite insurgentem hostem contemnendum, certus à minimis ingentia damna dari, regnorumque etiam validissimorum interitum à minimorum contemptu & neglectu nata; maioraque adeò à minimis illata damna, quo ferè magis neglecta: cum pulso timore mala crescunt, ac nimium securos sui inopinatos opprimunt.

Remedia.

FRequens in Superiore cogitatio, paterni in omnes affectus Dei. vt ad illius formam & imitationem paternam in sibi commissos gubernationem instituat; maximè cum cogitauerit, præesse se illis, quos

quos cælestis Pater in filios sibi adoptauit, coheredes vnigeniti Filij sui. quæ dignatio meritò vnumquemque Superiorem in paternum affectum excitabit, omni despotico deposito, ac quasi in exilium acto.

Suo deinde se Superior pede metiatur, videatque quales in se Superiorum suorum affectus optet, patrios an despoticos: excitetque in se tales, quales aliorum in se desiderabit. Certissima hæc bonæ ac religiosæ gubernationis regula est, qua fortiter sibi serioque proposita, non faciliè Superior à recto aberrabit.

Amari velit, non timeri; cogitetque imperata ab amore nata, ab amore peracta, diuturniora, sinceriora, tutiora, pacatiora, & laude etiam digniora esse.

Perpendat secum frequenter, quanto filialis amor seruili timori præponderet: illum verò sperari non posse, nisi ipse prius paternum in suos affectum induat.

Iuuerit etiam in primis, si vltronea & non rogata beneficia, ac sollicitudinem in suorum necessitatibus impendat, idque infirmitatis potissimum tempore, siue ab animo illa, siue à corpore profecta fuerit. paternè compatiendo, remedia malis præscribendo, vltro compellando, excitando, ac in spem meliorum prouocando, opem

fuam operamque pollicendo, medicum in corporum morbis consulendo, in omnem demum fiduciam, spemque paterni in se affectus inferiorem excitando. doleat cum dolente, commifereatur patienti, ac in omnem se formam vertat, ut suorum salutem consulat; cogitetque se non tantum patrem, sed & pro rerum exigentia matrem; ut etiam vbera norit præbere sitientibus, mellaque vinaque iis, qui amaro ac tristi sunt corde: nec quicquam omnino intentatum relinquat, quod patrius, adeoque & matris suggerere in carissimorum filiorum ægritudine affectus solet. multa patrum matrumque exemplo perferat, quamdiu infirmitas ægrum filium tenet; nec facile ad grauiiores admonitiones accedat, quamdiu malum sæuit, febrisque siue illa animi siue corporis languentem filium possidet. pulso malo, tum demum seria, sed paterna tamen, si necessum, monitione agat: ita ut sentiat subditus, à paterno, non ab indignabundo & despotico affectu monita nasci.

Bon. de
6. alis,
cap. 4.

Quòd si admonitiones paterna, & benignæ instructiones frustra fuerint adhibita, imitandierunt periti medici, qui non ex odio, sed amore ferrum & ignes, aliàque remedia insuauia agrotis adhibent.

Imi-

Imitetur deinde in suorum malis Apo- ^{Вопли.}
 stolum, *pro Corinthiis semper gratias agētem, supra,*
pro Ephesiis genua flectentem, pro Philippensibus ^{cap. 4.}
omnibus semper in cunctis orationibus cum
gaudio deprecantem, pro Colassensibus non ces-
santem postulare & orare, Thessalonicensium
memoriam facientem in orationibus sine inter-
missione, atque cum eodem Paulo dicat: Filiali Gal. 2.
mei quos iterum parturio, donec formetur in
vobis Christus. sic enim fiet, vt in quam
volet partem ac virtutem suos ducat: ma-
ximè si præeat ipse exemplo, ac dux facti
fuerit. neque durum erit filio patrem se-
qui, & generoso, nec degenerare calcatu,
æmulaque quadam laude, antea mbula
illius vestigia premere, vt vel solo etiam
rubore secuturus sit filius si patrem
agnouerit, paternumque in se pectus ac
sollicitudinē expertus fuerit. neque enim
credi potest quantum in omnem partem
intentus patris animus, ac de filij profe-
ctu ac salute sollicitus, possit, quantum ad
ardua quæque audenda calcar addat, &
incitamentum præbeat.

CAPVT IX.

Exigua cura interni spiritus.

HInc paulatim succrescunt zizania, & dum cultura negligitur, siluescit ager, spinisq̃ue ac sentibus repletur; fœcundusq̃ue antè gratusq̃ue Domino, sterilefcit; & quæ uvas solebat, labruscas vinea profert.

Nascuntur deinde pro spiritualibus sæcularia, & quæ priùs super niuem dealbata erat anima, nunc densa nocte tegitur: inuoluiturq̃ue tetra ac inimica spiritualibus nube, quæ fulgoris sui radios longè antè lateq̃ue multorū bono variè spargebat. sermo illi priùs, dum super grege suo excubabat Superior, cælestis, diuinarumq̃ue rerum grauidum pectus diuina profundebat; nunc illius neglectu, nil nisi nocitura, & sæculum suum sonantia promit.

Tepefcit inde Religiosus, & pro ardoribus, nausea quædam succedit spiritaliū rerum, nec vltrà suauem sibi optatumq̃ue cibum amplectitur anima; magis etiam fastidit ac spernit, & toxica illi videntur, morteq̃ue acerbiora, quibus antè ingenti plenus gaudio latus pascebatur.

Et vt nulla ferè re alia quàm culturæ
negle-

neglectu perit ager, ita nulla re aliâ magis quàm interni cultus neglectu Religiosus. Cùm enim natura proni ad zizania simus, vt nihil præter tribulos, solis ignibus natos, relicta sibi natura proferat; fit, vt nisi assidua cultura, diligensque in omnē partem studium accesserit, frustra horreo Dominico reponendam messem speres. Quin adeò, nisi perpetuetur labor, hîc putando, ibi vellendo, alibi radicitus excaudicando, ferròque etiam & ignibus non rarò sæuiendo; suffocabitur quidquid melioris seminis superieceris, miraberisque indolebisque; serò, nihil messi, aut horreo seponendum relictum esse.

Deterius etiam est, quando non tantùm negligitur interni spiritus cura, sed contrariis etiam nocituris distinetur; aut secularium occupationum anxia sollicitudine tantùm non insepelitur animus, vt erigere ad superna, aut inflectere ad interna se non possit, mole aut tempore sæpe ipso exclusus, vt in desuetudinem planè interni cultus veniat. sic enim fit, vt etiam dum volet, omni conatu ad spiritus culturam se attollere nequeat, negotiis tanquàm molaribus aut rupibus oppressus: quæ ubi totum insederunt hominem, vertuntur quasi in naturam, & domestica fiunt, nec

expellendi potestas reliqua: imò cùm vna ferè ex alia occupatio ac negotiatio nascatur, ac velut in denso nemore arbores mutuo implicentur, aut tanquam hedera parieti, sic animis innodetur, nulla aut arte aut industria repellas.

Deterius etiam, cùm ex assuetudine sæcularium rerum, delectatio quædam subnascitur, quæ ipsa magnitudine ac multitudine sua si crescat, frustra cælestia cogitabis. oblectatione enim rerû humanarum animus captus, non metitur æterna, nec ceruices ad futura circumfert, nec ad illum perennem cælorum solem perpetua negotiorum nube nebulaque cinctus, oculos deflectit: inhæret nimirum terræ, assuetus illi; omnemque cogitationem suam, & quidquid habet virium, profundit in sæculum, ut nullum super sit interno spiritui robur, quod omne pondere suo & oppresserunt & euigorarunt res aliæ: neque duobus in solidum se dare mens humana, nisi singulari Dei munere, potest.

Iam ea externarum internarumque rerum pugna est, ut perquam difficile mutuo socientur, ac ferè altera alteram pellat, nec in vno stabulare soleant pectore. Quod si quis contendat posse: ingens sane illud necessum est esse & robore, & va-

stitate

stitute sua nobile . quod perrarò in hac
vita concessum est homini , & è millibus
vix vni aut alteri . Tam enim ex aduer-
so pugnantis , & quæ ferè totum homi-
nem deposcunt , incumbere , arduum o-
mnino est , & quod humanas propè vi-
res excedit . quantum enim plus vñi con-
cesseris , tantum alteri ademeris . crescunt
secularia ? decrescunt spiritualia , aucti-
busque illorum hæc minuuntur : mensque
tota ab illis obsessa , vix cælestibus locum
dare potest . non possumus nimirum simul
mammonæ seruire & Deo . alter destituē-
dus est . partiri obsequia dominorum dis-
paritas non permittit . nec inimica signa
aduersantia in vna sacramēta concedunt .
vni qui se sacrauit , alterius hostilitatem
professus est . Dabit proinde se Religiosus
Deo , diuinisq; se totum mancipabit , cuius
rei potissima cura à Superioris vigili studio
dependet : à quo commissi sibi gregis ra-
tionem deposcet Deus , animasq; sangui-
nemque suorum , salutemque interitum-
que illi in primis ascribet , vt à cuius seria
ac in omnem partem intenta excubatio-
ne , aut neglectu , tota ferè subditorum sa-
lus pendeat .

Remedia.

Seria in Superioribus inuigilatio in spiritalem profectum suorum, diligensq; obseruatio singulorum, quem quisque ex orationibus fructum, quem ex mortificationis studio referat; quàm seriò singuli his incumbant; quo ardore ac zelo in proximorum salutem ferantur; quem in virtutibus progressum faciant.

Accurata conscientiae & non perfunctoria redditio, vt se totum aperiat inferior, quò nihil internarum rerum Superiorem lateat. in latentia pericula, meritò metuenda damna cognoscat, quò temperare moderariq; externarum rerum curam possit, sciatq; quibus illæ tutò, ac minori spiritus detrimento committi possint. quam ille cognitionem nulla è re certiùs, quàm ex inferioris sincera refectione cognoscet.

Moderatio domesticarum recreationum, maxime in iis quæ sæcularitatem sapiunt, aut minùs religiosam consuetudinem, ac modestiam.

Remotio ac resectio sæcularium negotiorum, quæ spiritum atterere solent, languoremque torporémque inducere. seponat proinde, quantum licet, externa,
quis-

quisquis interna amat. si ab obedientia ad illa agatur, quantum potest temporis animo suffuretur & Deo. non potest horas integras? potest medias. negantur mediæ? de fructare ex his modica potest. Neque vllæ tam densæ ac implexæ occupationes sunt, quæ frequētibus ad Deum aspirationibus iter claudant. etiam in medio foro, inter rostra & forenses actiones euolare ad cælum mens potest. libera nimirum suspiria sunt: nec vllis compedibus, aut agendarum rerum molibus impediuntur: nulla hæc tyrannis aut exercitus intercludere possunt. quibus si assueuerit animus, & familiares sibi aspirationes fecerit, etiam inter sæculi huius asperrima, cóniuncta mens viuet Deo. Quòd si neglexerit salutaribus hisce mentem pascere, mirabitur non multo pòst ex angue pectus, emedullatum cor, vitalibus suis destitutum: seroque ingemiscet, & retrò respiciet, aut ad meliora manum protendet, ingenti vndique mole oppressus:

CAPVT. X.

Remissio in gubernando.

NEque enim satis est, mala vitare: nam & seruus sciens voluntatem domini sui, & non faciens, plagis vapulabit multis: & ferè ab eiusmodi Superioris remissione omnia mala nascuntur. vniuersa enim religiosa disciplina labascit: qua cadente, tamquam referato vitiorum aditu, omnia simul subintrant mala. nam cum natura prona in libertatē ferè trahamur; si desit obseruator, censor, monitor, sponte in nocitura toto impetu volumur, & iam licere arbitramur, quod Superiorum indulgentia permittitur.

Quid? quod non repressa vitia virtutis nomen sortiantur, abeuntque tandem illa in naturam, cum familiaria ac domestica facta fuerint. seroque Superior medicinam cogitat, cum vniuersum hominem domumque ægritudo occupauit; quod in Superiorum ignaua clementia fieri consuevit. Quare si aut naturę quadam facilitate, aut noxiis illis opinionibus Superior ductus, quibus quidam arbitrantur omnia omnibus concedenda, nulli petita neganda, numquā peccari posse clementiâ,

tiâ, nulla remissionis delicta esse, sola beneuolentia subditos in officio continendos; metum omnem, increpationes, monita grauiora seucrioraque abesse à religiosa domo debere; solius benignissimæ matris, ac de sinu & ubere lactentis ac ludentis personam induendam, numquam maturioris patris, minùs etiam iudicis; minas proinde pœnasque ab hac domo ablegandas; quare ad quod quis ultro non properet ac propendeat, numquam compellendum, sed neque generosioribus in quacumque ægritudine medicamentis utendum, consultiusque esse ægrum inter dulcia & mellea perire, quàm per ignem & ferrum conualescere: si his inquam Superior tanquam certis gubernationis regulis inhæserit, vniuersam religiosam domum euertet, peccabitque in ipso bonæ gubernationis limine. neque quidquã ad reuellenda omnia religiosa firmamenta potentius reperiri potest; quodq; certius cum omnium religiosarum familiarum institutione pugnet. sperare enim singulos suoapte ingenio virtutum semitam decursuros, nec ad dextram aut sinistram declinatu-
ros, nullisq; incitamentis tanquã calcaribus impellendos, nullis cohortationibus grauioribus metumque incu-
tien-

tientibus, ab omni omnino rectæ gubernationis regula aberrasse est. quò enim in omni Religione regulę, cõstitutiones, monita, & alligatę transgressoribus pœnæ, si singula singulis permittēda, si nullius vultus contristandus, nemo mœrore afficiendus, nihil negandum roganti? Imò quò Superior, & obedientia tota? neque enim aut Superioribus opus est, si cuiuscumque propensionibus obsequēdum est; aut obedientiæ locus est, si omnium desideria Superiores expleant, permittantque singulis, quod cuiusque voluntas, aut pronus in quamcūque rem animus suaserit: quin magis Superiores inferioribus obtemperant, & illorum in his veriùs; quàm horum obedientia est.

Accedit, quòd hæc Superiorum remissio, affinis interminatoriæ nauseantis Domini sententiæ sit, *quia tepidus es incipiam te euomere ex ore meo*, vt fastidire illum videamus languorem hunc, & tanquam nauseātis à tepore foetidissimi vomitus pro-
trimentum: eo magis quo nocentior hæc Superiorum quàm inferiorum remissio sit; cū illorum eat in exemplum, obambulet regna, ac in posteritatem etiam virus suum iaculetur. quo fit, vt quidquid delictorum ex hac remissione ortum fuerit,

rit, in Superioris caput redundet. Hinc est illud Gregorij. admonēdi sūnt, *ne dum* ^{Pass.} *nimis humanam pacem desiderant, prauos ho-* ^{p. 3. c. 23} *minum mores nequaquam redarguant; & consentiendo peruersis, ab auctoris sui se pace disiungant: ne dum humana foris iurgia metuunt, interni fœderis discussione feriantur.*

Nolo tamen in Superiore nimium rigorem, nolo perpetuam seueritatem, vultum contractum, imperia sæculum redolentia: amorem volo & ex amore imperia nata: hîc patris, ibi matris, alibi medici, sed & iudicis, si qua necessitas occurrerit, personam indui. quin imò minùs noxia perpetua patris dextra, quàm matris vbera sunt, minoribusque periculis obnoxia rigidior quàm mollior semper manus; vt non tam certa præcipitia sint àserij semper obseruatoris fronte, quæquæ nusquã parcere didicit, quàm à molli materno sinu; neque toties in pœnitenda, ac nullo pòst ingenio aut arte emendanda cadet, qui nullâ maturitatē, grauitatem, seueritatem clementiâ, quàm qui nullâ clementiam seueritate temperat.

Et Dei exemplo discimus etiam in amicissimis, mollia seuerioribus miscere, neque semper mella propinanda, & asperioribus nonnunquam monitis Domini ex-

exemplo in Petro, etiam carissimos coërcendos. nunquam crescet in virum, qui de materno semper collo pendet & vberibus. per aspera & dura ad magna contendimus. nunquam ad sui vitiorumque prauorumque affectuum cognitionem ac victoriam deueniet, quem remissus Superioris animus mollibus semper fouet, metuitque redarguere, aut maturioribus monitis ab illicitis nociturisque reuocare. Sane quem diligit Dominus, castigat, ut amoris indicium castigatio sit; & non castigasse, non amasse sit. Nunquam verò ne verborum quidem maturiore castigatione opus esse, à cælo non à sæculo sperandum est. quinimo vsitatissimū in omni Religione est, optimos etiam viros, ob leuia & diurna delicta quædam, grauius fortiusque supraque delicti magnitudinem moneri, non tam delinquentium quam aliorum causa, ut dum patientiam in non promeritis intuentur, discant in meritis animum componere, & ad modestiæ normam dirigere.

Iam quid sperari potest à familia, cui Superioris remissio in omnem libertatem habenas laxauit, in qua cuique voluntas sua pro regula, affectus pro Superiore est? quid non timeri? exulat paulatim hinc omnis vir-

virtus, succedunt vitia, ad quæ natura quasi obtorto collo rapimur. sed & in ipsum Superiorem insurgitur. sequitur remissionem venerationis neglectus ac contemptus, è quibus oblocutiones nascuntur ac detractiones. Nec priuatis hæc parietibus continentur, viciniam complent, vrbesque totas peruagantur, plurimumque apud externos de sanctimoniæ ac probitatis æstimatione detrahitur: à quibus initiis sperata animarum salus corrui, quam venerationis & auctoritas, & conceptæ probitatis opinio ferè tutatur & prouehit.

Hæc est illa remissio per quam vnus adificat parietem, & alius linit, per quam laudatur peccator in desideriis animæ suæ: imò per hanc canes muti non valentes latrare per consensus uniformitatem, faciem & similitudinem peccatorum assumunt, sicut scriptum est, Vsquequò iudicatis iniquitatem, & facies peccatorum sumitis?

*Petrus
Chrysa.
in epist.*

Remedia.

FRequens recordatio commissi sibi à Domino gregis, seueræque exactionis concreditæ sibi villicationis.

Incommodorum, quæ ex hac remissione nascuntur, apud animum suum commemoratio, vt illorum magnitudine terri-

E

tus

Epist.
76.

tus magis seriam excitatamq; gubernan-
dirationem induat. De Heli D. Leo: *Me-
ruit eorum delicta tolerando, diuina iustitia
vnà cum filiis sententiam experiri, propterea
quòd segni indulgētia dissimulauit plectere pec-
catores.*

Fortis tenaxque instituti obseruatio,
frequensque in se prouocatio amoris vo-
cationis suæ: sic enim fiet, vt cùm seipsum
tamquam discusso somno excitauerit, aut
tanquã depulso frigore in amorem insti-
tuti sui inflammauerit; nihil omittat illo-
rum, quæ ad Religionem sartam tectam
seruandam necessaria sunt, in omnem be-
ne agenda rei occasionem intentus. Ne-
que difficile est, ad quæ amamus potenter
ferri, & generoso ausu difficilia quæque
transuolare, nulla magnitudine terreri,
nullius vultum pertimescere, nec ferrum
nec ignem perhorrescere, quando pro-
posito sibi fini necessaria sunt, ducuntque
ad rem amatam, nec alia via ad illam. Ex-

1. Para.
15.

Bona. de
6. alis,
cap. 5.

citet verò se Domini verbis: *Confortamini,
& non dissoluantur manus vestra: erit enim
merces operi vestro. Istæ manus Prælati sunt in-
stantia in agendo, & patientia in sufferendo,
quod grauat. quæ si non dissoluantur per desi-
diam, seu intolerantiam, merces aterna ei cu-
malatur.*

Di-

Diligens regularum omniumque constitutionum obseruatio. faciet hoc omnis vocationis suæ amator, cui vigor & instituti valetudo bona cordi est, qui lacertos illius, robora, coloremque sanguinemque totiusque corporis habitudinem bonam amat. cumque illa in animi remissione stare non possit, excutiet torporem hunc, vigilique cura in exactam illarum obseruationem incumbet, nullis etiam acribus medicamentis parcendo, quando tuendæ valetudini necessaria sunt.

Proderit etiam, si tacitus secum sæpe cogitauerit, in omnibus omnino rebus humanis, nisi assidua cura indefessumque studium intercesserit, labascere quidquid magnum. videmus hoc in hortorum, nemorum, vinearum, agrorum cultu. quoties in illis noxia euellenda, putanda. quoties ferro opus & durior manu? quoties à radicibus sæuiendū? nec summa tantum arborum secanda, quin & euertenda sursum deorsum omnia, visceraque rimanda, si quod fors nociturum abditum latet fibris, si quæ sterilitas defixa inhæret terris. sed & ab ignibus sæcunditas petitur, & sterile solum flamma sæcundatur. vsque adeo sæuiisse prodest. Idem in animorum hortis vsu venire discet, quisquis euenta

E 2 rerum

rerum maiorumque exempla serius inuestigator lustrauerit.

Neque interim desperabit aut concidet animo Superior, si non omnia è voto ipsius successerint. Neque enim *mirum, si non omnes conatus animarum rectoris non proficiant in omnibus, cum nec Dei operatio proficiat in omnibus ad salutem ipsorum. Omnia enim quae seminantur non conualescunt, & qui thesauros effodiunt, libenter multam terram eruderant, ut modicum auri vel argenti reperiant. Animare verò debet rectorem ad laboris tolerantiam, quod non minus meretur in illis qui deficiant, quàm in his qui maximè proficiunt. Plus laborat doctor in indocili, quàm in docili discipulo, & ideo apud iustum aestimatorem laboris, plus meretur. In terra sterili & saxosa agricola plus laborat, & si fructus paucior, sed fructus maior. Et quae difficilius elaborantur, saepe carius venduntur.*

CAPVT XI.

Facilitas, & indulgentia nimia.

DVM à recto bonoque, & instituti regula se patiuntur Superiores abduci, idque aut innata quadam morum lenitate, aut difficultatibus victi, aut molestiarum

rum fuga, aut monitorum fastidio; aut quòd blandi facilesque haberi velint, aut denique omnibus placendi studio: quas res omne Religionis robur exedere, nemo non videt.

Neque enim deerunt vnquam optimarum legum transgressores, qui si viderint Superiorum conniuentiâ impunè omnia peragi, ad deteriora paulatim descendunt, ad ea nimirum quæ ferro & ignibus indigeant. quod vbi accidit, merita cadit in Superiores querimonia, qui cùm nullo negotio principiis obstare possent, maluerunt quæuis etiam permittere, ne quem suorum leui offensionis metu terrent, aut à se auerterent; quos postmodum eo patiuntur grauiores aduersarios, quo acrioribus in inueteratis malis eruendis, remediis opus est.

Et sanè non est hic amor, odium veriùs est, & hostile, non patrium pectus; cùm quæ non magno negotio posset in filiorum morbis pellere, crudeli indulgentia ferrum iubet expectare: dum dilata curatione computrescit membrum, & sola iam sectione & ignibus mederi malo potest. Sanè qui amat, qui pater est, initiis medetur, peccantem filium corripit, non parcit. parcere odisse est, corripere amasse est.

Hinc illud in exemplū omnibus Superioribus: *Quē diligit Dominus, corripit, & quasi pater in filio complacet sibi.* Apud Apostolū: *Quē enim diligit Dominus, castigat: flagellat autem omnem filium quem recipit. In disciplina perseverate, tanquam filiis offert se vobis Deus: quis enim filius quem non corripit pater? quod si extra disciplinam estis, cuius participes facti sunt omnes, ergo adulteri, & non filij estis. omnis autem disciplina in presenti quidem videtur non esse gaudij, sed mœroris: postea autem fructum pacatissimum exercitatis per eam reddet iustitia. Propter quod remissas manus & soluta genua erigite, & gressus rectos facite pedibus vestris, ut non claudicans quis erret, magis autem sanetur.* Quæ si negligent Superiores, nec se veros patres, nec inferiores filiorum loco habent, nec imitatores Dei sunt, qui de se ipso, *Ego quos amo, arguo & castigo; ut apud Dominum arguisse & castigasse, amasse sit: ergo non castigasse non amasse, adeoque odisse sit.* Hinc est illud: *Qui parcit virga, odit filium. hoc est, qui sub specie pietatis peccantem non corrigit animam eius ad interitum mittit.*

Neque quidquam in Religione malorum est, quod ex hac Superiorum indulgentia nō nascatur, & magnis ubique auctibus ingentia incrementa nō sumat. omnia enim

enim vitia sub hac arbore tanquam matre succrescunt, pullulantque ab hoc semel sparso iactoque ignauo semine. Nam cum natura ferè proni ad vitia simus, si desit qui huic animarum horto seriam sollicitamque manum admoueat, veteris hominis reliquationes eruderet, surgentia euellat zizania, putationi incumbat, fecundioribus melioribusque syluestria inoculet, noxiorumque fruticum, aridorumque radices ipsas excaudicet; syluescet, & in miricas exurget.

Iam cum indulgentem, vnde quaque Superiorem viderit inferior, quid nisi malo malum adnectat? probare fors arbitrabitur, cum non improbet. in Superiore enim non improbasse, probasse videri potest; ut qui damna cum possit non fugit, amasse videatur; qui nocitura non detestatur, laudasse censeatur. omnia proinde quæ eueniunt aut subnascuntur mala, vni Superiorum indulgentiæ meritò adscribi possunt.

Familiare verò in primis est, ex hac indulgentia tanquam e semine ac radice, pullulasceremutuas æmulationes, animorum alienationes, murmurationes & obloquia, sæculares mores, detractiones, laborum fugam, regularum omnium negle-

ctum, spiritus teporem, ac mentis quoddam frigus ac gelu; orationis omniumque propè spiritualium rerum nauscam, ac quendam quasi cælestium & spirituum vomitum. nam sperare ut cum quemque sibi reliqueris, singuli in solidarum virtutum studium incumbant, fatuæ cuiusdam fiduciæ est; maximè in iunioribus, quibus non exigua etiamnum vitiorum inhærent vestigia, aut necdum in integrum domitis iis ac conssepultis; aut è tenera adhuc cicatrice, nouum è non vehementi frictione, imò non rarò è neglectu solo, vulnus timeri potest: adeoque cineribus adhuc tectus ignis, veriùs quàm extinctus est, qui indulgentia hac, & Superioris conuiuentia ac incuria, perfacile in nouas exurgere potest flammæ; ut proinde perpetua opus Superioris vigilantia sit, & in omnem partem circumspeditione, ne vel noua exurgant, vel erumpant vetera.

Intentam proinde ad singula mentem, oculosque teneat, etiam ad infima fratrum munia. dici enim non potest, quantos hæc vigilantia curaque animos addat, quàm validè omnes in officio contineat, dum obseruari se, siue in remuneratione & laudem, siue in serias monitiones sentiunt;

tiunt; dumque ibi veri patrisfamilias in filiosintuentur affectum, alibi medici anxiam de suorum valetudine sollicitudinem; modò pastorem commisso sibi gregi inuigilantem, modò Superiorem in subductionem rationum subditorum suorum incubantem; in omnibus denique serium inuestigatorem & obseruatorem, quemque nihil domesticarum rerum fugiat. semel enim concepta hæc opinio omnes in sedulam commissarum sibi rerum executionem prouocat, dum in oculis, se suaque Superioris, perpetuò versari arbitrantur.

• Et ferè qualis ipse est, tales inferiores experietur. negligens ipse & incurius est? socordes & ignauos expectet inferiores. vigilans & serius? excitatos promptosque consequetur. tantum in vtramque partem exemplum parentis, ducis, medici, Superioris valet, vt ab huius ferè moribus, de reliquis iudicium ferre queas, & bona sperare, aut timere mala possis. diligens ipse, & vigilans, ac in omnem partem intentus? similes experietur inferiores. Quid si inter hæc deliquerit aliquis, & culpa poenam mereatur, memor sit Sapientis:

Pestilente flagellato, stultus sapientior erit: si autem corripueris sapientem, intelliget disciplinam, & alibi, Vir prudens & disciplinatus non

Prov. 19

Ecclesi. 10

Prov.
29.

murmurabit correptus. Si murmurauerit, habemus eundem interminantē: Virum qui corripientem dura ceruice contemnit, repentinus ei superueniet interitus, & illum sanitas non sequetur. & prudenter alibi monet: Me-

Eccli. 7.
Psal. 140.

lius est à sapiente corripī, quàm stultorum adulatione decipi. Hinc illud Psalmistæ votum: Corripiet me iustus in misericordia, & increpabit me: oleum peccatoris non impinguet caput meum.

De sex
alis c. 4.

Quòd si errantes & ab instituto deflecentes neglexerit Superior punire, audiat Bonauenturam: *Si non corrigit delinquentes, si permittit sub se vitia crescere, & consuetudines malas oriri, & iam exortas roborari & dilatarī, si videt Ecclesiasticas observationes dilabi, & transgressiones multiplicari, & pro posse non obuiauerit tam presentibus malis, quàm imminentibus; triplicem Deo reddet rationem.*

Sap. 6.

Primò, pro sua negligentia, quando non fecit ad quod officio tenebatur. nam ait: Cùm essetis ministri regni illius, non rectè iudicastis, nec custodistis legem iustitia, neque secundum voluntatem Dei ambulastis. Horrendè & citò apparebit vobis, quoniam iudicium durissimum his, qui præsunt, fiet. Secundo, quòd omnia peccata subditorum, quæ poterat & debuerat correxisse & præcauisse, imputantur ei: unde dicit Ezechiel: Si non fueris locutus, ut custodiat se im-

Cap. 33.

pius

pius à via sua, ipse impius in iniquitate sua morietur: sanguinem autem eius de manu tua requiram. Tertiò, pro abusione honoris & potestatis sibi collata, quam ad propriam gloriam & commodum retorsit, & non ad quod data ei. Tolle ab eo talentū (ait Christus) & inutile locus seruum eijcite in tenebras exteriores, ibi erit fletus & stridor dentium. Ostendat ergo bonus Zelator, quantum diligat Deum, in eo quòd beneplacitum eius in se & in aliis promoueat: nec ab hoc zelo mollescat per desidiam, nec labore lassetur, nec consiliis flectatur, nec astutiis circumueniatur, nec amicitia, nec blandimentis delinatur, nec ministerreatur, nec per diuturnam prauæ consuetudinis præscriptionem desperet, quin suum officium exequatur.

Remedia.

FRequens malorum, quæ ex hac indulgentia nascuntur, consideratio, bonorumque, quæ ex accurata regularum omniumque ordinationum obseruatione promanant, ut à quibus Religionis valetudo bona, flos, viror, roburque pendeat.

Pœnitentiarum in Religione receptarum usus, quas uti neque acerbiores, ita neque indulgentiores esse conuenit: quòd si quando morbi vis ac malignitas acriores adhi-

adhibere cogat; sentiat tamen infirmus, à paterno hæc affectu, & valetudinis studio, non ex animi exacerbatione, aut solius iudicis tribunali proficisci, verbis ad omnem suauitatem ac mansuetudinem compositis, quæ amorem, & emendationis desiderium, non vindictam, aut minùs ordinatum affectum loquantur. bene Sapiens:

Eccli. 29 Corripe amicum, ne forte non intellexerit & dicat, Non feci; aut si fecerit, ne iterum addat facere. quo magis inferiorem, qui Superiori filij loco est?

Exempla hîc proponi possunt ab omni Reipub. militiæ, priuatæ etiam familiæ, filiorumque institutione; cùm pleraque ex illis nimia Superiorum lenitate, & ignaua quadam facilitate perierint; & quæ aut opibus aut robore prima, ad humilem ferè arenam, hostiliaque genua deducta fuerint. & grauis sanè in indulgentiorem in peccata filiorum suorum Heli, sententia

1. Reg. 3. Domini est: Eò quòd nouerat indignè agere filios suos, & non corripuerit eos, idcirco iurauit domui Heli, quòd non expietur iniquitas domus eius victimis & muneribus usque in æternum. & secuta prædictionem miseranda indul-

1. Reg. 4 gentis patris mors. Cecidit de sella retrorsum iuxta ostium, & fractis ceruicibus mortuus est. in quem locum est illud Gregorij: Quia falsa

Psst.

par. 2.

cap. 6.

ap. 6.

falsa pietate superatus ferire Heli delinquentes filios noluit, apud districtum iudicem semetipsum cum filiis crudeli damnatione percussit. ut meritò Superiores omnes terrere hoc exemplum debeat.

CAPVT XII.

Dissimulatio in suorum malis.

DVM verentur Superiores, ne mœrore afficiant suos, ne offendant, ne à se alienent, ne querimoniæ subnascantur, ne pacata turbent. Hinc conniuentiæ, religiosæ disciplinæ relaxationes, omniumque pedetentim neglectus, dum à paruis initiis ad maxima properamus: familiare in humanis malum. de his autem Superioribus dici illud Prophetæ ex persona increpantis Dei potest: *Speculatores eius cæci* Isai. 56.
omnes, nescierunt vniuersi, canes muti non valentes latrare. & illud: Quod si speculator viderit gladiū venientē, & non insonuerit buccina, Ezechi. 33.
& populus se non custodierit, veneritq; gladius, & tulerit de ijs animam; ille quidē in iniquitate sua captus est, sanguinem autem eius de manu speculatoris requirā. Speculatores Superiores sunt, qui si munere suo functi fuerint, periculorū monuerint, nec inferiores ob-
au-

audierint, meminerint illud Domini: *De-*
Prov. 1. *spexistis omne consilium meum, & increpatio-*
nes meas neglexistis. Ego quoque in interitu ve-
stroridebo, & subsannabo, cum vobis id, quod
timebatis aduenerit. cum irruerit repentina
calamitas, & interitus quasi tempestas ingru-
erit: quando venerit super vos tribulatio & an-
gustia. tunc inuocabitis me, & non exaudiam:
manè confurgent, & non inuenient me, eò quòd
exosam habuerint disciplinam, & timorem Do-
mini non susceperint, nec acquieuerint consilio
meo, & detraxerint vniuersæ correptioni meæ.
 Sanè qui Superioris correptionem con-
 temperit, Dei contempsisse iudicandus
 est, cum vices Dei Superior obeat. quo ma-
 ior etiam cura Superiori incumbit, cui vi-
 ces suas commisit Deus, seueram ab eo
 exacturus rationem commissi sibi gregis:
 cuius non tam affectum ac propensionem,
 quàm necessitatē ac vtilitatem intueri Su-
 perior debet, Dei quē ac patris personam
 induere.

Non est autem veri patris nocitura fi-
 liis permittere ne doleant. prudentes illæ
 lacrymę sunt, quæ excutiuntur noxiorum
 amotione: ingemiscat filius, dummodo
 perimentia amoucas, benè est; ne seriùs
 postea ingemiscat pater, & non profutu-
 ras profundat filius lacrymas, parentis dis-
 simu-

simulatione natus. Non est amor, venena
 permittere, & nociturum ferrum: odium
 est, amoris palla tectum. neque medicus
 ille laudandus, qui ne offendat, ne mœrore
 afficiat ægrum, morbum simulat, remedia
 negligit. Indignetur æger, exurgatque in
 iras acerbioribus medicamentis prouoca-
 tus, non ideo aut desperandus morbus, aut
 destituenda curatio est. laudabit ubi con-
 ualuerit, & duras medici sui manus præ-
 mio afficiet, exosculabiturque ubi pul-
 so morbo, malisque quibus opprime-
 batur, bona sua senserit. Prudenter Sa-
 piens, *Qui corripit hominē, gratiam postea in-*
ueniet apud eum, magis quàm ille, qui per lin-
gua blandimēta decipit. Sin inclementi com-
 miseratione motus medicamina in seram
 curationem distulerit Superior, damnabit
 meritò æger inhumanam hanc benignita-
 tem, nec tam mansuetudinem, quàm cru-
 delitatem inclamabit. Idem fiet in ani-
 morum morbis; totam accusationem, in-
 dignationemque suam vertet in noxium
 hunc dissimulatorem: qui cùm mederi
 posset malo, maluerit crescere, cumque
 admouere manum debuisset, leuibus et-
 iam tum initiis, ac quasi in superficie lu-
 dente ægritudine, distulerit curationem,
 donec in præcordiis sæuiret malum. Hinc
 illa

Pro. 13.

Pro. 19. illa Sapientis monita: *Erudi filium tuum, & refrigerabit te, & dabis delicias animæ tuæ. & Eccli. 30 Qui diligit filium suum, assiduatur illi flagella, ut latetur in nouissimo suo, & non palpet proximorum ostia. qui docet filium suum, laudabitur in illo, & in medio domesticorum in illo gloriabitur. qui docet filium suum, in zelum mittit inimicum, & in medio amicorum gloriabitur in eo.* filij autem Superiorū inferiores sunt, & verissimorum patrum verissimi filij.

Quòd si alius accesserit Superior, priore munere defuncto, qui suorum inuigilaue- rit malis, quiq̃e serius vbique periculo- rum monitor manum admouerit, qui da- mna properantia, ac ceruicibus imminen- tia, ac iamiamq̃ue ruitura præcauere vo- luerit; miratur monitorem suum, tanto- rumq̃ue periculorum denunciatores, qui morbum in eam diem nullum senserit, æ- gritudinem prorsus ignorauerit (vt fieri consuevit vbi in naturam abierunt mor- bi) & exurgit non rarò in indignationes, nec credit denuncianti; quin aut ab alie- no in se animo monita hæc promanare, aut ex inanibus nimiumq̃; credulis Supe- rioris sui suspicionibus, aut è molitionibus aliò tendentibus arbitratur; sequunturq̃ue non leues animorum alienationes, mur- murationes etiam, & obloquia, & fiunt ta- les

les acerrimi Superiorum obſeruatōres & cenſores, ſiquid fortè in illis deprehenderint, quo ſuſpicionēs hāſce ſuas alant, dicta factaque illorum in ſiniſtram ferè & deterioreſ partem interpretantes, vt cauſæ ſuæ æquitatem tueantur.

Si pro ratione muneris ſui pergat Superior; aut erumpunt in pœnitenda, & ad odia graueſque detractiōes, & ad malorum denique vltima deſcendunt: aut ſi in morbi, quo detinentur, periculorumque cognitionē venerint, vniuerſa indignatio prolabitur in priorem Superiorem, malorum diſſimulatorem: illum accuſant & damnant, cuius immiti ſilentio, & ignaua diſſimulatione mala creuerunt. Et ſæpe ad tantum præcipitium mala venerunt, vt pedem in tutum retrahendi nulla ſpes affulgeat, omneque medicamenti genus, malum aſpernetur. Hinc inter monita & curationem, gemitus & dura trahuntur ſuſpiria, mœrorique indignatio miſcetur, & grauior etiam melancholia, quam non niſi cum vita æger deponet, dum de victoria ſui, mali magnitudine victus, deſperat, & in clamat cum Propheta: *Plaga mea deſperabilis renuit curari.* Iorem.
15.

Quòd ſi initiis, & in herba adhuc lu-
dentibus malis, tenero adhuc caule, ma-

num prior admouisset Superior, nullo hinc opus esset ferro. & sanè gaudebit quisquis sapit inferior, morborum suorum principiis à Superiore occurrì, paternamque manum admoueri. Scit enim verum illud

Prov. 15 esse Sapientis: *Auris quæ audit increpationes vitæ, in medio sapientum commorabitur. qui abiicit disciplinam, despicit animam suam: qui autem acquiescit increpationibus, possessor est*

Prov. 12 cordis. & illud: *Qui diligit disciplinam, diligit scientiam: qui autem odit increpationes, insi-*

Prov. 13 *piens est. Denique egestas & ignominia ei qui deserit disciplinam: qui autem acquiescit arguenti, glorificabitur. Quare lætabundo animo corripientem excipiet patrem: at ubi inualuit malum, & ignibus iam opus est & ferro, antè aut animam aut vocationem ponet, quàm duri iudicis admittet manū.*

Remedia.

A Vigili Superiorum cura petenda, vt nec minima quidem negligat, certus ex his magna etiam oriri: modico fermento totam non rarò massam amarescere; modico felle mella vinaque corrumpi nobilissima; modico veneno ingentia damna dari; vnaque non rarò scintilla oppidorum flammæ enasci. Ille agri sui prudēs cultor est, qui zizania in semine, tanquam

in

in matre & vtero, priusquam nascantur, lucemque aspiciant, aut in aliorum oculos incurrant, perimit.

Cogitet deinde Superior, mala, quæ in ortu leui medicari manu poterant, vbi adoleuerint, & robori iam suo innixa steterint, non nisi valentissima dextera, potentissimisque medicamentis, & in ceruicem sæpe Superioris ruituris curari posse. poterant initio componi non magna querimonia: neglexit; excreuerunt in arbores, ut ferro iam opus sit & ignibus, illis excidendis. Quid? quod non vilius, vbi inualuerint mala, sæpe interitu medicamenta adhibeantur: nam vbi serpendo plures secum traxerunt, agrumque non raro vniuersum venenaria sua lue infecerunt; non leuia meritò timeri possunt, cum in vnum insurgant omnes, doleantque sibi eripi, quæ longa iam consuetudine propè in naturam ac regulam abierunt.

Si cogitauerit deinde damna ex infelici hac dissimulatione nascentia, periculaque vniuerso corpori imminentia, seueramque extentamque in vindictam Dei in dissimulatores manum, præmiaque cælo seris in omnem partem excubatoribus reposita; facilè se ad vigilem curam sollicitudinemque prouocabit.

Nemo denique ad noxias hæc diffimulationes descendet, qui soli Deo innititur. hic enim extra spem metumque positus, nullius gratiæ, benivolentiæ, indignationi quidquam tribuit, Deo inhærens, à quo solo vt verè metuenda, ita & speranda veniunt.

CAPVT XIII.

Studium placendi sibi subditis.

DVM aut subditorum metuunt oblo-
cutiones, aut terrentur scriptionibus: aut nolunt offendere quos commodos sibi arbitrantur, quosque dictorum, factorumque suorum laudatores experiuntur.

Accedit metus temporalium rerum, dum verentur ne in earum aut tractationibus, aut consecutionibus minùs utilem fidamque suorum operam & industriam sentiant, aut illis etiam vniuersim destituantur.

Hinc pro malorum magnitudine non admouentur remedia; aut extrema tantùm delictorum leuiter tanguntur, nec ad interiora curatio accedit; vel, quod deterius, excusationes prætexuntur, minuentisque

disque ac leniendis, ac propugnandis denique malis rationes & quæruntur & reperiuntur.

E quibus provenit, ut inferiores aut non sentiant mala periculaque, quibus avertuntur; aut immania, quibus insistant, præcipitia, ruinæ proxima: aut vitia etiam virtutes arbitrentur, cum videant illa non damnari, imò & probari interdum ab ijs quorum prudentiæ commissi sunt.

Accedit, remedia seriùs plerumque ad-moueri, cum mala medicam omnem manum magnitudine sua aut respuunt, aut superant; cum leuissimis medicamentis in primis ortus sui initiis morbus omnis pelli vinci que potuerit.

Denique complacendi hoc studio vni-versa paulatim religiosa disciplina dissoluitur, dum Superiores inferioribus occasionem præbent quidlibet experiendi, quidlibet audendi; deueniturque pedetentim ad summa transgressionum fastigia, ad totius vocationis instituti que neglectum ac contemptum; dum singuli prope, vitæ sibi genus formant, quale pronus cuiusque in libertatem animus suasit.

Clauduntur hæc mala Superiorum contemptu. ferè enim in humanis, indiuiduo quodam nexu, placendi studium con-

temptus sequitur : neque enim aut in Superiore auctoritas , aut in inferioribus venerationis diu stare potest, dum complacendi suis studium , ad multa venerationi ex professo inimica Superiorem abiecerit. nam licet filialis quidam in inferioribus, tanquam in parentes amor , plurimum ad venerationem valeat ; nisi tamen sua parenti constet auctoritas , neglectus quidam sequitur, ac ingens paulatim etiam de patre existimationis diminutio : ut in omni bene constituta familia conandum sit, ut amoris filialis quidam timor permixtus sit, qui & paritatem tollat, & amico filiali que metu auctoritatem conciliet. ita in amore hominis ad Deum salutaris omnino metus intercurrit, ut dum amamus patrem, vereamur in offenso iudicem ac dominum. In Superiore etiam dum personam amamus parentis, timeamus Superioris : nam nisi hic timor amore comitetur obedientia diu consistere non poterit. Si enim omni Superioris persona deposita, solius se benignissimi patris, ac quasi matris vestiat qui preest, venerationis non leue naufragium patietur ; imò nec verus ille pater dicendus est, qui filiorum gratiam venatur, totumque se in illam profundit : amicus enim verius, aut inferior etiam illorum,

rum, quorum gratiam aucupatur, dici potest. nam in eo quo alterius beneuolentiam studiosius sibi comparare studet, Superiorem illum agnoscit, ut à quo affectus ac beneuolentiæ alterius beneficium speret; in quo parando ad non paucâ auctoritatem diminuentia dimittere se cogitur. è quibus paulatim venerationis loco ingens contemptus nascitur; quem ut non facile inferior exuet, ita nec Superior auctoritatem consequetur. semel enim hac proculcata, aut nunquam, aut perquam rarissime exurget. Conatum fors Superior adhibebit; at semel contemptus imbibitus, altiùs plerumque insidet animo, quàm ut pelli possit, maximè cum totum hominem occupauerit. Inde Superioris iam imperia nulla, & ex imperatis ea exequimur quæ probamus, ut obedientiæ mensura, voluntas ac iudicium nostrum sit.

Existimatio deinde tota deperit, & quidquid erat opinionis bonæ; sequuntur iudicia aliena & aduersantia, censuræ graues: nec domesticis se parietibus malum hoc tenet, perambulat seculares, & in corpus vniuersum abit.

Et ferè iusto Dei iudicio illos in primis patiuntur aduersarios, quorû parandæ beneuolentiæ impèsius studuerunt Superiores.

Remedia.

Certa bene gubernandi norma Constitutiones & Regulę sunt: quarum si serius obseruator & custos Superior fuerit, & ex illarum spiritu præesse studuerit, nec ad dexteram aut sinistram in huius aut illius gratiam deflexerit; nullo negotio & patris affectum, & Superioris auctoritatem tuebitur, pulchra, tuta ac necessaria etiam mistura. Nam vt à gubernandi prudenti regula decedit qui tantum parens est, ita ab illa degenerat qui tantum Superior est. vtrumque peritus regendi artifex coniunget; nec nimiam seueritatem induet, nec ad nimiam se benignitatem abijciet: nec Superiori necessaria auctoritate, nec patria mansuetudine se spoliabit. vtramque occupabit; vt sua in inferioribus amoris stet veneratio, suus venerationi amor: pari vtrimque pondere; plus tamen si habuerit patris, non damnum: integra in omnibus Superioris auctoritate & veneratione, vt nihil de hac patris demat amor.

Studium deinde vni placendi Deo: in quo si Superior certam spem ponat, illumque in omnibus actionibus intueatur, ad eumque studia, cogitata, factaque diri-

dirigat, non magno negotio quidquid optari in Religione potest, consequetur; ne humanos fauores laudemque aucupabitur, cælestibus pascendus. bene hîc Gregorius monet: *Rector solerter inuigilet, ne hunc cupido placendi hominibus pulset, ne, cum studiosè interiora penetrat, cum prouidè exteriora subministrat se magis à subditis diligere quàm veritatē querat*: & non magno negotio etiam temporalium difficultates superabit. Neque enim fieri potest, vt monitorum, consiliorum, mandatorumque suorum serium vigilemque obseruatorem destituat Dominus. quin magis crescet etiam Dei benignitas, crescente Regularum obseruatione; vt quasi pari passu & harum custodia & illius accrescat munificentia: maximè vbi Superiorem nullo humano respectu, sed solo placendi sibi studio, ferri & impelli viderit Deus: cui si studeat placere Superior, à quo solo præmia speranda sunt æterna; facilè præmiorum magnitudine & æternitate illectus, reliqua contemnet, nec tam sollicitè perituram gratiam suorum venabitur. Audiat Apostolum, *Non quasi hominibus placentes, sed Deo, qui probat corda vestra.* & ex se factus nobis magister, *An quaro hominibus placere? si adhuc hominibus placerem, Christi seruus non essem.*

Past. p.

2. s. 2.

1. Thes. 2.

Gal. 1.

Proderit verò non parum si sibi persuaserit fore, iusto Dei iudicio, ut eos experiatur aduersarios, quorum disciplinæ relaxatione beneuolentiam captauit. Et docuit non semel experientia, docetque indies, eos acriores hostes passos Superiores, quibus plus indulserunt, ut indulgentiam neglectus, contemptus, detractiones & odia sequantur; dum maiora semper appetit semel gustata libertas, indignaturque ad negata: ut aut omnia concedenda sint, aut violanda amicitia. & ut concesserint omnia, nusquam consistet, gradumque sistet hæc licentia: insurget in ipsum Superiorem, nec finem statuet, donec illum munere deiectum viderit. Ultima hæc ferè merces placendi est.

CAPVT XIV.

Nimia in suorum aliquem fiducia.

QUÆ res cum aliorum æmulationem & inuidiam utrique comparat, tum magnis obnoxia periculis est; ne aut talis animos sibi sumat maiores, aut partem ad se trahat gubernationis, subditorumque à Superiore animos deducat, ac in se transferat; obedientiæ vim infringat, eaque ingeren-

gerendarum rerum actionibus committat, quæ & dedecori Superiori & damno sint, bonoque Religionis nomini non parum derogent. Et ferè videmus tales non postremam ad se gubernationis partem trahere. ita nimirum nimiam fiduciam confurgunt animi, ut omnia sibi concessa arbitrentur, quibus nimio quodam fiduciae nexu colligati Superiores sunt.

Non probo diffidentiam in altero extremorum sitam: mediocritas laudata: ut neque in omnibus morosa quadam prudentia, nimiamque complacentia tui diffidas; neque prodiga fiducia omnia credas. temperetur fiducia metu, ut nec omnia subtrahas, nec omnia largiaris. Consultumque in primis est, Superiorem in omni etiam probatissimo, viroque aliam maximo, oculos in omnem partem intentos habere. plus tamen uni, quam alteri confidat, in tanta hominum varietate necessum est. Nam & testata unius virtus, prudentia, circumspectio, plus fiduciae iure quodam suo deposcit. Neque prudens omnes eodem metietur pede, circumspectabit singula, mores omnium, vitam, probitatem, & pro cuiusque talento ea committet, quæ tuto committi posse arbitrabitur.

Ac licet plurima sæpe spectata alicuius
vir-

virtutis ac prudentiæ viro committi posse ratio suadeat, ita tamen res instituatur, vt nihil agendarum rerum Superiorẽ lateat; vt & rationem reddere petentibus possit, & extra sollicitudinem versetur, neque se nimia in suorum aliquem fiduciã, ignarũ in discrimen ac pericula coniectum serò queratur, viamque inter præcipitia, cùm euadendi spes nulla superest, circumspiciet. & sanè rarò quisquam eo conatu res alienas, quo suas tractat, aut deliberationem aut laborem magnitudini parem ad-mouet, cùm ex euentu ferè res omnes metiamur; quarum fortunatus infortuna-tusque exitus cùm maximè in Superiorem cadat, magis plerumque illi de propinquo res cordi est, tanquam laudis & vituperationis materies & scopus.

Et nescio quid aliquando interueniat humani, cùm laudem omnem videamus accrescere Superiori, laborem omnem esse nostrum, commendationẽ illius. quæ res negligentiam interdum auget, socordiam nutrit, & mistis aliquando æmulationis aculeis exasperat animum, & ad pœnitenda deducit. ita studio nonnunquam sperata alteri gloria decerpitur, neque exequimur quod licuit, verentes nimirum, ne quantum laudis accedit alteri, tan-
tum

tum decedat nobis: quæ res etiam expro-
fesso in non laudanda non vnum in aliena
re impulit, non tam odio alterius, quàm
studio amoris laudisq̃ue sui.

Accedit quòd tales ægrè postmodum
reuocari ad cõsuetam Religionis normam
reliquorum more possint. Quòd si pergat
Superior vrgere, quæ concessionibus coa-
luerat amicitia, dissoluitur, vertiturq̃ue in
odia amor, & in criminationem Superio-
ris: crescunt deinde suspiciones, & profi-
ducia diffidentia nascuntur, mutua de-
mum accusationes & contemptus, præ-
teritarumq̃ue actionum depressiones, &
quæcumque etiam antè cum laude gesta,
in dubiam vocantur fides. Ex fauo nimi-
rum fella & venena suguntur.

Sed neque bene consulitur illi, quem
hac fiducia Superior firmavit: nam & do-
mesticorum reliquis suspectus hic esse in-
cipit, vt etiam consuetudinem illius fu-
giant, familiaritati se subtrahant, minùs
fidenter agant, consilia respuant, dicta fa-
cta q̃ue illius in alium longè ab auctore
sensum trahant, planeq̃ue ingenti apud
omnes diffidentia laboret, actionesq̃; pro-
pè illius omnes etiam probæ in sinistram
rapiantur partem. Ita omnium talis & be-
neuolentiâ excidit, & inuidiam in se pro-
uocat,

uocat, in quem nimia Superiorē rapi confidentia senferint: tanquam omnium petendus sit telis, qui vnus Superioris clypeo protegitur. Familiare malum etiam inter vnus patris sobolem. cū enim profusiore in vnum senferint animo parentem ferri, mutua reliqui conspiratione in vnum feruntur; oppugnaturque ab omnibus, quem nimia patris supra reliquos beneuolentiæ fiducia tegit: maxime cū parentis ille in se affectu elatior, omnia sibi licere arbitratur, & in fratres, vnus vteri & paritatis oblitus, impotentius insurgit, reliquisque negata fidenter sibi assumit, nec iam fratris sed patris in fratres personā assumit. Vix enim humanum est in nimium secundis animum moderari. assurgimus surgente fortuna, & iisdem passibus extollimur, & dispares felicitate, matris licet vberē & sinu pares, caput efferimus, & ad imperia ē fortuitis conuolamus, paritatis immemores; priorisque fortunæ obliti, ē sola externa felicitate prærogatiuam metimur. inde iam indignationes, & in vnum caput, tanquā inimicū, hostiles molitiones; nec infidiarum machinationumque finis est, donec penitus euertant, quem Superioris indulgentia efferri supra reliquos viderint.

Quod

Quod dum fit, ingentia partium confurgunt studia, & magna vbique area mutuarum detractionum aperitur, illeque fortunatus censetur, qui socium quaqua demum via gradu turbauerit.

Remedia.

EX paritate in omnes sumenda sunt. fiet hoc, si par in omnes Superioris feratur amor: si singulos non ob priuata cōmoda, aut ingeniorum prærogatiuas, sed quòd vnus patris Dei, vnus matris Religionis filij sint, amore prosequatur.

Non nouit hæc discrimina Dei amor, nisi ex virtute nata: ac ne tunc quidem palàm aperienda: tacitus apud se potiùs veneretur hos Superior, committatque ita negotia, vt ipse tamen intentum in omnia oculum teneat.

Neque vni tantùm speciosissima credat, sed aliorum etiam non rarò virtutem experiatur, quando sine damno potest.

Neque cum vno plurimùm sermonem misceat, sed pro re nata varios etiam libēs admittat, & vltro etiam prouocet, animetque si quid rectum ab illis factum; ac sicubi erratum, paternè moneat, errorem ostendat; ita tamen vt modum præscribat, quo corrigi ille possit.

Nec

Nec ideo vniuersim à negotiis tales excludat; sed vbi illa commiserit, præmoneat, modumque præscribat. quòd si iam ex præscripto feliciter egerint, laudet illos, & ad maiora hortetur.

Quòd si quem innata prudentia probitasque maioribus dignum suaserit, vt meritò plus illi credi possit & debeat: neque enim omnium par industria, sapientia, solertia, fides, rerumque experientia est; is omni studio deuitet ne qua parte supra reliquos se efferat, ne quid muneris Superioris ad se trahat, ne aliorum se familiaritati subtrahat, ne potiores dignioresque partes assumat. sed contrà rara in omnes beneuolentia ac humanitate feratur, inferiora, quæque plus laboris molestiarumque quàm splendoris habeant, vltro sibi deposcat, & oblata cum magna hilaritudine arripiat, illustriora lubens aliis deferat, concedique gaudeat: bene de omnibus, & si potest splendide; de se suisque non nisi modestissimè loquatur, aut vniuersim sileat. errores si qui, vt in humanis solent, occurrant aliorum, aut in totum diluat, aut quantum potest minuat eleuetque, omnibus benignus, vt minimis etiam prout occasio tulerit assuescat, quam etiam studiosè nonnunquam in-

qui-

quirat, ne quis meritò contemptum aut neglectum se ab illo queri aut suspicari possit. Sic fiet vt omnium omnino beneuolentia iudicioque, reluctanti etiam potiora omnia deferantur, felicesq; se reliqui arbitrentur, si in rebus suis consilio illius vti possint. tantum in humanis humanitati iuncta modestia valet.

CAPVT XV.

Priuatæ necessitudines & amicitia.

NON sunt hæc signa veri amoris. contingit enim his quod simiæ, quam cùm mater fortiùs stringit, perimit: ita quos arctiori sibi familiaritatis vinculo Superior innectit, perdit. nam cùm in his prouocet nimiam fiduciam sui, audaciã, fastum, aliorum contemptum; aliorum etiam in hos offensiones concitat, diffidentias, non inanes sinistras suspiciones, murmurationum ac detractionum non vulgares causas. vt non immeritò talis dicere Superiori possit, *Eleuans allisti me*, ad inuidentiæ nimirum breuia, ad æmulationum scopulos, ad liuoris vada.

Contingit etiam nonnunquam, vt his moribus dicere liceat præpostero planè

naturæ ordine res ire . neque enim non rarò non tam Superior domui , quàm talis Superiori & domui imperat , cùm plures sæpe ad hunc quàm ad Superiorem decurrant. Difficilis nimirum ad Superiorem aditus , facilis ad hunc est ; nec quidquam tam magnum quod per hunc non consequantur . negasse enim postulata , amico negasse est : quem cùm nolit Superior offendere , aut mœrentem dimittere , omnia concedenda sunt , aut sanè amicitia renuntiandum est.

Nascuntur deinde dissimulationes defectuum in iis , quibus familiarius adstringimur ; cùm eos vel amor tegat , aut offensionum metus dissimulet , aut priuatæ necessitudines libertatem adimant , aut arctiores mutui nexus monita respuant , nec iam admittant personam patris , multoque minùs iudicis.

Crescit dein ex hac familiaritate in inferioribus audacia , quæ ferè familiarem coniunctionem comitatur . contemptus denique , quem à familiaritate , tanquam sobolem à parente , videmus nasci ; vt indiuiduo ferè hæc nexu coniungantur , magna necessitudo , & ad intima quæque admissio , & minor æstimatio . Neque enim fieri potest , quin multa in illa familiari-

liaritate improbanda, aut sanè non probanda deprehendamus, quæ priùs ignorata admirationem & venerationem provocabant. quæ duæ res dici non potest quàm validè in omni gubernatione Superiori auxilio sint, cùm sæpe opinionibus gubernatio contineatur: quod & in laude & contemptu plurimùm valet.

Quare cùm non probem nimiam in Superiore retractionem, ac solitudinem; tum nimis prodigam ac profusam familiaritatem probare non possum. Nolo in Superiore aliorum fugam; neque ad intima tamen omnia perfacilè quemquam admittendum suaserim; non quòd aliquid committi velim, quod alienum oculum vereatur, sed quòd non faciat ad venerationem, opinionisquæ magnæ antè collectæ augmentum, vniuersa referare & expandere.

Scio non vereri illum homines qui illaudanda committit teste & iudice Deo; nec erubescere debere ad alienum prospectum, cui frons colorque stetit in oculis omnia videntis Domini. At ille non tam euentu, quàm animo res metitur; nos ex ingenio nostro, nudisquæ non rarò opinionibus innixi, iudicium plerumque de toto homine ferimus: & aliquid aliquando

liberius aut vidisse, aut audisse, plurimum de concepta existimatione minuit. lapsus est verbo, improuidum aliquid excidit, minus maturum, minus serium? vniuersim de omnibus iudicamus. remisit aliquid Superior de consueta maturitate, vt non raro in intima illa familiaritate assolet? preiudicia nascuntur.

Iam cum ad omnem bene gubernandi rationem plurimum opinio momenti conferat, hanc verò nimia necessitudo, & ad abditissima quæque admissio diminuat; nemo paulo prudentior ad illa suos admittet, nisi ea in omnibus, etiam secretissimis vtatur circumspectione, vt nec hostiles in iis oculos vereatur. Quod cum rarissimum in homine sit, neque quisquam facile ad eum prouidentiae gradum conscendat; non facile etiam aditus ad omnia aperiendus est. Magnus ille, cuius omnia patere possunt omnibus, & qui nec in cubili, aut strato, in mensa, animique corporisque exteriore laxamento, inimicum testem ac iudicem vereatur. Nisi ergo omnia, etiam inter priuatos parietes, priuata colloquia ea sint, quæ quis meritò admiretur, imitetur, laudet; non suaserò ad omnia, ostia reserari.

Quòd si quando tamen faciendum necessi-

cessitas ac ratio poscat; videat Superior, quem admittat, quem intimorum omnium suorum testem, ac quasi iudicem statuatur. Rarissimi enim sunt, etiam in circumspicissimum Superiore, quibus tutò hæc sine venerationis diminutione credi possint, qui non faciles ad offensionem sint, qui sciant res temporibus metiri, qui homines cogitent, non Angelos, qui parua vitia magnis virtutibus norint integere, qui nullo sæculo cogitent fuisse quemquam, cui non aliquid, maximè inter domesticos parietes, ignoscendum fuerit: qui circumuolitantes errores, tanquam pulueres Aquilone sparsos, magnarum virtutum factorumque scopis norint detergere, qui que volaticos hos diurnorum vitiorum cineres, illustrium ac generosarum operationum serie, tanquam valido vento diffilare didicerint. Tales ubi nactus fuerit Superior, fors poterit ad intima quæque admittere.

Remedia.

FRequens in Superiore consideratio muneris sui; omnium se esse, non vnus, aut paucorum parentem; omnes pari sollicitudine, non vnum alterumue curæ ipsius commissos; omnes pari iustitiæ &

charitatis lege concreditos; omnesq; pari sanguinis & adoptionis iure, Dei ac Religionis magnę ac facundę matris, filios esse.

Cogitet deinde Superior, vnus omnes corporis membra esse. quare pari omnia cultu & obsequio obseruanda. quid? quod Apostolo teste vilioribus maiorem honorẽ circumdemus. & fatuum omnino est vnus membri cultui totum se tradere, reliquis destitutis. quid enim nisi non modò reliquorum, sed & huius corporisq; totius interitus expectandus est?

Frequentata consideratio diuinę glorię, quę sepositis priuatis affectibus, ad omnium perfectionem & amorem pari iure deducit.

Periculorum, quę ex his familiaritatibus nasci consueuerunt, considerationes; ac illius in primis, multa ferè in his necessitudinibus amico cõmitti, quorum pœnitudo grauis auctori est. Factus enim quodammodo Superior illi seruus est, cui animi sui secreta committit, cùm illum variis iam nominibus obstrictum teneat; maximè cùm iustus ille insurgat metus, ne, si quam alienationis causam præbeat, prodat amicè concredita. Atque hinc iam dissimulationes illę nascuntur, quę inferiori omnis licentię ianuam aperiunt, vt

periculum sit, ne contingat in hac familiaritate Superiorum, quod Ezechiae regias opes ostendenti: vt, cùm animi sui reconditos thesauros alteri reserauerit, bella exspectet, & reconditarum in eam diem opum expilationem.

Vetus illud dictum tacitus sæpè secum voluat Superior, & ab ipsa prudentia dictatum: *Secretum meum mihi*. Neque enim infelicius quidquam eo est, qui celare consilia sua non potest, quique animi sui morbos in alterius effundit sinum. Non est talis regimini natus, cùm primū summumque prudentis bonæque gubernationis fundamentum sit, nosse silere. quod non poterit, qui se suaque in familiarioris sibi pectus effundit. quod in omni propè familiaritate vsu venire solet. Iam cùm hic familiaris alium fòrs sibi familiarem habeat, quem nihil celare consuevit, fit vt intima quæque Superioris prodantur. quæ res ingentium secum incommo-
dorum seriem trahit.

CAPVT XVI.

Defectus boni exempli.

FErè enim omnium oculi in Superiore versantur, & dux ille suis vt ad virtutem, ita ad vitia est; proniq̃ue maximè iuniores sunt in Superioris imitationem; manentq̃ue hæc viua morum illorum exemplaria in omnem etiam ætatem impressa menti; & transcunt in posteritatem, tanquam morum regulam: vt religiosè ille viuere videatur, vocationemq̃ue expleffe, qui Superiorem moribus refert, dictaq̃ue factaq̃ue illius exprimit, eo etiam magis, quo propiùs ad illum accesserit. Præclare Nazianzenus, *Neque enim vel indelebilem tincturam pannus, vel fætidum aut suauem odorem res admota ita facile contrahunt, vel exitialis quidam vapor tam facile in aërem diffunditur, ac per aërem animantia occupat (quod quidem pestis est & appellatur) quàm subditi Antistitis improbitate celerrimè impleri solent, & quidem multo faciliùs quàm virtute.*

Quo grauior reddenda ratio Superioribus erit, cum non ignorent, dicta factaq̃ue sua in exemplum & imitationem posita; nec quicquam in sequelam efficacius esse Superiorum moribus, qui tanquam benè

& religiosè viuendi prima quædam principia ac pronunciata habentur.

Maiores deinde scandala è Superiorum erroribus metuenda; quorum quo illustrior locus ac dignitas, eo periculosiores defectus sunt, & vniuerso corpori nocentiores. vnde etiam illud metuendum, *Potentes potenter tormenta patientur*. Hinc Gregorius: *Nullum, puto, ab aliis maius præiudiciũ tolerat Deus, quàm à Superioribus, quando eos, quos ad aliorum correctionem posuit, dare de se exempla prauitatis cernit: quando illi peccant, qui compescere peccata debuerunt.*

Homil.

17. in

Euang.

Et ad gloriam plurimũ facit, exemplo ad virtutem præluxisse. Sanè à moribus ferè Superiorum vniuersa domestica disciplina, reliquorumq; mores pendent. verba rebus inania plus etiam non rarò offensionis, quàm documenti secum ferunt; res ipsæ viduatae licet verbis, & inornatae, nihil detrahunt natiuæ venustati: imò non semel plus roboris ac pulchritudinis, res nudæ, omnique adscititio ornatu spoliatae, quàm nobili aliqua dictionis purpura vestitæ ostentarunt. facere, viri, & religiosi est: & plurimũ rebus potentes, verborum inopes; verbis diuites, rerum inopes sunt. & è millibus vix vnum alterumue, cui omnia concessa, reperies.

Inlocuplete namque verborum copia, rei parum esse solet, cùm inopia verbis iuuari velit: in opulenta rerum copia, verborum minus est. neque enim alienis splendere aut fulciri vult domesticis diues. imò murmurationum non leuem causam præbent fortia verba emedullata rebus, cùm non respondent monitis facta; & illudere etiam incipimus & obloqui passim. exaspere nempè animos solent mortua verba, rebus, id est vita sua, destituta, & prouocare in æstimationis suæ derogationem.

Sanè vt nihil ad inuitandum potentius Superioris exemplo est, ita nihil ad omnẽ illi auctoritatem venerationemque tollendam validius, quàm cùm verba factis aduerfantur. Et frustra talis malis medellam sperabit, aut suorum morbis medicinam adferet. respuet hanc manum æger animus, nec altè imbibet, quod à superficie, & à solis Superioris sui labris natum videt. Quare si sperare valetudinem suorum debet, si aut collabentem erigere disciplinam, aut ne collabascatur tueri, si interpescentem accendere pietatis ardorem, aut illius nutrire flammam, si immania alterius sexus præcipitia vitare, si mutuam animorum coniunctionem maiorumque imperia stare, reliquaque quæ ad Religio-

nis

nis tuitionem, damnaque vitanda necessaria sunt; manum Superior admoueat, exercituumque imitetur ductores magnos, qui non tam lingua, quam manu prompti & exemplo, ad ardua quæque audenda suos inhortati, fortiter facere, quam bene dicere maluerunt. Faciendo nimirum, non dicendo res magnæ geruntur: nec quisquam facile paulo generosior miles præeuntem destituet ducem. pulcrum namque per illius vestigia triumphum mereri; per illius sudores hostem ferire; per illius sanguinem, hostilem bibere: idemque à Christo discimus, qui non antè docuit, quam opere expleuit: *cæpit* nimirum, Scriptura teste, *facere & docere*, ut exempla præcesserint, monita secuta sint: quæ tunc demum potentiissima sunt, cum opere tanquam clypeo & vallo armantur. nec quidquam iam inferiori durum ac difficile: præeat modò Superior, nec tam verbo, quam re ipsa ducem se præstet, ut non tam monitor, quam ductor sit: primus enim si ille ad ardua manum porrexerit, sequentur reliqui vel sola verecundia impellente.

Hæc demum una & vera omnis bonæ gubernationis via est; neque res vlla validior certiorque est quæ bonis iuxta improbisque plus animorum addat, & ad virtutem

tutem incitamenti: qua etiam vna deficiente, nihil solidi sperari potest, nihil quod ætatem ferat, quod laudem mereatur, quod probatis maiorum moribus respondeat; dum singuli suo spiritu feruntur, & totiam Religiones, quot capita enascuntur. In diuersa namque studia & partes scindi necessum est eos subditos, qui aut ductore carent, aut solis monitis præcuntem Superiorem viderint, verbis nimirum multa pollicentem, inhortantem, sed verbis solis, rebus animaque, vt ita dicam,

*Cassiod.
lib. 11.*

Var.

cap. 8.

Ephrem

de vita

spir. cap.

37.

sua viduatis. Neque enim potest auctoritatem habere sermo, qui non iuuatur exemplo; dum iniquum sit bona præcipere, & talia non egisse. Nihilq; aquè animum ducit ad salutem, iunior eq; ad laborandum incendit, atque si doctorem re ipsa & exemplo ad virtutem cohortatorem inuenerint.

Remedia.

FRequens meditatio reddendæ rationis Deo, maximè cum vitia Superiorum eant in exemplum suis posterisque.

Feruida incentiua amoris vocationis suæ. Sic fiet vt instituti sui amantes, totos se in virtutum studium profundant, maximeque illarum, quæ Religionis suæ propria sunt.

Frequens cogitatio muneris sibi impositi, quare ad illud à Domino delectus fuerit: quid ipsi ratione illius incumbat: quàmforti exemplo cogatur imperio Dei præire militiæ huius dux constitutus: qua in Superiores suos obseruantia, quo humilitatis, paupertatis, castimoniæ studio, quo quantoque ad labores animo, qua ad imperata promptitudine, quàm benigno blandoque in delatores suos animo, in eosque quos alieniores à se deprehenderit, maximè si paria à suis exigat, & sperare audeat.

Seria cogitatio grauissimorum incommodorum damnorumque quæ defectu boni exempli Superioris, nasci solent, non parum iuuabit: maximè si bis per diem Superior, examinum conscientiae tempore, secum tacitus consideret, num in aliquo deliquerit, quod aliis ad deteriora incitamento esse possit: num quid omiserit, quo dux suis auctorque ad virtutem esse debebat & poterat.

Proderit non parū, si domestico suo confessorio liberam monendi facultatē concesserit, quandocumque minùs religioso exemplo præeuntem viderit, aut audiuerit; gratamque sibi illam monitionem fuisse hilari lætoque vultu ostenderit.

Iuua-

Iuuabit etiam plurimùm, si vltroneam sibi certamque in omni deteriore exemplo poenam irrogauerit, vt hac quasi monitrice ad saniora melioraque flectatur.

CAPVT XVII.

Executionis defectus.

FRustra namque ordinationes, regulæ, constitutiones, instructionesque conduntur, nisi frequens Superiorum accedat inculcatio, ac strenua ordinarum rerum executio. Neque quisquam prauas consuetudines, & quæ altè radices egerunt, leui & intermittente manu excadicabit. assidua cura, non cessantibus laboribus eruuntur nocitura; & facile itur ad ingenium, nisi vigilans accedat sollicitudo, quæ non patiatur vetera succrescere: cùm ferè proni rapiamur ad ea quibus olim assueuimus. & procliuior semper lapsus ad deteriora, ad recta difficilior exscensus est.

Accedit inferiorum in his omnibus neglectus, cùm videant Superiores in benè prudenterque conditarum rerum executionibus tepescere: nasciturque adeò in illis fastidium quoddam optimarum licet

& vtilissimarum ordinationum, cùm sentiunt Superiores tam ignaua manu in illas incumbere, satisque habere, semel denuntiassè: nam & illi satis tunc habent, semel audisse. Nec sanè maior à subditis in peragendo, quàm à Superioribus in exequendo diligentia meritò exigì posse videtur.

Quæ res vbi accidunt, vniuersam benè constitutæ Religionis disciplinam paulatim marcescere necessum est: succeditque hoc Superiorum neglectu, densa tandem optimarum rerum obliuio, peregrinarumque rerum in patrio, tanquam in peregrino solo studium; vt nusquam iam minùs, quàm in re nostra domi simus, alteriusque potius, quàm nostræ Religionis ciues videri possimus.

Nascitur verò hæc in Superiore incuria, vel ex innata quadam naturæ ignauia, vel è pusilli pectoris angustiis; cùm aut difficultatibus occumbūt, aut plus æquo subditos reuerentur, aut executionem desperant, siue rei magnitudine victi, siue suorum virtuti, siue viribus suis diffidentes. Nam & molestias, quæ se offerunt, diffugiunt, labores sudoresque auersantur, commodorū suorum studiosi, & difficultatibus succumbentes, nunquam ad ardua protendunt manum, & dum placere stu-

dent

dent omnibus, nulli fastidium aut molestiam creare volunt.

Quòd si suorum obstricti beneficiis Superiores sunt, duram seruiunt seruitutem, & animus ad imperata exequenda deest: quibus si quid commiserint, quod cuulgarī metuant aut erubescant; tanquam inter vincula & compedes constituti iacent, facti mancipium suorum.

Iam si non modò Superior ad hæc non adijciat mentē, sed tædio victus, vel, quod deterius, alienior ipse ab imperatis flaccescat, nihil est quod in aliis speret. ipse si præcedat, & prior calcet viam; non deerunt qui sequentur, vel solo rubore impellente. Nec quidquā tam potens, quod non Superiore ductore vltro lubentes exequantur inferiores, & inclament, Etiam illo duce, medijs inter arenas, fluctus, scopulos, serpentes, ferrum & ignem benè nobis est, & habemus benè; vt qui eandem cum Superiore non inuiti fortunam subeant, gaudentes illi inter aduersa parari. Brevis proinde ad felicissimam executionem quantumuis maximarū rerum semita est, Superiorem præire, & exemplo suo executionem vrgere, nec antè ad monita descendere, quàm opere, quod imperat, expleuerit.

Remedia.

Assidua Superiorum in subordinatos sibi Officiales vigilância, monita, peractarum rerum inuestigatio, seriaque in res omnes excubatio: vt nimirum domum ipsam non infrequenter obeat Superior, singulorum munia lustret, curiosiusque nonnunquam perscrutetur quid in vnoquoque genere à singulis peragatur; qua fide, industria, religione, studio, exemplo, diligentia.

Frequentes cum primis domus suæ Patribus de ordinationū executione consultationes, conferentiarumque spiritalium sedula institutio: in qua per occasionem sæpius in exequendarum rerum monita excurrat, neglectæ rei causas disquirat, aperiat, remedia præscribat.

In Officialibus omnibus diligens impositorum munium administratio, maximeque illius qui Superioris loco domui præest, illiusque vicariam administrationem sortitus est: quem in omni hoc genere quàm instructissimum necesse est esse.

Consequetur hoc, si frequenti lectione ac praxi ordinationes omnes familiares sibi reddat: neque impunitos transgressores

res permittat, nunc monendo, nunc laude etiam præmioque diligentibus proposito, pœnis etiam; maximè cum malum grauius est, quàm vt mollioribus flecti possit: tunc enim ad duriora descendat; ita tamen vt aspera succedant dulcibus, minasque ac pœnam amoris præcedant linimenta, & quidquid ab huius locuplete officina depromi potest, ægrienti porrigatur: quæ si respuat malum, ad acriora veniendum erit. nec finis medicamenti statuendus, donec depulso malo victrix stet diligentia.

Multum, vt in aliis omnibus, in hac re valebit seniorum exemplum, maximeque eorum qui varia in Religione munia obierunt. Sequentur enim iuniores, vel solâ verecundiâ, ac tanquam filij patres imitabuntur. Ad laborandum proinde omni conatu Superiori est, vt seniores ad exempla iunioribus statuenda prouocet.

Conandum deinde ne nimis multis subditi obruantur, ac tanquam molibus insepeliantur potius quàm iuuentur. facilis enim aut desperatio, aut fastidium, aut neglectus è multitudine est. frequensque præscriptarum rerum mutatio, magno executioni impedimento esse solet. indignationem enim illa nauseamque prouocat,

venerationemq; minuit, cùm inconstan-
tiæ opinionem ingerat.

CAPVT XVIII.

Disciplina neglectus.

EST verò *disciplina* custos spei, retinaculum
fidei, dux itineris salutaris, fomes ac nu-
trimentum bonæ indolis, magistra virtutis. &
Hugone Victorino teste, desideriorum car-
cer, frantum lasciuia, iugum elationis, vincu-
lum iracundia; quæ domat intemperantiam,
leuitatem ligat, & omnes inordinatos motus
mentis atque illicitos appetitus suffocat. cuius
negligentia à Superiorum indulgentia, &
innato quodam animi tepore, à noxia cle-
mentia, à placendi omnibus studio; à lan-
guore quodam animi, & à Religionis a-
more degenerere; à politico denique spiri-
tu, exiguaque aut nulla salutis suæ & suo-
rum cura nascitur; aut sanè à nimis Supe-
rioris in externa diffusionibus. quo fit
vt cùm totum illum sæcularia occupaue-
rint, ac vltronea quadam addictione vni-
uersum obsederint, domesticæ suorum di-
sciplinæ intendere non possit; plurimaque
elabantur, fugiantque memoriam illius
tanta externorum negotiorum mole cir-

Cyprian
lib. de
discip.
& hab.
virg.
Lib. 2.
Instit.
Non. c.
10.

cum septam & oppressam. Exurgit hinc lassitudo quædam mentis, &, dum quidquid roboris habet, exerit in externa; destituitur in domesticis, viribus, comedunt nimirum alieni robur eius. raroque vni homini ad tam diuersa, ac inter se pugnantia, quæque singula totum hominem requirunt, vires suppetunt, vt animi non desint.

Iam vbi semel laxatis habenis Religionis rigor intepuit, prono cursu, & præcipiti veriùs prolapsu in supinum omnium propè neglectû ruimus; cùm vnus alium trahat, nec solitaria in vno stet ignauia, sed prono semper cursu in deterius labatur, donec ad extrema deuenerit, grauiû corporum more, quibus stetisse iacuisse est.

Sequitur verò ignauiam quidam discipline contemptus. Inde iudicia profiliunt critica, quædam in primis, inde vniuersim omnia damnantia; & aliud iam vitæ genus cogitamus, amamus, laudamus etiam palàm, & vigilantioris Superioris, veriùque boniùque tenacioris studia contemnimus & ridemus. quòd si palàm non audemus, clàm eleuamus, & detractum imus nomini, & damna di caussas seduli disquirimus: vt si semel è quocunque capite malè audi-

re cœperit, in omnibus displiceat; & pro diligente ac instituti amante, imprudens, immitis, feuerus, ac crudelis demum audiat.

Succedit inde spiritualium rerum nausea, animique ad salutaria languentis fastidium. displicent quæ placuere antè, vertunturque optata priùs mella in absynthium, & fel merum. intepescit virtutis studium: & qui antè etiam de genu pugnabat, mixtosque quasi sanguine dentes lætus in spiritali lucta deuomebat, mille antè animas positurus, quàm leui se crimine obstringeret; nunc vel solo eminusterrore, tenuique prouocamento, ac ultro etiam nullo hoste impellente, sciens volensque inter grauissima scelera, tanquam inter sociam amicamque sibi arenam voluitur. bibit nimirum iam ille gaudens iniquitatem, qui omni morte, omnibusque antè tormentis grauiùs leuissima quæque detestabatur, & ad solius delicti, tenuisque transgressionis nomen perhorrescebat.!

Profiliunt deinde in inferioribus ex hoc Religiosæ disciplinæ neglectu mala propè vniuersa. orationis antè omnia tepor, ac quoddam spiritalis progressus frigus geluque, diuertimur inde ad externa, ad

ſæculares confabulationes, iocos, riſus, ad cibi potuſque delectum, ad commodorum ſtudio, laborum fugam, otij amplexum; ad priuatas deinde amicitias, partiumque ſtudia. totuſque exinde homo in omni propè tam domeſtico, quàm externo congreſſu, ſæculum magis, quàm Religionem ſapit & loquitur.

Nec mirum. nam cùm in vnoquoque Ordine, regularum conſtitutionumque tenaci diſciplinâ tanquam habenis Religio ſtringatur, ac tanquam ſalutis vinculo arctetur; fit vt qui illa laxauerit, pronam natura ſua in libertatem humanam mentem, tanquam iniecta manu in præcipitium propellat. maximeq; hoc locum habet in iunioribus, qui necdum in ſolidum confirmato animo, tenera etiam nũ ceruice, priſtinæque licentiæ ac commodorum memores, laxatas vniuerſim excutunt habenas, ac in veterem ſe vendicant noxiam libertatem; perituri, niſi prudentior Superioris manus fræna ſtrinxerit, loraque animæ æternũ profutura arctauerit. Indoleat licet ac ingemiſcat iuuentus arctius iam habita; gaudebit poſtmodum, & has Superioris ſui manus ſeueriores, vbi ad ſe & ad primogenium Religionis ac diſciplinæ ardorem ſtudioque redie-

redierit, deosculabitur; & clementes mitesque appellabit, fatebiturque agnosceretque patris fuisse, quas iudicis arbitrabatur.

Remedia.

A Superioris manu vigilique cura pendenda sunt: qui si se secularibus proximorum negotiis, quoad populi locique conditio patietur, expediuerit, totumque se tuendae firmandaeque disciplinae dederit, perfacile illam stabiliet. neque magni moliminis erit non accersere, non ad se trahere, non sponte se externorum occupationibus induere; à multis etiam oblati, ac incurrentibus se subducere, quando sine merita proximorum offensione, ac diuinæ gloriæ nominisque diminutione, æstimationisque Religionis, salutisque aliorum detractioe fieri potest. Prima proinde cura sibi commissorum sit, quibus arctissimis iustitiæ legibus obstrictus est. reliquum verò quod à suorum illi cura temporis superest, externorum salutis impendat; memor semper primam curam debere esse suorum tanquam patri, tanquam pastori, seueramque ipsi aliquando illorum reddendam rationem Deo.

In omnem deinde Superior partem in-

tendat; perspecta domestica habeat, moresque propensionesq; animorum singulorum; illisque antè omnia incumbat, quæ Religionis iugulum petunt: qualia esse possunt, feminarum frequentata familiaritas; sociorum fuga; aulici, politici, sæculumque sapientes mores colloquiaque; detractiois vitium; externos ad Ecclesiasticas, seu sæculares dignitates commendandi studium; mutuae domesticorum, aut gentium dissensiones; aberratio ab vniuerso vocationis spiritu; obedientiæ ac totius orationis neglectus; & huius generis non pauca.

Minora tamen his non negligat, sed serios in omnem partem oculos animumque intendat. Frequentibus dein consultationibus insistat: è quibus aliorum etiam ore domesticas res discat.

Quæ si ea fide, & pastoralis ac paternæ qua obstringitur cura serio, & non cursim præstiterit; non erit difficile Religionis disciplinam intra imperatas regularum leges continere.

Curandum etiam, vt in transgressores poenitentiarum vsus vigeat, in quibus nec nimis morosum frequentemque esse conuenit, ne à frequentia contemptus nascatur, & consuetudo in naturam transeat,

confuescatque cui imperantur pudorem exuere: nec nimis remissum, ne conniuentia accendatur malum. mediam viam ingredi tutissimum, vt nec clementia, nec seueritate nimia peccemus. minora minoribus, grauiora grauioribus puniantur.

Detque operam Superior, vt intelligant delinquentes, meritò talia iniungi, cauendumque serio, ne qua in his personarum acceptio eluceat, ne quod in vno indulgemus, puniamus in alio: grauis enim ex hac personarum acceptione obloquutionum occasio exoritur, dissensionumque materies datur.

Videat deinde Superior lapsuum causas, fortuitæ sint, an præcogitatæ; à fragilitate quadam animi, an à permixta improbitate proueniant; rariùs aliquis, an frequentius in idem incidat; præcesserint aliquando monitiones, an secus; auctor aliis fuerit, an alios secutus; è pronitate quadam naturæ, minusque prouida circumspectione, an è contemptu natæ. quæ singula pœnarum grauitatem augent aut mitigant. ignoscat non rarò, monuisse contentus. nec facilè ob priuata delicta aut vni tantùm alteri uenota publicè puniat, ne subditorum exacerbetur animus.

Magna etiam pars melioris disciplinæ à Præfecto spiritus dependet; qui si cum Superioribus magnis animis cōspiret, non magno negotio, quidquid hîc languoris est ac neglectus, erigetur in melius, in ardorem, & obseruantiq; quendam zelum.

Inuestigandæ demum seriò causæ sunt eneruatæ disciplinæ, & è quibus ferè domestica in Religione disciplina detrimētum capere soleat. quales ferè sunt

1. Inutilium multarum personarum admissio, qui vel ob valetudinis tenuitatem, vel ob iudicij debilitatem, vel ingenij duritiem, vel ad seditiones odiaque concitanda pronitatem, vel ob prauorum affectuum insolentiam, vel pessimorum habituum inueteratam consuetudinem, vix subeundæ disciplinæ idonei sunt. à quorum omnium admissione remotissimum Superiorem esse conuenit.

2. Laxior Nouitiorum institutio. quos nulla postmodum arte ad disciplinæ rigorem adducas, & antè frangas quàm flectas. quare seriò illis nouitiatus tempore inuigilandum, ac seueriùs etiam nonnihil, minusque molliter ac blandè habendi. facilis est nouitiatu expleto seuerioris disciplinæ remissio: difficillima concessæ libertatis restrictio.

3. Pietatis ac orationis neglectus. è quo Religionis zelus extinguatur, ac in regularum ac constitutionum omnium neglectum itur. vis disciplinam florere, da operam ut orationi omnes sedulò incumbāt. nemo illam neglexit, qui huic seriò incubuit: nemo illi incubuit, qui hanc neglexit. tantuſq; ferè quisque disciplinæ quantus orationis pietatisque obſervator fuit.

4. Frequentes domo excuſſiones, ac prolixiora cum ſæcularibus colloquia, aut eorundem cum meliorum horarum diſpendio, frequentatæ viſitationes. ferè enim aliquid licentioris conſuetudinis domum referimus, imbibimusque mores diſciplinæ contrarios. cumque deſueſcat animus rigoribus, aſſueſcit commodis; & iam amat otia, labor diſplicet, grauis ſolitudo eſt, fabulis delectatur; & qui antè vnus Dei, nunc ſæcularium ambit amatque familiaritatem. præſcindenda hæc erunt ſi conſultum religioſæ diſciplinæ volumus.

5. Hoſpitum frequentia. qui ferè curioſiora ac liberiora colloquia, occupationum varietatem, & remiſſionis aliquid à regula ſecum trahunt. quorum ferè exempla, noxio laxamento, eunt in imitationem. neque tamē ideo hoſpitalitas negli-

ligenda; moderanda tamen & intra religiosæ disciplinæ circum continenda, ut dum caritati indulgemus, disciplinam non proiciamus.

6. Superiorum in remissionem ac laxitatem pronitas. horum enim exemplum regula quædam inferioribus est, & cum plerique naturæ quadam pronitate præcuntem sequantur; religiosiores etiam paulatim imitantur, ne aut seuerioris vitæ genere displiceant, aut improbare illorum mores videantur, aut indignationem incurrant. cui malo solius Superioris mutatione occurri posse videtur.

7. Superiorum in regularum transgressores conniuentia. quod siue vniuersim fiat, siue in paucis, tota pedetentim domestica disciplina corrui; nec iam vltra Religiosorum, sed sæcularium contubernium videas. quod malum vix corrigas quàm vna Superioris mutatione.

8. Nimius seueriorum statutorum rigor. abit enim tandem seueritas hæc in animorum à capite suo dissensionē. cum enim durioribus se premi inferiores sentiunt, excutiunt tandem iugum vniuersum rigoris impatientes, seueritate in indignationem versâ, rigore in odium: è quibus tandem, effractis habenis, toto pro-

prono cursu, pudore exuto, in apertum omnis licentiæ campum decurrunt. moderatio disciplinæ magistra est, rigorque benignitate temperandus, si perpetuum volumus.

CAPVT XIX.

Neglectus valetudinis suorum.

NE aut superfluis tepescat spiritus, abeatque in carnem & sanguinem; aut parcimonia, & necessariarum rerum defectu ad alia se inferior consilia cōuertat, alienisque à Religione viis incedat, & necessaria paret. in quam necessitatem, si quando Superiorum aut neglectu, aut duritie, aut parcimonia se coniectum inferior videt; paulatim ad omnem licentiam dilabitur, friget obedientia, iacet vniuersim paupertatis amor, nascitur alienatio, & clancularia ac secreta succedunt consilia, & ad externos mala hæc decurrunt, non sine Superioris, corporisque totius nota, totaque domestica collabascit disciplina.

Vix enim credi possit, quantum necessariarum rerum carentia & defrustratio, in subditorum animis languorem prouocet;

cet; vt desipiant iam spiritualia omnia; & pro alacritate ac feruore, noxia succedit tepiditas: frequentes inde querimoniae, mutuæque inter se murmurationes, ac vniuersim ab omnibus imperatis alienationes. Ea enim est fragilitas humanæ conditionis, vt ad necessariarum rerum carentiam flectamus animū, maximè quando hanc non ex euentu, aut temporum conditione, sed à Superioris duritia ac voluntate nasci videmus: non enim in tali Superiore patris affectum, sed durioris domini imperia inferior intuetur. Vnde fit, vt omnem etiam ipse filialem affectū & obseruantiam exuat, nec iam volens amica & patria, sed coactus despotica sequatur imperia, contentus quocunque modo illa peregisse. Cū ē contra vnā necessariarum rerum prospicientiā, tanquam falce, omnes murmurationum occasiones secentur, addaturque animus ad quæcunque imperata, etiam duriora, lubenti animo peragenda. Nam cū inferior se suaque cordi esse videat Superiori, neque vllā necessariarum rerum curā pulsetur; totum se ad imperata exequenda conuertit, conaturque tam propense in se Superioris voluntati respondere: neque quidquam iam illi durum aut asperum

rum videtur, quod à tanta in se Superioris sollicitudine natum intuetur. quoque generosior quisque, maioriq̃ue ingenio est, hoc se magis etiam ad imperata exequenda profundit, cùm paria ac maiora etiam Superioris munificentia reponere conetur, nolens vinci à Superiore in amica hac amorum lucta; vt antè vitam ponat, quàm tam benignæ in se patris sollicitudini & amori non respondeat.

Omniū tamen maximè in inferiorum ægreditudinibus, à quacunque causa natis, Superiorū affectus se prodit; & quo quisque in suos animo sit, ægreditudo, siue illa corporis, siue animi, ostendit. ac vix vlla in humanis potentior vis est, aliorum in se affectus ac voluntates prouocandi, quàm cùm infirmitate quacunq; detenti, propensos paternosque in se, ac prodigos etiam, aliorum (vt ita dicam) animos senserint. Hoc enim illud tempus est, quo necessitate ac indigentia crescente, maioribus auxiliis opus est. nam integra valetudine, virium sæpe in multis satis, quibus domestico se robore, etiam contra aduersantia & incurrētia tueantur: at ybi grauior aliquis ingruerit morbus, siue ille animū, siue corpus depascitur; ad aliena ferè subsidia respicimus, domesticis destituti.

stituti. quæ ubi nacta fuerimus, incredibile est, quanto in illa affectu rapiamur: quoque morbi vis maior est, eo & ardentius ad remedia aspiramus, & tenaciori postmodum, gratiori que memoria accepta beneficia recolimus. Quid? quod sola paterni huius affectus recordatio ad ardua quæque obeunda ingentibus inferiores animis excitet.

Neque vni illi ægro animi, sed omnibus crescunt, pares nimirum Superioris affectus in paribus sibi malis promittentes. tantumque hæc res valet, ut hac una benevolentia, ac paterni in suorum ægritudinibus affectus ostentatione, multa alias in Superiore non probanda leniantur, ac tanquam molliori hac spongia deleantur. neque enim difficulter inferiores mores Superioris sui, alioqui grauiores, perferunt, cum illum senserint magno vereque paterno in suorum ægritudinibus animo rapi, nec quidquam in illis intentatum relinquere, quod suorum inualetudini consulat.

At ubi se neglectos viderint, nullamque, aut perexiguam ingruentibus malis Superiorum in se sollicitudinem ac benevolentiam senserint; non te pescit tantum, sed omnis evanescit amor, tollitur ad ardua

dua alacritas, succedit maximarum quarumcunque rerum fuga & aspernatio: & dum exiguam in morbis, Superiorum curam intuentur, solliciti perpetuò de valetudine, eam propè solam curant. ardua proinde quæque tanquam valetudini noxia subterfugiunt, nec ad ea se adduci patiuntur, veriti Superiorum in se immittiores, aut minùs benignos ac sollicitos animos, si qua in valetudine in talium susceptione opprimerentur. perpetuus enim eos morborum metus tenet, cùm Superioris minùs paternam ac sollicitam curam senserint. accedunt oblocutiones, detractiones.

Nec intra domesticos parietes querimonix se tenent: magnis passibus ad externos decurrunt, à quibus solatia poscimus, domesticis destituti. præbetur etiam occasio tacitè quædam valetudini tuendæ commoda in sciis Superioribus emendicandi & arripiendi; conamurque hanc paupertatis violationem valetudinis prætextu excusare; paulatimque animus ab instituti & vocationis suæ affectu auocatur, perpetuaque sollicitudine & anxietate detentus, ad maxima quæque frigescit ac tepescit; succeditque tanquam nauseantis ad noxia stomachi hor-

ror quidam , & præclarissimorum quorumcunque munium fuga ; vnde perpetuus languor mentem occupat , nec sperari iam quidquam magnum aut illustre potest.

Remedia.

NVllum potentius,quàm si se Superior patrem, non dominum ; inferiores filios, non seruos cogitet:neque enim difficile erit patri, filiorum necessitatibus inuigilare. magis etiam si se matrem cogitet, quæ ferè indulgentior, maximè in suorum ægritudinibus, esse consuevit, non laboribus, non sanguini parcens, valetudinemque suam pro filiorum salute & incolumitate prodigens.

Iuuabit etiam illa cogitatio, si se bonorum familiæ suæ dispensatorem, non dominum cogitauerit, vt proinde illa in suos è voluntate diuinæ benignitatis disperat ; singulosque in illa, tanquam summi parentis filios, hereditarium quoddam diuinæ adoptionis ius habere. Iam si quamunificentia benignitateque illa largitur Deus, eadem in suos profundat ; perfacile omnium necessitatibus occurret, explebitque quidquid meritò à Religioso opum contemptore sperari potest.

Pro-

Proderit vehementer, si certò sibi persuaserit, ab hac paterna in suos cura, sollicitudine ac prospicientia reliqua ferè dependere; disciplinæ nimirum Religiosæ exactam obseruantiam, magnarum arduarumque rerum lubentem susceptionem, inferiorum in se amorem, promptos facilesque ad omnia animos, murmurationum extirpationem, & quidquid paci mutuae, ac domesticæ quieti, & animorum coniunctioni aduersatur.

Exemplo magnorum in Religione virorum curam in se ægrientium suscipientium, si se Superior excitauerit, præmiisque cælo repositis; non faciliè certissimas hæc obstringendi sibi suorum in perpetuum animos occasiones elabi patietur: maxime si cogitauerit, vna hac paterni in suorum infirmitatibus affectus ostentatione, durissima etiã imperia mollescere, ipsasque adeò sectiones & vstiones à paterna sollicitudine profectas suaues videri, nec quidquam subdito asperum censerì, quod à patris affectu & manu proficisci videt. abicitque iam sui valetudinisque curam inferior, cùm viderit illam Superiori, tanquam parenti seriò commendatã, omnesque cogitationes suas ad voluntatis Superioris expletionem conuertit, certus

de propensa in se illius sollicitudine & affectu.

CAPVT XX.

Nimia in hospites parcimonia.

Modicam plerique hanc rem arbitrabuntur, quidam etiam à virtute, & paupertatis amore natam. at nunquam & nusquam virtus caritati aduersatur. Et sanè leue iudicari non debet. quòd si non tollit ac frangit; minuit tamen, & liuore suo deuenustat caritatem. Et vt in omnes, ita in hospites potissimùm, & peregrè venientes, liberales in primis maximos quosque viros, & Religionum parentes reperiēs. Sciebant hac beneuolentiæ ostentatione mutuis caritatis pectoribus, tanquam submisso igne flammās immitti & foueri. sciebant quidquid foris in casto religioso amore aut temporum iniuriā, aut obtrectantium improbitate elanguisset, sola religiosæ munificentiae seria ostentatione, ac quadam effusione reparari. Quare & prouiores eos semper in omnem liberalitatem fuisse videmus, vt nec domesticæ suppellectili parcendum putarent. ac ingentibus etiam prodigiis confirmatam à Deo religiosam hanc munificentiam legimus.

Et solo illius exemplo, qui augusta plenaque dona sua mortalibus largitur manu, impelli meritò debemus in paria, quantum humana generositas æmulari diuinam potest, & insequi præeuntem Deum. Habemus hîc monentem Apostolum: *Caritas fraternitatis maneat in vobis: & hospitalitatem nolite obliuisci.* & alibi: *Necessitatibus sanctorum communicantes, hospitalitatem sectantes.* Heb. 13
Rom. 12

Et verò angusti parcimonia omnis animi est, ac de diuina prouidentia diffidentis. nititur enim auarus omnis viribus industriæ, solertiæ, diligentia suæ: liberalior animus, Deo. quoque generosior cuique mens est, hoc etiam in liberalitatem pronior est. cùm contrà *auaro nihil sit sceleratius, nihil iniquius quàm amare pecuniam: hic enim & animam suam venalem habet.* Eccl. 10

Nascuntur verò ex parca tenuique hospitū exceptione obloquia varia, mœrores, suspiciones, iudicia caritati inimica, offensiones, fastidia; paulatimque caritas omnis, quâ vnâ inuictæ Religiones stabant, dispergitur. & quod à maioribus inuentum traditumque erat, in rugatæ, aut à temporum lapsu, absentiaque æruginatæ quasi caritatis augmentum nitoremque; hoc sicca hac arenteque hospi-

tum acceptione dedecoratur. Ita quæ in languentis caritatis medelam hospitalitas erat, in eiusdem perniciem parcimoniâ suâ infurgit.

Spargitur deinde hæc fama per regna, tenacitatisque narrata terror omnium animos percutit; ut iam plerique fugiant has domos, & auersentur Superiores: &, si ad illos destinentur, mille excusationes prætexant. quod si aliud maiorum imperia cogant, difficiles tales experientur qui præsumunt, laborum impatientes, otij sectatores, immorigeros. quid? quod totæ plurimum tales domus perpetuis murmurationibus tanquam fluctibus agantur. iacet prostrata caritas, pax exulat: nec quies iam vlla; sed continuæ animorum luctæ, aliæque non leuia mala domesticos tenent. Dictum à Sapiente, *Conturbat domum suam qui sectatur auaritiam.*

*Prou.
15.*

Neque interim nimia sequenda profusio est, & quæ plus habet sæcularis vanitatis, quàm Religiosæ modestiæ. media insistet via quisquis benè religioseque præesse volet, ut paupertatis, ita & caritatis memor; ne effusior in liberalitate, ne in parcimonia contractior. modestia luceat Religiosa, absint sordes: nihil hîc reperiatur quod sæculum, & illius redoleat mores;

mores; deliciae & apparatus, & quidquid de splendore promittere & profundero mundus solet, exulent à Religiosa domo. sed & nimia parcimonia, frigidior mensa, contractior manus, morosior deiectioniorque vultus, frons corrugatio, & quidquid in amœnitatem, minusque gratam beneuolamque mentem ostentat, à Religiosa familia exigantur. vt & pergratos se Superioribus domesticisque sentiant peregre venientes, & non desit quo propensam Religiosam munificentiam suam commonet profundatque Superior, ac non tantum nihil desit, sed & aliquid supersit aduentanti.

Mirum dictu, quantum benigna hæc Superiorum liberalitas ad animorum conjunctionem faciat. accenduntur his in mutuum amorem animi, pelliturque frigus omne à quocunque capite natum; mutuisque his amorum flammis mutuae incalescunt mentes, & ad ardua parantur; vt ingens & acti laboris, & futuri leuamentum sit hæc Superiorum in omnes munificentia. Inde mutua possunt gaudia, congratulationes, commendationes, spontaneæ in omnem etiam supra ætatem ac vires laborem oblationes, susceptiones. neque quidquam nunc arduum

animo tot flammis tanquam fornacibus succenso.

Plena dehinc regna sunt hac laude ; & iuuat inter eos viuere quos munificos experti sumus; ac si quid aliunde, vt fit, mœroris contractum, benignitate, tanquam potenti spongia, detergitur, ac tanquam valido vento nocitura nubes depellitur. adeoque & mori delectat sub munifica Superioris manu. & quidquid in Religione graue & arduum, mollescit hoc temperamento. Dura videntur, acerba, amara, & pondere moleque sua prementia, tristia, ac mœroribus etiam plena, quæ refugiat animus & ad quorum memoriã perhorrescat? accedat liberalior Superioris vultus, & dextera; & omnis illa acerbitas dolorque in dulcorem gaudiumque vertitur; vt inclamare iam lubeat, Ecce quàm bonum, & quàm iucundum habitare fratres in vnum! à tam exigua re tanta bona; vt à negata re tantula, tanta mala.

● *Remedia.*

A Superiore pendent. qui si cogitaue-
rit, domesticarum se rerum non do-
minum, sed dispensatorem; non erit illi
difficile ex iis, quæ liberali manu profun-
dit

dit Deus, liberali etiam dexterâ in discipulos, adoptiuosque Dei filios erogare,

Cogitet deinde secutura mala, quæ priuatim ad se, publicè ad omnes eunt. qualia sunt, minùs carum subditis esse, malè apud exteros audire. parcum nimirum, sordidum, miserum, morosum, difficilem, aliaque huius generis, quæ non in vna hærent domo, sed perambulant regna, adhærentque æternùm homini, vt nec cum morte finiantur: viuitque munere defunctus inglorius apud omnes. Cùm è contra liberalior in suos exterosque animus, siue munere iam deposito, siue dum etiamnum illo fungitur, carus iuxtà externis domesticisque viuat, in omnium ore, laude, votis, beneuolentia, grataque etiam iucundaque post mortem memoria. peccat? facilis in omnium mentibus commiserationi mista venia est. deliquit ille prior? gaudium potius quàm dolor de lapsu est. vt fatuum planè sit, ob tantillâ rem, contractiorem scilicet in hospites manum animumque, tantis se nomenque apud omnes suum periculis exponere, malorumque suprâ recensitorum quàm publicè, quàm priuatim causâ dare; nullo, aut per exiguo domui, cui præest, emolumento, spirituali damno maximo.

Cogitet deinde quid defunctus officio ex omni hac parcimonia, anxiaque sollicitudine expectare debeat, præter multorum alienationes, nullius beneuolentiam, obloquia innumera, contemptum plurimorum: qui si amorem laudesque contemptui & odiis præferat; amorum causas munificentiam sectetur, odiorum parcimoniâ tollat.

Proderit etiam si Superior Tecum illud statuatur, eâ in reliquos esse munificentiam, quâ reliquos in se esse vellet. & monemur
Lat. 6. ab Euangelio: *Date, & dabitur vobis: mensuram bonam, & confertam, & coagitatam, & supercreffluentem, dabunt in sinum vestrum, eadem quippe mensura, qua mensi fueritis, remittetur vobis.*

Exemplis denique seipsum excitet Superior magnorum in Religione virorum, quibus in summa animi magnitudine par liberalitas stetit, parque secuta est. pul-
Ad Ru-
sic. cra hac in re D. Hieronymi sententia est: *Non leui vsitatoq, sermone hospites inuitemus: sed toto mentis ardore teneamus, quasi offerentes se cum lucro nostro atque compendio. Semper lucrum ex Religiosa hospitalitate expectet Superior. Exemplum in omni Religione maxima sunt, magnis diuinis spon- sionibus firmata. & monet Apostolus Pe-*
trus:

trus: *Ante omnia mutuam in vobismetipsis* ^{1. Pet. 4.}
caritatem continuam habentes, quia caritas
operit multitudinem peccatorum: hospitales in-
uicem sine murmuratione; imò cum gaudio.
hinc est illud Sapientis: In omni dato hilarem ^{Eccli. 31}
fac vultū tuum. & illud D. Paulli: Hilarem da- ^{2. Cor. 9}
torem diligit Deus. præmittit remuneratio-
nis expectationem; quid nimirum sperare
debeamus: Qui parcè seminat, parcè & me-
tet: & qui seminat in benedictionibus, de bene-
dictionibus & metet. subdit, Qui autem admi-
nistrat semen seminanti: & panem ad mandu-
candum præstabit, & multiplicabit semen ve-
strum, & augebit incrementa frugum iustitie
vestræ, ut in omnibus locupletati, abundetis.

Adde, neminem propè inferiorum re-
 periri, qui non volens lubensque liberali
 subsit & obsecundetur; neminem, qui
 parco & sordido. in illo vel omnia lau-
 dant, vel improbanda excusant: in hoc,
 etiam laudanda damnant. hi fructus vtri-
 usque, & tanquam fontis sui scaturigines
 fluminaque in possessoris sui laudem vel
 vituperationem nata.

Quòd si neque aliorum exemplis, ne-
 que rationum pondere, non commodorum
 damnorumque varietate & multi-
 tudine, non Superiorum monitis, subdi-
 torumque aliorum querimoniis alios Su-
 perior

perior mores induerit, consultius fuerit
vnum à munere remouere, quàm tot
tamque grauibz malis domum onerare.

CAPVT XXI.

*Inutilium personarum admissio,
aut retentio.*

QUàm graua ex his data Religio-
nibus data sint, ignoscere nemo po-
test; cum aut parentum, amicorum, be-
nefactorum, magnorumque virorum ro-
gatu, aut spe bonorum in Religionem
minùs idonei admittuntur, aut in ea re-
tinentur. Quid enim non meritò vereri
debeamus ab hac inutilium turba, nisi
totius Religionis teporem quendam ac
frigus, ac demum interitum vniuersum?
Nam cum per hos consueta Religioni mu-
nia rite & cum laude ac fructu obiri non
possint, fit vt aut vniuersim negligantur,
aut cum dedecore peragantur: aut sanè
plurimi idonei supra hanc inutilium tur-
bam admittendi sunt, quorum opera tu-
tò, ac cum fructu vti possimus: atque ita
replentur Religiones personarum nume-
ro, vtilium partim, partim inutilium, quo-
rum

rum exemplis priores illi ad otiosam, & ad non dignam Religione vitam descendunt.

Sed nec quidquam ab hoc hominum genere expectandum, quàm vt, postquam impleti, dilatati & incrassati fuerint, abeant in murmurationes otio amicas, in obloquia, in aliorum criminationes, in instituti neglectum; inde etiam in contemptum, in mandatarum rerum refragatores; in cibum, potum, somnum, carnem, & his similia; & in magnum denique vniuersæ Religionis dedecus & infamiam latè spargendam; cùm externorum quisque ex his metiatur reliquos: vt non tam profit proborum non contemnendus numerus, quàm paucorum imprudens & ab instituto degenerans conuersatio.

Accedit quòd hi ferè vniuersam domesticam pacem turbent, semper inquieti, nulla in re stabiles, otio diffuentes, ad vana & sæcularia propensi; & cùm nihil in eis sit quod Religiosum redoleat, tum prima quæque munia venantur, dignissima quæque deberi sibi arbitrantur, reliquorum dièta factaque criminantur; & ferè in optimos quosque & probatissimos hi insurgunt, ementitisque quaqua possunt calumniis onerant, detrahuntq; primis quibusque. cùm enim videant, se vir-
tute

tute non posse cum his contendere, ad maledicta descendunt, clàm primùm, inde publicè; vt per magnorum depreSSIONES, gradum sibi ad summa quæque sternant.

Iam illud ferè obseruatum, tales plerumque in eos insurgere, quorum noxia facilitate in Religionem admissi sunt. nam nisi omnia concedantur, insurgunt in benefactore; inde in contemptum, & oblo-cutiones graues in primum illum suum nimis beneticum parentem: nec grande illud olim concessum beneficiũ agnoscunt, nisi quæcunque voluntas suaferit extorserint; & cùm se admissione aut retentione æquatos vident optimis, etiam virtutum præmio paritari volunt, virtutis omnis expertes.

Laborant hoc malo non infimi Superiorum, innata quadam lenitudine ac clementia, zelo etiam non rarò animarum: qui si considerarent, crudelem illam meritò clementiam censerì debere, quæ vt paucorum non proborum salutì consulat, optimos quàm plurimos animarum periculis exponit; longèque illos à clementia abesse, qui, vt noxio membro partant, corpus vniuersum morti obijciunt; non tam facilè ad illa descenderent. Prudens

dens verò secabit membrum, vt corpus tueatur; euellet nocitura, & ignibus dam- nabit, vt bono semini consulat. Ille verus pater est, qui seposito imprudenti paterno affectu, vt morigeris probisque liberis prospiciat, malæ improbæque indolis filium à domo fratrumque consuetudine ablegat. Idem in pecoribus usu venire videmus: amouet scabie laborantes prouidus pastor, ne vnus contagione grex reliquus pereat.

Et sanè non tam clementia, quàm im- manis sæuitia est, admittere aut detinere Religioni noxium, aut minùs idoneum; cùm res hæc in vniuersi corporis vergat interitum, plusque vnus sæpe improbitas nocumèti Religioni damni que dare con- sueuerit, quàm plurimorū probitas emolumentum adferre. ita nocitura facundiùs serpunt, & nullo impellente fertilissimos agros occupant: proba, culturâ indigent; nec faciliè radices agunt, aut se ad vicina extendunt, ni indefessus labor accesserit.

Remedia.

Seria in admittendis disquisitio, magis
Setiam seria post admissionem proba-
tio.

Faci-

Facilis è tirocinio dimissio, in iis, qui exigua promittunt, quorum talenta tenuia spem non magnam faciunt magnarum rerum.

Prudens delectus Magistri Nouitiorū, qui iudicio, prudentia, & in ingeniorum disquisitione solertia valeat: qui institutioni non tantum amans, sed & serius & accuratus vocationis cognitor, quò concreditos sibi ad eam regulam formet, maximeque ad mortificationis studium: aut enim sequentur doctorem, & naturæ prauitatem, sui victores, superabunt; aut lassi & victi, aliud vitæ genus deligent; aut sat magnam occasionem dabunt ad sæculum ablegandi.

Iuuerit etiam plurimum, vt neminem quis Superiori à quo admissio pēdet commendet, nisi antè probè cognitum, & cuius ingenium variè probauerit, vtque non tam numero, quàm aptitudine delectetur.

Nemo nuda amicorum, benefactorum, magnorumq; virorum commendatione admittendus. in quo recti tenacissimum, constantemque per omnia deçet esse Superiorem: ne aut beneuolentia, aut consanguinitate, aut potentium auctoritate à vero deflectat. cogitet plus se Religioni,
cui

cui præest,quàm sanguini & potentiaẽ debere. prima proinde semper cura indolis & ingenij sit , postrema omnino opum, nobilitatis, sanguinis, amicorum: quæ ornamenta si nuda sint, omni ingenio viduata, reliquisque animorum præsiidiis destituta,numquam Religioni ascribendos censeo.

Non facilè denique admittendi,de quibus merita dubitatio moueri posset; imò non admittendi quamdiu iustæ dubitationis metus subest.

Plures in omni admissione in consilium vocandi,quo certius aliquid statuatur,nec uè vnus potiùs Superioris affectu, quàm plurium sententia res peragatur.

CAPVT XXII.

Negligens institutio nouitiorum.

A Qua ferè vniuersa Religionis habitudo bona nascitur. cum plurimùm reliqua omnis ætas ab illorum recta prauaque institutione pendeat. ab hac enim in omnem profutura nocituraque ætatem documenta petuntur: fundamenta namque hinc mittuntur totius ædificij spi-

ritalis. quibus perperam iactis, quid nisi reliquorum ruina timenda est?

Et sanè prudenti hîc opus architecto: qui magna solertia soli naturam serius diligensque scrutator examinet. neque enim omnis fert omnia tellus, nec paria fundamenta omne solum desiderat. malignum hîc & superstruendis cessurum molibus; altè proinde fodiendum, donec ad ignaram ligonum virginem adhuc terram deueneris. qua si destituaris, densè impactis sudibus superanda firmandaque malignitas est. Nihil est quod non ars laborque vincant: etiam in mediis fluctibus & mari æternaturæ exurgunt moles; tantum industria, labor, prudentia possunt. alibi fodientium votis terra respondet, nullis cessura ponderibus: aliquando nec fossionibus opus, arbitreris è viua rupe aut solido saxo compactam.

Imitabitur deinde noster institutor agrorum cultores. non omne statim semen credet omnibus. soli conditionem solers inuestigator perscrutabitur. Hîc nescio qua naturæ benignitate ne proscissa quidem gleba, sparsa leui manu semina in diuitem messem surgunt; ibi vomere & ligonibus altè proscindenda, sudoribusque madidanda est; alibi satis est supremam
super-

superficiem leui manu retexisse; non vno loco nullus labor, industria nulla satis est, stercorendus ager, calce etiam ac intersparso cinere iuuandus: vt horum æstu frigus ac innatum quoddam gelu colliquescat. etiam ignibus vincenda sterilitas, & non nisi flammis fœcunditas speranda est. adeò non solum ferrum fertilitati sufficit.

Hic aliquando silua stetit? secanda est. nec satis est. maior in radicibus lucta est; euellendæ sunt. nec hoc satis est, altè plerumque iacent, & sparsa hinc inde semina nouam siluam minantur. ignes admouendi sunt. Ibi vepribus, vrticis plena sunt omnia, & nescio qua naturæ prauitate, etiam bona semina in lolium degenerant. assidua hîc & indefessâ opus solertia & cura est, sæpe vertendum solum, ac in ipso quasi semine elidenda prauitas. sanè vt primû se ostenderit, eruenda est. & multorum tamen sæpe hîc annorum labor est. nusquam proinde indormiendum, donec labori malignitas cesserit, & neglecta primorum annorum semina, infatigata colentis industria excusserit. Alibi perpetua quasi rudera & saxa, vt profeminata studio credas, fœcunditati impedimenta iniiciunt. eruenda sunt. nec desistendum

donec frequentibus altè foffionibus per-
purgaueris solum, vt, si non omnis tolla-
tur, rarior iam lapis fit, à cuius densitate
nulla sementis boni suffocatio metuenda
sit. Nec rarò nimio humore peccat solum.
frustra messëm speres natante semine.
hinc inde proinde per varios aque ductus
aliò flectēda aqua est. Nimia etiam inter-
dum ariditate peccat ager : vt frustra co-
natum adhibeas in tam arenti solo, æsti-
busque quibusdam suis siue à natura con-
genitis, siue aduentitiis, emedullato. fre-
quentes proinde hîc densaque fœcundę-
que cælo nubes pluuięque votiuis cali-
disque precibus exorandę ; aut prudenti
solertia, è vicinia, aut remotiore etiam
loco torrentes euocandi, flumina dedu-
cenda. paria in leuiori ac arenoso solo ad-
hibenda: validis stercorationibus ac aque
ductibus leuitas corrigenda erit.

Eadem in ingeniorum cultura euenire
consueuerunt. Hîc saxosa inuenies inge-
nia, dura, & quę culturam aspernentur,
quę fortiter resistent monitis, quę non
facilè cedant, quę validè adhærescant se-
mel conceptis, quę vsu & iudicij sui con-
suetudine callū obdixerūt ad aliena con-
silia. bene sperare possumus quamdiu non
coaluerunt hæc saxa, & abierunt in ru-
pem.

pem. quamquam & hanc non tam ferro quam mollioribus euincas. ita ingentia saxa ab elementorum molliſſimo exeduntur. frequentibus proinde paterniſque monitis vincenda ac emollienda hæc peccata ſunt, maximeque amoris diuini incentiuis, quibus ferè ſaxeæ hæc mentes tanquam ignibus cera, ſole niues colliqueſcunt.

Ibi arentes animas & tanquam omni meliore ſucco emedullatas reperias, à ſæculi æſtu ambuſtas; quas virtutum ſucco, frequentiſque cæleſti rore orationibus euocato prudens rigator humectabit, poſſiſſimè verò frequentibus per diem iaculatoriis orationibus. qui vbi virtutum paulatim delicias deguſtauerint, proni auidique in eas ferentur; omniſque noxiuſ calor à cæleſti pluuiâ orationum robore eliciſta extinctuſ, marceſcentem animam fecundo ſucco beabit.

Alibi ſilueſcentem vitiorum varietate ac multitudine mentem naſtuſ, non tota ſtatim nemora exciſiſ, ſed carptim ſingula excaudicabiſ. quòd ſi molli manu vincere ſoli improbitatem non poſſiſ, ad ferrum & igneſ deſcendeſ; ita tamen vt ferrum & igne� vltro depoſcat qui patitur; gaudeatque non ignibuſ & ferro, ſed

sperata ex his valetudine & fœcunditate
successura.

Quòd si torrentibus fluminibusq; innatuerit alius, totumq; apertis faucibus elementum biberit, aut sæculi absorptus fluctibus agrè lassum caput extulerit; auxiliarem supponet dexteram, vndisq; ereptū pericula docebit, terrebit, vt, dum discrimina ipse sua senserit, exhorrescat fatuos suos conatus, improuidos ausus, stultos prolapsus, morte mortemq; secuturis æternitatibus in metum & fugam, & meliorum cogitationem propositis.

Si quem temerario ausu per rupium montiumq; vertices decurrentem, perq; saxorum decliua audaci conatu reptantem consecutus fuerit; ingentia ostendet præcipitia, prolabentium numerum, primorumq; quorumcumq; sanguine nobilitata saxa, infames mortibus rupes, vt mirari primò discat imprudentes speratæ per abrupta hæc gloriæ ausus, tot exemplis nequidquam antè edoctus.

Primò proinde instructor naturæ cuiusque, ingeniorum iudiciorumq; conditionem perscrutabitur, dispicietq; singula peritorum medicorū more. cognouisse, propè vicisse est. vt longè maxima difficultas in morborum ac constitutio-

nis cognitione sit. medicamenta ad manum sunt, plurimus ferè error in ignoratione mali est. accedat cognitio, & spes summa elucet valetudinis bonæ. ita etiam præuisa damna fugam concedunt, inopinata ignaros obruunt. vt autem ingens ingeniorum morborūque animi discrimen est, ita & medicamentorum esse debet. *Ex Lib. i. adu. Pelag.*
corporalibus, Hieronymo monēte, confideranda spiritualia sunt. alius velox est pedibus, sed non fortis manu. ille tardus incessu, sed stabilis in prælio est. hic pulcrum habet faciem, sed rauca vocis est: alius tetram, sed dulci modulamine canit. illum ingeniosum, sed obliuiosum: hunc memorem, sed tardi videmus ingenii.
 addit Gregorius: *Hoc omnipotens Deus agit Hom. 10. in Ezechiel.*
in cordibus hominum, quod facit in regionibus terrarum. Poterat namque unicuique regioni fructus omnes tribuere: sed si vnaqualibet alterius regionis fructibus non indigeret, communionem cum altera non habuisset. Audeo dicere, maius longè ingeniorum quàm terrarum ac corporum discrimē esse, vt maiore, in his industria ac prudentia opus sit, quo & sperati fructus & pericula maiora sunt.

Discat proinde morum magister ingenium cuiusque. qua in re varia dexteritate opus erit. quædam ab ipso nouitio in-

4K

uale-

ualetudinē suāque omnia tanquam medico prodente intelliget, quēdam à sociis cognoscet, quēdā è recreationibus hauriet, alia longa obseruatione ac experientia discet, versando sibi commissum in omnem partem, laudibus, obiurgationibus, pœnitentiis, præmiis: variarumque propensionum adiungat socios. hîc restringat, ibi quēdam concedat, aliàs arctè reprimat, nonnunquam remittat habenas. committat etiam interdum aliquid prudentiæ ipsius, omnia interdum neget, ac, cùm propensioni aliquando illius laxauerit habenas, tum contraria omnia propensioni imponat. seuerè etiam interdum habeat, molliùs deinde, iungatque aliqua sibi familiaritate, iterumque ab ea secludat. sæpe paternè agat, ac medici hinc inde personam induat, plerumque suauioris, rigidioris interdum, vt in omnem omnino partem tironem suum vertat. assuescat duris, vt horum consuetudine delectetur asperioribus, & gaudeat difficilioribus cùm familiaria illa sibi fecerit; induatque veteranos animos, quibus à vulneribus & sanguine generosum incalescit pectus. detque operam, vt non tam ipse asperiora imponat, quàm à nouitio ultro deposcantur. quæ mitiget tamen, & ab
vl-

vltroneis hisce aliquid demat, & leniora ac minora petitis concedat.

Vbi verò ingeniorum hunc agrum variè exercitum cognouerit; impedimenta antè omnia remoueat, saxa temere ac improuidè iactata, aut nata, intersparſa zizania, prauarum consuetudinum noxias radices, & quidquid aut ingenuum aut prauum seminis superiectum est.

Purgata dein variè à noxiis area, solidas virtutes seminet, quas assidua cura à nocituris tueatur. Orationis ante omnia studium primas partes occupet. assuescat illi nouitius, maximè meditationi; in qua ea primò pertractet quæ timorem incutiunt, validoque iniecto metu à peccatis terrent, morte, æternaturisque pœnis, iudicii que horrore proposito; transeat deinde ad virtutum prouocatiua, Christi Sanctorumque vitam documenta, consilia; ad amorum denique incentiua, cælorum præmia, gaudia, nunquam perituram gloriam. Frequentibus deinde per diem aspirationibus mentem pascit, & contra aduersa firmet; binis etiã per diem feriis conscientiae discussionibus, in quibus nihil intactum relinquat, nihil inemendatum.

Plus tamen mortificationi studeat, plus-

que operæ & temporis huic concedat, ut
à qua maius momentum pendeat. certius
enim hac firmantur animi, solidius robo-
rantur, & contra aduersa parantur: cum
intima animi cultura ab hac pendeat, cu-
ius auxilio rudera & prauorum habituum
radices & fibræ, & naturæ malignitas, &
superiacta zizania euelluntur, ac tanquã
scopis euerruntur, totaque interior area
ferendis hauriendisq; virtutibus aptatur;
ut nullo iam labore optima quæque semi-
na tutò certoque mittantur, centuplaq;
fecundatione dominum suum beent. Et sa-
nè sine hac frustra quocumq; conatu vir-
tutem insecueris. quæcunque enim nobi-
lissima licet semina scruposo ruderosoq;
solo, zizaniiq; improborumq; affe-
ctuum pleno immiseris; nequidquam spe-
res. neque enim aut radices agent, aut ex-
urgent in culmum, aut emergent in fruti-
cem; sed in semine suo occident, aut in
herba suffocabuntur: ut nec sola cælestis
pluuia, nec pinguior stercoreatio, nec vi-
gilans cura sufficiat. Eruderanda primò
prudenti validaque manu noxia sunt, &
proscindenda quaqua parte, durisq; li-
gonibus, securibus, vomere secanda ter-
ra, ac quasi refingenda est, meliori que se-
mini parâda. quibus peractis ad diuinorū

amorum ignes accedat instructor; nec magno molimine in ingentes excrescent flammæ. purus enim hic iam ignis est, pulso prauorum habituum æstu, soluta-
 que glacie ac gelu, tepore languoreque fugato. Hinc est illud Magni Gregorij, *Pastor.*
Jeremia misso ad prædicationem dicitur, Ec- p. 3. c. 35.
ce constitui te hodie super gentes & super re-
gna, ut euellas & destruas, & disperdas & dis-
sipes, & ædifices & plantes. quia nisi prius per-
uersa destrueret, ædificare utiliter recta non
posset: quia nisi ab auditorum cordibus spinas
vani amoris euelleret, nimirum frustra in eis
sancæ prædicationis verba plantaret.

Moribus etiam sub initium formandis inuigilet instructor. exuant prauos, sæculares, vanos; induant modestos, maturos, religiosos. oculi in primis domandi, ac tanquam iniecto freno cohibendi, ne in omnem partem excurrant, ne nocitura hauriant, statione sua contineantur, ac quodam quasi aggere claudantur, verecunda quadam deiectione, rara eleuatione, aut curiosa circumspeditione: manus contineantur, non indecorè protrudantur, nec in frequenti motu versentur: non iactentur brachia, aut longiùs protrudantur: incessus sit constans & moderatus, qui nec lentitate ignauiam designet, nec ci-

tatiore progressu incompositam mentem testetur, nec in variam partem libratus fastum denotet: totaꝫue corporis compositio erecta, capite modicè subidente: nihil denique, quod sæculum sapiat, quod aulæ mores, quod iactantiam & fastum, quodûe nimiam aut amœnitatem, aut trucem seueritatem vultu præferat. ad verecundam honestatem, & in comitate ac benignitate maturitatem omnia componantur, omni leuitate, vanitate, effusaꝫue lætitia sæculū redolente eliminata.

In verbis seria maturitas, præcogitata dictio, ad moderatam tarditatem quàm ad celeritatem pronior; vt nihil pœnitendum elabatur, nec lingua mentem, mens linguam præueniat, exulet profusior risus, verbaꝫue risum prouocantia, dicteria, sarcasmi, acerbior prolocutio, vanarum rerum narrationes, & quidquid sæculum suum loquitur.

Assuescant piis colloquiis, omnemꝫue fermocinationem diuinis condire rebus. læta tristibus, tristia lætis miscere, mœretes solari, prodigè effusos moderari morte proposita, dubio cuntu, incerta futurorum consecutione. honores opesꝫue sæculi huius cum alterius vitæ, principum magnorumꝫue studia beneuolentiamꝫ;

cum

cum Dei Sanctorumque cælo ascriptorum, peritura cum æternis, momentanea cum perennaturis, terrena cum cælestibus componere. Extollitur aliquis prosperis? opponat aduersa. deprimitur aduersis? erigat spe meliorum. paupertate opprimitur? cælorum ostendet opes. proscinditur calumniis? melius esse doceat innocentem quàm nocentem pati. habeatque ad manum vtriusque fortunæ exempla, quibus aut erigat aut deprimat, & intra modestiæ terminos hospitem suum contineat.

Remedia.

A Vigili Superioris cura petenda sunt. qui si certò sibi seriæ institutionis nouitiorum momenta proposuerit, sibi que persuaserit ab hac vna totius Religionis spem omnium maximam, vitamque ac interitum pendere; pulsa ignauia ad sedulam se institutionem accinget.

Quòd si pergat in socordia, molestiarum ac laborum pertæsus, alteri muneri admouendus erit, in quo minore Religionis detrimento versetur.

Inuigilandum deinde vt qui præest, nõ nuda pietate ac religionis zelo, sed prudentia in primis instructus sit: cùm plus
saepe

sæpe momenti à prudenti quàm à sola pia directione pendeat. Prudens sanè director, qui singulorum naturam altitudine quadam mentis, seriaque solerti que indagatione penitus introspexerit; non facile à recto bonoque aberrabit, aut commissos sibi in errorem ducet, aut ad præcipitia adiget, aut ad extrema & pœnitenda impellet. scit consilia, monita, remedia naturæ singulorum accommodare, molliaque asperis pro cuiusque ingenio temperare. at pius prudentia destitutus, qui feruore quodam animi eadem omnes via ducit, eodemque omnium morbis medicamento medetur; & peccabit grauiter, & pro medicamentis non rarò venena porriget, in multorum interitum abitura. quæ enim vni in vitam, alteri in mortem sunt, & è non malis pro varia valetudinis conditione toxica bibuntur. neque vllus error grauior est quàm in spiritali institutione directioneque iisdem omnes in omni re disciplinis instituere, iisdem mederi modis, cum pugnantes naturæ morbi que pugnancia remedia deposcant. Euenit enim in ingeniorum tractatione quod in corporum curationibus; in quibus prima præscribendorum cogitatio à constitutionum varietate petenda est, in qua
qui

qui peccat, mille se erroribus inuoluit, & pro profuturis interimentia propinabit. Pius sit instructor, orationis antè studio excultus, magis etiam mortificationis; vt dux ipse suis ad omnem virtutem sit, plus-
que exemplo quàm verbo instruat; habeant in eo, ac in omni actione verboque ipsius nouitij quod tutò imitentur. à prudentia verò siue illa naturali, siue cælo concessa quàm instructissimus sit. adeò vt si votis hîc agendum sit; minus in institutione à solida magnaque prudentia cum moderata pietate, quàm à magna pietate prudentia destituta periculi videatur.



LIBER SECVNDVS.
INFERIORVM MORBI
ET
CVRATIONES.

CAPVT I.

Auersio à Superioribus.

HX quacunque causa nata, difficultatibus & periculis plena est: neque enim in sola Superioris persona stat hæc auersio, sed abit ad omnia ab ipso imperata; vt etiamsi hæc sanissima sint, instituto conformia, animarum salutis propria, bona etiam, adeoque amore illius cui imperantur profecta, omnia tamen ex aliis iniitiis prolata arbitretur. Hinc in parendo ingens difficultas sequitur, cum omnia imperantis suspecta sunt, totaque interioris hominis pax turbatur & euertitur. nam siue Superior taceat, crescit cum auersione inquietudo; siue loquatur, & salutaria præscribat, pro toxico illis salutis monita sunt. vt ex omnibus non modò
im-

imperatis, sed ne ex dictis factisque Superiorum quidquam placeat, displiceant omnia. sint qualia à religiosissimo & prudentissimo sperari ac desiderari possint; fatua illi erunt, & periculis plena: sint amicitissimâ mente, munificentissimâque dexterâ erogata; ab hostili pectore, & a uara manu venient. Prudens Superior consilium dedit, prouidè imperauit: fatuus, aut politicus est. Beneuolè excepit: aulicos mores induit. Largissimè omnia spondit: infidias struxit, & aliud verbis, aliud animo fouit. Planè loquitur: latent doli. Parcus in verbis est: fraudes, & inimicam mentem tegit. Suadet profutura: commodis suis studet. Nihil denique tam sanctum certumque, quod non profanum, periculisque plenum illi sit.

Neque manet hæc auersio in vno, prodit se foras, ac vbicunque deprehenderit aliquem ex quacunque causâ turbatiorem, aut Superiori offensum, illi se morbumque suum aperit, qui hoc malo teneatur, mutuaque hac confidentia mala crescunt; vt inde societate iam roborata, in apertas prorumpant murmuraciones, oblocutiones, detractiones, ac quidquid ferè in Religione malorum excogitari potest.

L

Quid?

Quid? quòd etiam ad externos serpat hoc malum: neque enim contineri vnus animo commotio & tempestas hæc iactatioque potest, non magis quàm flamma cineribus: erumpet proinde vel minima data occasione, maximè si externus ille pro contracta inter eos familiaritate, cœperit aliquid in Superiore improbare; tunc enim periculū est, ne tanquam hac nouacula dissectum apostema, venena simul omnia profundat, non Superioris tantum, sed & corporis totius damno.

Demum crescente hoc malo, ad instituti vniuersi damnationē prolabitur hæc alienatio, ægrumque suum ad extrema propellit, dum nihil iam probat, damnat omnia, auersaturque quæcunque documenta, tanquam ab hostili manu propinata: nusquam patris, nusquam medici manum agnoscens, sed inimicam vbiq; dexteram. etiam inter amica fercula & propinationes, inter patria monita benignissimo pectore deprompta venena reperiet, & fella pro melle leget, colocynthidas pro saccharo, pro vita mortem, tantum valet alienior animus.

Iam cū displiceat Superior, monitaque studiaque ipsius, qualia demum illa fuerint, licet ab intimo Religionis deprom-

prompta; incipiunt etiam Religionis propria displicere. & semel à Superiore alienior animus, auertitur etiam ab iis quæ instituti sunt, maximeque ab illis, ad quæ Superiorem propensiorē videmus. quòd si ad omnia instituti pari conatu feratur Superior, ab omnibus auertimur; displicet nimirum res cū persona displiceat, & quæ proba antè erant, improba videntur, cū ab hostili dextera nihil arbitremur amicum profuturumque porrigi posse.

Atque hinc spiritualis quædam exurgit nausea, & mœrentis animi fastidium, vt nihil iam placeat quo foueri mens consueuerat, aut lassā reparari, aut fessa erigi, aut ægra sanari.

Oratio verò tota prostrata iacet, credas exsectis neruis omni robore viduatam. ita occupatus ac possessus alienatione hac animus, nihil præter auersiones ruminat, vt nec spatium sibi concedat cælestia cogitandi. tanquam si palatum amaritudine circumfessum, suauia ac salutaria omnia respuentem cogites.

Sed & animus ad generosa quæque deest: amatque sub tali Superiore ingloriam magis vitam & ignauam trahere, quàm ad victura dexteram protendere. quæ tandem res ad extrema inferiorem dedu-

cit, varioſq; etiam corporum morbos adducit. nec finem facit, donec aut in apertum erumpat odium, & hoſtiles machinationes, & deſperata mentis molitiones, aut vitam ſibi aliisq; grauem trifti languore finiat, infeliciq; demum morte claudat.

Remedia.

Conandum Superiori quibuſcunque poteſt modis, maximè verò per Præfectum ſpiritus, Confefſarium, alioſq; ei caros, vt æger hoc malum ſuum fidenter, clarè, & ſine ambagibus retegat: in reſe-
ctione enim hac, potiſſima ſanitatis pars conſtituta eſt.

Beneficiis etiam vincendus æger, & ad hanc ſui deſectionem blandè ducendus erit: quaſdam etiam in illo leuiores imperfectiones diſſimulando: negotia qua-
dam, quæ tutò illi credi poſſint, vltro com-
mittendo: ſi quid rectè factum, laudando: ſi quid minùs benè, errorem tamen excu-
ſando, intentionem collaudando, ſuaui-
ter monendo, & ad maiora excitando.

In qua re magna Superioris opus eſt pruden-
tia; vt ſi blandè inferiorem adducere non poſſit ad ſinceram mali ſui reſeratio-
nem, ſimulet ſe auerſionem hanc ſcire, mul-

multisq̃ue fiducia signis, ac quibusdam etiã concessionibus ab instituto non alienis, suauius appellationibus, colloquiisq̃ue quæ animi in illum propensionem fiduciamq̃ue ostendant, eum sibi deuinciendo; propositis etiam interdum quibusdam tanquam consilij causa, ac iudicium illius explorandi, probando etiam illud, si quo modo fieri possit.

Quòd si his similibusq̃ue animum illius sibi conciliauerit; dissimulare in vniuersum Superior poterit, quò fidentius ille se suaq̃ue, pulis diffidentia nebulis, Superiori credat: si verò æger se aperuerit, beneuolentia Superioris victus, benignè illum Superior audiat, soletur, ostendat vanum metum fuisse, non fundatas suspiciones, & ne à se cogitatis quidem rebus natas; aut sanè rationem dictorum factorumq̃ue suorum amicè illi reddat, sæpe ad se, suaq̃ue aperienda inuitet, vt consuetudine hac, fiducia nascatur & amor.

Magna denique dexteritate, animum ægroti in omnem partem versando, paulatim illi omnem auersionis causam eucllat, dicta factaq̃ue illius in Superiorem minuendo, multa humanæ fragilitati tribuendo, multa huius generis in omni hominum genere euenisse.

Quòd si his remediis vinci æger non possit, seriò de loci mutatione cogitandum erit: sæpe enim naturalis quædam è constitutionum diuersitate nata auersio est, quam priusquam euincas, vniuersam antè valetudinem frangas & perdâs.

CAPVT II.

Neglectus obseruantia erga Superiores.

REm quis arbitretur non magnam, magna hæc tamen incommoda secum trahit: sequitur enim hunc neglectum venerationis & auctoritatis diminutio ac contemptus denique. quod vbi fit, tota collabascit obedientia, quæ his firmanentis, tanquam validissimis vinculis ac propugnaculis continetur. neque difficile est illi obsequi, quem veneraris; impossibile propè illi obsequi, quem contemnis, maximè ea obsequentia, quam ab animo profectam omnis bene constituta Religio exigit.

Succedunt hinc in omni propè imperio murmurationes, cùm non placeant imperata; quæ placere perrarò possunt, cùm displicet qui imperat. nam etiam si prudentissima illa sint, si non placet imperans, nec imperata placebunt: contrà, si
pla-

placeat ille, etiam imprudenter imperata; si non probentur, locum tamen excusationi & propugnationi inuenient. tantum in vtramque partem refert affectus in auctorem: Amas? etiam verbera placebunt, aut tanquã de manu optimi & clementissimi patris venisse iudicabis. Auerfari; etiam munera detestaberis, arbitraberisque ab inimica dextra venire, & molliora benignioraque verba factaque, dolos fraudesque tegere opinaberis. Molliã; verè amantis, dura licet, verba sunt, quin & molliã verbera; dura alienioris animi, molliã licet, verba sunt, muneraque verbera non donã sunt; vt nihil iam expectare debeas, præter spiritalem quandam nauseam, ac tepentis animi spiritalem quandam vomitum. omnia enim cum Superiore displicere incipiunt; minorque iam veneratio rebus instituti propriis, minor maiorũ decretis. nam ad neglectũ ac contemptum satis est à tali Superiore profecta: sancta licet probaque sint, ac veteris germanique instituti, ac primarij spiritus, non sapiunt tamen, imò displicent à tali manu propinata. ita semel concepta opinio dulcia omnia ac salutaria, in amara ac noxia vertit: mella nimirum in fel merum, medicamenta in venenum. vnde

supinus tandē neglectus omnium spiritua-
lium exercitatioⁿū rerumque Religioni
propriarum nascitur, ac perpetuus tandē
animi languor, non nisi cum Religionis
ipsius odio aut morte finiendus. tantum
in humanis potest ex neglecta veneratio-
ne contemptus, vt ad malorum vltima
Religiosum deducat, nec antē finē faciat
quā illum tota Religione protrudat, iu-
ratumq; hostem ex filio & amico statuatur.

Aliquid proinde sit in Superiore quod
venereris, virtus, benignitas, paterna cura,
comitas, ingenii magnitudo, iudicij pro-
funditas, eloquētia, agendarū rerum dex-
teritas, morum maturitas, rara continen-
tia, pietas, probitas, eruditio non vulgaris,
prudentia magna; aliquid denique quod
venerationem prouocet, ē qua ferē amo-
rem nasci videbis.

Fateor etiam his omnibus destituito, ve-
nerationi tamen locum esse posse, vel hoc
solo nomine, quod Superior Christi vicēs
gerat, cui in Superiore obtemperamus:
verū difficile est, vbi omnibus Superior
quę natura sua venerationem prouocant
destituatur, solo intuitu vicarij illi à Deo
concessi muneris venerationē prouocare.
ferē enim homines etiam ad diuina, hu-
manis quibusdam ducimur trahimurque
sub-

subsidis; quibus si destituamur, ægrè ad nuda diuina, propter ipsa rapimur: vestiri enim illa optamus, & humanis quibusdam illecebris cingi.

Et sanè vt nihil facilius est quàm in venerationem, ac venerationi implexum amorem rapere, si amore ac veneratione digna, manu quasi tangimus; ita interdificilia non vltimum est in veneratione ac amorem propellere, cùm omnia externa venerationis ac amoris prouocamenta desunt.

Illud verò in alieniore animo solemne est sequi, vt vnus pectore venerationis diminutio non claudatur; spargitur per plures, & totas obit familias, fitque vt derogata semel veneratione, obedientia tota labascet: obmurmurationibus colloquia nàtent: & quæ prius amoris ac filialis parentiæ, nunc seruilis obsequentiæ sunt, à sola coactione nata. atque hinc omnium intepescunt animi, imperataque nauseabundi exequuntur. quare nec fructum illum sperare prudenter possumus, quem à laboribus sudoribusque amoris ardoribus excitis exspectare solemus. Quid? quòd etiam ad externos eat hæc fama, & venerationis illa retractio causæque totas impleant vrbes, non sine non-emendanda

nominis diminutione, quæ res in vniuersum corpus redundat.

Remedia.

PLurimum hîc valet Dei, in omni Superiore cuius hic vicem gerit, præmiorumque cælo repositorû seria frequensque consideratio: non magnum esse variis naturæ cælestibusque donis excultorem gerere, cum ipsa donorum excellentia etiam hostes in admirationē rapiat, aut à Religione alienos in amorem trahat. neque in his magna meriti ratio esse potest: ingens illa præmij meritiqûe materies est, cum in Superiore nulla humana momenta ponderamus, sed Christum solum, cuius ille vices gerit, intuemur: illum vt Dei in terris vicarium, vt cælo nobis datum amplectimur. quæ vna ratio omnibus potentior, maior, certiorque apud, verè Religiosum esse debet; & à qua sola plus venerationis amorisqûe, quàm à reliquis omnino omnibus animo concipere, factisqûe præ se ferre meritò oporteat.

Quæ in Superiore laudanda, sæpiùs ob oculos ponere; neque enim quisquam est, in quo non aliqua reperiatur, quæ laudem mereantur, siue è naturæ donis, siue studio

dio comparatis , siue singulari prærogatiua à Deo concessa.

Quidquam non commendandum in Superiore occurrit, fortiter repellendum, excusandū; intētionis bonitas, humanaūe fragilitas cogitanda errorum vitiorumq; priorū magnitudo grauitasque leuibus illius opponenda. quod eo facilius faciet inferior, quo errores, delicta, & quidquid in se non vna reprehensione dignum, tacitus secum euoluerit. Videat in quantis sibi ab aliis indulgeri velit, maximè à Deo, cuius oculis nuda sunt omnia. quàm multa damnanda secum trahat, & non vni veniæ subiicienda, quo magis minora in Superiore dissimulationis & indulgentiæ scopis verrat. ac quandocunque occurrunt quæ meritam damnationē exigunt, & venerationis diminutionem, obijciat illustriora quæque ipsius, quæ iure quodam suo admirationem ac venerationem deposcunt. quod perfacile erit verè Religioso, & simplici melioreque oculo singula intuenti.

CAPVT III.

*Simulata & tecta conscientie explicatio
& redditio.*

Malum eo nocentius, quòd à filiali in Superiorem tanquam patrem ac medicum retèctione, omnis bona certaque, ac secura gubernatio pendeat. Vnde fit, vthuius defectu neque curentur nocitura vulnera, & mortem sæpe allatura; neque vitentur damna corpori vniuerso inferenda; neque prudens, ac sine insigni aliqua clade diu consistere gubernatio possit. Committuntur munia, quibus credenda non erant, conijcitque non raro suos in salutis discrimina Superior, morborum ac propensionū suorum ignarus.

Et sanè vt nihil difficilius est, etiam peritissimo medico, longaquererum ac ætatis experientia docto, quàm ignoratos ægrientium morbos aggredi, & ad quorum retèctionem, siue noxia verecundia, siue simulandi studio, siue pertinaci silendi obfirmatione, obmutescit æger, premitq; secum mala; ita nihil facilius, quàm cognitas perspectasque infirmitates, earumque causas depellere. vt morbi certa
cogni-

cognitio, medico certa propè curatio sit: at ignarus morborum fluctuabit, & pro salutaribus perimentia sæpe medicamenta propinabit. calentibus opus est? porriget frigida. humectantibus æger indigebit? siccantia præbebit. Idem eueniet in animarum medico. didicit morbos? remedia ad manum sunt, siue noxiorum subtractione, siue profuturorum propinatione.

Et cum in omni animorum morbo plurima veterum in vtramque partem existant documenta, & exempla; non erit Superiori morborum consilio difficile ea præscribere, quæ salutaria cum primis futura sunt. vt sciuisse suorum morbos propè curasse sit; cum contrà ex illorum ignorance nulla non mala nasci procliue sit.

Sanè prudentem omnem gubernationem ex hac suorum cognitione pendere nemo non videt; cum reliqua omnis gubernatio ex ignorance nata, fortuita sit, & mille lapsibus exposita; vt in qua nihil certò, nihil tutò, nihil solidi statui possit. fortunæ nimirum cōmittēda sunt omnia. Nam licet ex externo suorum conuictu, colloquiis, domestica consuetudine, familiarium etiam indagatione, multa solers prudensque Superior colligat; plurima

ma tamen ignorabit. cùm pauci morbos suos prodant , tegant plerique : & ferè grauissimi altè habitant, ac in imo latent, visceribus implexi ; leuiores prorumpunt foras. mortem allatura intimis præcordiis clauduntur , nec nisi cum interitu reteguntur.

Causa ferè mali huius in Superiore residet. qui si paternum in omnes affectum explicabit , expandetque matris viscera vberaque, nullo negotio filialem in se subditorum affectum prouocabit. crescit enim cum amore fiducia. neque facilè se generosus animus in hac mutua amorum prouocatione vinci patietur. Quare si Superior genuinos, verique patris sinus expandarit, in omnem fiduciæ refectionem inferiorem incitabit ; maximè vbi illum non tantùm patrem & medicum, sed fidissimum commissorum sibi custodem senserit, creditaque sibi arctissima æternùm custodia seruantem. plurimùm enim in inferioribus valet concepta hæc de Superioribus concreditorum infracta firmitas, & secretorum tenacitas. Proderit etiam vel inter prima , si à fidenti inferiorum conscientiæ animique refectione, propensos in se Superiorum animos senserint, ac peculiare tenerosque patrios in
se

se illorum affectus experti fuerint, ac plus etiam quàm antè beneuolentiæ ac fiducia. dici enim non potest, quantum his crescat amor, fidentisque morborum animi, nudaque sinceraque, omni fuco & simulatione seposita, resectio.

Altera mali caussa, ab arrogantia metuq; ab hac nato proficiscitur. cùm veremur, ne si quæ animum premunt vulnera aperuerimus, sinistram Superiores opinionem induant, decedatque non parum de veteri in nos affectu, aut de concepta virtutis opinione, minusque iam aut solita committant, aut à maioribus dignioribusque auocent.

Ab innata etiam quadam animi in omnes, aut certos Superiores diffidentia, aut pusillanimitate, noxius hic timor, qui candorem hunc sistit, nascitur. Et sanè nisi fastum hunc exuerit inferior, metum illum nunquam deponet. Nihil hic periculi foret, si humilitatis amor obsedisset pectus. gauderet enim talis contemptu, & causas vltro depressionis inueniret & suggereret. aut sanè si firma in Deum fiducia occupasset animum, qui nunquam permittit fidentem sibi in fraudem duci, non magno hic opus esset molimine: cùm enim inferior Superiori Dei vices gerenti mor-

Quòd si his remediis vinci æger non possit, seriò de loci mutatione cogitandum erit: sæpe enim naturalis quædam è constitutionum diuersitate nata auersio est, quam priusquam euincas, vniuersam antè valetudinem frangas & perdās.

CAPVT II.

Neglectus obseruantia erga Superiores.

REm quis arbitretur non magnam, magna hæc tamen incommoda secum trahit: sequitur enim hunc neglectum venerationis & auctoritatis diminutio ac contemptus denique, quod vbi fit, tota collabascit obedientia, quæ his firmamentis, tanquam validissimis vinculis ac propugnaculis continetur. neque difficile est illi obsequi, quem veneraris; impossibile propè illi obsequi, quem contemnis, maximè ea obsequentia, quam ab animo profectam omnis bene constituta Religio exigit.

Succedunt hinc in omni propè imperio murmurationes, cùm non placeant imperata; quæ placere perrarò possunt, cùm displicet qui imperat. nam etiamsi prudentissima illa sint, si non placet imperans, nec imperata placebunt: contra, si
pla-

placeat ille, etiam imprudenter imperata, si non probentur, locum tamen excusationi & propugnationi inuenient. tantum in vtramque partem refert affectus in auctorem. Amas? etiam verbera placebunt, aut tanquã de manu optimi & clementissimi patris venisse iudicabis. Auerfari, etiam munera detestaberis, arbitraberisque ab inimica dextra venire, & molliora benignioraque verba factaque, dolos fraudesque tegere opinaberis. Molliã, verè amantis, dura licet, verba sunt, quin & molliã verbera; dura alienioris animi, molliã licet, verba sunt, muneraque verbera non donã sunt; vt nihil iam expectare debeas, præter spiritalem quandam nauseam, ac tepentis animi spiritalem quandam vomitum. omnia enim cum Superiore displicere incipiunt; minorque iam veneratio rebus instituti propriis, minor maiorũ decretis. nam ad neglectũ ac contemptum satis est à tali Superiore profecta: sancta licet probaque sint, ac veteris germanique instituti, ac primarij spiritus, non sapiunt tamen, imò displicent à tali manu propinata. ita semel concepta opinio dulcia omnia ac salutaria, in amara ac noxia vertit: mella nimirum in fel merum, medicamenta in venenum. vnde

supinus tandē neglectus omnium spirituum exercitatio, rerumque Religionum propriarum nascitur, ac perpetuus tandē animi languor, non nisi cum Religionis ipsius odio aut morte finiendus. tantum in humanis potest ex neglecta veneratione contemptus, ut ad malorum ultima Religiosum deducat, nec antè finē faciat quàm illum tota Religione protrudat, iuratumque hostem ex filio & amico statuatur.

Aliquid proinde sit in Superiore quod venereris, virtus, benignitas, paterna cura, comitas, ingenii magnitudo, iudicii profunditas, eloquentia, agendarum rerum dexteritas, morum maturitas, rara continentia, pietas, probitas, eruditio non vulgaris, prudentia magna; aliquid denique quod venerationem prouocet, è qua ferè amorem nasci videbis.

Fateor etiam his omnibus destituito, venerationi tamen locum esse posse, vel hoc solo nomine, quod Superior Christi vices gerat, cui in Superiore obtemperamus: verum difficile est, ubi omnibus Superior quę natura sua venerationem prouocant destituitur, solo intuitu vicarij illi à Deo concessi muneris venerationē prouocare. ferè enim homines etiam ad diuina, humanis quibusdam ducimur trahimurque.

sub.

subsidiiis; quibus si destituamur, ægrè ad nuda diuina, propter ipsa rapimur: vestiri enim illa optamus, & humanis quibusdam illecebris cingi.

Et sanè vt nihil facilius est quàm in uenerationem, ac uenerationi implexum amorem rapere, si amore ac ueneratione digna, manu quasi tangimus; ita interdificilia non vltimum est in ueneratione ac amorem propellere, cùm omnia externa uenerationis ac amoris prouocamenta desunt.

Illud verò in alieniore animo solemne est sequi, vt vnus pectore uenerationis diminutio non claudatur; spargitur per plures, & totas obit familias, fitque vt derogata semel ueneratione, obedientia tota labascatur: obmurmurationibus colloquia nātent: & quæ priùs amoris ac filialis parentiæ, nunc seruilis obsequentiæ sunt, à sola coactione nata. atque hinc omnium in tepefcunt animi, imperataq; nauseabundi exequuntur. quare nec fructum illum sperare prudenter possumus, quem à laboribus sudoribusque amoris ardoribus excitis expectare solemus. Quid? quòd etiam ad externos eat hæc fama, & uenerationis illa retractio causæque totas impleant vrbes, non sine non-emendanda.

nominis diminutione, quæ res in vniuersum corpus redundat.

Remedia.

PLurimum hîc valet Dei, in omni Superiore cuius hic vicem gerit, præmiorumque cælo repositorû seria frequensque consideratio: non magnum esse variis naturæ cælestibusque donis exultorem gerere, cum ipsa donorum excellentia etiam hostes in admirationē rapiat, aut à Religione alienos in amorem trahat. neque in his magna meriti ratio esse potest; ingens illa præmij meritiqûe materies est, cum in Superiore nulla humana momenta ponderamus, sed Christum solum, cuius ille vices gerit, intuemur: illum vt Dei in terris vicarium, vt cælo nobis datum amplectimur. quæ vna ratio omnibus potentior, maior, certiorque apud verè Religiosum esse debet; & à qua sola plus venerationis amorisque, quàm à reliquis omnino omnibus animo concipere, factisque præ se ferre meritò oporteat.

Quæ in Superiore laudanda, sæpiùs ob oculos ponere; neque enim quisquam est, in quo non aliqua reperiatur, quæ laudem mereantur, siue è naturæ donis, siue studio

dio comparatis , siue singulari prærogatiua à Deo concessa.

Quidquam non commendandum in Superiore occurrit, fortiter repellendum, excusandū; intētionis bonitas, humanaūe fragilitas cogitanda errorum vitiorūq; priorū magnitudo gravitasque leuibus illius opponenda. quod eo facilius faciet inferior, quo errores, delicta, & quidquid in se non vna reprehensione dignum, tacitus secum euoluerit. Videat in quantis sibi ab aliis indulgeri velit, maximè à Deo, cuius oculis nuda sunt omnia. quàm multa damnanda secum trahat , & non vni veniæ subiicienda, quo magis minora in Superiore dissimulationis & indulgentiæ scopis verrat . ac quandocunque occurrunt quæ meritam damnationē exigunt, & venerationis diminutionem , obijciat illustriora quæque ipsius , quæ iure quodam suo admirationem ac venerationem deposcunt. quod perfacile erit verè Religioso , & simplici melioreque oculo singula intuenti.

CAPVT III.

*Simulata & tecta conscientiae explicatio
& redditio.*

M Alum eo nocentius, quòd à filiali in Superiorem tanquam patrem ac medicum refectione, omnis bona certaque, ac secura gubernatio pendeat. Vnde fit, vt huius defectu neque curentur nocitura vulnera, & mortem saepe allatura; neque vitentur damna corpori vniuerso inferenda; neque prudens, ac sine insigni aliqua clade diu consistere gubernatio possit. Committuntur munia, quibus credenda non erant, conijcitque non raro suos in salutis discrimina Superior, morborum ac propensionum suorum ignarus.

Et sanè vt nihil difficilius est, etiam peritissimo medico, longaquererum ac ætatis experientia docto, quàm ignoratos ægrientium morbos aggredi, & ad quorum refectionem, siue noxia vere cundia, siue simulandi studio, siue pertinaci silendi obfirmatione, obmutescit æger, premitque secum mala; ita nihil facilius, quàm cognitas perspectasque infirmitates, earumque causas depellere. vt morbi certa
cogni-

cognitio, medico certa propè curatio sit: at ignarus morborum fluctuabit, & pro salutaribus perimentia sæpe medicamenta propinabit. calentibus opus est? porriget frigida. humectantibus æger indigebit? siccantia præbebit. Idem eueniet in animarum medico. didicit morbos? remedia ad manum sunt, siue noxiorum subtractione, siue profuturorum propinatione.

Et cùm in omni animorum morbo plurima veterum in vtramque partem existant documenta, & exempla; non erit Superiori morborum conscio difficile ea præscribere, quæ salutaria cum primis futura sunt. vt sciuisse suorum morbos propè curasse sit; cùm contrà ex illorum ignorance nulla non mala nasci procliue sit.

Sanè prudentem omnem gubernationem ex hac suorum cognitione pendere nemo non videt; cùm reliqua omnis gubernatio ex ignorance nata, fortuita sit, & mille lapsibus exposita; vt in qua nihil certò, nihil tutò, nihil solidi statui possit. fortunæ nimirum cõmittenda sunt omnia. Nam licet ex externo suorum conuictu, colloquiis, domestica consuetudine, familiarium etiam indagatione, multa solers prudensque Superior colligat; plurima

se illorum affectus experti fuerint, ac plus etiam quàm antè beneuolentiæ ac fiducia. dici enim non potest, quantum his crescat amor, fidentisque morborum animi, nudaque sinceraque, omni fuce & simulatione seposita, reiectio.

Altera mali causa, ab arrogantia metuque; ab hac nato proficiscitur. cum veremur, ne si quæ animum premunt vulnera aperuerimus, sinistram Superiores opinionem induant, decedatque non parum de veteri in nos affectu, aut de concepta virtutis opinione, minusque iam aut solita committant, aut à maioribus dignioribusque auocent.

Ab innata etiam quadam animi in omnes, aut certos Superiores diffidentia, aut pusillanimitate, noxius hic timor, qui candorem hunc sistit, nascitur. Et sanè nisi fastum hunc exuerit inferior, metum illum nunquam deponet. Nihil hîc periculi foret, si humilitatis amor obsedisset pectus. gauderet enim talis contemptu, & causas vltro depressionis inueniret & suggereret. aut sanè si firma in Deum fiducia occupasset animum, qui nunquam permittit fidentem sibi in fraudem duci, non magno hîc opus esset molimine: cum enim inferior Superiori Dei vices gerenti mor-

morbos aperiat, fieri non potest ut permittat hunc Deus dolis circumueniri, quòd si tamen permiserit fraudi hunc aliqui candorem esse, certò sibi qui damnum passus est persuadeat, locupletiore longè mercede hanc in Deum fiduciam remunerandam.

Quòd si pergat inferior Superiorē animorum medicum morbos suos celare, nihil propiùs, imò necessum omnino est, ut politicum quendam spiritum plenis faucibus hauriat, consilia resque suas vario artificio tegat; probitatem, pietatemque simulet; valetudinem bonam verbis vultuque; mentiatur, cum extrema sæpe, mortemque vulnera intentent. audiat Sapientem: *Via stulti recta in oculis eius: qui autem sapiens est, audit consilia.* & illud: *Fili sine consilio nihil facias, & post factum non pænitebit.* quanto magis audiet consilia Superioris inferior, parentis filius, infirmus medici, idque in re salutis?

Prou. 12.
Ecclesi.
32.

Remedia.

A Superiore ferè petenda, ut paterna beneuolentiæ ostentatione, affectū in se fiduciamque suorum excitet, beneficiis etiam prouocet, adeoque ad ea munia

nia promotione, à quibus periculum inferiori non creetur.

Proderit etiam faciles benignasque in omni ad se recurſu aures præbere, ultro etiam non rarò compellare, fiduciamque oſtentare, aditumque in omnem retegendi ſe libertatem ſternere, nulloque vel minimo ſigno aut diffidentiam præ ſe ferre, aut è concredit ſibi timorem.

Inculcanda rei huius utilitas neceſſitaſque, ſive in exhortationibus publicis, ſive in priuatis colloquiis, maximeque in domeſticis conferentiis, vel à Præfecto ſpiritus, aliisque inſtituti peritis & amantibus. aperienda incommoda damnaque è noxio ſilentio nata, exemplisq; illorum confirmanda, qui ab imprudenti verecundia, vel à timore & inani diffidentia, vel celandi ſua ſtudio, ad perpetuam animi inquietudinem, ac tandem ad vocationis ſuæ deſertionem deuenerunt, in carnem ſimiliaque vitia prolapſi.

Exemplis deinde magnorum virorum, qui grauiffimis aliquando in omni vitiorum genere tentationibus pulſati, poſt plurima fruſtra tentata remedia, in vna mali ſui reſectione ſalutem reppererunt. Nec veriti non pauci ſunt, publicatis etiam libris, palàm quibus iactati fuerant,

dæmonum insidias aperire, quidam etiam lapsus suos, aut lapsui pericula proxima.

Excitandi deinde, & ad animi sui morbos periculaque aperienda prouocandi erunt, exemplis morborum corporis, quorum verecunda, & oculis etiam nostris pudibunda, grauitate mali victi, medicis adeoque & hostibus retegimus: quo magis idem faciendum Superiori ac patri in animi morbis, corporis morbis longè perniciosioribus, vt à quibus beata infelixque pendeat æternitas, nulla postmodum arte reparanda. Serio in hanc rem Gregorius: *Quisquis intrare æternitatis ianuam nititur, tentationes suas menti Pastoris indicet.* & in Vitis Patrum: *Ne abscondas cogitationes tuas: ita enim confusus immundus spiritus discedet à te. Nihil enim ita confundit dæmones, eorumque virtutem allidit, quàm si quis secreta cogitationum reuelet Patribus sanctis.*

CAPVT IV.

Curiositas in indagandis, quæ gubernationem tangunt.

QVÆ quo magis internam cuiusque pacem turbat, eo Religioso magis vitanda & fugienda est: neque enim potest in illius animo solida pax tranquillitasque consistere, in quò agendarum imperandarumque rerum perpetuæ natant sollicitudines.

Neque in vñto inquietudo hæc permanet, ab it in plures, cùm quæ solerti indagatione cognita sunt, aperiuntur aliis; causamque sæpe præbent magnarumurbationum: cùm ea ipsa quæ decreta aliquando, coguntur, re meliùs propiusque perspecta, aut quibusdam inexpectatis nouis que intercurrentibus, quæ aliud suadent, Superiores mutare. quod vbi euenit, aut inconstantiam in Superiore redarguunt, aut imprudentiam, aut denique, si ipsos restangebant, priora que consilia magis placebant,urbationum mare magnum nasci videbis.

Profiliunt inde suspiciones in varios, mœrores, murmuraciones & obloquia,

quorum omnium causa primus ille curiosior indagator & explorator est. nascunturque ex his principiis temeraria in primis iudicia; & frequenter culpam in illum coniicimus, qui extra omnem noxam est: unde ingentes profluunt animorum alienationes, partiumque noxia Religioni studia; varia deinde parum religiosæ molitiones, & innocentissimorum sæpe eversiones; decurriturque demum ad interna, ac ad externa non rarò patrocinia & intercessiones.

Plurimum deinde curiosior illa disquisitio adimit de obedientiæ integritate, cum magnam partem debitæ resignationis & indifferentiæ tollat. Etenim animus ad omnia Superiorum imperia paratus, nullam causam habet curiosioris indagationis, promptus in omnem imperij partem: neque illum cura mordet imperandarum rerum, qui in omnem Superioris, tanquam in Dei voluntatem excubat, & in quo nullus delectus muneris, aut agendarum rerum est: sed infima iuxta ac maxima à diuina manu per Superiores expectat; magisque etiam fertur in abiecta, tanquam in tutiora, & rarò lapsui aut præcipitiùs vicina, quia minùs splendida, & per plana ducunt, in quibus rarior ut

æmulatio, ita infrequentior casus est.

Monemur in hac materia à Sapiente:

Altiora te ne quæsieris, & fortiora te ne scrutatus fueris. Sed qua præcepit tibi Deus, illa cogita semper, & in pluribus operibus eius ne fueris curiosus. Non est enim tibi necessarium, ea quæ abscondita sunt, videre oculis tuis. In superuacuis rebus noli scrutari multipliciter, & in pluribus operibus eius non eris curiosus. multos supplantauit suspicio illorum, & in vanitate detinuit sensus illorum. Præcipit Deus per Superiores. quorum præceptis vt diuinis insistendum esse monet Apostolus. & ferè ingentem animo inquietudinẽ omnis curiosior indagatio adducit, magnarum vbi-que turbarum ac iactationum causa. ita in perpetua quadam tempestate fluctibusque curiositas omnis nauigat, omnibus littoribus exclusa, ignara portus, stationum nescia; inanibus plerumque vanisque suspicionibus iactata, dum irrequieta mente Superiorum consilia scrutantur, dubiosque & fortuitos euentus, solerti subdolaque prospicientia anteuertere conantur, semper anxij ne quid fors alienum à propensione Superiores de se statuunt, multum de diuinæ prouidentiae fiducia detrahentes, quam præprouida sagaci-que industria sua præuertere conantur.

quo fit vt relinquat illos Deus in manu consiliorum suorum, destituatque cælestibus subsidiis; quibus affluunt quotquot vni Dei voluntati innixi, totam sui curam Superioribus relinquunt, certi fortunatius successura quæcunque à prudenti & præprouida diuina manu profluunt, quã quæ à fatuo delectu nostro euentum ignaro.

Huc accedit, in altissima pæce viuere, quotquot se suaque diuinæ prouidentia committunt, ac cæca quadam manu accipiunt, quidquid à prouida illius dextera porrigitur. Eueniant vt placitum bonitati ipsius fuerit, res imperatæ; habent ad manum illud solatij, Obsecuti sumus Deo. non eueniunt optata aut sperata felicitate? satis esse hominî debet, paruissè in Superiore Deo. & fortè in salutem erit infelicior euentus, fuisset in damnatione aut lapsus fortunatus successus. Quid altiora nobis scrutamur mortales? certum, non posse falli Deum, nec fallere sperantes in se posse.

Qui verò curiosiore indagatione Superiorum, ac in illis de se suisque aut aliis etiam, diuina disquirunt consilia, in perpetua quadam sollicitudine vitam trahunt. quòd si Superiores ad sua vota deduce-

duxerint, æterna ferè pœnitudine conatus suos luunt; cùm plurimùm extorta hæc imperia infelici exitu claudantur, & præcisa tunc spes omnis mutationis videatur, cùm erubescimus ad prioribus contrarias preces, qui auctores nobis malorum fuimus, & mutatae in Superiore sententiæ.

Remedia.

Obedientiæ per meditationes, librorumque de hac virtute tractantium lectiones, excitatus amor.

Studium tranquillitatis internæ, quam nullo negotio consequuntur, quicunque extra omnem sollicitudinem Superiorum tanquam Dei imperia læti hilaresque expectant & excipiunt.

Commemoratio eorum, quibus plerumque minùs feliciter nimia hæc cura cessit; contraque aliorum, quibus fortunatissimo ferè exitu paratus ille animus ad omnia Superiorum mandata exequenda successit.

Proderit etiam cogitare, quem curiosior hæc indagatio finem sibi propositum habeat. si solam cognitionem: quò mihi illa? aut quid adferet internæ pacis? si ut

habeat primus euulgator; inuidentiam etiam vereri debeo, & secretorum euulgator Superiorum, & indignationem timere. Si ut aliò Superiorum consilia flectam in iis quæ me tangunt; parum tutâ ingredior viâ: accedentibusque molestiis, quales promptum est hîc nasci, nullus querimoniis relictus est locus, cùm Superiorem à suis ad mea consilia deduxerim. inde mœrores sequuntur non rarò; cùm contra pacatissimi sint, qui toti à Superiorum voluntate pendent, parique affectu quæcunque demum imperata cadant, amplectuntur; quibus si non omnia ex voto prospera eueniant, habent quo se solentur, Superiorum, non sua se voluntate rem aggressos; & tutò Superiori difficultates proponere, remediaque deprecari possunt.

CAPVT V.

Obedientiæ neglectus.

QVI ferè ex eo prouenire solet, quòd in Superiore non cognoscamus imperantem Deum: quem si in illo intueremur, non facilè ab imperatis deflecteremus, iudiciaque nostra illius præponeremus. Nam quis paulò religiosior sua diuinis

nīs consiliis, quæ in Superiore elucet, præferre audeat? aut quis ea temeritate, barbaroque fastu est, qui diuina postponat suis? Omnis proinde neglectæ obedi-
tiæ ratio in Superioris ignorance consistit, cum vicariam in illo Dei potestatem inferiores non agnoscunt, nec imperantem in eo Dominum considerant, sed humanis rationibus metiuntur omnia; nec aliud in Superiore, quam aut inditam naturâ, aut longa experientia partam prudentiam intuentur: ita fit, ut sæculi more obtemperent, rationibus nimirum, aut metu, aut sola externa auctoritate ducti. qui obsequendi modus longissimè à diuino abest, ac prudentiæ potius, & seruili timori, quam diuinæ voluntati in Superioribus imperanti innititur; quam si in Superiore consideraremus, non difficile foret obtemperare, maximè cum in obsequēdo rarus intercurrere error possit: non quòd non aberret à recto veroque Superior, sed quòd error ille perrarò in Superiorem cadat: nec minora interim apud Deum obedientiæ præmia reposita sunt, si quis imprudenter, quam si prudenter imperanti obtemperet; ac merces etiam maior illi debetur, cum minùs prudenter ac prouidè imperanti, solius Dei nomine,

in illis quæ nullam peccati labem continent, obtemperet.

Damna verò adeò graua & obuia sunt quæ ex obedientiæ neglectu nascuntur, vt in omnium oculos nullo negotio incurrant: neque enim vlla non Religionis modò, in obedientia potissimùm fundatæ, sed nec reipubl. aut priuatæ etiam domus sine huius virtutis accurata obseruatione prudens cōsistere gubernatio potest, nullum imperium stare, nullus exercitus ab hoste victoriam sperare, nulla securitas in rebus humanis, pax nulla, quæ ferè obedientiâ tanquam vinculo ligatur.

Ingentem deinde rerum omnium perturbationem huius defectu necessum est sequi, cùm membra capiti, inferiores Superioribus aut imperant, aut non obsequuntur: quæ res interitum corpori de propinquo minatur. nam quid sperari potest, quid non timeri, cùm inuertitur hic ordo rerum, quo inferiores Superioribus parcre æquum est? cùm aut Superiorum ignauâ incuriâ inferioribus omnia permittuntur, vt pro voluntate quisque sua vitam moresque instituat, munia deligat, res administret, in quæcunque se domestica ac externa profundat; aut cùm innato quodam negandi timore, aut mœ-

tore

rore afficiendi metu, aut rogandi importunitate, succumbunt; aut temporalium denique commodorum causâ; aut sanè ob inferiorum duritiem, & arrogatam auctoritatem, è Superiorum tepore natam, liberas suis habenas permittūt; quid expectari magni bonique potest, dum singuli vnus licet corporis membra, contrariis in diuersa motibus feruntur, si non vltimarum desperationum miseranda consilia?

Commoda verò adeò manifesta sunt, vt non egeant explicatione: mutuò enim hac virtute debito amore constringimur, dum singuli commissio sibi muneri incumbentes partes suas tuentur, ne in aliena sibi non concredita inuoluantur. Augustini de hac virtute verba sunt: *Virtus obedientie in rationali creatura, mater quodammodo omnium est custosq; virtutum.*

*De Ciuitate
lib. 14.*

Sequitur hanc virtutem sine sollicitudine vita tranquilla, & curarum expers, cùm Superiori se totum resque suas inferior credit, illius nutui paret, totumque se illius voluntati committit. Felicem imperata res euentum consequitur? præmia cum Superiore laudesque partitur, & maior etiam gloriæ pars ad inferiorem transit. Infelicem sortitur effectum? si obse-

cu-

cutus est imperanti, securus, & extra culpam & reprehensionem est: prudentia, timor, dubius & anxius de euentu animus, seriæ deliberationes, mœror & pœnitudo; Superioris sunt: pœnitudo, dolor, metus nullus, fortuitarum rerum sollicitudo, interni quæ fluctus nulli; sed pax alta, profunda quæ quies, ingens quæ animi tranquillitas, inferioris sunt. Nullæ in hoc, ut in Superiore, noctes insomnes, nulla anxia futurorum cogitatio, nullæ sollicitudines cor exedentes, nulla præcipitatio, nulla gloriæ aut nominis defraudatio metuenda: cum satis inferiori in omnem laudem sit quemcunque res euentum fortita fuerit, paruisse; nec minorem laudem quocunque demum euentu, felici an infelici, mereatur, neque gloriâ commendationem quæ referat inferiorem. cum omnis obsequentis honos in sola parentia, non in successuum felicitate consistat, & fortunati infortunati quæ euentus solius Superioris delectui ac imperio ascribi debeant. Semper proinde laudem decus quæ quocunque euentu obediens reportabit, etiam apud iniquos rerum æstimatores; solam verò laudem Superior è fortunato euentu consequetur. ut tutissima obsequentis conditio, certissima quæ gloria;
dubia

dubia ac incerta per omnia imperantis sit. tanto hæc discrimine dissident, tantoque imperiis potior parentia est.

Remedia.

FRequens lectio, & commemoratio meditatioque eorum, quæ ad hanc virtutem pertinent. commodorum etiam incommodorumque, quæ ex huius virtutis prosecutione aut neglectu nasci proclive est, sæpe repetita memoria, quanta animi tranquillitate, quanta securitate ac certitudine, molestiis expertem vitam ducant, qui se totos obedientie sacrarunt: quanta contra mentis turbatione, anxietate, inconstantia, dubioque ferè exitu iactentur, quotquot ab illa degenerarunt, aut deflexerunt. Bene Sapiens, *Fir obediens loquetur victoriam.* omnium nobilissimam retulit Christus, qui *humilianit semetipsum factus obediens usque ad mortem, mortem autem crucis.* Sequitur victoria, & è victoria triumphus. *Propter quod & Deus exaltavit illum, & donavit illi nomen, quod est super omne nomen: ut in nomine IESU omne genu flectatur, caelestium, terrestrium & infernorum, & omnis lingua confiteatur, quia Dominus IESUS Christus in gloria est Dei Patris.*

Fre-

Frequentare narrationes in familiari colloquio, de infelici plurimum exitu illorum, qui Superiorum imperio neglecto, suo se arbitrato voluntateque rexerunt: quantaque sanctimonix ac miraculorum etiam prerogatiua virtutis illius cultores, omni ætate eluxerint.

In omni Superiorum imperio Deum cogitare imperantem, allicientem, præmiantem. Monet Apostolus: *Obedite præpositis vestris, & subiaceite eis. ipsi enim peruigilant quasi rationem pro animabus vestris reddituri, ut cum gaudio hoc faciant, & non gementes. Non ad oculum seruientes quasi hominibus placentes, sed ut serui Christi, facientes voluntatem Dei ex animo, cum bona voluntate seruientes sicut Deo & non hominibus.* addit Petrus: *Non tantum bonis & modestis, sed etiam dyscolis.* Ac licet de seruis illa verba; multo certius in Superioribus locum habent, quibus non humana mercede, sed tanquam Deo peculiari obedientix voto nos astringimus. Hieronymi verba sunt: *Præpositum timeas ut dominum, diligas ut patrem. Credas tibi salutare quidquid ille iusserit. nec de maioris sententia iudices, cuius officij est obedire, & implere que iussa sunt.*

Sanctorum deinde exemplo, ac in primis Christi Domini, ad ardua quæcunque im-

imperia sese animare, spe maximè futurorum: sæcularium etiam exemplo, qui in Principum obsequiis, militari disciplina, ac in omni republica, in grauissimis rebus maiorum imperiis parère coguntur.

In omni re Superiori proponenda, duo præmittere, orationem & resignationem.

A facilioribus inchoandum, aliquando etiam in non noxiis aliqua concedenda: ad ardua dein descendendum, mora tamen aliqua interiecta.

Per familiares etiam aliquando monendo, maximè aliorum exemplis, qui maiores ætate, eruditione, gratia, paratos promptosque se exhibent, omnem felicitatem in vna obedientia ponentes.

CAPVT VI.

Obedientia è solo metu profecta.

Seruilis omnino ingenij obediētia, quæ non vltra metum progreditur: si clàm futura putat, imperata negliget; si pœnarum effugium sperat, etiam contemnet. nihil proinde magnum ab hoc sperari potest; quale ferè ab animo bene composito, & affectu, aut in rem ipsam, aut in im-

imperantem proficisci consuevit : amor namque ardensque desiderium potentissima incitamenta ad magna sunt, quibus tanquã validis arietibus, quæcunque aduersantia propugnacula non magno negotio propullantur ac deuerruntur. audet enim, qui amat, & leuia arbitratur quæcunque amore suo minora sunt : qui metuit, etiã viribus suis inferiora perhorrescit. omnia enim metitur metu, vt ille prior amore: qui cùm rebus maior sit, non mirum ad ardua, vt ad leuia, prosilire: cumque metus in aliis rebus etiam leuioribus maior sit, nihil mirandum si ad illa non extendat manum. desperatio enim quædam felicioris euentus, fortunatiorisque consecutionis metu impellente mentem possedit : hinc angusti illi exsurgunt animi, tremorque ac timor, & diffidentia timoris comes. quare frustra ab hoc pectore, viro ac cælo dignas, victurique ac in posteritatem abituri nominis cogitationes expectabis.

Idem in obedientia è solo humano metu nata reperies ; aut enim vniuersum quod operatur opus, negligit, aut sine anima aut mente præcepta exequitur, aut languet ac quasi congelidata friget, plurimumque desperato calore amittit. succedit

cedit pallor ac quædam operû ægritudo, nec valetudinẽ sperare possumus nisi seruilem hunc metum, potenti quodam amoris medicamine tanquam purgantibus minuat ac pellat.

Alienationes exinde animorum exurgere necessum est, quæ in odia paulatim excrescunt, in murmurationes, detractiões, aliaque his affinia vitia. nam vbi solus metus inferiores continet, displicentia nascitur imperantis, cum imperata displiceant, è qua procliue est recensita vitia, aliaque his similia tanquam laxatis habenis decurrere: quem enim solus continet metus, is si hunc excutere potest, fertur in imperantem, nec parcat, vbiunque vulneribus locum reperit, perpetuaque in statione est. hinc aperto si quando datur marte; inde, vt plurimum fieri consuevit, ex insidiis imperantem petit, omnem euertendi illum occasionem captans.

Quid? quod animus è metu obsequentis in perpetua quadam amaritudine versetur, semper inuoluntarius, suspicionibus & æmulationibus plenus, nusquam nisi in oblocutionibus apertus & candidus, semper tectus & simulatus, & consiliorum suorum occultator, mœroribus verò tantaque melancholia tam validè oppressus, vt

ferè nonnisi cum morte, aut loci Superioris mutatione dolorem ponat.

Neque latere externos hæc res potest, qui aut ab imperatarum rerum tarda & tepenti executione, aut à verbo per imprudentiam elapso, mali huius magnitudinē perfacilè cognoscunt: quod dum fit, nihil promptius esse potest, quàm vt vel in inuidiā vocetur Superior, vt in imperando durior & imprudentior, vel inferior suspicionem apud alios incurrat alienioris à Superiore animi.

Politici deinde ex hoc metu exurgunt in inferiore spiritus, plenaque simulationibus sunt omnia. obsequentiam parendique studium factis exprimit, mente aliud voluit: vt rebus cogitata non respōdeant. atque hinc consilia exurgunt varijs artibus tecta, dolisque fraudibusque plena, & cū mentem Superiori obsequentem, & imperiorū amantem opera præ se ferant, animus odio natat, & sub exteriori obedientiæ spongia, tanquam sub amplexu Ioab ferrum latet, aut sub osculo Iudæ vincula & catenæ.

Et ignauissimorum hæc ferè signa animorum sunt, qui cū de virtute desperent, ex insidijs hostem petunt, solis fraudibus fortes, reliqua socordes. Generosus ani-

animus aperta ingreditur via, antè in mortem ruiturus, quàm femineis his armis v-surus. certè nō nisi seruilis ingenij, & ignauissimi cuiusdam pectoris est, solo metu ad obsequendum impelli, testatissimum-que signum nihil in tali religiosi affectus latère. imò manifesta signa hæc sunt spū-riæ vocationis diuinæ. quæ si germana legitimaque esset, ab amore nasceretur, omni seruili metu depulso.

Neque hic animus cælo dignus est, qui solis minis, grauioribus acrioribusque monitis, verberibusque in officio contineri potest. cælo filij inscribuntur, & hæreditario quodam iure possessionem illius ad-eunt; excluduntur quibus præter seruile ingenium, nihil amoris ingentum est, nihil filialis parentiæ & venerationis. amare debet quisquis amoris præmia sperat. nulla verò cælo quàm amor dantur; quo solo præmia metiri & erogare solet Deus.

Remedia.

Magna parte à Superiore petenda sunt, qui si paternum in suos affectum induat, rebusque non nudis verbis illum ostendat, non magno negotio suorum in se affectum trahet. Neque difficile

erit amare imperata, cùm qui imperat, amatur, vbi paternum Superiorum pectus fenserint; maximè cùm monita & imperata à paterno candore nata viderint.

Seria frequensque cogitatio imperantis in Superiore Dei, plurimùm in hac re potest. qui enim vicariam in illò Domini potestatem intuetur, non tepidè ad imperata exequenda descendet; maximè si Sanctorum virorum exemplis, in omni Superioris imperio, cælo imperia nata cogita-uerit. quis enim non alacer obtemperet imperanti Deo? In omni ergo imperio si Dei imperia considerauerimus, quis non pulso frigore ac languore lætus aduolabit ad præceptorum executionem, certus iam de illius voluntate?

Iuuabit etiam si generosum inferior animum induat, illumque ad magna obfirmet, indignumque viro ac Religioso esse cogitet metu compelli, vt pudeat illum seruilis ingenij, & indignetur ad mancipij nomen, maioremque se statuatur, quàm vt vincatur à metu: quin adeò fortium pugnatorum exemplo, antea in media arena generosam euomat animam, quàm timori locum tribuat.

Quòd si quis imperata amet, tanquam vberem materiam cælo coronandam, tanquam

quam fecundā messem horreo Dominico inferendam, discatque non imperantem intueri, variis fors affectibus obnoxium, sed promissa obsequentibus præmia; non erit difficile, metu seposito, æternorum amore alacri mente ad imperata decurrere, certus de remuneratione, certus de præmio, amabitque imperia à quocunque ore dictata, felici æternitate commensuranda.

CAPVT VII.

Excusationes.

NON postremum in Religione malorum, cū imperata à Superioribus, quasi obiecto clipeo, exētimus, palām & in os resistere verecundia prohibet, via excogitatur qua sine rubore liceat. valetudinem accusamus, virium tenuitatem, morbum etiam languoremque; mentimur. verbo, posse negamus, nimirum quia nolumus non possumus: vt nolle non posse sit. eneruandæ obedientiæ certissima regula. arbitreris tanquam nouacula aut securi iugulum illius præscindi: ita duobus verbis, Non possum, robur illius omne subruitur. Neque potest grauius quidquam Su-

perioribus euenire , cùm nolentes cogere durum sit , & plus habeat coactio omnis domini ac iudicis quàm patris ; & indulgere negantibus inconsultum sit , sit vt incerti dubiique hæreant Superiores. Si pergunt imperare , seueros cogites ; si assentiuntur repugnantibus , mollescunt animi , & nulla iam imperia sunt , nisi quæ ultro suscipiuntur : vt vniuersa obedientia non ab imperantis virtute aut prudentia , sed à parentis nuda voluntate ac propensione pendeat. decurritur enim ad tritum illud , Dicite nobis placentia , & audiemus & obsecundabimur : vt ante imperia voluntas deposcenda inferioris sit.

Infelici sanè ferè exitu excusationes hæ terminantur. cùm aut in nimis indulgentem , aut fortent nimiùm Superiorem inciderint. nam & primus indulgentia perdit , & secundus robore non tam flectit , quàm frangit. mediàm verò inuenire viam difficillimum. nec quisquam facilè talibus ingeniis satisfaciet. nam vt voluntatibus istorum subseruire graue , ita nolentes cogere durum est. Sanè disciplinam paullatim omnem diffluere necessum est , cùm paucorum exemplo reliqui ferè in paria trahantur. Si enim ad imperata excutienda minùs grata satis est , Non possum ; quis
non

non duobus verbis molestiam omnem deterget, & auertet à se quidquid minùs naturæ, aut propensione cuiusque amicum est?

Infortunata omnino Superioris conditio, cùm tales nactus fuerit, quibus nec imperare nec indulgere tutum. & vix in his prudentiæ locus est. neque enim tales ratione, Dei futurorumq; timore, aut vocationis amore, sed solis propensionibus suis aguntur. placent imperia? amplectuntur. displicent? excutiunt. Nec in vna re hæc res finitur. assuescunt paullatim his excusationibus, adeoque excrefcit hæc licentia, vt quidquid non placet, negent se posse, solis placituri obtemperaturi. vnde fit vt si in facilem mollemque Superiorem inciderint, ad indignissima quæque Religionem dilabantur, suisque singuli motibus ac propensionibus agantur, nec tam ipsi Superiori, quàm hic illis obtēperet, euerfa omni prudentis gubernationis regula. si in fortem & qui imperare pergat deuenierint, ad mœrores labātur & melancholias, & de deferenda vocatione cogitationes.

Nec in vno malum hoc clauditur, it ad plures, & obit paullatim domum, cùm paria sibi singuli concedi velint, contendantque iisdem quibus alij prærogatiuis do-

nari. quæ si negauerit Superior, & personarum hæc discrimina admiserit, tota familia æmulationibus & oblocutionibus repletur, nec quies aut pax vlla, sed tanquam fluctibus ac tempestatibus iactatur, non ante domus totius interitum positura motus: quos etiam in externos non nemo effundet, solatia ab his, & morbo suo remedia captaturus.

Prouenire hoc malum assolet, vel ex supina quadam ignauia, vel à libertatis amore, vel à Religionis tædio, vel ab alienatione à Superiore, vel à pusillanimitate mentis, vel ab amore proprio, vel à iudicij sui tenacitate, vel denique ab innato quodam fastu, & opinione sui. è quibus illæ proficiscuntur, non deprecatoriæ tantum, sed excusatoriæ & negatoriæ voces, præualida hac armatura armatæ, Non possum. hîc nimirum imperatis inferiores vires sunt, ibi alienior animus munus exhorrescit, alibi oneri succumbit, valetudini noxia res aut cælum, focij displicent. vellem; sed negat corporis animique robur, impedimenta quædam siue illa mentis, siue illa virium non permittunt impositæ rei susceptionem. adducitur etiam conscientia, & mentis quædam abdita vniuersim narrata, periculaque non expresso periculorum nomine.

de-

denique vno omnia verbo clauduntur, Non possum. quid agat Superior? perget imperare? ad manum est, Non possum. nihil nimirum potest nisi quod animo collibuerit. ad hoc & vires & animus sufficit, ad imperata defunt. ad optata robur superest, ad imperata exulat. quò se vertat Superior? vrgebit nolentem & negantem posse? sæuus & crudelis habebitur, qui maiora viribus imponat. indulgebit? collabascet omnis paullatim disciplina, corruentq; imperia, & in his Religio vniuersa. vt magna in talibus opus sit dexteritate ac prudentia, ne aut vniuersa corruat disciplina, aut mœroribus succumbant & opprimantur inferiores, aut otio diffuant, & in noxium dilabantur teporem, Dominico ore deuomendi, ac paullatim spiritalia fastidiant nauseabundis in omnibus similes: nec antè finem faciant, quàm desperata vbique re, in ignauissima socordia contabescant, diffuantq; in amicam otio carnem, & quia spiritu inceperunt, in fœdas corporis voluptates infortunatissimo exitu dilabantur.

Remedia.

AB exercitiorum spiritualiū frequentī repetitione petenda, vt his accendatur ad ardua animus, Christiꝑ; Sanctoꝝꝑ; exemplo discat gaudere duris, delectari asperis, generosiꝑ; inter hæc animam positurus, quàm inter mollia victurus.

Aliorum deinde, siue eruditione, gratia, eloquentia, viribus inferiorum, exemplo animandi & ad magnā impellendi sunt. honore etiā gloriaꝑ; ac dedecore nonnunquam excitandi.

Iuuabit interdum loci, sociorum, Superiorumꝑ; mutatio. virum enim si tales nacti fuerint fortem, constantem, prudētem, quiꝑ; exemplo præeat, socios etiam serios, & ad labores promptos, sola non rarò verecundia ignauiam deponent, quam sub tepentibus sociis, mollibusꝑ; Superioribus nutriebant,

Quòd si emendatio non successerit, non inutile fuerit tales ad postrema officiorum reiicere, nullo loco habere, nulla familiaritate coniungere, vt pudore tandem vincente manum maioribus admouere incipiant, fortiꝑ; certiusꝑ; hoc etiam fiet, si iuniores alacres & ad ardua prompti illis præ-

præferantur, si præmiis donentur, laude afficiantur, ac ad illustriora munia obeunda admoueantur.

CAPVT VIII.

Intercessionēs.

VEræ ac genuinæ obedientiæ impedimentum, dum imperata aliorum intercessionibus infringuntur, & aliorum vertuntur importunis intercedentiū precibus: vnde periculum creari Religioni potest, ne in omni imperio voluntas primū inferiorum, propensioque inuestiganda sit; nec quisquā alia suscipiat, quàm ad quæ propensam voluntatem reperit, vsurus in non placentibus aliorum intercessionibus, quorum operâ imperata evertat: maximè cum apud Superiorem facilem, pronumque in suorum voluntates res agitur.

Hinc etiam sequitur, cum subterfugiant imposita onera, qui Superioribus in primis idonei videbantur, vt imparati-ores, minusque idonei, non sine graui totius corporis detrimento, rebus admoueantur.

Tollitur deinde omnis rectè gubernandi

di ratio, libertasque, Superioribus sollicitis in omni imperio de voluntate suorum, ut non tam Superiores, quàm inferiores præesse videantur, ut quorum voluntati magis quàm Superiorum fiat satis.

Exurgunt verò ex his intercessionibus ingentia mala, cum paulatim iuvenes, patronos sibi apud Superiores parant, & præprouida sollicitudine tanquam in cautelam, antè sibi mæcenates conciliant, habituri auxiliores & propugnatores quacunque necessitate occurrēte. atque hinc partium videas suboriri studia, dum varij variorum beneuolentiam captant, eorum nimirum, quos apud Superiores plus posse arbitrantur.

E quibus initiis quasi dissensionum iactis fundamentis, mutua paulatim animorum coniunctio scinditur, dum huic potiùs, quàm illi adhærescimus, & hos tanquam in clientelam datos, magis quàm alios tuemur. quid enim reliquū, nisi ut ratione diuersorum patronorum ac clientū eamus in factiones, dum hunc laudamus, damnamus alium: illum supra merita extollimus, alium infra dignationem deprimimus?

Hinc etiam aulici paulatim irrepunt mores, mutuae obseruationes, ac ne paulatim

tim patrocinationis studium intepescat, frequentes, cum insigni temporis iactura, miscentur confabulationes: inter quas fieri non potest quin sæcularia intercurrent colloquia plurima, mutuae aliorum detractiones, ac in primis patronorum, ac clientum aliorum; subdolæ etiam, curiosæque in iis quæ gubernationem tangunt, indagations; & iam tanquam in diuersorum patronorum clientes conspirationes subnascuntur; consuetudo cum aliis rarior, cum illis frequentior.

Nec vera tamen inter patronos hos ac clientes, solidæue amicitia est: mentita enim omnis beneuolentia est, quæ, quamdiu apud Superiores aliquid poterit patronus, tamdiu adhærescet; ille si gratia aut munere exciderit, cadit omnis ille simulatus amor, & alium circumspicit mœcenatem, plusque iam in priore damnat, quàm antè laudabat. Neque hoc mirum, si cogitemus, non hominẽ clientes hosce, sed fortunam illius fuisse veneratos.

Minor etiam inter vnius partis clientes amor est, quos sola patroni veneratio continebat, cùm intus potentibus æmulationum ac inuidentiæ fluctibus concuterentur, si aut vnus carior aut frequentior, aut munere aliquo, aut verborum consulta-

tionumque prærogatiua prælatus, innumerisque aliis ex causis, quas solers sibi invidentia fingit.

Decurritur tandem etiam usu, & quadam consuetudine intercessionum harum ad externorum intercessionem, magnorum nonnunquam virorum, Principum etiam, & benefactorum, ut hac quasi armata manu extorqueant à Superioribus imperata. Quare nihil euenire benè constitutæ Religioni deterius potest, magisque noxium: cum enim neque negare Superiores audeant, neque concedere sæpe tutum sit, hærent anxij, & victi magnorum precibus, quæ illis pro imperio sunt, succumbunt, permittuntque & illis, & Religioni nocitura. nam cum neque mores delictaque interdum suorum aperire religiosa caritas permittat, neque negare petentibus audeant, damna nascuntur, nulla postmodum prudentia reparanda.

Remedia.

MInus recedat Superior à sententia semel maturè concepta, intercessoribus intercurrentibus, quàm si ipsi quas proferunt difficultates, vltro proponant.

Seriò intercessores moneat, & ab intercessio-

cessionibus deterreat, doceatque quam noxiæ illæ omni bonæ gubernationi sint.

Intercessores hos, patronosque, si pergant importuniùs suorum causam agere, serió non semel monitos à se remoueat Superior, aliisque functionibus distineat; vt hoc exemplo à patrociniis hisce terreantur reliqui.

Inuigilet deinde Superior, vt valida manu clientelas patrociniaque rescindat; occurrat initiis, nec permittat noxia hæc molimina succrescere, seculares hæce aulicasque noxias in primis Religioni consuetudines; terreatque ab his, grauib; etiam propositis pœnis.

Munere etiam si quo splendidior fungantur religiosi hi mœcenates, exuantur, quò desinant ex officij magnitudine audaciam sibi ad patrocinandum sumere, reliqui que à simili conatu terreantur.

Si externos patronos Superiores aut iusto metu veriti fuerint, aut factis etiam senserint, ad ea loca patrocinatorum prouocatores transferant, in quibus omnis cuiuscunque patrociniij spes præscindatur. vt dum destitutos se patronis viderint, vni potiùs virtuti quam aliorum gratiæ, beneuolentiæ, ac potentiæ incumbant.

CAPVT IX.

Laborum fuga. Otij amor.

MAlorum vitiorumq; adeò omnium seminarium. ex hoc namque omniũ generum profiliunt mala, in Religionis interitum nata, omnemq; succum, seminaque fecundissimi antea illius agri cmedullantia ac perimentia. & quid sperari à Religioso potest otij amatore, quæ non timeri mala? nam vt omnino nihil agat, remotissimum ab ingenio humano est, quod occupationibus gaudet, nec in ignauo cōsenescere perpetuò potest otio. refugit res instituti, ac vocationi suæ proprias? conuertit se ad alienas; & cūmi desint quibus delectetur, transit ad Religionis noxia, seque suosque non rarò in aperta coniicit discrimina. Si negata, aut non concessa illi sacularium rerum negotiatio, deflectit ad animi mala; paulatimque tam altè ignauissimi teporis huius venena bibit, vt ne excutere quidem hæc dum volet possit. tantum inueterata vitiorum consuetudo potest, vt versa iam improbitas in naturam videatur, quam cum sola vita deponat.

Pro-

Proſiliunt ex hoc otio murmuraciones, dictorum factorumque aliorum obtre-
ctationes. nam cum paria alijs aut noli-
mus, aut vitio noſtro non poſſimus, fit vt
damnemus in iis, quæ nos aut magnitudi-
nis terrore, aut otij amore fugimus: & cum
deſperemus aſſequi in alto poſita, pigeat-
que ad ardua dexteram porrigere laboribus
territos, dolemus reliquos generoſo dif-
ficilium calcatu, quaſi per ſudores & ſan-
guinem ad excelsa decurrere. naſciturque
hinc optimarum quarumcunq; rerum in-
uidencia: à quibus dum ob coniunctam
ferè indiuiduo quodam nexu difficulta-
tem, manum remouemus, alienæ virtutis
inuidencia ſtimulamur & depaſcimur; co-
namurque reliquos aut propoſitis, ac in
immenſum auctis difficultatibus terrere,
aut ſperatorum ex iis fructuum extenua-
tione auertere. quòd ſi non aſſequamur,
ambitioni, aut inani placendi Superiori-
bus alijsque ſtudio conatus hoſce aſcri-
bimus.

In ualeitudinis deinde metu ab arduis
quibuſque reliquos auocamus. ac ſi quæ
tota Religione exempla ſint eorum, quos
in medio magnarum rerum conatu vale-
tudo aliquando deſtituit; ingenti illa am-
plificatione in terrorem adducimus, de-

teriora etiam ob oculos ponentes. quæ res non parum momenti ad terrorem habet. Voluntario interim silentio teguntur innumeri, quorum maximis conatibus valetudo respondit. tacentur deinde quos in otio aut immatura & inexpectata mors præoccupavit, aut perpetua quædam inualetudo tenuit. tacentur denique quorum inualetudo otio crevit, decrevit laboribus, quique non antea otio natam ægritudinem deposuerunt, quàm se laboribus darent, quorumque quasi per gradus laboribus valetudo crevit, ut tantum valetudinis accederet bonæ, quantum laboris.

Et sanè plurimum damni ex amico hoc quorundam otio reliquis accedere negare non possumus. Valent enim hæc maxime in iunioribus in exemplū, ac sub prætextu valetudinis tuendæ, otij crescit amor: quod semel degustatum, minus generosa pectora perfacile in solidum, quietis quadam dulcedine ad se rapit, detinetque illicibus his prærogatiuis, molestiarum & laborum carentia.

Ad hos interim otij amatores prono quodam lapsu vitia decurrunt. & ferè omnes tales in somnum pronos, in cibum ac potum æstuosos, in corporis denique commoda omnia procliues videas, ac tandem

dem in carnem labentes. Laboribus sanè caro frangitur, sudoribus tanquam fluminum superfusu flamma illius restinguitur, otio roboratur, ac tanquam olei superiectu accenditur: & vt non facilè insurgit laboribus tanquam castibus domita, ac quasi pedibus conculcata caro; ita non facilè prostrata iacet, otio fota, deliciis commodisq̃ue exstimulata. Docemur hoc omnium Sanctorum monitis, & quotidiana propè in omni Religione experientia, vt ad lapsum non alia pronior via sit. & ferè bona pars illorum, qui semel ad Religionis aratrum porrecta manu, retrò respererunt, ad Ægyptias ollas, ad honores & commoda; ab otio, & laborum fuga viam sibi ad præcipitia prostrauerunt. vt verè

dixerit Sapiens: *Via pigrorum quasi sepes spinarum: via iustorum absque offendiculo.* & alibi: *Pigredo immittit soporem, & anima dissoluta*

Pro. 15.

Prov. 19

esuriet. nam mens quia se ad superiora nō stringendo non dirigit, neglectam se inferius per desideria expandit. Et dum studiorum sublimium

Gregor.

Past. p. 3

c 16.

vigore non constringitur, cupiditatis infimæ fame sauciatur: vt quo se per disciplinam ligare dissimulat, eo se esuriens per voluptatum desideria spargat. cui rectè per Salomonem dicitur,

Pro. 20.

Propter frigus piger arare noluit, mendicabit ergo æstate, & non dabitur ei: qui enim nunc ex

bonis operibus non exudat, cum sol iudicij feruentior apparuerit, quia frustra regni aditum postulat, nihil accipiens æstate mendicabit.

Remedia.

A Superiorum in strenuos operarios beneuolentia sumenda sunt. vt quos magno religiosoque conatu in proximorum salutem incumbentes vident, nullis laboribus, nec propriæ valetudini parcentes, eos & singulari affectu prosequantur, & currentes sistant, & iniecta paterna manu, beneuolè reprimant, deque necessariis omnibus vltronea ac munifica dextera, etiam reluctantibus prouideant.

In alios verò, quos in medio magnorū laborum cursu fractos reperiunt, vniuersum paternum affectum profundant, nihil deesse patiantur, & quantum Religio patitur, peculiaribus fauoribus prosequantur, vltro misceant colloquia, consiliis etiam dandis adhibeant, nec quicquam illis eorum quæ ad honestam recreationem, decentemq; ac religiosam animi laxationem faciunt, deesse patiantur, vltroque etiam ingerant, & ad illa cogant.

Exemplo deinde suo, magnorum Imperatorum more, reliquos Superior excitet. Incredibile quantum hoc in subditorum

ani-

animis valeat, vt vel solo pudore etiam illi excitētur qui ad otium proniores sunt.

Exemplis denique, maximè in Religione, aut in Ecclesia Dei illustrium, qui affecta etiam valetudine, magna ingenti ausu conatuque aggressi, ad felicem exitum deduxerunt. Iam si vita laborantes destituat, quid in omnem æternitatem gloriosius, quàm fortium militum more, in mediis sudoribus, laboribus, sanguineque vitam ponere; nec in gloria aut ignaua morte vilem animam emittere; factaque priùs fortia indecora morte signare?

Proderit etiam vt, si quos otio & ignauia se dare viderint, nulla eos sibi familiaritate iungant, nullis familiaribus colloquiis dignentur; sed tanquam ignauos, & Religionis quosdā quasi fucos ac vomitus auersentur. vt vel dedecore, ac prudenti quadam paterni affectus repulsa contemptuque ad meliora impellantur.

Vtile etiam fuerit tales in humilibus quibusque officiis continere, & ab omnibus dignioribus remouere; ad extremas etiam quasdam habitationes, minusue nobiles reijcere; aliorum etiam monitis, ac in primis Præfecti spiritus ad labores prouocare, præmiis ac non rarò minis etiam propositis; vt quos non potest amor, non

magnorum exempla, impellat timor & ver-
ecundia è contemptu nata.

Neque res vlla potentiùs dæmonum
incurfibus refistit, impetum frangit, quàm
perpetua feriarum rerum occupatio. Hinc

*Ad Fra-
tres de
monte.*

*illud Bernardi: Varijs autem officiis occupatus,
nullis vacabis cogitationibus, & dum ab alia
transis ad aliud, opusque succedit operi, illud so-
lum mente tenebis, quod agere compelleris. &*

*Ad Ru-
ficum.*

*Hieronymus: Facito semper aliquid operis, ut
te semper diabolus inueniat occupatum: multam
Eccli. 33 enim malitiam docuit otiositas.*

Vitabit sanè
quisquis salutis suæ studet, quisquis illi ex a-
nimo consultum volet. neque enim potest
mens humana, tanquam in ignauo quo-
dam sopore tota conquiescere. semper a-
liquid agat necessum est: igni persimilis,
qui erumpit in flammam, in scintillas, in fu-
mum; & antè ferrum disrumpet & chaly-
bem, quàm arctetur angustis. facit idem
mens nostra, antè diffringet hæc vincula
quibus illigatur, quàm vt in pigro hoc car-
cere ignaua delitescat. bona desunt? ver-
sabit mala. hæc ne illam teneant, meliori-
bus distineatur. nec magno admodum hinc
molimine opus est. assuescat bonis; abi-
bunt in naturam. fœcundus nimirum ani-
morum ager. sementem immitte bonam.
respondebunt fructus.

CAPVT X.

Studiorum neglectus.

QVem inter prima Religionis mala si quis numerauerit, non multum aberrabit. nam quid à iuuentute speres, studiorum ardore seposito? ut nihil agat in illo ætatis flore & æstu, nequidquam speres; ut ad meliora conuertat mentem, frustra expectabis: nam qui semel excussit iugum, ad quod ab obedientia destinabatur, reliqua contemnet. & quid potest in ea ætate maius esse, quam solida fundamenta victuræ in omnem ætatem eruditionis, in salutem proximorum natæ, serio magnoque conatu & ausu iacere? aut quæ res plus apud proximos in venerationem, admirationem, laudem, fidem, sequelam valet, quam profundæ ut virtutis, ita & conceptæ eruditionis opinio? quam non facile ignauus quisquam & altioris eruditionis contemptor consequetur. prodet se illius aliquando infantia & inscitia, tantumque ferè à salute illorum promouenda decedet, quantum ab eruditionis opinione.

Iam ad quæ se adolescens neglectis con-

uertet studiis? ad otium, laborum fugam, ad vitia denique omnia, quæ ex otio nasci consueuerunt. aliqua nimirum re. necesse vt vacuam à studiis mentem occupet. defunt alia? conuolabit ad vitia, ac tanquam in præceps actus, toto pronus corpore ad ea delabetur, trahetque exemplo suo tenerrimum quemque, inde robustiores etiam, & quibus plusculum virilis pectoris est: tandemq; iunctis quasi manibus viribusque, ad profunda labentur vitiorum.

Et ferè virtutes comitantur studia, vt quem seriò totisq; animis videris illis incumbentem, pari propè generositate virtutibus insudantem reperiās. idem enim propè ardor æstusque qui in studiorum, in virtutum amorem rapiet. longè sanè erit à vitiis, vt quibus assiduīs studiis aditum præcluserit. feriis enim occupata mēs non faciliè illorum importunitati patebit. occupatio omnis moram postulat, poscitque tempus: quod si negaueris, excluderis ab occupatione. ille negat, qui vniuersum animum iis detinet, & cuius totam mentem studiorum occupauit amor, sancta quadam æmulatione, proximorumq; sperata salute, tanquam stimulis actus. qui cū omnem aditum præcluserit vitiis, vir-

tuti aperuisse censendus est, quæ ultro vacuam vitiiis mentem occupare solet. sanè paratior mens talis ad virtutum susceptionem est.

Iam studia ferè ipsa, ardorque illorum, mentem ad magnâ & generosâ prouocat, ad contemptum minimorum & vilissimorum quorumcunque excitat; ad detestationem impellit vitiorum, vt quæ indigna arbitratur viro ad maiora gradienti: & cùm veretur maculam gloriæ, abstinet ab iis, quæ ad contaminandam illam nata sunt. cùm verò virtutem nullo studiis impedimento & dedecori, adiumento verò & honori maximo esse senserit; tanquam in amicam, studiorumque suorum sociam prona voluntate rapitur.

Adde, longa nos edoctos experientia, pari propè feruore Religiosos ferri in orationem, piasque exercitationes, quo rapiuntur in studia. Nam & studiorum neglectus ignauiaque transit in orationem; & scientiarum ac eruditionis ardor in orationis studium. nec difficile est æstuantem studiis animum pari in orationem æstu transferre: vt languentem in studiis, ignauiaque otiique amore subactum, in reliquis ferè languere ac ignauescere videas.

Ab hoc verò studiorū languore omnium

propè spiritualium rerum nauseam proficisci, ac quoddam piarum rerum fastidiũ reperies; inde etiam murmurationes, detractiones, inuidantias, cibi potusque auiditatem, commodorumque corporis, ac complacendi aliis studium. Nam cùm deesse sibi ad maiora subsidia videant, & otij amantes, laboribusque territi, nolint ad ardua conniti, ab aliis ambitioni suæ subsidia mendicant. Inde iam placendi conatus, adulationes, & politici spiritus ingentia semina, in validas arbores nascitura, ni potentibus sectionibus & vstionibus fortiter obuiam eatur.

Remedia.

OMnia propè à Superiore pendent. nec difficile est, adolescentiores maximè, quasi substratis ignibus in studiorum ardorem impellere, si modò prius hoc æstu inardescat Superior, remque non perfunctoriè, sed seriò tractet. Si frequenter suos quàm publicè, quàm priuatim animet. Si ardentes, laude & præmiis; ignauos, dedecore & poenis prouocet. Si hos etiam amoueat à studijs; illos externa quadam paterni affectus beneuolentia accendat.

Magnum etiam momentum in hanc
rem

rem magistri adferunt. quos si studiorum laborumque amantes nacti fuerint, pari ardore sanctæ cuiusdam æmulationis studio ad illa rapiuntur. maximè si frequentes & seriæ commendationes illorum accesserint; si amica quædam cum studiorum amantibus familiaritas, & externa benevolentia necessitudo; si frequens in conatu animatio; si ignavos non patiantur inultos; si in priuatis publicisque illos disputationibus ad ruborem etiam patiantur deprimi; si acrioribus stimulent verbis; si frequenti disputationum ac defensionum recurſu hos fatigent, ut quos non sociorum exempla, non Superiorum monita, erubescencia extimulent, & poenarum metus.

Plurimum etiam proderit ad animos excitandos, monita Præfecti spiritus, aliorumque domesticorum Patrum, quibus languidiores familiari aliquo nexu conſtricti sunt, sociorumque prouocatio.

Inuigilandum etiam Superiori erit, in linguæ Latinæ vsum. ferè enim linguæ illius neglectum, studiorum neglectus sequitur. quem enim linguæ Latinæ & elegantia & promptitudo delectat, delectant etiam studia, sine quibus parari illa non potest. quem verò nulla capiunt studia,
nec

nec elocutione gaudebit. Mutuo enim ferè contemptus se duorum horum, amorque sequuntur. neque facile studiorum contemptor linguæ elegantiam amabit, aut sequetur; sequeretur, si amaret. rapimur enim ad amata. amaret, si studia amaret, quæ linguæ calamiq̃ue elegantia exornantur. Dandaque in hoc genere opera Superiori est, ut elegantia etiam in elocutione studeant sui. & turpe est ab externis in hoc genere Religiosos vinci. turpius etiam, non posse animi conceptus Romana lingua, tersa & fluente exprimere: sed hæere ad singula virum alioqui non ineruditum, ut qui scientias proficitur, balbutiat ad illarum explicationem. Neque erit difficile, si exemplo præeat Superior, laudeque, præmiis ac poenitentiis reliquos excitet, maximeque iuniores, & humaniorum literarum magistros, ac cuiuscunque professionis studiosos. serioque caueat, ne qua in recreationibus lingua, quam Latina utantur, ut assuetudine usuque promptam sibi illam, paratamque faciant; ne barbarie sua & Religioni & sibiipsis dedecori, & aliis graues sint.

LIBER TERTIVS.
 S V P E R I O R V M
 A C
 I N F E R I O R V M
 COMMVNES MORBI,
 ET CVRATIONES.

CAPVT I.

Orationis neglectus.



RATIONE enim tanquam rore suo, aut cælesti imbre destitutus animus necesse are scat, abeatque in vagum puluerem, omni vento sæcularis afflatus variè dispellendum. Et sanè qui agro quantumvis natura sua fertili imbrem roremque fœcundantem subtraxerit, ille simul speratos fructus in semine tanquam falce demetit. Ac licet nonnunquam semen bonitate sua exurgat, spemque in herba promittat; nisi nube rigetur, æstu sæuiente, omni meliore succo viduatur, vt in cineres tandem diues illa sponsonibus herba fatiscat, ornatu

natu suo nudata, spoliata robore. Eadem in animo cogita. Sortitus aliquis mentem bonam est, & promittebat Dominicis horreis messem amplam; verum negatus cælo ros suus, & fœcundans subtracta pluuiæ, miseram reliquit sibi, omnesque illas locupletes sponfiones vertit in arenam. Cælestes illæ pluuiæ mentem vndique irrigantes, & quadam pinguedine sua fœcundantes, gratiæ sunt cælo repositæ, quas ex opulenta nube sua depluere Dominus consuevit in animum orationi ac pietati deditum: nec ferè delabi gratiarum illum imbrem copioso fluxu permittit, nisi orationum precumque vi pellerctus. Credas nubem illam diuinam non pluere, nisi antè mentium nostrarum vapor summa petierit, ac quasi in cælestibus orationum vi concreuerit, à cælesti sole magno in sublimē tractus. atque hinc Propheta Regius:

Psal.

142.

Meditatus sum in omnibus operibus tuis, in factis manuum tuarum meditabar. Expandi manus meas ad te: anima mea sicut terra sine aqua tibi. & commodissimum huic orationum generi nocturnum ac matutinum tempus.

Psal. 62

hinc illud eiusdem: Memor fui tui super stratum meum, in matutinis meditabor in te. &

Psal. 76

Et 33.

Meditatus sum nocte cum corde meo, & exerci-

Psal. 118

tabar, & scopebam spiritum meum. & alibi: Pra-

uene-

*uenerunt oculi mei ad te diluculo, ut meditarer
eloquia tua.*

Vt cibo potuque spoliatum corpus diu
vitam tolerare non potest; ita & mens
nostra orationis cibo frustrata, quo vno
nutriri, foueri, roborari solet, omni breui
spiritali vita exuitur. nam vt corpori terre-
stri cibus suus terra est, ita animo cælesti à
cælestibus sperari cibus debet. quo fru-
stratus contabescat, ac quasi meliori suc-
co emedullatus, exarescat: maximè dum
vis illius concupiscentiarum vndique igni-
bus obfessa eneruatur, hostilibus illarum
flammis excocta; euigoraturque robur o-
mne, potenti harum incurfu protritum, vt
nisi à cælo nouæ accedant vires, noua sug-
geratur robor, diu salua consistere mens
nostra non possit: sperari verò à cælo non
debent, nisi valido orationum nostrarum
prouocamento excitatus Dominus cæle-
stibus suis donis roborauerit egentem, sti-
paueritque contra incursantia inimica ag-
mina potentibus dexteræ suæ armis, fir-
misque illam diuinæ gratiæ propugnacu-
lis fulserit, ac in circuitum vallauerit con-
tra nocte dieque procursantes hostiles a-
cies: vt quantum nimirum hinc inimici-
tiarum ac oppugnationum, tanta inde
gratiarum ac propugnationum materies
sub-

subministretur. quod sine orationum affi-
duo cultu frustra speremus.

Et ipsa sanè oratio, validum in omnes
hostiles procurfus propugnaculum est:
illa enim mens nostra de propinquo iun-
cta Deo, sub protectione dexteræ illius,
omnes hostiles ridet conatus, valentiore
clypeo diuinæ manus tecta; perenni-
que diuinæ potentia associatione, non metuit
minitantes ac procurfantes mundi ac in-
ferorum acies. Vt dama in summo inac-
cessi montis vertice venatorum ridet co-
natus, & sæuientium infrà canum illudit
rabiem secura de loco: ita anima oratio-
num quibusdam alis ad suprema euecta,
& Deo suo inhærens, de vicinitate illius
omnem hostilem sæuitiam contemnit, se-
cura de protectione. Eleganter in hanc
rem Chrysostomus: *Quemadmodum ciuitas,*
quæ muris cincta non est, facile venit in pote-
statem hostium: propterea quòd prorsus absit
id quo fuerat hostium incurfus arcendus: sic &
animam non munitam precibus diabolus facile
in suam redigit potestatem, nec multo negotio
omni scelerum genere implet. Nam ad animam
quidem precibus munitam, non audet propius
accedere, metuens robur ac fortitudinem, quam
illi deprecatio subministravit, magis vegetans
animam quàm cibus vegetat corpora.

Lib. 2.
de Ora-
tion.

Quod

Quod anima corpori, hoc oratio est animæ. illam qui sustulit, vita simul exuit; hanc qui subtraxerit, meliore vita spoliabit: & cum omnis animi vigor, vitæque à cælestibus donis, diuinisque inspirationibus pendeat, quibus necessum est catere mentem, quæ ex orationis neglectu talibus destituitur, sit vt mortuo similior sit, vt quæ cælesti vita, qua vna verè viuit, spoliata, in ignauo quodam sopore consepulta iaceat. Et sanè nisi continuo diuinorum influxu fulciatur, labascit & colliquescit tota, mortemque bibit, tot modis diu noctuque ab inimica inferorum manu propinatam, ignara generis sui, improuidaque futurorum, immemorque creatoris sui ac Dei: & iam hosti mancipata, & duro æternum seruitio obstricta. Hinc illud Chrysostomi: *Quisquis non orat Deum, nec diuino colloquio cupit assidue frui, is mortuus est & vita carens, expersque sana mentis. nam hoc ipsum euidentissimum signum est amentie, non intelligere magnitudinem huius honoris; nec amare deprecandi studium, nec hoc habere persuasum, quod anima mors sit non prouolui ad Dei genua. quemadmodum enim corpus hoc nostrum, si non adsit anima, profectò mortuum est ac fætidum, sic anima nisi seipsam incitet ad orandum, mortua est ac misera, ac grauiter olens.* Et deterior

P longè

*Lib. I.
de orando Deū.*

longè animæ mors est, quacunque corporis morte; cùm destituta anima cælesti vita sua, orationis neglectu, graui somno defossa iacet, vt nec diuinæ virtutis rorem influxumque, sentiat, nec mala sua persentiscat, nec amissorum bonorum desiderio tangatur; tanquam vna obliuionis spongia, quidquid fuerat antè bonorum, deletum videatur. quæ omnia ab orationis demisso studio paulatim irrepunt, donec ad extrema demum hominem suum deducant, & ad miseranda Religionis precipitia propellant.

Exempla nos docent illorum, qui deserta Religione, ab orationis ferè neglectu initia ruinæ duxerunt; neque quisquam ad crimina descendit, aut in iis inualuit, callumue obduxit, qui non antè in orationis studio intepuit; vt meritò oratio meditatioque tutelaria arma, validaque aduersus hostem propugnacula dici possint, quibus munitus animus, nullo hostili robore superari potest. stat inuictus aduersus carnem, mundum, diabolum, validis his spiritualibus armis protectus. Sed neque exarescere mens potest, perenni hoc orationum fonte rigata, cælestiumque indies gratuitis donis perpluta. quòd si validè vndique oppressa ceciderit, promptius

exurgit, periculaque vulneraque orationis ardoribus excita agnoscit; neque diutius prostrata licet, inhærere luto huic potest, quæ potentibus hisce diurnis adminiculis, & tanquam auxiliariis præualidis copiis fulcitur.

Quod cor viuenti, hoc oratio est animæ. illud sustuleris, vitam ademeris. orationem tolle, & tanquam clauo & cæstibus animæ vitam excusseris, quam ab oratione habet. quæ spoliata, tanquam in ignauo sopore prostrata ac consépulta iacet.

Quod condimenta mensis, hoc animæ oratio. insulsus sine illis cibus, & fastidio ac nausæ propior: idem euenit animæ oratione destitutæ, nausæabundos transiget annos, & in ignauo languore, ac displicentia etiam sui desidem vitam trahet.

Quod gemma annulo, hoc oratio animæ. annuli decor gemma, animæ gloria oratio: à qua splendorem lucemque accipit, gratam cælestium oculis, adeoque & Dei.

Quod flos horto, pomerio poma, botrus vineæ, nemori laurus, pascuo flumen, vallibus torrentes, fontes montibus; hoc animæ oratio. hinc mentis gratissimi flores quibus cælestis Sponsi vertex coronatur, hinc illa malogranata dilecti manibus

decerpta, hinc botrus vineæ Engaddi quo inebriatur sponſus, hinc æterna laurus nullo fulmine feriendâ, hinc felicia oculorum flumina, torrenteſque ſingultibus ab alto ductis proruentes, fonteſque ſummo montium Domino ſalientes.

Quod laſſo requies, mœrenti gaudium, inopi aurum, fatiſcenti robur, nerui corpori, ſpiritus ſanguisque vitæ; hoc animæ oratio eſt. alta ſecuraque pace mentem firmat, ingenti lætitia perfundit, cælorum opibus donat, vires ſuggerit, diuinoque quodam ſpiritu animat iacentē ac torpentem, ac nobiliore quodam cæleſtium donorum ſanguine, pectoris mentiſque venas implet.

Quod ſol diei, luna noctibus, nauigantibus ſtellæ; hoc oratio eſt animæ. ſol enim diem animæ pulſa criminum nocte ſtatuit, cæleſteque lumen præfert, diuini que amoris radiis calefacit, gratiarumque donorumque; fœcundo influxu inopem mentem, omni que ope deſtitutam locupletat: ſcclerum verò tenebris oppreſſis, denſaque delictorum caligine circumſeptis, errantibuſque in tenebricoſo peccatorū ſenticeto, noua luna felices aperit & oſtendit, & à fallentium errore viarum reuocat. tentationum denique fluctibus oppreſſis, ſæuiſque tentationibus iactatis, inter ſcopulos

pulos & breuia oppugnantium nos vndique hostium, tuta littora, portumque gratissima stella designat, desperatisque rebus, & tantum non insurgentium vndique vndarum procellosis iactibus absorptis manum eminus porrigit, & ad tot votis, suspiriis, lacrymisque optata deducit.

Quod gluten, calx, clauī, funes iungendis firmandisque rebus, hoc oratio Deo & homini. qua vna tanquam glutine adnectimur, tanquam calce astringimur, tanquam clauo conterebramur, tanquam fune colligamur illi. Deme quibus illa in humanis iunguntur, & collabascant quæ associata mutuo fuerant. tolle orationem, qua vna coadunescit anima Deo, nec multo, dilabimur, & denectimur illi, quantumuis potenti prius orationum vinculis constricti. ita perpetuari oratio debet, si perpetuanda cum illo coniunctio est.

Quod secures præualidis secandis lignis, quod mallei ignesque ferro domando, hoc oratio duris veteribusque peccatorum nodis secandis, ac inueteratis; ac quasi chalybatis criminum consuetudinibus contundendis ac emolliendis est.

Quod speculum faciei, hoc oratio animæ est. illud maculas detegit, oratio animæ æuos, vt nihil reconditæ deformita-

tis, aut internæ inuenuſtatis latere diu poſſit orationis ſpeculo propoſito. intima enim peruadit, & nudam oculis proponit. ſiquid tortuoſum, ſi quid degenerat aut aberrat à fine cui creatum, vniuerſum nudat & aperit, & tanquam è latebris eruit, ac in apertam deducit lucem.

Quod muſica homini, hoc oratio Deo. neque enim vllus illi concentus gratioꝝ oratione ſupplici mente. & corde prolata. nullus illi cantus ſuauior, inter ſuſpirioſos ductus tanquam inter ſaxa & ſcopulos mœrentis animæ & cupientis diſſolui, & eſſe cum ſponſo ſuo: nulla illi muſica ſonantior denſis oculorum fluminibus imbricata, ac tanquam ſalientium ac ſuperne cadentium lacrymarum modulis variegata: hinc tardè ac quaſi gemmatim proſilientium, vt ad grauitatem de compoſito credas fluere; ibi celeri motu ac quaſi mutuo ſe fatigantium & opprimentium lapſu, vt in multitudine feſtinoque lapſu arbitreris ludere; vbique in venuſtatem, lætumque cæleſtium oculis proſpectum.

Quod cella vinaria ſitienti, quod torcular muſto plenum, quod vinea odorato flore grauida, quod arboribus floribusque conſitus hortus; hoc oratio eſt animæ, vt bibat

bibat & inebrietur sponsus. neque alijs clauibus amoris cellæ aperiuntur, aut celestia referantur vasa, aut torcularia redundant, aut vineæ diuitem autumnum spondent, aut animorum horti gratos cælestibus fructus, cæloque perennaturos flores spondent.

Quod hominibus cellæ aromaticum, hoc oratio est animæ. hinc illa currebat in odorem vnguentorum dilecti sui, non aliis quàm orationis passibus; & non aliis quàm orationum sponsæ suæ odoramentis excitus sponsus, columbam suam, speciosam suam amplectitur.

Quod gladius anceps bis acutus, bis hostem feriens, hoc oratio animæ. in quamcumque enim se aduersarius partem verterit, signa intulerit, aciem direxerit, paratum orationi deditum reperiet. quodque instructissimus exercitus in inimicam aciem, hoc oratio est animæ. nam hac vna cælorum angelorumque legiones, ipseque cælestium ductor legionum Deus, euocatur. neque instructior alia acies est, quàm mutuo sibi succedens oratio.

Quod nobilissima medicamenta morbis medendis, hoc oratio est animæ. neque potentior vlla medicatio, nullaque certior curatio quàm ab oratione venit. Docent

hoc omnium ætatum exempla nobile fan-
nè mithridaticū, generosa theriaca oratio
est. cui valentissima inferorū, mundi, car-
nisque venena comparata flaccescunt.

Quod corona regia nobilissimarū gem-
marum multitudine variegata regio ver-
tici, quod armillæ aureæ pretiosorum la-
pidum textura collucentes, quod ornatus
regius argento, auro, purpura grauidus re-
gio corpori; hoc oratio est animæ. Nullæ
enim gemmæ cælo lucidiores oratione,
qua verticem, collum, brachia dilecti sui
sponsa, tanquam nobili amoris vinculo
stringit, sibi que æternū adnectit. nul-
lum argentum, aurum, purpura cælo gra-
tior. hac vna decorat sponsum suum spon-
sa, purpuratque nobilissimo auro gem-
misque intertexto pallio, amoris sui tesse-
ra, latè interlucentibus votiuīs flamma-
rum suarum desideriis, tanquam primis
cælorum stellis.

Remedia.

FRequentes Superiorum de damnis
neglectæ orationis exhortationes &
monita: de fructu etiam & varia utilitate
frequentatæ orationis.

Exercitationum spiritualium annuus
usus; & frequentior etiam, si qua necessi-
tas

tas postulauerit, aut maior quædam igna-
uia teporq̃ue hominem occupauerit, vt
annuo vno exercitiorum igne non videat̃
tur posse accendi.

Præfectorum spiritualium in hanc rem
incumbentium assidua sollicitudo, dili-
gensq̃ue in vnoquoque inuestigatio, seriâ-
q̃ue monitiones.

Frequens lectio piorum librorum, co-
rumq̃ue maximè, qui de neglectæ oratio-
nis damnis, quique de fructu, emolumen-
tis, & orationis necessitate scripserunt.

Iuuabit in primis frequens seriâq̃ue co-
gitatio innumerabilium propè bonorum
quæ ex vnica oratione diuite vena pro-
manare solent.

Hac vna quidquid in humanis intercur-
rit aduersitatis, tanquam molli spongia
deletur, aut tanquam flumine diluitur,
aut tanquam valido vento inimicæ nubes
metum incussuræ pelluntur, omniaq̃ue
procurstantia mala vt leues aquilone ia-
ctatæ palcæ difflantur.

Hæc tormentis superiores cultores suos
facit, poenarumq̃; contemptores, ignibus,
clauis, ferro, cruce maiores; neque sentit
animus in neruo, sub ense & securibus qui
per orationem coniunctus Deo est. cre-
das in aliena carne carnifices sæuire, cum

mens per orationem conditori suo iuncta est.

Hæc facit contemptorem sæculi, cùm hac vna discat homo, quantum inter cælestia & humana discriminis interiaceat, quantoque diuina terrenis potiora, quantumque æterna perituris antistent.

Hac intellectus illustratus nil nisi cælestia sapit, desipitque illi quidquid hîc magnum & nobile, quod illis comparatū non nisi calcantium protrimentum pedum est,

Hac voluntas cælesti amore inebriatur, vulneratur, nec quidquam iam felici vulnere saucia præter dilectum quærit cælo reclusum : illum turturis instar compare destituti, suspiriosis questibus amore languidis, lacrymisque suauè fluentibus, ardentibus votis deponcit.

Hæc vna ingentem animo voluptatem parit, cùm mens cælestibus potata gaudiis mœrorem omnem detergit, illumque in gaudialem diem conuertit.

Hæc incorruptos nos seruat Deo, cùm hac vna salis instar condiamur, & ab omni vitiorum putredine intacti seruemur. nescit mens purulescere hoc animorum sale confricata, intactamque se sponso suo seruat.

Hæc vna ductrice virtutes omnes pa-
ran-

rantur, vitia extirpantur. Docemur hoc ætatum omnium sæculorūque exemplis; cūm eos legamus omnibus semper virtutibus cultissimos fuisse, qui speciali orationis prærogatiua florerent.

Hæc nos iungit Deo, disiungit sæculo, discriminatque ab huius amatoribus. sine qua sola ab his veste diuidimur; paresque nos angelis facit. cūm hac vna ad angelorum fastigia tollamur, & mente Deo quodam familiarioris coniunctionis nexu astringamur, & quantū diuina permittunt, mutuae cuiusdam amicitiae vinculo colligemur.

Sanè nihil tam potens est quod oratione non consequamur. hac scelerū veniam consequimur, extensam in vindictam iudicis manum, animumque flectimus, æternis ignibus poenisque abolitis. hæc enim vana certa vt præmiorum, ita & poenarum felix procreatrix est. sine qua nullę cęlestes gratiæ, auxilia nulla speranda sunt. petite & dabitur vo bis. mentiri Veritas non potest, præmia petenti spondet; negatura torpenti.

Et certè vana sine hac omnis nostra religio est, & vmbrae similis, cūm quidquid solidæ religionis est, ab oratione tanquam capite, & diuite fonte defluat; inanisque
omnis

omnis sine hac medulla, sine his neruis, sanguineque vis ac robur, & vmbra quàm corpori similior sit. nemo verò huius cultor aut cecidit grauius, aut diu in delicto prostratus iacuit, cum orationis quadam quasi manu erigeretur in pedes, in spem vitæ melioris, peractæque pœnitudinem culpæ.

Qui verò hanc negligit, præcipitio proximus est, facilis ad lapsum, pronus in ruina, cum, quibus per orationem firmabatur præsidii ac fulcimentis, spoliatus sit.

Et nemo sanè carni reliquisque vitiis paruit, nisi hac nudatus. nemo hac munitus sanguinè hosti dedit, vulneraue mortem allatura retulit. quid? quòd adeò potens ab hac vna medicatio petatur, vt innumeri huius solius præsidio firmati in æterna castitate steterint. cum perpauci hac destituti in sepulcrum castimoniam deduxerint.

Et verò quicumque Religionis desertor audiuit, antè orationem proiecit & calcavit: à cuius neglectu, per contemptum adiurata Religionis signa deferenda, regia via descenditur.

CAPVT II.

Ariditas, & in oratione distractio.

QVA mens tanquam terra sibi relicta, nullo aut rore rigata, aut pluuiæ de cælo pasta, arefcit, abitque in cinerem, ventis non multo post insurgentibusque tempestatibus futura ludibrium: vel quacunque etiam decidua cælesti nube fecundata fuerit, quibuscunque mortificationis rastris ac vomere proscissa; manet tamen in inerti sua sterilitate, nec nisi perpetua vigilique cura assurgit aliquando ex ignaua & infœcunda sua procubatione. Quod vt facilius dignoscatur, remediaque malo huic admoueantur, ariditatis ac distractionum harum causæ examinandæ sunt. quare videndum,

Num ex innata quadam naturæ conditione, instabilitate ac leuitate, quæ certis adhærescere nesciat, aut vni insistere, aut materiæ defectu, discursus inopia, aut adnata ariditate malum oriatur. quod frequens multis malum est, eoque maioribus remediis eget, quò cum natura illis pugnandum est: frequensque hoc vitium non tantum in iis, qui omni studiorum adiumen-

imento carent; sed doctis etiam, quibus innata quædam mentis inconstantia est, aut quibus impotens imaginationis vis dominatur, quaque violenter in alia rapiuntur, ut incogitantes ab omni oratione alienissimis immergantur. Crederes nauem validis irruentibus aquilonibus, nequidquam pugnante domino, ad inimica litora rapi. quo maior cura ac sollicitudo adhibenda, ac principiis omni studio occurrendum est, præscindendo omnes auocantium occasionum radices, nec vel tenuibus parcendo ne exurgant in maius malum, habitumque induat qui patitur; & è leuibus his initiis innascantur, non nisi violenta postmodum manu medicanda.

Num ex inordinato ad vitia affectu, siue à natura ingenito, siue usu exercitationeque comparato: quæ res impedimenta adfert plurima, nec patitur mentem cælesti rore rigari: saxescit enim, ac quasi rupefcit anima vitiorum habitu roborata, omnisque è cælesti nube imber prouens è rupeo hoc monte facile dilabitur; aut sanè ut in profundam vitiorum arenaream congeriem decidens tam altè ariditate illius, exsuccoque solo imbibitur, ut nulla propè tantarum cælestium aquarum vestigia super sint. Euertendum proinde omne hoc
solum

solum frequenti potentiq̃ue suspiriorum ductu, tanquam rastris; exscindendæq̃ue animorum illæ rupes violenta manu, serio conatu, frequenti lacrymarum fusu. nec desperandum aut intermittendus labor, donec cum radice excaudicemus malum. Maior omni malo animus sit, & vincemus. Nihil inuictum audenti; succedit sperata victoria, si validè insistamus operi. Terratur tiro clamoribus & minis, veterano etiam vulneribus crescit animus. Idem conandum nobis, ab ipsa difficultate animus sumendus. Vincet quisquis vincere audebit.

Num ex occupationum multitudine, quibus spiritale semē suffocatur, animusq̃; ad externa rapitur potenti illorum dominatu totus possessus, ac quasi in seruitutem reductus, assiduoq̃ue illorum usu adeo altè pertinctus, vt vix elui hic color possit, quacunque etiam cælesti pluuia inebrietur.

Num ex cælestis influxus subtractione ariditas hæc proueniat. Causæ hîc inuestigandæ negati aut subtracti influxus, diuinarumq̃ue gratiarum; nostra ne culpa subtractio hæc euenerit, impedimentane à nobis iniecta sint; repercussus cælestis influxus, duritia cordis nostri, delapsus friga-

re ac tepore nostro, protritrus nimia ad sæcularia effusione, excussus contemptu, ac ingratitude nostra, repullus peccatis nostris; proiectus, ac in fugam actus occultis vitiis nostris, superbia inprimis, mente non casta, detrahendi facilitate, mutuae charitatis dispersione, obedientiae ac paupertatis neglectu, regularum ac constitutionum transgressione, politici & sæcularis ac aulici spiritus prosecutione ac imitatione? An verò nulla causa nostra, sed vel innata quadam naturæ, tanquam puluerulenti soli, ariditate. An solius Dei nutu, idque aut in meritorum augmentum, aut exercendæ virtutis ac roboris causa, aut in exemplum denique & instructionem aliorum.

Quibus omnibus seriò occurrendum, cum ferè ex hac ariditate spiritualium rerum nausea enascatur, omniumque virtutum fastidium; cum languorem suum mens considerat, tædioque ac diffidentia quadam speratæ emendationis, in desperationem tandem melioris consecutionis labitur, indeque ad extrema malorum omnium prorumpit, ad vocationis suæ languorem, neglectum, contemptum, desertionem, ad vitia denique omnia. Neque quidquā tam graue aut immane est, quod
his

his initiis, tanquam è copioso fonte, fertili-
 que vena non profluat, ac in apertum
 vitiorum omnium campum profiliat. Vt
 meritò huic malo magnis remediis occur-
 rendum sit, ne vniuersa animæ nostræ area
 cælesti imbre destituta, arescat tota, & in
 steriles soluatur arenas, aut in noxias de-
 generet miricas, in venenarios frutices, in
 cespites dominum fallentes, solaque fuli-
 ginosa fauilla diuites, spemque fecundæ
 glebæ solique mentientes.

Validè nos monet Cyprianus: *Quæ se-* De Ora-
tion.
Dom.
*gnitia est, alienari & capi ineptis cogitationi-
 bus & profanis, cum Dominum deprecaris? qua-
 si sit aliud quod magis debeas cogitare, quàm
 quòd cum Deo loquaris. quomodo te audiri à
 Deo postulas, cum te ipse non audias? vis esse
 Deum memorem tui cum rogas, quando ipse
 memor tui non sis? bene in segnitiei detesta-
 tionem, in verecundiæ prouocationem.
 audiri venimus: & dum preces fundimus,
 animus aliis distinetur. Simulationis hæc
 species est, & illudentis non deprecantis
 Dominum. nemo reus iudicis aduolutus
 pedibus incertus de exitu, inter mensarū
 delicias animo latus accumbit: nemo pau-
 per eleëmofynam supplicibus deposcens
 votis, opes suas ostentat: nemo æger me-
 dicas in dubia valetudine deposcens*

manus ludit & ridet. nos tot criminum rei, omnium egeni, extremis malorum morbis iactati, peccatorum vulneribus concissi quid exspectamus? remedia poscimus, & tam ignaui; frequenter pectore, ut orandi potius videamur venisse quam oraturi. hinc illa increpantis Domini verba

Mat. 15. sunt: *Hypocrita, bene prophetavit de vobis Isaias, dicens, Populus hic labiis me honorat, cor autem eorum longè est à me.* Scio vix sperari in humanis posse, ut ab omnibus aliarum rerum cogitationibus liberi vacuique, soli Deo inhæreamus, nec iactemur aut feramur sæculi motibus; conatum tamen adhibebit Religiosus, totumque se dispellendis illis impendet, dolebitque de importunis variarum rerum procurfibus monito-

Collat. 23. c. 7. re Cassiano: *Quis tantum spiritus potuit unquam retinere feruorem, ut non interdum lubricis cogitationibus, in ipsa quoque orationis intentione translatus repente de caelestibus ad terræna corruerit? quæ licet omnia nonnullis qui sunt crassioribus vitiis inuoluti, leuia, atque à peccato panè aliena videantur; scientibus tamen perfectionis bonum, etiam minimarum rerum multitudo grauissima est.* Sequatur proinde magno conatu Apostolum præeuntem: *Orabo spiritu, orabo & mente: psallam spiritu, psallam & mente.*

1. Cor. 14.

Remedia.

PRimi generis iuuari poterunt, si frequentibus feruentibusque mentem animent pascantque iaculatoriis orationibus: memores Apostoli, *Orationi instate vigilantes in ea. & Sine intermissione orate.* *Colos. 4. 1. Thess. 5.* Frequenti etiam sed breui ferè, & interrupta piarum rerum lectione; ac si quando meditationi se dederint, propositæ meditationis primo pûcto perlecto, seriò de eodem aliquid cogitent, similitudinibus, aliisque à se inuentis materiam extendentes, claudantque breui aliqua oratione. Transeant deinde pari modo ad secundum, tertium, quartum, donec inueniant in quo animus magis conquiescat, in eoque persistant.

Secundi generis; si laborauerint, vt affectionum radices assidua cura, & particularis examinis studio euellant, sperare victoriam possunt, maximè si temporario & aduentitio malo tenentur: si adnato, & quod cum ipsa quasi natiuitate adoleuit; maiore diligentia & assiduitate opus erit, maiore etiam cautela & custòdia sui, amico etiam aliquo monitore, maximeque spiritualium rerum Præfecto, qui vbi

dignum aliquid monitione obseruauerit, non parcat.

Tertij generis nulla videntur re magis iuuari posse, quàm frequenti per annum spiritualium exercitiorum repetitione: frequentatæ enim per exercitia meditationes. facilè animum memorem sui, etiam in mediis occupationum turbis statuent, nec patientur superuacue effundi. Audet in mediis occupationibus regijs

Psalm. 38. *Propheta, Concaluit cor meum in trame, & in*
Psalm. 140. *meditatione mea exardescit ignis. & Dirigatur*
oratio mea sicut incensum in conspectu tuo.
 quid non poterit Religiosus si conatū adhibuerit? Iuuabit etiam ante occupationum aggressiones, animū cum Deo componere; illisq̃ue finitis, dicta factaq̃ue secum examinare. vnde illud Sapientis: *Ante orationem prepara animam tuam, & noli esse quasi homo qui tentat Deum.*

Ecclesi. 18. *Ecclesi. 35* Quarti generis, animi submissione (oratio humiliantis se nubes penetrat) tolerantia, perseuerantia, spe meliorum, diuinorum decretorum conformatione iuuari poterunt: maximè si sibi persuaferint, ariditatem hanc, subtractionemq̃ue diuini influxus euenire ad gratiæ & gloriæ augmentum, ad amoris & ardoris excitationem; dum negata in amorem sui prouocant,

for-

fortiusque accendunt, & alliciunt ad se animos, & tanquam calcaribus cogunt, parantque ad condolentiam in aliorum ariditatibus: ad erudiendam deinde mentem, in aliorum instructionem; ad submissionis augmentum, & spiritualis superbiæ victoriam; ad virium etiam nonnunquam conseruationem, ne ex spiritualium consolationum & illustrationum affluxu contabescant; ad patientiæ denique exercitationem, imbecillitatisque suæ cognitionem, cum vident, quàm nihil possunt, cum solitariè sibi relinquuntur.

Nemo hîc dicat, Non possum. quanti omnium litterarum rudes, inculti, omnibus educationis probæ præsidii destituti, moribus indomiti & efferi, & barbara gente nati, ad summum orationis apicem venerunt? si non desit animus, reliqua aderunt. nulli enim tam natura nouerca fuit, quæ illum orationis præsidio nudauerit. facile est protendere cælo manus, mentem, verba. & si verum illud Sapientis est: *Apposuit tibi aquam & ignem: ad quod volueris porrige manum tuam. ante hominem vita & mors, bonum & malum: quod placuerit ei dabitur illi. quoniam multa sapientia Dei, & fortis in potentia, videns omnes sine intermissione. oculi Domini ad timentes eum, & ipse agnoscit omnē*

Eccli. 15

*operam hominis. Nemini mandauit impiè agere; & nemini dedit spatium peccandi. quanto promptiùs faciliusque mentem per orationem coniunget Deo, Creatori, Domino, Regi, Iudici, Medico, Redemptori, Patri, animæ suæ Sponso? nulli occludit ostia Deus & Pater, cùm ipse vkrò prouocet: Ecce sto ad ostium & pulso. si quis audiuerit vocem meam, & aperuerit mihi ianuam, intra-
 bo ad illum, & cænabo cum illo, & ipse mecum.*
Matt. 23. & alibi: Quoties volui congregare filios tuos, quemadmodum gallina congregat pullos suos sub alas, & noluisti? non repelle, admitte rogantem. aderit; nec solitarius. non solet nuda venire munificentia, sed cælestibus instructa gratuitis donis, quibus obsequētem, pasci & ornari desiderantē, cibant
Prou. 8. & beat animam. *deliciæ* enim illius, *esse cum filiis hominum*. nulla hoc in re elucet magis, quàm in oratione: vt gaudere videas Deum, si potenti submissa que suorum oratione, prouocetur ad donā, ad familiares congressus, ad amicas mutualque fermocinationes, vt exuisse illum arbitreris personam Dei, induisse hominis.

CAPVT III.

*Neglectus lectionis spiritualium
librorum.*

E Quibus hauriuntur arma tutelaria aduersus hostes, quorum robore opprimimur, medicaminaque in spiritualium morborum, priusquam animum obsederint, præcautionem; vbi obsederint, depulsionem: discimusque ex his non magno negotio, quæ multorum sæpe annorum dubia non rarò pugna, & periculis non tantùm proximi, sed & immerſi, & obruti etiam malis didicerunt viri magni: vt quasi vno oculi iactu & morborum & medicamentorum, pugnarum & victoriarum discamus genera. ita quod aliis sudoribus & sanguine stetit, nobis non magno labore paremus. Idem hîc accidit, quod aurum per immensa terrarum marisque spatia, inter vitæ mortisque spem metumque quærenti; quod alteri extra periculorum terrores laborumque molestias vtrò defertur.

Et ferè videmus eos qui piorum librorum lectionem negligunt, ad minùs probatos decurrere, è quibus non rarò noci-

turas flammās hauriunt: & iam ardet fornax, & iaculatur in propinquo flammās, quorum antè pectus frigora & glacies constrinxerat.

Completur deinde homo totus vefanis his ignibus, non multo pòst in alienum sexum erupturus; historiis etiam fallentibus & mentientibus, inaniumque litterarum scoria, vanissimarumque fabularum narrationibus. inde iam furit in tragœdia, amat in comœdia, liuet in satyra, ludit in epigrammate, adulatur in elegia, bellumque intonat in aliis, omnemque intus non raro faciem induit noui alicuius lupanaris. & ferè harum rerum curiosiores gentilitatem cum his imbibunt, & cum illa animæ mortem.

Hinc colloquia nascuntur parum religiosa, modesta, casta, sæculum & aulam redolentia, alienissima ab omni pietate: & totus homo procurrit in historias aut veteres, aut nuperas, in narrationes nihil nisi vanitatem loquentes; vt in exilium pulsam credas omnem sermocinationem religiosam. sequuntur liberiores cachinni, immoderati risus, gestus solutior, vox clamorior, diffunditurque vniuersus homo in sæculi mores. Contrà quos piorum librorum frequentata lectio delectat, paria
etiam

etiam colloquia, & cogitationes delectât; vt in mediis etiam externarum rerum occupationibus, piis cogitationibus pascantur, facileque ad illas in quacunque etiam sæcularium consuetudine descendant, vtanturque pro re natâ talibus magnò solatio suo, magno aliorum fructu; monendis etiam, & ad optima quæque impellendis, copiosam in promptu supellectilem habeant, qua & solentur mœrentes, reprimant effusos, erigant deiectos, deprimant arrogantes, animent timidos, refrenent audaces, mitigent iracundos, excitent languentes, recreent afflictos; medicamentis denique ad omnem spiritalem morbum curandum abundant. Neque enim deesse his remedia possunt, è tot præstantissimis spiritualium rerum officinis deprompta.

Sed neque deesse materia potest in omni serio, aut familiari colloquio, proximorum salutis aptata: semper enim ex iis quæ à lectione reposuit assiduus spiritaliû lector, ad manum habet plurima, quibus vtatur, ac tanquam è locuplete penâ depromat vina, magnorum antea torcularibus & calamis protrita.

Et ferè optimum quemque Deoque coniunctissimum piorum lectionibus de-

lectari videmus; plusq; ex illis solidæ haurire voluptatis, quàm quotquot sæculo immerſi ex omni conuiuiorum apparatu, inaniumque lectionum & confabulationum ferie: cùm & animi gaudia certiora, tutiora, puriora, potentiora omnibus corporis voluptatibus ſint, poſſeſſoremque ſuum via recta ad felicem æternorū fruitionem ducant; corporis verò ad interitum, & miſerandam pœnarum flammarumque perrennitatem.

Et experiuntur illi, qui ſtudiis hiſce capiuntur, tantà frequenter animorum ſollatia, tamque valida, vt præ hiſ non deligant orbis imperia; contemnantque quidquid hîc magnum, tanquam verrucam terræ adnatam, tanquam folium aquilone raptum, tanquam puluerem vento agitatum, tanquam bullam concha excuſſam; rideantque magnorum omnium conatū in gloriam, in diademata & ſceptra, in purpuram & opes momēto eripiendas, & vt plurimū ignibus præmiandas.

Diſcet deinde ex hiſ libris lector morbos ſæpe ſuos, quibus ignarus premebatur; ſimulque remedia diſcet; variarum etiam tentationum, & inimicarum fraudum circumuentiones, doſoſasque hoſtilium inſidiarum machinationes, vt cùm
dolos

dolos cognouerit, nouaculaſque ſpongia reſectas, effugere ſciat pericula, & imminetia vitæ damna. totum denique ſeiſpſum, tanquã in ſpeculo intuetur, abditarumque ſæpe ægritudinum intima depaſcentia viſcera cauſas agnoſcit, mortemque è propinquo minitantem: de cuius vicinitate, aliorum docetur exemplis, viresque roburque induit, prudentibus Scriptorum conſiliis, tanquam clypeis, ferro & vallo cinctus; variamque breui ſapientiam colligit, cùm è ſingulis quod prudentiſſimum eſt haurit, ac tanquam in vnum faſciculum compoſitum ſibi ac occurrentibus neceſſitatibus ſeponit, uſurus ubi res ratioque poſtulauerit.

Iam cùm in humanis animus ſibi non ſufficiat, ſed à variis ferè profutura mutuari cogatur, breuique ſcriptorum compendio, multorum ſudoribus uti poſſit; facile videmus quantis deſtituantur auxiliis, qui aut aliorum, cùm poſſint, meſſes colligere negligunt, aut alienos labores contemnunt; nec horrea quidem ſua aperire dignantur, aut torcularia mutuare, alieno autumno grauidanda, aut alieno pecore ſtabula locupletanda.

Et ſanè ſtolidum videtur, quod ſine labore poſſis, ingenti ſudore, nec rarò non pro-

profuturo, parare velle: quasi ingratae sint opes, quae ultro obueniunt, ac, nisi sanguine sudoreque diu tingantur, displiceant. Docemur ab apibus, quae à variis propinanda mella sugunt, etiam à venenariis quibusdā floribus; ut mente captum non immeritò dicas, qui ultro oblatam ab aliis scientiam, rerumque prudentiam contemnunt; tanquam si inglorium sit, alienis notitibus & lampadibus erudiri, & sapientiam discere.

Remedia.

FRequens prouocatio sui in amorem librorum piorum, certumque in eorum lectione tempus diebus singulis seponere, quod nullis occupationibus elabi patiatur.

Examinis etiam particularis circa hanc rem institutio.

Communicatio cum aliquo spirituali viro circa ea quae quis legit, & maximè cum Praefecto spiritus, aut illo non inferiore.

Pia quaedam curiositas in variorum lectione excitata, desideriumque varia cognoscendi. Prudenter Hieronymus: *Vnum illud tibi nata Deo, praeg omnibus vnum predicans*

*trans & repetens, iterumq; iterumq; monebo, ut
 animum tuum sacra lectionis amore occupes, nec
 in bona terra pectoris tui, sementem lolij au-
 earumq; suscipias. & alibi: Maximum ad iusti-
 tiam auxilium est, implere diuinis eloquiis ani-
 mum, & quod opere exequi cupias semper cor-
 de meditari. ibidem: Præcipua tibi cura sit, le-
 gem nosse diuinam, per quam possis quasi præ-
 sentia cernere exempla Sanctorum, & quid fa-
 ciendum sit, quid vitandum, illius consilio
 discere. Inuitat in hanc lectionem magnis
 nos sponsonibus Augustinus: Sunt quadam
 deliciae sanctæ in libris, sunt gaudia spiritalia ex
 diuinis eloquiis scrutatis & inuestigatis, ex
 dulcedine inuentionis, quam præcessit labor in-
 quisitionis.*

*Ad Ca-
lantiæ*

*In psal-
38.*

CAPVT IV.

*Examiniis diurni neglectus, aut perfun-
 ctoria conscientie discussio.*

QUÆ res maiora secum damna trahit,
 quam prima fronte cuiquam videat-
 ur: nam cum ex seria, & non perfunctoria
 sui discussione & mala retlegantur, & ma-
 lorum causæ; perfacile est ad eorum re-
 media deuenire, secareque ad radicem,
 aut cum semine ipso euellere. quod in le-
 ui-

uibus, ac à superficie tantū tentatis morborum discussionibus perdifficile est : in quibus perrarò ad malorū fontes descenditur; vt vel palliata tantū ex illa nascatur curatio, vel ignauo hoc neglectu, tacitè succrescat malum, viresq; sumat maiores, quàm vt vis vlla postmodum assiduitasq; curaq; domet & frangat: reperitq; tandem homo animæ suæ hortum cum certo interitu sementis bonæ, tribulis, sentibus zizaniisq; tam dense valideq; consitū, vt nisi ferrum & ignem admoueat, desperanda salus & fœcunditas sit. Ita quæ neglectu inualuere mala, morâ ipsâ ingentia incrementa sumunt, cūm fœcundior semper fertiliorq; noxi-
orum prouentus sit. quod in accurata diurna excussione locum habere non potest, cūm hac vna, quidquid noxium est in semine, & à radice, tenero etiam tum caule euellatur. neque enim patitur seria hæc diurnaq; cura mala succrescere, aut in nocituros frutices arboresq; coalescere.

Nascitur ex examinis diurni neglectu spiritalis quidam tepor, ac totius hominis languor: qui examinis vi excitari solet, ac tanquam supposito igne exardescere, & exurgere in flammæ, quibus animi gelu discussionis frigore concretum soluitur.

omnis.

omnisque mentis torpor tanquam acrioribus suppositis aculeis pellitur, animique somnus vigili hac excubatione pulsatur.

Labitur etiam facile ad sæculi mores, quicunque hanc sui discussionem segnius obit. neque pronius quidquam est, quam ad illos prolabi, cum firmamenta tuendæ Religiosæ modestiæ desint; quæ à diurno examine petenda sunt. nam nisi continuo quasi freno mentem contineas, ad assuetam, & naturæ adgenita dilabitur.

Spiritualibus etiam spoliatur armis negligens discussor sui. neque enim solet illius mentē Deus spiritualibus armare subsidiis, ac tanquam auxiliaribus copiis protegere: sed cælestibus destituit influxibus, quibus & se tueatur, & audenter in hostes eat. sed neque vlla re validius armatur petus, quam noxiorum depulso, salutariumque accensione. vtrumque solerti conscientiæ discussione consequimur.

Exuitur hinc etiam paullatim cognitione diuina, cum enim ex huius neglectu, sui ignorance tanquam densa nube integatur homo, sit ut in cæleste lumen acciem intendere non valeat. soletque Deus lucis suæ radios iis subtrahere qui & prioris vitæ noctem, & diurnas incurstantes tenebras assidua cura non depellunt; sed
in

in alto negligentiae cuiusdam somno inter-
pescunt perpetuis erroribus ac labyrinthis
inerrantes: è quibus nunquam se ex-
plicabunt, caelesti sole subtracto.

Sed & nulla re alia à primæuo maiorum
spíritu degenerare plerosq; videmus. nam
cùm diligenti sui discussione & praua e-
mendetur, & futuris prospiciatur damnis;
fit vt illius neglectu & excrescant mala, ac
tanquam habitū quendam induant, eant-
que quasi in naturam, nec præcaueantur
damna; sed cæco quodam impetu in illa
proruamus, ac tanquam atra nube tecti in
præcipitia voluamur. Et nulla certè respu-
blica diu stare potest, quæ legum transgres-
soribus impunitatem concedit, & in qua
cùm bonis negentur præmia, tum impro-
bis condonantur poenæ. idem in animo,
& interiore mentis republica fieri consue-
uit: in qua nisi iudicem adhibueris qui de-
licta puniat, qui in omnem partem inten-
tum oculum habeat, qui que seria indaga-
tione in transgressionem inuigilet; nihil
expectandum aliud, quàm quod in repu-
blica iudice destituta.

Magnam etiam homo ex hac diligenti
discussionem suipsius cognitionem conse-
quitur: qua destitutus, nulla propè spes
reliqua bene prudenterque dirigendi sa-
lutis

lutis vias. neque enim fortuitò quis se suaque cognoscet. magnum studium assiduaque diligentia necessaria est, vt quis tam abdita, totque inuiis vijs recondita, tot anfractibus implexa agnoscat. quod ferè solius examinis vsu euenire consuevit. discit deinde ex hoc quibus subiacet pericula.

Crescit è seria hac cogitationum, verborum factorumque disquisitione, prudentia. neque enim ille facile cogitatione, verbo, aut re ipsa labitur, qui sua omnia ad quotidianam incudem reuocat. qui que quoties prolixiora cum externis habita colloquia, toties in se redit, audita dictaque discutit. maturitatem enim talis ac circumspèctione in omnibus induet, doctus tacere & loqui, neque facile in pœnitenda aut erubescenda proruet.

Magnum etiam ex hac accrescit animo robur. cum enim illa duce in noxiorum veniamus cognitionem, quorum detractione melior manet animi habitudo, fit vt huius vires solidentur: non secus ac corpus corrupti sanguinis emissionem roboratur, valetudinique suæ restituitur.

Continetur dehinc mens in perpetua quadam puritate ac castimonia. vt enim ex assidua zizaniorum eliminatione agro-

R

rum

rum perstat integritas, frequentique domus ac vestium emundatione, nitor quidam ac mundities seruatur: ita frequenti seriaeque sui discussione, mentis quidam nitor seruatur, ne aut sordibus obtegatur, aut aliquid de splendore remittat, aut maculas contrahat; quibus improuida cuiusque negligentia crescentibus, omnis decor obfuscat. quod ubi euenerit, nihil familiarius, quam nitoris, puritatis, castimoniae loco, sordes & impura vota subnasci.

Ducit deinde haec discussio ad contemptum sui, magnamque animi submissionem, cum in miseriarum nostrarum nos cognitionem deducat, milleque submississime mentis causas praebet, ac quadam verecundia totum hominem perfundat. indeque exurgit in admirationem laudisque protegentis, eleuantis ac miserantis Domini: cum & delictorum suorum frequentiam, & ignoscentis Domini benignitatem contuetur: maxime cum inter illa nouorum semper beneficiorum augmenta videat, meritarumque toties poenarum condonationem. quae omnia non possunt non ad toties totque nominibus debitarum gratiarum actionem hominem impellere: simulque metum incutere, ne,
fi

si negligentiores in hac fuerimus, benignam misericordemq; manum suam subtrahat, & ad immania præcipitia labamur.

Paternum ac benignum in aliorum lapsibus animum inducit, commiserationis viscera aperit. dum enim sua diligens scrutator delicta cognoscit, periculaque quæ sola potenti diuina manu euasit; facilis in aliorum culpis est, nec tam indignatione, quàm commiseratione impellente medicam ac paternam manum adhibet, conscius infirmitatum suarum.

Instruit etiam ac erudit, peritumque animarum medicum statuit. neque certior quisquàm illo est, qui in se mala expertus est, quiq; ex se, aliis mederi didicit, præcauere damna, præsentia pellere, providere futuris. ille namque, & morborum magnitudinem, initia, incrementa, exitum, & medicamentorum vim expertus, facilius tutiusque in alio exercet, quod in se didicit. neque vlla certior scientia est quàm quæ experientia nascitur.

Magnam deinde spiritalis lætitiæ causam præbet. cùm diligenti hac discussione, peccata ac imperfectiones mœrorum ac dolorum causæ euellantur; ac tanquàm validis frequentatisque ventis, noxiorum habituum nubes depellantur. hinc ingens

exurgit animo gaudium; innocentia nimirum suæ, diuinæq; protegentis se dexteræ: quod gaudium in illa mente esse non potest, quæ ingentium secum turbarum causas circumfert. nam cum è negligentis sui discussione, vitia habitusque prauis indies augmentum sumant, necesse etiam prauorum motuum ac turbarum causas crescere. cum nullis aliis rebus, tam potentes insurgant animo tempestates, quæ illum continua iactatione tanquam decumanis fluctibus variè in omnem partem impellunt.

Denique ex hac sui sedula peruestigatione, ingens delictorum pœnitudo, meliorisque vitæ seriò institutio exoritur. hinc enim æternum profuturæ fluunt lacrymæ, quibus tanquã flumine sordes eluuntur; exurgunt ab alto ducta suspiria, quibus tanquã præualido fulmine cælos penetramus. Et sanè cum è neglectu examinis huius, in densa ignoratione nostri versemur, fit ut paullatim grauissima etiam crimina ignoremus, obducto mentis oculo, frequentata scelerum congerie. cum contra, qui diurna hac sui disquisitione assuevit, non facile in pœnitenda labatur; aut si labatur, remedia ad manum habeat, seipso post robustior & cautior. adeoque vix fieri potest,

ut qui seria ac diligentibus per diem discussione conscientiam perscrutatur, in gravius aliquod delictum corruat; maxime cum in singulis discussionibus animum in delictorum, etiam minimorum seriam poenitudinem, ac emendationis propositum excitet, in præteritorum lapsuum seuerum dolorem, ac in futurorum cautam prouidentiam.

In quam rem illud in primis proderit, si in singulis conscientie discussionibus, serio, & non perfunctorie particularis alicuius vitij, in quod frequentius labimur, rationem à nobis seriam poscamus, conferendo inter se præsentis hebdomadæ dies, dispiciendoque quos in proposito vitij victoria progressus fecerimus, cum forti validoque emendationis proposito. quæ res vel una ad vitiorum extirpationem, rarioresque lapsus plurimum potest.

Remedia.

Magnorum in Ecclesia virorum in exactam examinis institutionem nos merito mouere debent monita. Ephrem verba sunt: *Diebus singulis vesperi & manè diligenter considera quo pacto se habeat negotiatio tua, ac mercimonij ratio. & vesperi quidem ingressus cubiculum cordis tui, examina* Tom. 3.
Serm.
Ascet.

teipsum & dicito, Putásne hodie in aliquo Deum exacerbaui? nunquid verba otiosa protuli? num per contemptum negligentiamq; peccaui? num in re aliqua fratrem irritaui? num alicuius famam detractiōibus laceraui? Eadem matutino tempore præscribit. eademq; S. Do-

Serm. 1. rotheus: *Vesperī sedulò quisque perquirat & inuestiget, quomodo pertransierit diem illum. rursum manè examinei, quomodo exegerit noctem illam.* & D. Bernardus: *Manè præterita*

*Lib. de
vita
solis.*

noctis fac à temetipso exactionem, & ventura diei tu tibi indic cautionem. vesperī diei præteritæ rationem exige, & superuenientis noctis fac indictionem. sic districto nequaquam tibi lasciuire vacabit.

Bonorum, quæ à seria ac frequentata conscientia disquisitione nascuntur, recordatio; malorumque ac periculorum, quæ à disquisitionis neglectu proficiuntur, commemoratio. & ferè sola frequens diligensque disquisitio sui satis erit ad omnia vitia superanda. Sapienter Chrysostomus: *Hoc solum est quod à nobis exposcitur, ut semper recordemur mala nostra, & conscientiam gestorū nostrorū habeamus ante oculos, ut pro his supplicemus Deo.*

*De cōp.
cordis.*

Fortis, ac sapiùs iterata apud animum suum propositio, seriò in accuratam conscientia examinationem incumbendi.

Quòd

Quòd si quæ impedimenta intercurrerint, quæ dilationem suadeant, aut consuetum examinandi tempus adimant; nullo tamen casu, quantacunque necessitate occurrente, omittenda disquisitio hæce-rit; sed primo quoque tempore à grauioribus vacuo, exequenda.

Proderit etiam vitæ mortisquæ incertitudinem sæpe sibi proponere, variorumque subitos casus, miserandos & inexpectatos exitus, momentaneosque excessus, & in summa non rarò valetudine, robore ac iuuenta, improuidos raptus: è quibus timorem similis in nobis exitus prouocemus, perque serias has conscientiarum disquisitiones, mentem ad subitas has & momentaneas mortes paremus. Ad quam rem iuuabit in primis, si quando aut grauius delictum, aut grauius periculum occurrerit, non expectare consueta disquisitionum tempora, sed subitam in se excitare pœnitudinem, prouocareque in se contritionis actum.

Consultum etiam fuerit, si quãdo negligentia nostra disquisitio hæc omissa fuerit, vltronea aliqua pœnitentia animum ad maiorem sui curam prouocare: vt hac quasi monitione teporem, ac ignauum à se neglectum pellat.

CAPVT V.

Tepiditas in iis quæ spiritum tangunt.

VT non immeritò tales lenta tabe, & feбри hectica consumi dixeris, quorum robur pedetentim emedullatur, vt nec sentientes mala sua corruant; quoque ruina propiores sunt, eò minùs pericula sua persentiscant.

Nec alteri rei commodiùs hæc tepiditas, animique languor comparari potest, quàm blattis & tineis, interiora validorum etiam lignorum rodentibus, vt si moram feceris, nudum corticem, exeso robore reperiās.

Rectè etiam assimilari tepidus potest hydrope aut aqua intercute laboranti, à qua paullatim opprimitur & suffocatur. Ignauus planè morbus, qui à paruis initiis serpendo, tibias ferè, indeque vniuersum corpus occupat: suffocatque quidquid generosorum spirituum toto sparsum iacebat corpore, enecatque quidquid magnum abditum latebat fibris, vertitque in limosam quandã saniem quidquid venis claudabatur valetudinis bonæ.

Melancholicis etiam humoribus prægrauato

uato similis est tepidus : nauseabundo in omnibus stomacho. ad omnia varius & inconstans, sibi aliisque grauis, aliorum contemptor & fugillator, inuidiaque in prosperioribus aliorum successibus intumescens. cui cum nihil placeat, displicent omnia. frigidos calentesque iuxta auersatur. nec bonus haberi potest, nec malus vult. *Vult nimirum & non vult piger, anima* Prov. 13
autem operantium impinguabitur.

Sed & similis est limaci, ignauissimæ inambulationis pigra fœdaque vestigia relinquenti; cum inerti volutatione corpus reptando trahit, signatque ignauas circumductiones spurca colluie, ingenti spectatium calcantiumque fastidio. idem in tepido reperies, qui in omni actione, teporis sui lenta vestigia relinquit, nauseam ardentibus paritura. & sanè nihil ab illo expectes, præter ignauas quasdam molitiones, pigro tepore signatas, ut aliquid voluisse illum potius, quam fecisse deprehendas: adeoque nec voluisse quidem, nisi quæ propensione suæ amica, amicum teporem fouent.

Vetus dictum & verum, Potior est exercitus ceruorum leone ductore, quam leonum ceruo duce. ut videamus omnium gentium sententia, quantum possit ardor,

animusque excelsus; quantum secum detrimenti damni que trahat mens vilis & tepore quodam cincta. leo nimirum vnus tot ceruos leones facit, ceruus vnus tot leones ceruos. Ita accensus ductoris animus in reliquos ardorem ignemque diffundit; mens tepida ducis in omnes teporis languorisque sui virus iaculatur. Ad ardua sane, & victura idoneus esse tepidus non potest; cum quæ in posteritatem abitura sunt, calorem & ignem quendam exigant: sine quo nemo manum extendit ad victura. Ingens nimirum animus esse debet qui ad excelsa dexteram porrigat. hunc animum interior quidam æstus propellit. at in tepido languet omne pectus, caretque hoc magnarum cogitationum prouocamento. & sane nisi amoris quidam æstus hominem protrudat, quid sperari magnū potest? cum ab vno amore meritorum magnorumque mensura nascatur. ab illo nemo excluditur. pares Reges diuitesque seruis pauperibusque sunt. nulla conditionum, genituræ, opum, honorum discrimina amor nouit. hunc amorem in tepido non reperiēs: ardoribus enim amor omnis fulcitur, ignorat frigora. Iam quam mercedem à Deo tepidus speret, mercedis mensura destitutus? neque enim ille tam dono-

donorum magnitudinem, quàm largientis ardorem intuetur. misera alioqui futura pauperis conditio, qui sola mente, magna magnis remuneranda præmiis donare potest. ita viduæ illius Euangelicæ laudatus animus, non minuta duo. & maiora hæc fuerunt magnorum thesauris, cùm ab ingenti animo duo venirent minuta, abitura in talenta, si opes animis pares fuissent.

Nec in vno primo possessore suo tepor hic manet, sed noxiæ instar scabiei ac pruriginis contubernales occupat. arbitreris lepram latè se spargentem, ac in obuia quæque sæuientem. ita serpit hoc malum, & ab vno capite totam propè non rarò familiam occupat. extinguiturque vnus exemplo ardor quidam mentis, ac quasi iniecto flumine tepescit prior flamma. & qui ignis antè fuerat, nunc solo fumo, ignem aliquando fuisse ostendit. pœnitete nimirum ignium quia pœnitet laborum: molliæque blandaque amplectimur, cùm domesticum exemplum videmus. noxia enim potentia in exemplum & imitationem sunt.

Ingens deinde teporem pusillanimitas comitatur, animus deiectus, varij metus ac timores plurimū inanes, suspicionumque

que integra nemora. quæ omnia potendarum rerum desperatione clauduntur: è qua malorum omnium extrema nascuntur. bonitatis diuinæ diffidentia, miserationis desperatio: ac denique cælestium non iam neglectus tantum, sed & contemptus quidam. nam cum labores fugiat, videatque se ad illa sine his peruenire non posse, in contemptum illorum deuoluitur: cum carere cælestibus malit, quàm sudorem in illorum prosecutione fundere. ita carior illi cælestibus sudor est. vt similis sit illis qui apud Sapientem inclamant: *Extinctus cinis erit corpus nostrum, & spiritus diffundetur tanquam mollis aër, & transibit vita nostra tanquam vestigium nubis, & sicut nebula dissoluetur, quæ fugata est à radiis solis. Venite ergo & fruamur bonis, vino pretioso & unguentis nos impleamus, & non prætereant nos flos temporis, coronemus nos rosis antequam marcescant: nullum pratum sit, quod non pertranscat luxuria nostra.* cum enim desperent cælestia quæ solis laboribus parantur, vertunt conatum suum mollem ad humana, omnemque in iis felicitatem ponunt, cum non magnis sudoribus hæc parentur, vt quæ obuia sint, & vltro etiam se ingerant, imò & non raro etiam reluctantibus se obtendant.

Et verò nemo è nobili Religioso vertice, nisi per immania teporum præcipitia ad malorum profunda delapsus est: vt per tepiditatis incrementa, tanquam per præcipientes gradus, aut decliua montium, ad infelicia præcipitia labamur. nemo etiam Religiosam stationem signaque in quæ iurauerat desertor reliquit, qui non priùs à teporibus his proritatus ac delinitus, longa quasi manu ad turpem infortunatamque fugam deductus fuerit. nemoque spiritalis militiæ desertor audiuerit, qui excusso tepore, fortiter Religiosam semitam presserit.

Benè dictum à Sapiente: *Spuria vitulamina non dabunt altas radices, aut stabile firmamentum collocabunt. Et si in ramis in tempore germinauerint, infirmiter posita à vento commouebuntur, & à nimietate ventorum eradicabuntur. confringetur enim rami inconsummati, & fructus illorum inutiles & acerbi ad manducandum, & ad nihilum apti.* Spuria in Religione vitulamina, & torpore quodam desides sunt, remotissimi à germanorum Dei filiorum affectu. neque altas in ea radices tepor aget: neque debilius vllū fundamentum tepore est. cui quidquid superstruitur, aduersis ingruentibus, radicitus euellitur: sed neque si excreuerit in arborem,

rem, ramos fructusque dabit perennaturos: ac si quos dederit, insuaues, & in fauillas aut quasi in farinam cōmolendos dabit. insipida enim omnis operatio tepentium est, & stomachum motura. vnde

Apos. 6. illud: *Vtinam frigidus esses, aut calidus: sed quia tepidus es, incipiam te euomere ex ore meo.*

Nec mirum hoc videri debet. cū tepidus omnis instar tepentis sit aquæ, vomitum prouocantis. quid verò fœdus vomitu in humanis? nauseantis verò hīc stomachi consuetudo exprimitur, qui noxia à se valido impulsu repellit, vt reliquo corpori bene sit: ne, si nocitura hæc contineat, ad reliqua abeat hoc virus, & toti paullatim corpori interitum paret. Hinc grauis etiam illa interminatio, *Maledictus qui facit*

Iers. 48 *opus Dei negligenter.* nec mirum, cū in tantæ maiestatis oculis constitutus, ignaua quadam fœcordia diuinas res exequitur, tantis promissionibus locupletatas, tanquam si res ludicras pertractaret. ita dum ludit in re salutis, infelici plurimū exitu luditur; & seriò destituitur à Domino, qui non seriò tanti Dei res peregit.

Fortiter proinde per Sapiētem nos Dominus ad labores inhortatur: *Vade ad fornicam, & pigra, & considera vias eius, & discite sapientiam: quæ cū non habeat ducem, nec præcepto-*

ceptorem, nec principem, parat in æstate cibum sibi, & congregat in messe quod comedat. Vsq̃uequò piger dormies? quando consurges è somno tuo? paullulum dormies, paullulum dormitabis, paullulum conferes manus tuas vt dormias, & veniet tibi quasi viator egestas, & pauperies quasi vir armatus. Si verò impiger fueris, veniet vt fons messis tua, & egestas longè fugiet. Erubescat tepidus doceri à formica. cælo natum doceri ab infima bestiarum, & prudentiam discere ac futurorum prouidentiam ab insensato animalculo. vt paret hic sibi quod æternùm prodesse queat: tepore nunquàm parauerit. labore & sudoribus æterna veniunt. Nam quid aliud speret torpore marcescens, quàm vt ab egestate tanquam ab armato prematur, perennibus cælorum diuitiis exclusus? *Egestatē enim* Prou. 10
operata est manus remissa: manus autem fortium diuitias parat. Sapiientis verba sunt & illa: Prou. 13
Qui operatur terram suam, satiabitur panibus: qui autem sectatur otium, stultissimus est. Addit, *Qui mollis & dissolutus est in opere suo, frater est sua opera dissipantis.* Prou. 13.
Et illud, *Pigredo* Prou. 18.
immittit soporem, & anima dissoluta esuriet. Egestatem anima remissa, fortium verò manus viriliter certantium, & de genu pugnantium, quibus à vulnere & sanguine crescit animus, opes parabunt æternas.

Hinc

Hinc meritò stolidissimi censendi sunt otij sectatores, quibus animæ panes cælestes gratiæ, & æterni fontes cælestium donorum negantur. hinc illa esuries, & infelix tepentium sitis, quæ à negato cælesti cibo potuque nascitur; atque hinc etiam promissorum diuinorum bonorum abdicatio. hæredes eramus. excludit nos tepor vt tam illustribus indignos. quæ sola virtute, vigili cura, profusis sudoribus, infesso labore parantur.

Eleganter torpentem describit Sapiens:
Pro. 26. Sicut ostium vertitur in cardine suo, ita piger in lectulo suo. abscondit piger manum sub ascella sua, & laborat si ad os suum eam conuerterit. Et tamen sapientior sibi piger videtur septem viris loquentibus sententias. Commoditatibus nimirum suis tanquam molli lectulo indormit piger, frigora metuens. hinc illa ignauia retractæ dexteræ, ori que cibum negantis. negat subtrahitque hunc sibi animæ cibum tepidus, laborem fastidians, quo solo cibus ille paratur. nec pudet illum à puellis puerisque vinci: quorū non pauci contemptis calcatisque mollibus, per dura & aspera cælesti cibo pasti sunt: per vulnera nimirum & sanguinem cælo inscripti. &, quod stolidissimū est, sapiens sibi piger videtur; quasi prudenti circum-
 spectione

spec̃tione & ignes & fr̃gora fugiat, & inimica corpori deuitet: gaudet nimirum blandè ludentibus, & quadam dulcedine molliter dissuauiantibus: damnat quos duris & asperis calcatis, per ardua viam sibi ad æternitatem sternere videt, quasi naturæ aduersantia vltro auidi amplectantur: ignari, æterna illis præmia, torpenti-
bus verò nullo æuo morituras pœnas parari. & *Per agrum hominis pigri transiui, & per vineam viri stulti: & ecce totum repleuerant* Promi 24
urtica; & operuerant superficiem eius spinae, & maceria lapidum destructa erat. tepenti-
bus enim dormientibusque nobis, ac tanquam dere salutis nimiùm securis, nocitura aduersarius semina inspargit, oppletque malarum cogitationum ac desideriorum zizaniis pectus, valido antè virtutum aratro subactum.

Hoc malum vbi inualuerit, ad ardua quæque ignauissimos reperiēs, sed neque facillima nisi placentia admittent. Virgēs, & instas operi? negant se posse, inualetudinem causantur, onerisque munerisque magnitudinem, impares vires.

Succedit his quædam spiritualium rerum nausea, horror paupertatis, obedientiæ & pœnitentiarum, omnisque omnino austeritatis; dum mollia captat animus,

& blandientibus se totum immergit, deferuescente spiritus ardore, ac vniuersim mutua refrigerante caritate.

Itur deinde regia via ad corporis commoda, ad prodigam in cibum, potum, somnum profusionem, ad voluptatem denique suaue ridentem, prouocantem, & ad se molles hosce spiritus allicientem.

Neque aliud sperari ab hoc tepore potest. nam vbi elanguit ardor spiritus, extabuitque pristinus æstus, ac quasi in fauillam cælestes antè flammæ abierunt, nihil nisi inanem fumum, leuemque ac euanidum vaporem sperare possumus.

Et certè abacto pristino ardore, animique calore emortuo ac consepulto, omnium spiritalium rerum mortem quandam ac interitum sequi necessum est: incipitque exinde viuere caro, cùm quantum illi spiritus decedit, tantum illi vitæ accedat; quantumque spiritui cura cælestis subtrahitur, tantum huic sæcularis auræ succrescat. è tepore proinde illius, ardor huius enascitur: ita namque in his comparatum est, vt quantum detrahitur vni, tantum addatur alteri, quantum decrescit vni, tantum alteri accrescat: vt vnus interitus, vita sit alterius.

Inuigilandum proinde ne noxius hic
tepor

tempor animum occupet. nam vbi illum semel possederit captiuumque duxerit, nequidquam ferè melioribus ignibus excites: tam alto sopore pectus illiditur, vt nec potentissimis quidem spiritalibus prouocamentis è profundo, quo tenetur, somno, ad se redeat, & nihil iam huic in omni vita serium. vt ludicra, & comœdiæ scenam grauissima quæque peragit: nec vt sua, sed vt aliena retractat: si dederis, accipiet, & vix aliquādo vel offerenti manum porriget: quòd si vltro non inieceris, nec desiderabit quidem, multoque minùs sudorem effundet, aut laborem impendet: sed neque spe felicitis æternitatis, aut infelicitis æternitatis metu commouebitur: in gloria, aut inglorius vitam ducat, iuxta habebit. propone vtriusque vitæ præmia, laboribus terretur: propone huius & alterius iudicia vitæ, tabescet ignauia; nec aut ad vnius gloriam, aut ad alterius prouocabitur tormenta. narra quæ æternitatē tangunt, fabulæ illi videntur; quæ ludicem Deum, tragœdiæ fragmentum. Nec plurimum magis præmiis pœnisque propositis mouebis, quam cadauer minis: imple mentem terroribus, imple gaudiis, virtutis speciem propone, & quidquid in illa prouocat in sequelam, in admirationem, in

laudem, in animi tranquillitatem & pacem nullo calamo explicandam; adde cælestem amorem, & quidquid vnquam flammæ iaculatum est cælum, quidquid ignium infernus; emarcidum truncum arbitraberis: nisi quòd belluarum more pronus rapiatur in corporis commoda, felicitatemq; in his ponat suam: quidquid verò ingenio, labore, industria assurgit ad magna, execratur.

Sed neque fidi huic quidquam potest, nec tutò aliquid committi, vnaque ferè huic beatitudo est, in ignauo otio & fabulis consenescere: nisi quòd, vt dixi, carnis plerumque vitia sequantur hunc teporem, eò maiora validioraque, quo languor hic maior est, altioresque in homine radices egit. quod vbi euenit, nihil in eo, non dicam Religioso, sed nec Christiano dignum reperiens.

Remedia.

O Rationum, meditationum vsus frequentior, piorum librorum, vitarumque Sanctorum frequentata lectio: neque credi potest quantum exempla in imitationem possint. puerorum enim virginumque ignes calcantium, tormentis tanquam
rosis

ros inambulantium, pœnas tanquam mensarum delicias amplectentium, cogitationes, quem non teporem pellant? iam Christi Domini passio, calentes lacrymæ, fusus sudor, sparsus sanguis, immitia verbera, corona spinea, immania vulnera, clavi, crux, lancea, quid non poterunt in religioso pectore, si seriò frequententur?

Mortificationum deinde, Sacramentorum, ac confessionis usus solito maior: consultissimumque fuerit fortibus pœnitentibus tanquam immissis ignibus teporem pellere. validissima enim remedia sunt quæ à sensibus petuntur. magnus ille est, qui nusquam pepercit sibi: prudens, qui in se punit quod in alio displicet: fortis, qui pœnarum metu ad magna se cogit.

Spiritualium exercitiorum crebrior repetitio; frequens usus piarum apud Deum aspirationum, maximeque earum, quæ aut in amorem illius, aut in laborem ex præmiorum aut pœnarum magnitudine impellunt, mentemque ad duriora ac diuina prouocant, auocant à suauibus & perituris. quæ si frequententur, tanquam perpetuis flammis inardescit animus, ac tanquam suppositis ignibus æstuant præcordia Deo plena. quibus accensus non facile intepestcit animus.

Diligens examen orationum, ac meditationum factarum, seriaque negligentiarum distractionumque in illis disquisitio. Serium deinde emendationis propositum, excitationesque pellendæ tepiditati idoneæ. Neque satis fuerit in eo qui tepore hoc oppugnatur, si bis per diem examen instituat. iteret frequenter, post Sacrum, Horas, pias lectiones, conciones, catechizationes, prolixiora colloquia, studia. Incredibile est quantum breuia hæc examina, mentem sibi præsentem contineant, quantum animent; dum & lapsus suos & pericula intuetur, & fortibus se ipsum propositis ad magna exacuit.

Frequens consideratio diuinæ præsentia, magnitudinis illius, potentia, scientia. hæc qui propius considerabit, facile teporem exuet inimicum Deo.

Iuuabit etiam in terrorem cogitatio iudicantis Dei, incertitudinis vitæ, æternarum pœnarum, paratorumque cælo præmiorum. vtriusque enim æternitas vehemens calcar est fortiter audendi & explendi.

Proderunt etiam frequentatæ per diem cogitationes, Omnem diem primum, omnem vltimum esse; illum in ardorem, hunc in terrorem. & magnorū illud, Quare venisti? quis instituti finis?

Com-

Commodorum deinde incommodorumque discussio, quæ aut ex ardoribus, aut tepore nascuntur, non poterit non ingenti spe bonorum, malorumque metu, mentem accendere ac terrere, teporemque omnem excutere. verè Prosper: *Sicut corpori noxium est, corpoream etiam non posse percipere; ita animo periculosum est, spirituales delicias fastidire.* Sent. 112.

Causam denique teporis consultissimū fuerit investigare, inuentāque valida manu euellere. neque sanè quidquam facilius quàm repertam pellere: qua etiam ignorata, nihil solidi sperandum est. cū ab huius cognitione omnis victoriæ spes pendeat. & principiis maximè inuigilandum est. maximè cū in hoc vitio à tenuissimis & quæ propè sensum omnem fugiunt, quasi per insensiles gradus ad extrema ducamur, eorum more qui per præcipitia labuntur, qui non antè desinunt quàm ad ima variis infelicibusque volutionibus deuenerint. initiis proinde fortiter insistendum, ne in medio infortunatissimarum volutionum serò remedia cogitemus, cū non teporē tantū sed & nauseam ac spiritalium contemptum imbiberimus. iam cū hostibus vndique cingamur callidis audacibusque, non tepenti-

bus consiliis opus est. domesticam patimur carnem, quæ nullam oppugnationibus moram concedit: ambientem mundum, ludentem, blandientem, allicientem, multa promittentem: insurgentem crudeli, effera, subdolaque simul infestatione demonem, singula vigili cura obeuntem, ac in omnem momento omni perdendi occasionem intentum. quo magis tantis domi forisque hostibus in æternis nocendi excubiis stantibus, ignavia teporeque pulso, inuigilandum quaqua parte saluti est. nusquam indormiendum. omnia etiam tuta circumspicienda, metuenda: nusquam, nunquam arma ponenda, ne hostili pateamus ferro, ne insidiis, ne in glorio tandem exitu tepentem pigramque vitam signemus. Et sanè turpe est Religiosum, ab opum, honorum, voluptatumque amatoribus vinci: quos ingenti ardore alacritateque ad summa vitiorum tendere videmus, non sudoribus, non sanguini parcentes. & quid non audet audax humanarum fors hoc momento periturarum rerum sitis? quanto molimine in brevi peritura insurgit; cum audaci calcatu per contemptum etiam vitæ ad ruitura vota sua pergat? Turpissimum verò tantis illis æstibus in momentanea hæc insurgentibus, Religiosos

giosos beata æternitate proposita, ad cælorum non peritura præmia, ignauo protrudi potius quàm progredi gressu. quid hic speret, nisi qualia ab ignauo pectore expectanda sunt, post grauem nimirum cum euangelici talenti fessore, Domini reprehensionem, pœnarum æternitatem?

Teporis autem ferè hæ causæ. I. Consuetudo è sæculo in Religionem deportata, quæ in naturam abiit. hæc valido frequentique conatu, ac quasi flatu prouocatis sopitis ignibus, & sæcularium adhuc cogitationum cinere tectis, contrariisque consuetudinibus pellenda erit.

2. Naturalis quædam animi inconstantia. qua nulli certæ rei inhærentes, ad varia semper manum protendimus, nouorum auidi, veterum pertæsi: omnia nimirum tentasse iuuat, cum vna ferè veritas virtusque gradientur via; dubia semper error, sui consiliorumque ignarus.

3. Defectus bonæ voluntatis. quæ vna potentissima spiritualium omnium profectuum causa est. excitanda illa erit Christi Sanctorumque exemplis, pœnis, præmiis, æternitatis vtriusque.

4. Imprudens & supra vires feruor, violento molimine expressus; qui ferè in languorem degenerat, cum indiscreto cona-

tu robur omne paullatim exteritur, vireſ-
que vniuerſim concidunt, totaꝫ valetu-
do eneruatur, nec ſe ad magna poteſt ex-
tendere, intempeſtiuis ardorum labori-
bus fracta. prudentia corrigendum hoc
malum, & ſapiente Superiorum ductu.

5. Domesticae disciplinae neglectus. cum
temporis languorisque omnis, conuiuentia
exceſſum, mater ſit: qui Superiorum vi-
gili cura emendandus. vetus enim illud
verum, Vbi rigor, ibi vigor. ſi prudenti Su-
perioris manu ducatur, ne nimius rigor
in ſeueritatem labatur, inde in animorum
alienationem, & odia.

6. Laboris fuga, otij amor. vellemus ni-
mirum, ſed labore terremur. extimulan-
da proinde voluntas erit potentibus ti-
moris Dei, & infelicitis æternitatis ſtimulis.

7. Institutionis, & boni exempli in Su-
periore defectus. doceat; plus tamen re-
bus, quàm verbo, & imitatores habebit.
nam vel ſolo rubore ſequentur præeun-
tem.

8. Infurgentium difficultatum metus.
qui ad infima abiicit, terret à magnis. ex-
pellendus ille, propositis fortibus in vtro-
que ſexu in prima iuuentute exemplis,
præmiorumque magnitudine.

9. Puſillanimitas. quæ è diuinæ prote-
ctionis

tionis & auxilij diffidentia nascitur. hæc ingentibus Christi sponfionibus, omnium-
que ætate testatissimis exemplis depel-
lenda erit. animusque ad æterna & magna
erigendus, ingenti que in Deum fiducia
excitandus. ~

10. Neglectus minimorum. sunt enim
hæc tanquam flabra ignem prouocantia,
tanquam ligna flammæ & calorum
materies, tanquam pulueres qui densati
prospectum adimunt, tanquam raræ nu-
beculæ, quæ compactæ noctem inducunt,
lumen adimunt.

11. Profusa passim loquendi licentia.
qua ferè hauriuntur quæ internum æstum
minuunt, profunditurque omnis animi ca-
lor. in cuius locum tepor succedit, & ge-
nerosi antè pectoris languor.

12. Nimia ad externa effusio. restringē-
da hæc erunt, & excitandus solitudinis cæ-
lestiumque amor, vitæ breuitate æternita-
teque proposita. quòd si obediencie impe-
rio implicamur externis; frequentibus re-
petitisque per diem piis aspirationibus,
mens indissociabili quasi quodam nexu,
iungenda Deo: temporaliaque negotia,
diuinorum incentiuis farcienda erunt. ne
his destitutus animus, diffluat in pulue-
rem.

Bern. de
conuers.
ad ele-
ricos,
cap. 30.

Quoties denique deuotionis feruor in-
tepuerit, consultum fuerit illud B. Ber-
nardi grata memoria repetere: *Non sunt*
condignæ passionēs huius temporis ad culpam
præteritam quæ remittitur, ad gratiam præsen-
tem quæ immittitur, ad inferni pœnam quæ
euaditur, & ad gloriam futuram quæ repromit-
titur.

CAPVT VI.

Mortificationis neglectus.

E Quo simul omnia propè mala nasci
videmus. Neque cum immortificata
hac affectuum ratione, castitatis, pauper-
tatis, obedientiæ obseruatio, aut solida
aliqua virtus consistere, aut in vocatione
constantia sperari prudenter potest. diu
fortè in alta permittitur pace, nec bella
sentit, aut inimicas experitur acies; con-
tinebit se intra modestiæ, ac quasi virtu-
tis limites: at vbi insurrexerit hostis, nec
minis tamen, sed conserto fortiter pede,
armis & ferro inassuetum malis pectus ag-
gressus fuerit; cadent animi, labascent ge-
nua, & ferè antè succumbet, quàm verbe-
ra senserit, adeoque ad solas etiam hosti-
les expallescet minas, & victorem agno-
scet, cuius non expertus est dexteram.

Tironibus hoc euenire solet, quos solus hostilium armorum fulgor terret, & in fugam vertit. Veteranus, cui cum pugna & lucta, dandisque accipiendisque vulneribus quædam quasi amicitia intercessit, qui que non vno pugno disculptum pectus habet; animos à sanguine induet, assuetus post vulnera victoriarum.

Perpetuam deinde mentis inquietudinem sequi necessum est, internæque pacis turbationem. neque enim quies sperari potest, vbi perpetua turbarum causa est: cumque vniuersa spiritalis vita, fructusque à benè mortificatis affectibus pendeat, tanquam à benè subacta & proscissa terra, semineque mortuo simillimo sperati agrarij fructus; sit vt mortuo similior dici possit, in quo crudi adhuc dominantur affectus, à quorum fœcunda malignitate nihil nisi agro Dominico nocitura proueniant: neque enim è scrupulo hoc agro, loliis ac zizaniis obsito, magna expectari possunt. nam vt non improba terra sit, ruderibus tamen, ac miricis innascentibus; quidquid est seminis boni suffocatur, ac quasi inimico pede proteritur, vt magno licet se conatu in herbam nonnunquam erigat, spem tamen raritate sua fallat, nec ad maturitatem deueniat; cum ferè in medio

dio sperati fructus noxiorū pondere corrumpat, aut exarescat.

Sequitur deinde domestica vniuersim turbatio, dum ab huiusmodi malè mortificatorum affectuum inquietudine, domestica pax turbatur, commouentur animi, & ab vnius sepe malè subacta mente multorum sequuntur commotiones, & quædam quasi tempestates; dum his tanquam flabris, iuniorum inprimis, minusque solidorum animi grauius commouentur, excitanturque in paria exemplo, ac in imitationem prouocantur; dum ferè ad pessimorum imitationem natura feramur, nihilque pronius sit, quàm præeunte aliquo tanquam duce, reliquos sequi, à quibus vniuersa domestica pax scinditur, ac quasi imis sedibus concusso mari, tranquillitas in tempestatem vertitur; cùm neque iam quisquam alteri cedere, nemo insurgentium quorundam impetus declinare, nemo durioribus interdū irruentibus, molliora, ac veluti saxi puluillos obicere, nemo procurrentibus locum, spatiumque cursui concedat. quod vbi fit, & aspera duraque paribus incurrunt & illiduntur, quid nisi fragmenta & ignes expectes? Vnde postmodum animorum alienationes, acerbioresque indignationes nascuntur,

per-

perpetuisque propè hisce mentium æstibus vniuersa familia iactatur, periculisque plena sunt omnia; dum singuli immortificatis impacatisque motibus præcipitio, quàm certè stationi viciniore sunt. neque fieri potest, ut à malè subactis animis, non ingentes insurgant fluctus, qui pacata etiam aliorum littora conturbent ac quatiant; ut totum iam domesticum elementum in non consuetos exurgat motus naufragiis proximos.

Sed neque quidquam magni ab his expectari potest, cum in perpetuo non vano metu Superior sit, ne in pertractandarum rerum decursu, si quid non placitum occurrat, aut minùs iudicio illorum conforme, erumpant è cruda hac affectuum compositione, in vniuerso corpore poenitenda. neque committi illis quidquam potest, à quo Religioni decus sperari, aut damna timeri possint: semper enim iustus ille metus, Superiorum insidet animis, ne qua parte elabantur, ne qua in erubescenda erumpant.

Quòd si iusto hoc Superiores metu ducti, non credant honoratiora, periculum est ne in graues & nocituras indignationes insurgant, & dum se contemptos arbitratur, in salutis suæ Religioni que nocitura

tura prorumpant; vt ad quamcunque se Superior partem flexerit, non effugiat pericula. Quare nescio an aliquid grauius euenire possit, cùm neque si fidat, nèque si diffidat Superior, immortificatæ huius mentis scopulos euitare possit. vt autem inter hæc turbati pectoris, tanquam turbidi maris breuia, tam certò clauum dirigat, vt in neutram partem illidat nauem; ingens omnino industria, longaque experientia, & prudentia necessaria est: ac nec in summa illa quidem semper effugere naufragia poterit.

Remedia.

AB ipso Religionis ingressu peti debent. nam & suauius & tutius peruincuntur mala, ac quasi in semine suo præfocantur in primo illo quiduis ferendi æstu, quàm cùm mora inualuerunt, calorque ille victoriæ suiipsius elanguit & deferbuit.

Non ab omnibus simul inchoanda res est, vniq̃ue rei primò admouenda manus, & à facilioribus, minusque radicatis initia ducenda sunt, vt assuescat paulatim animus vincere, audeatque etiam maiora tentare.

Pro-

Proderit in primis adhæc particularis examinis seria institutio, frequensq; commodorum incommodorumque ex hoc neglectu nasci solitorum in vtramque partem, exemplorumque tam veterum, quàm recentium commemoratio.

Prudenter Leo monet : *Toties peccatis In ser-*
morimur, quoties in nobis peccata moriuntur. *mon. do*
& pretiosa in conspectu Domini etiam ista mors *nati ali*
Sanctorum est, ubi homo occiditur mundo, non *7. Ma-*
terminatione sensuum, sed sine vitiorum. *chab.*
 & Augustinus: *Moriatur homo, ne moriatur; mu-* *Epist.*
tetur ne damnetur. optanda mors, qua vna *114. ad*
 viuimus, qua spoliati morimur. prudens *Sophia.*
 delectus, mori ut viuas: non viuere, ne
 moriaris. bene viuit qui moritur. felix mors
 qua vna viuimus: infortunata vita qua mo-
 rimur. Habemus in hanc rem illud Domi-
 ni: *Si quis venit ad me, & non odit patrem* *Luc. 14.*
suum, & matrem, & uxorem, & filios, & fra-
tres, & sorores, adhuc autem & animam suam,
non potest me esse discipulus. & apud Ioan-
 nem: *Qui amat animam suam, perdet eam: &* *Ioan. 12*
qui odit animam suam in hoc mundo, in vitam
eternam custodit eam. Eleganter in hæc verba
 Augustinus: *Magna & mira sententia, quem-* *Trac. 51*
admodum sit hominis in animam suam amor ut *in Ioan.*
pereat, odium ne pereat. Si male amaueris, tunc
odisti: si bene oderis, tunc amasti. felices qui ode-
 runt

- runt custodiendo, ne perdant amando. & Chrysostomus: Aenigmati simile hoc dictum videtur: non tamen ita est, imò verò præcipua sapientia plenum. Et quomodo qui amat animam suam, perdet eam? qui absurdis eius cupiditatibus obtemperat, qui præter debitum ei indulget: quemadmodum è contrario, qui odit eam in hoc mundo, custodit eam: hoc est qui non paret ei cum noxia iubet. Facit hoc Religiosus omnis, qui se salutemque suam amat. mortis huius non tantum oblatas fortiter amplectitur causas, sed ultro quærit, tanto futurus Deo gratior, quanto pluribus mortibus nobilitatus. fecunda mors, qua centupla fecundatione in vitam exurgimus æternam. eo magis quòd interminantē habeamus Dominum: Nisi granum frumentica dens in terram mortuum fuerit, ipsum solum manet. & Apostolum: Si secundum carnem vixeritis, moriemini; si autem spiritu facta carnis mortificaueritis, viuetis. & de se propheta Regius: Propter te mortificamur tota die, æstimati sumus sicut oves occisionis. monetque Colof. 3. Apostolus: Mortificate membra vestra quæ sunt super terram.*

CAPVT VII.

Regularum etiam minimarum neglectus.

DE quo illud dici potest, *Qui spernit* *Eccli. 19*
modica, paulatim decidet. & ferè à minimorum neglectu & transgressione itur ad maiora; vt hæc minima, gradus quasi quidam sint ad ingentia præcipitia. neque facile quisquã primo quasi saltu ad deterima descendit. à paruis ferè initiis ad summa exurgimus, & maxima quæque mala à tenuissimis profluxere principiis; quæ neglecta, nulla postmodum arte reparanda damna attulerunt. Nec mirum à tam leuibus subnasci maxima: serpunt enim mala, & dormientibus nobis, ignauoque quodam somno illis, succrescunt tenerrimi frutices in arbores ingentes, quæ superbo postmodum vertice de robore suo gloriantur, despectantque infra se posita.

Nec inter parua hæc numeranda, à quibus ad maxima decurritur, ad immania vocationum præcipitia, ad carnem & sanguinem, & omni ordini erubescenda. ita tenuis nubecula, solis prospectum adimit: & parua paruis innexa animum densa caligine cingunt, prospectumque vt melio-

rum, ita & periculorum adimunt. Sanè à scintilla neglecta ad humilem arenam nobilissimæ prostratæ iacent ciuitates, è leui vulnere & morbo, frequentes magnorum mortes. & non gutta cauat lapidem? tam mollis elementi pars minima saxa & rupes. & stillicidia rara tectorum, ferrum & chalybem, & durissima quæque marmora, ferro non rarò imperuia, exedunt.

Iam quàm magna è minimis prostrata iacent? à tineis & blattis emedullantur robora. & minimum animal, fluctuum rabiem, ventorum sæuitiam, & nauium ludit magnitudinem. à cuniculis & formicis vrbes euersas legimus. crocodilum ichneumon interimit, basiliscum mustela, bufonem araneus, & ab imbelli populo & fudibus armato ingentia armata agmina interneceione deleta sunt. Eua in vno serpentis alloquio perit, Adam in Eux? inde in omnem posteritatem vnus pomi improbitas transit: & pereunt tot millia quæ totius paradisi nec cespitem nouerāt. in vno mulieris aspectu cadit David, leones & vrsos & Goliadas assuetus sternere; in Dalila Philistæorū terror victorque Samson, in variis Salomon. pietas, fortitudo, prudentia, qualia nulla ætate, in femina iacēt. & non nobilissimi ductoris felicitatem

vna Iudith stitit? & quantula res mulier-
culæ aspectus vnus, familiarior sermocina-
tio vna, curiosior non casti penicilli in-
tuitus vnus, impurior calamus, lasciuior
cantus, mollia verba? & tamen in omnem
ex his etatem bella retulit non vnus, & in-
tulit sepulcro vulnera, ab vno curiosiore
oculorum iactu, vna in omnem vitam pec-
nitenda lasciuiore lectione, vno leui infe-
liciq; contactu. Dictum verè: *Nil tutò in* Curr.
hoste despicitur: quem spreueris, valentiorẽ lib. 6.
negligentia facies. Quantæ deinde, ac
quàm validæ res è minimis exsurgunt? è
tenui lino ingentia licia, è minimo semi-
ne ingens arbor exoritur, è zizaniorum
vna aut altera plantula neglecta totus sil-
uescit ager. & quid inualidius stramine &
serico? adnecte, & nullis viribus confrin-
ges. è minimis arenis ac lapillis quanti sur-
gunt montes, vastissima palatia, superbis-
simæ moles, celsissimæ turres? quæ iisdem
quibus steterant artibus euertes. minimo-
rum aggestione steterunt, minimorum
ablatione corruent. & quàm tenuibus ini-
tiis ad summam erigimur eruditionem? è
minimis elementis, è mutis inanimatorq;
vocalis. è paruis etiam opibus ad auri ta-
lenta, è plebeio sago ad orbis imperia.

Tepefcit in his paulatim Religionis, ac

instituti sui amor, dum ea negligunt quæ proprij instituti sunt, & per quæ magis etiam, quàm à maximis, ab aliis distingui-mur. Votorum namque obseruationes & violationes, cōmunes omnibus reperies, si votorum vim roburque spectes. minora reliqua licet sint, tamen ab his discrimini-bus & ornamentis, reliquorum discrimi-na nascuntur. Et ferè qui vocatione deser-ta, sæculum petierunt, à minimorū neg-lectu ac contemptu inceperunt, à quibus pedetentim ad extrema venerunt. Vetus dictum: Nemo repentè factus est pessimus. nec solet humani generis hostis ad imma-nia quædam scelera Religiosum primo im-pulsu propellere: paulatim, ac quasi non sentientem ducit ad præcipitia; è quibus fera sæpe pœnitudine vetera respectantē ad malorum profunda deturbat.

Tepescit perfectionis desiderium. in-credibile enim est quantum leuiores hæc profectum ornatumque secum trahant; vt si quis in veste aureas hinc inde licet mi-nutas stellulas interspergat, venustiore longè dabit, vt credas aliam ab illa priore: ita in Religioso, minimorum obseruatio magnum decus splendorēque adfert, vt toto cælo alium horum obseruatorem pu-tes ab eorum violatore, & tanquam alienę militiæ,

militiæ, ductorumque diuersorum stipendiarios.

Tenebrescit deinde paulatim his quasi nubibus, obtegaturque mentis nostræ lumen, & obscurantur animorum radij, quibus ductoribus ad virtutum summa ducebamur, collustrabamurque in perfectionis semita.

Labascit etiam amor Dei, diuinarumque rerum, dum paulatim abducimur à perfectionis studio; tædet laboris, minora errata, leuioreſque offensiones nihil facimus. Non sunt amantis signa solis mortem inferentibus terreri, & auocari ab amati offensione: signa sunt in amore languentis ac tepentis. Nam quis hic amor, promiscuè non tantum offendere amatum, sed prona voluntate ferri in has offensiones? Sanè nemo negare potest, diminutiones hîc esse amorû, tantoque plures, quanto in pluribus transgredimur, & deflectimus ab iis, quæ illi amica & accepta sunt. Quisquis enim amat, si verè amat, minimam amati vitabit offensionem, & sæuiorem morte omnem amati offensam æstimabit: adeoque ferrum antè & secures patietur, ac in medios etiam deuolabit ignes. mites flammæ sunt, dulce ferrum est, si in eum locum deductum se viderit,

vt aut offendendus amatus, aut illa eligenda sint; oculosque suos in amati oculos defert, in illis habitat; illis testibus, iudicibus, premiatoribus res omnes peragit; displicere si quid senserit, mortem antè deliget, omni offensa mitiorem.

Quare quicumque Religiosus vero fertur in Deum amore, eum vocationis suæ auctorem ac ducem, etiam in infimis quæret in quo placeat, fugiet in quo displiceat. ac instituti solius amore, si verè amat, nihil patietur negligentia sua effugere, nihil in te pescere: ac quadam illius quasi zelotypia tactus, minima maxima arbitrabitur, & ab illis deflexisse, à magnis aberrasse putabit.

Nec diabolus Religiosum primo aggressu in magnis petit: scit se repellendum, à minimis paullatim ad ingentia præcipitia ducit, sera in lapsu poenitentia. suadet Eremitæ pascere gallinas, inde gallum, tertio ancillam quæ nutriat, tandem in illa lapsum. Sed neque quisquam à Religione cecidit, è tam nobili celsoque vertice ad profunda vallium, qui non per minima delapsus sit. nec præcipitia timuit qui in minimis stetit. & vt nemo repente fit optimus, ita nec pessimus. gradatim & per minima ad illa exurgitur, ad hæc descenditur.

ditur. ita rapidissimi torrentes, vastaque flumina, à lentis minimisque fontibus, ingentia maria à non magnis fluminibus enascuntur. ut verum sit illud Gregorij: *Hoc agit sentina latenter excreescens, quod patenter procella sauiens. & minuta sunt quæ erumpunt in membris per scabiem vulnera, sed cum multitudo illorum innumerabiliter occupat, sic vitam corporis, sicut unum graue inflatum petitori vulnus necat.*

*In Pass.
par. 3.*

Remedia.

CUM natura sua facillima curatio minorum sit, neglectus tamen difficillimam illam facit. fit enim ut, cum minimis indormiamus, ac extra metum in illis versemur, à neglectu tanta incrementa sumant, ut antè perimant quàm metum incutiant. & licet non rarò à tepore spiritusque quodam languore neglectus hic proficiscatur; à superbia tamen frequenter originem trahit. quasi indignum sit virum doctrina ac prudentia clarum, talibus alligari. quæ res cum ad præsumptionis præcipitia ducat, ingentium causa malorum est. Sanè non sunt parua quæ ad interitum ducunt, quæ diuinum amorem, vocationisque minuunt, quæque à perfe-

ctiōnis studio deducunt, quæ ad ingentia, non longa manu præcipitia ducunt, & ad nullis postea votis lacrymisque emendanda mala præcipitant.

Cogitet neglectum hunc minimorum paullatim ire ad plures, abireque in posteritatem. principiis proinde obsistendum monent prudentes. nec contenti summa cacumina refecasse; ad radices manus securesque admouendæ sunt. nisi enim ad viuum rescindantur, ac in semine suo euellantur; cum fœnore repullulascant mala, & agrum alioqui fœcundum, tanquam iniecta manu occupabunt. Nemo igitur prudens malorum initiis ignoscet, secutura verebitur, & ventura mala in radice conscindet. tutò hoc fit, nec magno molimine, cùm tenero adhuc frutice leui manu spurium germen euellitur. in quo, vbi adoleuerit, expugnando ignibus & securi opus est.

Cogitet deinde de omni verbo otioso reddendam rationem. grauis omnino res cùm minimorū transgressio reuocanda ad iudicium Dei est. iam vt damnatio in violatoribus, ita præmiatio in obseruatoribus consideranda. præmiator enim Deus, non quanta, sed ex quanto res proueniant in-
Mat. 25 tuctur. Hin c illud: *Euge serue bone & fidelis,*
quia

quia super pauca fuisti fidelis, supra multa te constituam. & illud Lucae: Quia in modico fuisti fidelis, eris potestatem habens super decem ciuitates. Magna paruorum merces; vt ingens in transgressore paruorū pœna. cūm qui talentum domini suffoderat pœnarū metu, audit: Inutilem seruum eijcite in tenebras exteriores: illic erit fletus & stridor dentium.

Luc. 19.

Mat. 25

Seria hīc adhibeantur minimorum examina, vt capiamus *vulpes paruulas quæ demoluntur vineas*. in magnis enim vix opus monitore. à subdolis & ex insidiis irruentibus cauendum. & sanè non facilè labetur in magnis, qui parua studiosè vitat. quid? quòd qui parua vitat cauetque ne in his offendat Deum, ne Ordinum statuta transgrediatur, ingentem & Dei vocacionis amorem ostendat. Et sanè nemo filius in oculis piæ matris patrisque, nemo seruus in oculis domini & regis, nemo reus in oculis iudicis, etiam in paruis delinquit: nos in oculis magni Patris, Domini, Regis, Iudicis, Dei, quid facere deceat?

Cant. 2.

Seriæ etiam Superiorum monitiones, & pœnitentiæ; ita tamen vt ne nimium frequententur, ne quasi in consuetudinem vertantur, ac tandem in contemptum: rariora proinde in hoc genere placent magis,

gis,

gis, sed quæ pondere suo premant. secreta
seriaque adhibeatur monitio: periculo-
rum malorumque impendentium metu,
exemplisque aliorum, qui ab his principiis
ad extrema deuenerunt, terreantur: de-
decere etiam proposito, cum indignum
sit illum qui sæculo opibusque contem-
ptis, calcata carne, dignitates spreuit, ab
his minimis vinci, dextramque, ac victo-
riæ signum tam leuibus præbere: quæ cum
in virum, vereque Religiosum inciderint;
non magis illum lædere, quam illis tectis
grando consuevit. & ferè qui in paruis se
viri ostendit, is non tam animum quam
maiorum sibi materiam ostendit defuisse:
maioribus etiam animis ad hæc procur-
surus; vt à quibus scenam mercedemque
sperabit ampliorem.

Vt amur iisdem artibus quibus ad lapsum
diabolus, è minimis ad maxima ducit, ad
immania scelera; è minimis nos etiam ab-
ducamur ab illis, ducamur ad virtutem.
certè minimorum cura & studium ab im-
minenti non rarò nos exitio tueri solet.
ita summa libidinum proritamenta, mini-
marum recularum cogitationibus propel-
luntur. nec alia re certiùs tutiusque; aut ten-
tatio fugatur, aut inflammatio tanquam
infecto flumine extinguitur, aut commo-
tio

tio quantumuis valida sedatur, quàm variarum minimarum rerum ab illis remotarum seria cogitatione; vt obiectorum fortuitò capillorum, asserum, tignorum, fenestrarum, similiumque rerum leui ac transcurforia enumeratione.

CAPVT VIII.

Silentij transgressio.

QUANTA è loquacitate, liberaque quiduis quouis loco effutiendi licentia, mala vereri debeamus, nemo ignorare potest; cùm paulatim ex hac silentij transgressione, à vanis ad nocitura decurramus; minusque iam circumspecti negligentioresque verborum nostrorum obseruatores, facile etiam apud externos in poenitenda labamur. Neque enim modum adhibere currenti, ac per præcipitia prolabenti facile est: nescit enim finem sui, qui labitur, donec per infelices circumuolutiones deponitur potius, quàm conquiescat. Idem in hoc linguarum procursum reperies, faciliùs vniuersim sistitur, quàm vt in medio prolapsu reprimatur. assuesce silentio, etiam cum voluptate taciturnitatem coles: assuesce fabulis, cum mæro-

re linguam continebis. tantum in vtramque partem assuetudo valet.

Ac vbi paulatim inter domesticos creuerit hoc malum, nihil tam sanctum est, quod in sociorum sinum non diffundatur. nascitur quiduis effutiendi libertas, secretum res postulet, an secus; damna ex euulgatione secutura sint, an bona, iuxta habetur: dixisse enim, terminus est, vt quæ voluuntur corporum, iacuisse.

Assuetus deinde animus quiduis profundendi libertate, nihil, nec externis quidem clàm facit; amici illi, an inimici sint, pro eodem habet: neque enim personam intuetur, sed effutiendi quod conceditum illi erat, libidinem. Scitè sapiens:

Proh. 25 Sicut vrbs patens, & absque murorum ambitu, ita vir qui non potest in loquendo cohibere spiritum suum: quia enim murum silentij non habet, patet inimici iaculis ciuitas mentis: & cum se per verba extra semetipsam eijcit, apertam se aduersario ostendit. quam tanto ille sine labore superat, quanto & ipsa quæ vincitur, contra semetipsam per multiloquium pugnat.

*Greg.
Past. p. 3
cap. 15.*

Itur deinde ad mulierculas, & huic tam prodigo omnis secreti sexui domestica committuntur, ac cogitata etiam propè scelera; plusque illis iam creditur quàm Superiori, quàm Parenti: quibus tacuisse, crimen

crimen est; maximè dum inter socias mutuo prouocamento quidquid reconditum erat, produnt in amicitia quoddà pignus, nouique fœderis testationem.

Sequitur deinde ex hac prona locutione noxia in omnium mores vitamque curiositas, cùm mens confabulationibus assueta, destituta propriis, aliena quæ narret quærit. si obuia desint, intima scrutatur, & nunc per ambages, nunc dolis & astu, nunc aperto cælo profunda rimatur: nec quidquam tam abditum, quod horum oculos auresque fugiat: & dum gloriam quandam à nouarum rerum narrationibus venantur, nihil ne in amicissimo quidem intactum relinquunt: & cùm vera desint, ad vanum suspicionum suarum campum decurrunt, & in alieno agro, etiam hyeme media, quod dolosa metant falce reperiunt; mendaciis, cùm veris destituantur, diuites. inde plenis iam plaustris, aliorum fama prostituitur, & ille ingeniosissimus habetur, qui de suo quàm plurima in alieno reperit, & mendacio, tanquā peregrina veste eiusdem contubernij socios induit; fitque dicendi quodam usu ac consuetudine, vt falsa pro veris nabeant; non dicta, non facta vsu pro indubitatis testatisque narrent, nec mendacium sen-

fentiant mendacij auctores. abiit nimirum in naturam, & laudem etiam sperant ab ingeniosa criminatione. ita in aliena fama & sanguine natant hæc linguæ, postquam silentij semel frænis laxatis, vicina proterunt pascua, proculcant nemora; improba linguarum falce, flore sæpè medio, spem annorum multorum demetunt, ter impij, in Deum, in socios, in Religionē, ac in salutem etiam proximorum, quam barbara hac libertate euertunt, dum fidem nomenque eis adimunt, à quorum æstimationis integritate plurimorum salus pendebat.

Variarum etiam in oratione distractionum occasio sequitur; cùm mens tam variis onerata, ægrè se ad orationis quietem componere potest. occurrunt audita, narrataque; & quidquid imbibit curiosa in alienos mores inuestigatione, non supremis tantùm natat labris, sed suprema cordis occupauit: vt dum mens orationem meditatur, importuna hæc suggestionem aliò eam vocent, & ad se trahant. nec potest facilè animus tot dictorum auditorumque; lusus speciebus, ad meliora se conuertere, aut supra hæc sese erigere, tanta illorum mole oppressus. Contingitque non rarò, vt nullo sæcundiùs tempore narranda

da nascantur. fertilis nimirum in talibus area est orationum tempus: hinc suggeruntur, quæ alibi ignorantur: hinc inveniuntur abdita, & sociorum effodiuntur thesauri, imis sæpe defossi pectoribus, densissimisque; te & i ac damnati tenebris. tantum potest inimicus homo, & consuetudine improbitas firmata.

Denique Religiosus, à quo meritò perpetuam cum Deo coniunctionem exigas, totus ab illa auertitur, & in vana, ac non profutura, noxiaque etiam profunditur. Nescit mens inhaerere Deo, sui Deique per fabulas prodiga. ignorat cum Deo coniunctionē, quæ solitudinis amica non est, cum illa in omnia se profundat temerario ausu: neque potest coniungi Deo, quæ tanta vanarum narrationum congerie disiungitur, neque tanta vanarum rerum varietate cincta, erigere caput potest; aut caelestibus inhaerere, quam narratarum auditarumque rerum maria oppreserunt, absorbuerunt fluctus. Non fert æmulum Deus; aut amari solus vult, aut amari non vult. quantumque coniungeris aliis, tantum ab illo disiungeris. vis illi coniungi, pelle quidquid te disiungit, quidquid alteri iungit. Inter potentissima, quæ te coniungunt alteri, loquendi quædam

prodigalitas est; & narrandarum rerum curiosa inuestigatio: amat enim hæc, quicumque studiosius his incumbit; quantumque hæc amat, tantum ab amore illius decedit; quantum accedit Deo, tantum ab illis recedit: nec alias, quàm diuinas narrationes nouit, quisque Deum amat.

Quemcunque ergo videris propensum in aliarum rerum narrationes, cogita res illas amare, Deum non amare: nam si amaret, plenus diuinis esset narrationibus. profunditur enim quisque in ea quæ amat, vt animo, sic ore: non profundi, non amare est. & ea amantur, in quæ quis profunditur. Nescit amor mentiri, vt nec tegi. prodit se ignis, & amorẽ suum loquitur.

Sed neque magni quidquam sperari ab eo potest qui pronus in hoc vitium est, nec quidquam Religioso dignum. vt meritò dicat Apostolus: *Si quis autem putat se religiosum esse, non refrenans linguam suam, sed seducens cor suum, huius vana est religio.* Comitatur enim hoc vitium detractio, secretorum violatio, muliebris inconstantia, sæculi mores, imprudentia magna. vt meritò Sapiens: *In multis sermonibus inuenietur stultitia.* & alibi: *Vidisti hominem velocem ad loquendum; stultitia magis speranda est, quàm illius correptio.* sed neq; diu immunis à peccato

Iac. i.

Ecclesi. 5.

Prou.

29.

cato talis esse potest: *In multiloquio enim* Prou. 13
non deest peccatum, qui autem moderabitur la-
bra, prudentissimus est. argentum electum lin-
gua iusti, cor autem impiorum pro nihilo. Et, Qui Eccli. 20.
multis utitur verbis, ledet animam suam. hinc
illa monita: Indisciplinata loquela non assue- Eccli. 3.
scat os tuum, est enim in illa verbum peccati. &
alibi: Omni custodia serua cor tuum, quia ex Prou. 4.
ipso vita procedit: remoue à te os prauum, & de-
trahentia labia sint procul à te. atque hinc il-
læ etiam preces: Pone Domine custodiam ori Psal. 140.
meo, & ostium circumstantia labiis meis. & al-
terius: Quis dabit ori meo custodiam, & super Eccli. 22.
labia mea signaculum certum, ut non cadam ab
ipsis, & lingua mea perdat me? magni Regis
magnum votum, ut merito inelamet: Bea- Eccli. 14.
tus vir qui non est lapsus verbo ex ore suo, &
non est stimulatus in tristitia delicti. qui enim
custodit os suum, & linguam suam, custodit ab Prou. 21
angustiis animam suam. neque hoc mirum
videri debet, cum mors & vita in manu lin- Prou. 18
guæ sint; inquietum omnino malum, plena ve- Iac. 3.
neno mortifero. & verbis paucissimis omnia
complexus mala est: Lingua ignis est, uni-
uersitas iniquitatis.

Remedia.

POenitentia transgressoribus imponatur. In inueterata verò libertate loquendi qui longiùs progressi sunt, remoueantur, etiam à communi recreatione; vt vel hac pœna discant moderari linguam.

Cura in Superioribus, vt recreationes religiosè transigantur.

Aliquorum, etiam primorum, maximeque spiritualium excitatio, qui reliquos in religiosa recreatione præeant, ducesque sint ad linguarum moderationem, moneantque etiam, maxime exemplo, si quis ad alia deflexerit, minusque religiosa miscuerit, præscindendo omnem eiusmodi narrationem, aliamque magis instituto consentaneam substituendo.

Seria in conscientiaë examinibus inuestigatio causæ erroris huius, periculaque ac incommoda recensendo, præcauendo, cum firmo seriæ emendationis proposito, cum profunda, & non perfunctoria diuinorum verborum discussione: *Omne verbum otiosum quod locuti fuerint homines, reddent rationem de eo in die iudicij.* Addantur in omni hominum genere, damna ex hoc vi-

tio nata: quorum frequenti commemoratione reprimat effusam hanc libertatem, quam sola sæpe pœnitentia sequitur; cùm emendari tam calidè effusa, ac in extremis labris, non in corde fabricata, non possint. neque enim retrahi dicta possunt, aut indicta dicta semel haberi. & manet non raro offensio æterna, ex improvida paucorum verborum effusione nata. Accedit ferè in hac quiduis effutiendi libertate, quidquid in meditationibus orationibusque magno studio collectum erat spiritus boni, effundi ac euanescere. vt meritò vir Religiosus omnem expellendo hoc vitio conatū adhibere debeat, certus magnam silentio prudentiæ opinionem colligi, magnam in humanisq; diuinisq; providentiam, raros in pœnitenda lapsus, rarissimas aliorum offensiones, magnam modestiæ famam, magnam cum Deo coniunctionem, altam internam pacem, omniumque virtutum vberem fecundamque per omnia mensem.

CAPVT IX.

Aberratio ab instituto in rebus pijs.

GRAVIS error, eoque maior, quo sub pietatis prætextu fallit insequentem; ducitque Religiosum sub boni specie ad instituti sui alienissima: neque enim quia in se bona, ideo omnibus amplectenda sunt. quanta medicamenta multis fuerunt noxia? Et quis potest grauior error in humanis esse, quam omnes ad eadem cogere, iisdem fouere & pascere, iisdem mederi velle, eadem munia & onera, remedia eadem præscribere? Nullum propè vitæ genus est, in quo non reperiesset aliqua laudanda; non tamen ideo imitanda omnibus. Nullum Religiosum institutum, in quo non plurima videas admirationē decusque merentia: non tamen omnia ad omne institutum traducenda. Nam cum discrimina necesse sit esse Religionum variarum; confundit ille decorem, quem in hac varietate grata memoria decurrimus, quicumque omnia ad omnes transferre conatur. Suos cuique limites præscripsit dictauitque Spiritus sanctus, suis iussit moribus contineri. non transgrediamur hæc
cælo

cælo data in primis Religionis parentibus monita, ne plus aliquid, & supra cæli prudentiam sapere videamur. Hinc illa Sapientis monita: *Ne transgrediaris terminos antiquos, quos posuerunt patres tui.* Pron. 22.

Nobile institutum est SS. Augustini, Benedicti, Bernardi, Norberti, Domini- ci, Francisci; sed sua cuique stat gloria, or- namenta sua: quæ si quis in agrum suum transferat, erret. neque enim eadem fert omnia tellus. alia atque alia pro regionum terrarumque conditione, spera. omnia si omni loco cogites, falleris: vt iam è loco- rum varietate rerum discrimina enascan- tur; illa calido, illa tepenti, frigido etiam non pauca, humido plurima; sunt quæ sic- co gaudent solo. Eadem propè reperies in variorum Ordinum situ vario, Spiritu san- cto seminatore, rigatore, fotore & altore.

Quare vt grauissimus sæpè error esset, ex aliena republica in suam leges velle transferre, cùm alias atque alias diuersi hominum mores, ingenia, loci conditio, aliaque id genus postulent; ita grauior et- iam error foret, ex aliena Religiosa familia decerpere ea velle, quæ in tuam transfe- ras: cùm ferè ita inter se connexa sint o- mnia, vt qui vnum loco mouerit, plurima mouere cogatur, magnamque illius par- tem

tem veteri decore suo spoliare. Quòd si noua aliunde euocata ac mutuata inferuerit, in vno cōsistere non poterit; sed ad magnam receptarum antè, longaque annorum experientia probatarum rerum mutationem compelletur. quo fit, vt alia iam respublica videri meritò possit, priore forma mutuatitio hoc colore deuenustata: imò monstrum è differentibus coagmentatum; vt si quis è variarum gentium vestibus moribusque vestem vnā, rempublicam vnā statuatur; si quis è variis animalibus animal vnum, equino capite, bubulo pectore, ceruinis pedibus, elephātis proboscide.

Et persuaderè sibi quisque debet, quidquid à primigenio spiritu degenerat, ruinæ proximum esse. transit enim quasi in aliam familiam, ad aliena castra, ad alienas aquilas, alteriusque ducis imperia, quisquis moribus alios profitetur, alienisque induitur armis; vt non immeritò militem credas, alieno sacramento obstrictum. Sanè aurigæ fortiter orbitæ insistent. nam vt vicinior planicies sit ac planior, fors tamen ea ducet ad saxa, ad dubios exitus, ad inuia. prudentissimus tutissimis notisque inhæret; temerarius incerta amplectitur, & perignota decurrit. sapiens trita incedit
semi-

semita; per inuia viam sibi sternit imprudens.

Nec minor illorum error est, qui non ex alieno agro, sed è cerebro suo nouè inuenta, quia pia, quia ad salutem aliorum, traducunt ad vitæ genus suum, degenerantes à maiorum placitis, & non pauca attexentes nobili Religionis suæ vertici, quæ nulla retro nouit ætas. Non sunt hæc viri prudentis, & instituti sui amantis: sunt proprio iudicio fidentis, & de suo cerebro nouum institutum fabricantis. tales enim cùm paulatim suos à maiorum moribus abducant, adducantque ad suos, ad aliud vitæ genus suum, non maiorum transferunt; vt ignari propè rerum, aliam omnino à maioribus faciem paulatim introductam ingemiscamus: quam eò difficilius eluimus, quò quæ sub pietatis prætextu immixta sunt, altiùs resederunt.

Et sanè tales aut ignorantia rerum suarum labi necesse est, aut ambizioso nominis sui fastigio, aut quadam proprii iudicii pertinacia, aut denique imprudenti spiritualis profectus zelo. quidquid dixerimus, non leuis culpa est. Nam siue tam ignarus rerum sit, vt quæ stabiliendæ Religioni necessaria sunt, ignoret; siue veteris peritæsus nominis, ad nouum nouo fastu co-

gitationes flectat; siue nimia sui fiducia, longius quàm par est in nouarum rerum delectu prouehatur; siue fatuo denique zelo feratur in aliena, domestica fastidiēs, lata vbique culpa est, nec excusationi locus.

Dæmonū ferè fraudibus obnoxij sunt, qui suo fidentes iudicio, noua sibi placita commentantur, facti sibi ipsis legislatores ac magistri. quibus ferè contingit quod ægroto, peritissimorū medicorum manum negligenti, de quæ suo cerebro medicamenta sibi in interitum commentanti: quod quæ secundo prospero quæ vento nauiganti, sed aliò vela vertenti, factus sibi ventus & infelix exitus. Et sanè periculi plenissima res, à maiorū placitis tot lacrymis rigatis, tot sanctissimorum virorum moribus comprobatis, recedere; aut de suo illis post tot magnorum testata exempla, addere aliquid aut demere. magna sanè in hac re circumspèctione opus est. Solet enim diabolus illos imitari qui sapidissimis quibus quæ rebus venena miscent, quo facilius incautos in errorem & interitum trahant: vt sub bonarum rerum prætextu, ac perfectionis studio, in immania præcipitia trahat. neque enim quæ apertam malignitatē improbitatem quæ continent

tiuentimentibus Dominum propinabit; scit enim se repellendum. nec quisquam palàm porrecta venenaprudens haurit. sed electissimis intersparsa inscius transmittit: vt dum auidus in cibum fertur, mortem celerius accersat.

Remedia.

Occurrendum proinde est huic malo ingenti conatu, & ad viuum rescandæ malorum radices, ne pullulent in interitum sementis bonæ. Cautè etiam prudenterque inuigilandum huic malo, ne grandi paulatim auctu occupet & depasciat intima; eoque maiori prouidentia opus est, quo sub prætextu ac specie boni trahimur in nocitura, & interitum de propinquo sub amica specie iaculantia.

Accedat frequens lectio eorum quæ instituti propria sunt. plurima enim ab instituti ignoratione nascuntur ab eo aliena.

Amoris instituti sui prouocatio. neque facilè ab eo aberrabit, qui illius affectum altè in animum immisit: hîc ille, antè propositis ignibus, in illos insiliet, quàm ab instituto deflectat.

Nihil nouè instituere, sine seria & repetita in arduis deliberatione, ac ne in tenuiori-

oribus quidem, quidquam è voluntate sua aliis inconsultis statuere: nec minùs suspecta habere diuersa à maiorum & instituti moribus, quàm vestem Ordinis & instituti alieni.

Suspectissima omnia habere, quæ aliorum ab instituto deflectunt, aut à maiorū semita recedunt: etiam in optimis, quæque magni speciem præ se boni ferunt, si peregrina sunt, neque domi nostræ nata, nec Religioni consueta, timidè ac lentè procedere, ac non nisi matura grati que non vna præuia deliberatione, idque cum iis qui & intelligentes, & instituti amantes sunt: sæpe apud animum suum voluendo, quò hæc tendant, quò ducant euntem; quid sperari ex his, quid timeri possit; à quo spiritu nata: subita, & tanquam à musto è torculari adhuc spumantia, aut ab igne calentia sint; an verò à matura seriaque meditatione; maiorumque placitis promanantia.

Iuuabit in primis nihil, quod nouitatem quoquomodo redolet, aggredi inconsulto Præfecto spiritus, multa que ad Deum prece, & sacrificiis præmissis.

Frequens etiam consideratio finis ad quem vocati sumus: à quo aberrasse, ab omnibus aberrasse est. qui verò à mediis ad illum

illum ducentibus aberrant, à fine decessisse arbitrandus est. facit hoc quisquis à præscriptis in Religione medijs recedit.

CAPVT X.

Auersio aut vniuersim ab instituto, aut aliquibus instituti propriis.

QUÆ res extremæ ruihæ proxima, & periculi plenissima est, & ferè à superbia nata; cùm quis iudicium suum auctoris instituti, totque magnorum in Religione virorum, decretisq; Pontificiis præferat: aut certè à desideriis commodorum corporis proficiscitur.

Hinc videmus eos qui aut carne, aut nominis sui gloria pulsanter, cùm desperauerint ea in Religione consequi, paulatim ad instituti derogationem descendere; vt hoc quasi pallio vitia sua tegant. Sane vbi inceperit animus se his irretire, singulaque institutionis suæ, humano sensu suo, non maiorum placitis, non tantorum annorum confirmationibus, non maximorum Deoque gratissimorum virorum comprobationibus discutere; non multum ab extremo periculo abesse potest.

Desi-

Desipit deinde huic, non prima fronte tota vniuersim instituti ratio, sed vna alteraque constitutio, regula, Superioris ordinatio; inde serpit hoc malum ad plura, ac deinde corporis totius iugulum petit.

Nascitur deinde in hoc ab omnibus imperatis animi quædam alienatio, & tanquam febridetentis, occupato semel palato ab humore febrili acido, dulcissima amarissima videntur: ita hominis illius obsessa semel mente ab instituti auersione, acescunt omnia. & quæ antè mollia & suauius, rationique ac diuinis consiliis ac placitis consona videbantur; ea nunc dura & aspera, & à diuinæ voluntatis decretis remotissima censentur.

Plena deinde hæc res periculi est, cum ferè eiusmodi quærant aliquem ingenij sui, cui paulatim instillent hæc venena; serpitque hæc res non magno negotio per plures, viresque acquirit vniuersæ Religioni noxiæ. & ferè magis coalescunt ingenia hac similitudine tacta, mutuoque se firmant & exacuunt, quàm probatissimorum quorumcumque mentes. ita ad oppugnationem, quàm ad tuitionem natura prouiores sumus, & pessima quæque, maximeque noxia impetu feruntur maiore, miscenturque; tanquam fatua quadam circum-

cum uolutione, secumque trahunt, quid-
quid solidiore fundamento caret. si quid
radice tenuiore fecundo Religionis solo
insertum, si quid optimæ illius arbori leuius
inculcatum, si quid trunco superficiem
tantum radat, id omne non magno impul-
su corruere necessum est. Quare si quem
hi deprehenderint aut commodis suis stu-
dentem, aut obedientiæ iugum reiectan-
tem, aut potui ciboque potentiùs addi-
ctum, aut carnis illecebris proritatum, aut
in mulierum familiaritatem propensiorē,
aut laudis gloriæque suæ sectatorem, aut
magnorum familiaritatibus inhiantem,
aut orationis studium fastidientem; perfa-
cile in sententiam suam pelliciunt, & ab
his initiis ad vniuersum institutum con-
uellendum pertrahunt. Nec difficile est
tales inuenire, qui in aliquod vitiorum
horum proniores sint, repertosque in om-
nem partem flectere, maximè si acce-
dat accuratior regularumque obseruan-
tior Superior, qui non parcat, nec impu-
nita in illis delicta transeat. hinc enim ani-
morum commotiones, exacerbationes,
querimoniæ, oblocutiones nascuntur. Cō-
modum proinde turbandæ rei tempus na-
cti priores illi in sæuas propellunt tempe-
states hæc maria, arentibusque his lignis
flam-

flammas ignesque subiiciunt. & à minimis sæpe scintillis ardet domus tota: à non potenti flatu, non in iras tantum minasque, sed in furores insurgunt hi fluctus, secumque non raro in interitum trahunt domum totam.

Euitabit has flammas, venena, pestes, quisquis Deum, quisquis Religionem amat: fugietque tanquam insanos scopulos multorum in Religione mortibus nobilitatos.

Remedia.

CAusæ inuestigandæ, è qua nimirum radice germina hæc pullulent: illa enim semel resecta & euulsa, reliqua nullo impellente corruent.

Fiducia etiam in illis excitanda, ut fidenter se Superiori aperiant. Beneuolentiis etiam, ac quibusdam confidentiæ demonstrationibus in fiduciam excitandi. ubi se aperuerint, paternè iuuandi.

Veterum etiam, aliarumque Religionum exemplis, rationeque singula confirmanda, dubia excutienda & dissoluenda: in quibus omnibus magna necessum est Superiorem uti patientia; audire libenter, operam suam ultro spondere, nullum illis aditum ad se negare; rem modò leua-

re, modò periculorum votorumque quibus se obstrinxit, magnitudinem ostendere, prout prudens charitas, & patientis constitutio suaserit.

Spiritualibus deinde exercitiis, piorumque librorum lectionibus talis iuandus.

Proderit etiam per spiritus Præfectum, aut per alium virum cordatum, cui æger plus fidat, medicamenta malo huic propinare, maximè si quando aliquid alienationis ab ipso Superiore intercurrat, quod ferè talibus euenire solet.

Dispiciendum deinde, an per alium Superiorem æger noster, aut loci mutatione iuari leuarique possit: nec quidquam omitterendum quod ad latentis huius mali venenum utile futurum sit. Neque enim malo huic indormiendum, cum ferè magno impetu incrementa sumat, ubi primùm hominem occupauerit. Quare nullis hîc laboribus parcendum, frequenter, & in omnem partem versandus æger, nullaque non medicamenta tentanda sunt.

Iuuerit etiam piarum occupationũ varietas, à quibus minùs abhorret. Familiaritas etiam illorum, qui in virtutibus magna incrementa fecerunt, & à quibus nullum in hoc hominum genere periculum.

Auocatio etiam conuersationis illorum, qui faciles ad hæc mala sunt, minoresque in instituti amore progressus fecerunt. Communes denique preces, ipsiusque in primis Superioris, cui ut pastori, hæc cura magis incumbit.

CAPVT XI.

*Æmulationes, etiam in rebus piis,
& instituti propriis.*

VT euenire frequenter solet in lectionibus, concionibus, confessionibus, catechizationibus, externorum familiaritatibus, aliisque generis eiusdem; cum paria, aut plerumque superiora etiam cogitemus, quæ cum ingenio, naturæque dotibus assequi non possimus, decurrimus ferè ad alienorum dictorum factorumque improbationes, depressiones, criminationes, tanquam si his alienæ famæ derogationibus, viam ad gloriam nobis sternamus.

Neque res alia Religiosum ad alienarum virtutum, nominisque boni detractionem faciliùs deducit. ut non errauerit, qui exitialem hanc Religionum pestem dixerit: nam & virtutibus derogat
alio-

aliorum, & propria deuenustat ac enervat: nec quicquam iam illi placet, semperque reperit aliquid quod reprehendat, ac in omni re magna tantum miscet acoris ac toxici, ut vniuersam massam venenet, laudeque sua, meritoque decore defraudet. Ingeniosa nimirum omnis æmulatio est, nec vnquam ei, quod reprehendat, deest: fecunda damnationis mater, ut si rem non possit eleuare vniuersam, maximam tamen laudum partem detrahat, & ad apertè decurrat falsa, ad manifestas criminationes: & cum vbique talis dictorum factorumque alienorum vituperator ac damnator sit, tum suorum ingens laudator est. Quæ res etiam in rebus magnis fidem ei detrahit. assueti namque auditores narrationum excessibus. nec cum vera quidem narrat, fidem inuenit. Habet hoc nimis laudator sui, ut fide etiam in verissimis careat.

Sed neque diu latere hæc studia possunt, produnt se & vulgatione sui, animorum primùm alienationes, inde etiam odia concitant, contrariaque studia, quacunque via, proba an improba adiuuanda. Ita æmulatio omnis, quæ superbix innititur, cum virtutum media & adiuumenta desint, à vitiis auxilia mutuatur, im-

Tract.
32. in
Ioan.

mormutux caritatis, instituti, & Dei. Acute & verè in hac materia D. Augustinus: *Tolle inuidiam, & tuum est quod habeo: tolle inuidiam, & meum est quod habes. liuor separat, caritas iungit.*

Nec inter domesticos parietes se malum hoc continet, decurrit ad externos; ita proditor affectus sui, fit æmulator omnis; causamque præbet cur & externi descendant in partes ac factiones denique: ingentesque aliorum animis dissensionum suspiciones ingenerat, quæ ad vniuersi corporis subuersiones tendunt. Neque Deo, aut gloriæ illius, sed sibi nominiq; suo æmulus omnis studet; paulatimque ab instituti & animarum zelo degenerans, ad laudes suas commodaque labitur, vt laborum sudorumque suorum finem seipsum sibi statuatur.

Videt in alio, auditque laudanda? indignatur ringiturque, & aut improbat, aut minuit laudem, semperque aliquid solers inuidia, etiam in laudatissima re quod vituperet inuenit: sapiusque lubentiusque in externorum, quam domesticorum procurrat laudes. etiam in hostium religionis ac hæreticorum scriptis, quod obseruatum non semel, inueniet quod probet; in domesticorum verò quod vituperet; qua-
fi

si domesticis laudibus aliquid detractum
 eat suis. contingitque non rarò, ut quæ
 externi summa in aliquo & admirantur
 & prædicant, ea nos ingenti conatu depri-
 mamus, stupentibus illis, & admiratione
 quadam attonitis, cum in suos exurgere
 vident viros religiosos, invidiaque odio-
 que grauidum pectus æmula prodant ver-
 ba: indeque iam profiliunt famæ nomi-
 nisque dedecorationes; fitque ut quos Re-
 ligio laudatores sperabat, vituperatores
 inueniat. Insurgunt nimirum in matrem
 filij, cum filiorum vituperationes eant in
 matrem, magno non infrequenter totius
 Religionis damno; cum iudicia hæc pluri-
 mum integra regna peruadant, arbitren-
 turque quorundam hanc sententiam, vni-
 uersæ Religionis sensum esse.

Bene in re nostra Gregorius Magnus: *Past p. 3.*

*Quid istis infelicius, quos dum conspecta felici-
 tas afficit, pœna nequiores reddit? aliorum verò
 bona quæ habere non possunt, si diligerent, sua
 facerent. sic quippe sunt vniuersi consistentes in
 fide, sicut multa membra vno continentur in
 corpore; quæ per officium quidem diuersa sunt,
 sed eo quo sibi vicissim congruunt, vnum fiunt.
 unde fit ut pes per oculum videat, & per pedes
 oculi gradientur, ori auditus aurium seruiat, &
 ad. usum suum auribus oris lingua concurrat,*

suffragetur venter manibus, ventri operentur manus. In ipsa igitur corporis positione accipimus, quod in actione seruemus. nimis igitur turpe est non imitari quod sumus. nostra sunt nimis mirum, quæ etsi imitari non possumus, amamus in aliis, & amantium fiunt quæ amantur in nobis. Hinc ergo pensent invidi, caritas quanta virtutis est, quæ alieni quoque laboris opera nostra facit sine labore. Dicendum itaque est invidis, quia dum se à liuore minimè custodiunt, in antiquam versuti hostis nequitiam demergantur. Admonēdi sunt invidi, ut cognoscant quantis lapsibus succrescentis ruina subiaceant, quia dum liuorem à corde non proiciunt, ad apertas operum nequitias deuoluuntur. nisi enim Cain inuidisset fratris acceptam hostiam, minimè peruenisset ad extinguendam vitam. lior itaque sacrificij fratricidij seminarium fuit. Dicendum invidis, quia dum se ista intrinsecus peste consumunt, etiam quidquid in se aliud boni habere videntur, interimunt. unde scriptum est, Vita carniū sanitas cordis, putredo ossium inuidia. quia per liuoris vitium ante Dei oculos pereunt etiam quæ humanis oculis fortia videntur. ossa quippe per inuidiam putrescere, est quadam etiam robusta deperire.

Proin.

14.

Reme-

Remedia.

DEVm in omnibus quærere, illumque vnum sibi laboribusque suis proponere: nec aliud in his, quàm & illius gloriam, & animarum salutem intueri. quod qui consecutus fuerit, non facillè per æmulationum præcipitia labetur, prudens in solido pedem figere, in solius nimirum diuini nominis propagatione.

Proderit etiam meminisse damnorū ex æmulationibus nascētium, cū ferè nunquam illæ sine alterius, aut vtriusque etiam partis interitu, aut sine graui damno finiantur, maximè vbi se illæ prodiderint: tunc enim in apertam itur dissensionem. non desunt auctores alendis his ignibus idonei, donec erumpant in apertas flammæ, in incendia & cineres: nec antè ferè finem faciunt, quàm lata partium tegantur ruina, quæ corpus simul vniuersum in periculorū & damnorum partem trahit.

Iuuabit etiam frequens cogitatio præmiorum à Deo repositorum iis omnibus, qui totis animis illi, cui omnia debemus, non sibi nominiq̃ suo laborant.

Et sanè miserum est à sola populari laude præmia sperare, quæ aut cum vita, & plerumque ante illam, finiantur; qualia

~~ab~~ ab amulo hoc luore consueue.
 Prudens ille est, qui pullo hoc mon.
 si vni iudat, a quo aterna sperat, o-
 mnemque aliam cogitationem aliorum
 ducentem contemnit & calcat, tanquam
 calo speratorum præmiorum blattam ac
 tincam.

CAPVT XII.

Amor sui.

HINc nasci videmus non leuia mala,
 murmuraciones, impatientiam; pa-
 rendi difficultatem, cum imperantur quæ
 minùs placent, minusque ex honore suo
 esse iudicauerit qui hoc malo tenetur; in-
 dignationes etiam & alienationes, graues-
 que animorum mœrores consequi solent:
 contemptus deinde aliorum, censurae
 graues, detractionis studium, cum
 quid in aliis magnum
 extollant; delectationes
 que ad honorem
 cum viris
 ta; con-
 ili

prærogatiuæ in rebus honoratioribus concessiones. Sequitur pœnitentiæ & asperitatum, omnisque mortificationis fuga, iudicii que sui tenax in omnibus sequela, primarum que ubique partium postulatio: ingens denique inquietudo mentis, si quid sentiant detractum gloriæ, si quid non concessum, si frustrata vota, nec expleta in omnibus desideria, quæcunque ea demum fuerint.

Concedit Superior quæ aut honori tales suo, aut commodis idonea arbitrantur? nullus rogandi finis: neque enim modum sibi amor sui statuit, delabitur que in dies ad noua; ut vnius rei concessio gradus sit ad aliam. accenditur que hoc exemplo reliquis animus ad paria audenda & petenda; ut qui antè nec cogitationes quidem harum rerum admittebant, nunc exemplo moti, tanquam valido vento plenis velis ad similia & in ceteri nunc palam delectet. Cogitationem taciti auer-

g, & abnuat ro-
gationes, decur-
olas machinatio-
am externos: &
s, quæ nostris im-
non illubentiùs
X 5 quàm

quàm audacius accipimus. Ita paulatim & paupertatis, & obedientię ornamenta detrahuntur; & parte maxima pristini roboris spoliantur ac nudantur.

Est & illud in hac re in primis perniciosum, quòd ferè huius generis homines laborem omnem fugiant, sectentur otia: ardua ne attingunt quidem, aut si tangunt, levi decurrunt manu, & superficiem potiùs radunt, quàm in latentia petant. Nihil proinde magni ab his sperari potest, quæ ferè innumeris difficultatibus, tanquam vepribus, ac densis vndique spinis obsessa sunt. nam vt primùm asperiora senserint, manum retrahunt, & ad mollia flectunt, deliguntque in ignava potiùs commoditate sordescere, quàm per ardua viam ad magna sternere: aut si quando ad difficilia dexteram porrigant, non extendunt conatum ad maiora, quàm quòd eos honoris ac dignationis propriæ libido impellit: vt nunquam, aut nusquam eos Dei solius, aut Religionis gloria, aut animarum salus, sed proprium decus ad angusta protrudat.

Quæ res cum veræ Religionis affectu diu stare non potest, atque ita præterquam quòd meritum omne corruat, domesticæ mutueque Religionis amor diu consistere non potest, aut locum, quem debebat, tenere.

nere. Vnde minor iam vocationis amor auersio etiam, & vniuersim ab illa subdu-ctio & fuga, ac tandem odia nascuntur, & alterius vitæ cogitationes, nausea præsen-tis, & ingens fastidium.

Atque hinc gratiam venantur externo-rum, amicos sibi parantes in extremam hanc fortunam, & plurimùm detèriorem sexum sibi conciliant, apud quem dome-sticas etiam querimonias deponunt: quòd sexus ille facilior in commiserationem sit, & laxiores affectui habenas concedat, ma-ximè si paribus excitetur. quæ res à pericu-lo longiùs abesse non potest; accenditur enim vtrimque animus, ac tanquam ignes duo, mutuis se exacuunt flammis, celerius perituri, & in cineres dilabendi.

Et nihil in his dein sanctum aut sacrum est, quod non faciles lubentesq; prodant, nihilque adeò reconditum, etiam cum al-terius, ac non rarò cum Superioris ipsius dedecore coniunctum, quod non vltro profundant, & denuntient illis, quæ nihil arcanum norunt, nisi quod ignorant; qui-busque adeò etiam ignorata pro certis vulgantur; neque diutiùs silent, quàm so-cia aut auditrice destituuntur.

Nec quisquam Superior voluntati ta-lium faciet satis, aut explebit cupidita-tem;

tem: semper enim in quocunque Superiore quod desiderent aut damnent, reperiunt, etiam in beneuolentissimo viro. omnia enim concedere, impossibile est; pauca verò, imò vnum illis negasse, omnia negasse est: immemoresque beneficiorum præteritorum, ad sola præsentia mentem conuertunt, reliquorum obliti. adeò eos commodorum suorum vota cæcarunt, vt nisi omnia concesseris, omnia negasse videaris: ferunturque in hunc, tanquam in iuratum commodorum suorum hostem.

Sed neque serias vllas monitiones admittunt, non molles ac lenes: ita dum peccare impunè volunt, puniri nolunt: vt nihil reliqui amor sui fecerit, spe propè omni emendationis adempta, quàm extrema quædam salutis ac vocationis præcipitia.

Sequitur indiuiduo quodam nexu amorem sui, ingens ignoratio sui; vt in rebus suis in perpetuis tenebris ac densa vbique nocte ambulent. acciditque his qui hoc vitio tenentur quod phrenesi laborantibus, qui quo propinquiore morti sunt, eo se valentiores arbitrantur, pereuntque dum in summa valetudinis bonæ opinione sunt. E quo deinde errore stolidissima sequuntur consilia, audent viribus non imparia.

tan-

tantum, sed & sibi & Religioni noxia. nec remedia sperari possunt, cum & graui teneantur ignoratione morborum suorum, nec monentes admittant. sibi nimirum illi sapiunt, reliquis fidem abrogant: ut omni planè spe careant valetudinis bonæ.

Cumque cæci in suis sint, oculatissimi in alienis sunt. monstro similes. domestica & è propinquo sua non vident, remotissima alièa usque ad ossium medullas, scrutantur. quin etiam vident in alio quæ nusquàm sunt: cum solis suspicionibus in aliorum vitiis oculos habeant, in quorum tamen laudibus oculis carent. si quid lucis in aliis, nihil vident; si quid tenebrarum, vident. noctemque non rarò in alieno cælo reperiunt in quo plenissima lux est, diemque in densissima nocte sua vident. ita in nocte diem, noctem in die reperiunt; prodigioso ubique errore. tantum cæcus potest amor sui. minima illi in alio vitia maxima sunt, verruca mons est, pilæ surgentes cælo rupes, festuca trabes, risus fulmina cælo iaculata: in se ingentia criminum saxa nulla sunt, montesque & superstantes nubibus rupes, nullæ sunt. quid? quòd vitia etiam sua virtutes arbitrentur, infantiam eloquentiam, imperitiam scientiam, fatuitatem prudentiam, morositatem lenitatem, aspe-

asperitatem suauitatem. quo fit vt in grauissimos errores labantur. nemo mirabitur qui cogitauerit oculos illos habere toxico saginatos, ac in alienis inuidia ac odio, in suis amore sui grauidos: feбри deinde illos maligna teneri. quo fit vt suauia illis amara, mella fella videantur: amorisq̃ sui veneno farti ac saginati, nil prater venena in aliis vident, & vt cum improbitate ingeniosus hic amor est, siquid inter ingentes aliorum virtutes non laudandum latet, aranearum more exugit, optima intacta relinquit.

Succrescit deinde ex hac improba radice amoris sui, Dei diuinarumq̃ rerum densissima ignoratio. cū enim in omnibus se solum, comoda, honoremq̃ suum intueatur qui hoc malo tenetur, fit vt longissimè absit à diuinorum consideratione cognitioneq̃ue. quòd si quæ cælestia intueatur, non videt ea nisi qua parte commodis illa suis subseruire posse arbitratur. & sanè tegitur spissa quadam nebula quicunque hoc vitio laborat, vt cælestis solis radios intueri non possit: aut si quos intueatur, facite eorum more qui per obscuram nebulam, vestigia quædam cælestis luminis intuentur.

Cū verò fiducia sui ab amore sui nata
casti-

castimoniam sit hostis, sit ut mille se pudicitiam periculis induat, quicumque plus æquo prudentiam suam innititur : & antè labatur infelix quàm damna senserit. cumq; commodis suis impensè studeat, delectatur mollibus, & corpori amica avidus amplectitur: effundit se proinde facilè in cibum & potum, castitati inimica. accedunt excusationes in omnibus suis, spretaque prudentium monita. quo fit ut cum in præcipitio steterit, præcipitia ignoret, & antè per inuia infortunatissimo lapsu devaluatur quàm periculum adire se sciret.

Scinditur exinde vniuersæ familiæ caritas mutuaque animorum coniunctio, quæ una Religiones firmantur, ac tanquam inenodabili vinculo connectuntur. cum enim singuli paullatim horum exemplo rebus suis studeant, fieri non potest ut coalescant animi, dum singuli se suamque, comoda, honores, reliquaque præferri volunt aliis: quæ cum mutuò se iugulent perimantque, necessum amorem interire, amicitiamque penitus omnem ab illa domo exulare. nam nisi omnia probes quæ cæcus amor sui ambit, amicitia collabescit. omnia probare in tanta iudiciorum diuersitate impossibile est, nisi adulatio rebus misceatur, quæ cum germano amore stare

stare non potest. accedit, eos qui hoc malo tenentur, sibi amicos esse, aliis esse non posse, cum solis rebus suis studeant, aliorum commoda laudesque ignorent.

Ingrediuntur verò huius loco doli & fraudes, omni candore ac sinceritate pulsa: nam cum regia via ad optata peruenire non liceat, quæruntur anfractus, subdolæque semitæ, & per obscura viarum ad præfinitum animo tendimus. quod si minùs è voto successerit, nec cogitationibus res responderint; suboriuntur mœrores, grauesque insurgunt melancholiæ, ac non vltima pusillanimitas, timoresque, ac ingentes vndique curæ: indeque extremus quidam languor, orationum salutisque proximorum neglectus, ac vniuersæ vocationis contemptus. nam cum quæ validè animo proposuit, his non consequatur viis, ad alia principia vitæque genera amoris suo congrua, se, cogitationes, studiaque sua, toto conatu conuertit.

Remedia.

EXercitatio sui in rebus humilioribus, maximeque in iis, à quibus potissimū horremus, delectusque eorum, quæ in primis auersamur: animo priùs per varias huius

ius generis meditationes ex cultis, & ad viliora ac duriora excitato; propofita ſibi humilitatis pulchritudine, vtilitate, neceſſitate, præmiisſque virtuti huic à Domino æternùm conceſſis: ſuperbiæ verò fœditate, damnis, miniſque ac pœnis à Deo intentatis: cælum in Lucifero, & Angelis illius; paradifum in primis parentibus; orbem, in infelici ferè ſuperborum exitu; infernum, in miſerando æternùm arrogantium cruciatu conſiderando.

Mutuæ deinde caritatis per beneficia inuitatio: mutui honoris, maximè in ijs, à quibus alieniores ſumus. præuentio: honorationum operum, & quæ plus externi ſplendoris habent, aliis conceſſio: difficiliorem, minusſque in ſpeciem illuſtrium arrogatio.

Contemptus in ſe ſui, dictorumque fa-
ctorumque ſuorum præteritorumque criminum memoria.

Sanctorum hîc, magnorumque, ac Chriſti ante omnia exempla proderunt, ſi noſtra cum illis compoſuerimus: ſi quanta Deo, creationis, conſervationis, redemptionis, innumerisſque penè aliis titulis debemus, præmiorumque cælo reſpoſitorum magnitudinem frequenter conſiderauerimus.

Proderit in primis frequens cogitatio
IOAN. 12. verborum Domini: *Qui amat animam suam, perdet eam: & qui odit animam suam in hoc mundo, in vitam æternam custodit eam.* qui odit, prauas animi propensiones frangit ac domat: qui amat, assensum illis præbet, obsequitur. ille demetit tanquam falce luxuriantes noxias herbas, nusquã parcit, ferro & ignibus sæuit in insurgentem amorem, hoc vno pius, quòd impius sit amori, nec quidquam largitur petenti.

Iuuabit etiam odio quodam ferri in hoc vitium, propositis sibi illis quæ ex hoc nasci consueuerunt. maximè quòd nec humana nec diuina, vbi inualuerit, pensi habeat amor sui. nihil apud hunc sanctum, nullum secretum, nisi qua parte commodis hæc suis seruiunt. pugnant cum amore sui? violabit omnia, quòd amori suo consulat. Ingens deinde cæcitas amoris socia terrere nos debet. cæcus ad æterna præmia, ad ignes æternos est. nec mortem videt imminentem fors cras, fors hodie. sed neque finem suum consequitur hic amor sui. laudem quærunt? damnationem referunt. commodis suis student? ferè iis frustrantur. honores venantur? ignominiam referunt. cùm gloria fugientem sequatur, prosequentem destituat.

Ma-

Magnum deinde calcar ad victoriam sui, cogitatio seria iudicij extremi, in quo occultissima quæq; nostraretegenda sunt orbe inspectore; mortisque momento omni dubia incertitudo. & quò mihi in illa hora gloria, opes, eruditio, scriptio, eloquentia, commoda? quis tunc sensus humanarum laudum, quæ utilitas?

Vtile etiam fuerit sæpiùs animo voluerè, quanti nos orbe toto vicerint robore, forma, eloquentia, opibus, honore, commodis, prudentia, variaque eruditione, æternis nunc ignibus materies æterna. quòd si humanas laudes spectemus, quanti nos laudant? quàm pauci norunt orbe toto? & vicesimùsne quisque è notis laudat? certum plures damnare. iam quò laus absentium ignorata mihi? præsentium verò laudes, adulationes sunt, laudes non sunt. cùm ergo absentium de te laudes ignores, præsentium adulationes habendæ sint, quid certi in humanis est quo extollimur?

Necessaria in omni hoc vitio frequens seriaque conscientia per diem discussio: validum in eo propositum victoriæ sui: omniaque amor huic amica generosè ac constanter pellere; illiusque loco contemptum sui, diuinumque in se amorem his similibusque verbis excitare, *Dilectus meus*

mihi, & ego illi; qui pascitur inter lilia. Deus meus, amor meus, & omnia. A te quid volui super terram? Pars mea & hereditas mea Dominus. Quemadmodum desiderat cervus ad fontes aquarum, ita desiderat anima mea ad te, Deus. Trahe me post te, curremus in odorem unguentorum tuorum. Exultabimus & latibimur in te, memores verbum tuorum super vinum. Fasciculus myrrha dilectus meus mihi inter vera mea commorabitur. Botrus cypri dilectus meus mihi, in vineis Engaddi. Sub umbra illius quem desideravi sedi, & fructus eius dulcis gutturi meo. Quis mihi det te fratrem meum sugentem vera matris mea, ut inueniam te foris, & deosculer te, & iam me nemo despiciat? Pone me ut signaculum super cor tuum, ut signaculum super brachium tuum, quia fortis est ut mors dilectio, dura sicut infernus emulatio: lampades eius, lampades ignis atque flammarum. Aquæ multa non poterunt extinguere caritatem, nec flumina obruent illam. Hæc aliæque generis huius, quæ cuique sua pietas, & amoris diuini auctor Deus suggeret, ad illius amorē nos excitabunt. beneficiorum etiam commemoratio diuinorum, grataque recordatio, præmiorum deinde cælo repositorum, ac passionum Domini. potentissima hæc incentiua veri amoris sunt.

Orationis denique studium plurimum in hac re poterit. in quo mens cælestibus collustratur, discutitque cælesti lumine errorem suum, agnoscit tenebras exuitque, melioribus cognitionis amorisque diuini radiis perfusa.

CAPVT XIII.

Dictorum factorumque suorum commendatio, reliquorum damnatio.

EST hæc innata quibusdam conditio, consuetudine deinde aucta & robodata, sua ut laudent sola, aliena aut damnent, aut silentio transeant; laudes suas etiam ab imperitis auidè excipiant; aliorum, deiecto vultu, fronte, oculis hauriant; & cum improbare non possint, nunquam tamen probent. Dolent potius aliorum præclaris dictis factisque, ac mœrorem si quando verbis obtegāt, vultu tamen produnt; ad sua, etiam minima, & quæ laudem nullam merentur, si quis laudator accedat, totis animis ut ad tubas & tympana militiæ amatores, exiliunt. nec continere pruritum hunc possunt, os genæque gaudium testantur; ut ille iam illis amicorum

rum primus maximusque sit, qui primus maximusque laudator est.

Quò te veritas in hac vanorum hominum prurigine? laudabis omnia? non est viri Deum timentis; neque enim possibile est, non profluere ab homine quædam non laudanda. damnabis? pro hoste habebis. tacebis? non laudasse, damnasse apud hos est. quin adeò eò crescit hæc quorundam scabies, ut in vno non laudasse, aut improbasse, in omnibus damnasse sit. Nescit modum aut frenum sibi imponere laudum hæc libido: sed neque vulgari contenta laude est, etiam infima in summa reponi laude desiderat. ferendum quoquo modo esset, nisi meritò improbanda non rarò, summè etiam laudari vellet; ut, ni feceris, contracta ac corrugata fronte, deiectisq; genis ac superciliis moerorem testentur, & amicitia renuncient. cum enim amasse in illis, laudasse; non probasse, damnasse sit, sit ut amorem & odia, sola laude & improbatione metiantur.

Et sunt plerumque hi molesti grauesque omnibus: nulla enim propè illorum colloquia sine dictorum factorumq; laude reperies. velis pròinde, nolis, laudes audias necessum est: & ingerunt has nullasæpe temporum, locorum, personarum ha-

habita ratione ad omnium fastidium; nec immunem quemquam ab importunissima laudum suarum narratione abire permittunt, veriti ne, si vnus ignorauerit, damnati, aut non satis laudati videantur. non facerent si memores essent monitorum Sapientis: *Laudet te alienus, & non os tuum: extraneus, & non labia tua.* Prom.
27.

Nec inter domesticos tantum, apud quos faciliior venia esset, sed inter externos, & mulierculas etiam ingentibus verbis decantant sua: quæ nisi plenæ abeant cõmendationibus, nullum sibi dictorum factorumque suorum fructum retulisse videntur; futuræ nimirum apud socias aut æmulas, laudum præcones confessoriorum suorum; narranturque sæpe dicta factaque, nec dicta, nec facta vnquam: imò vniuersæ aliorum Superiorumque laudes in illos commigrant: ab horum scilicet consiliis, si quid in domo vniuersa est, quod laudem mereatur, profectum est; sin aliquid infelici euentu præter spem successit, his monitoribus meliora euenissent. aliud sua serunt, auditi non sunt; hinc damna accepta: auditi fuissent, & alia longè rerum facies esset, & pro damnis emolumenta nata forent.

Noxium ante omnia hoc hominum genus

nus in Religione est, multorumque emulationibus & inuidiæ obiectum, mutuarum dissensionum & alienationum causa. Et nati hi non Religioni, non Deo, famæ tantum suæ sunt: nam si Deo & Religioni, gauderent utriusque nominis propagatione, quam aliorum dictis factisque ingentia vident incrementa sumere. Non gaudere, non laudare, cum meritò possis, damnare est. Et cum de tuis minimis prodigè in omnem lætitiā profundaris; in aliorumque etiam maximis, doloris potius quam lætitiæ signa prodas; non hoc est de Domini Religionisque gloria, quæ talilibus augefcit, crescitque in maius, dolere? quæ quibus innitantur principiis, nemo non videt; superbiæ nimirum & inuidentiæ fundamentis, quibus hæ suorum laudationes, alienorum damnationes inedicatæ sunt.

Et sanè non minùs perniciosus est, qui alienas laudes alto silentio premit, quàm qui eleuat, aut damnat facta. quid? quòd silentio suo grauiùs sepe ille feriat, quàm apertus hic improbator: nam cum p̄timus ferè moderatioris ingenij habeatur, ut qui affectus suos tegat, fit ut silentium illius pro aperta damnatione habeatur. Non laudasse enim cum possit, qui modestiæ opi-

opinionem habet, vituperasse est. & ille qui apertè laudanda damnat, criminato-
ris potius nomen obtinet, & verbis ipsis,
improbandi que modo alienationē osten-
dit, incompolitum que minus que ordina-
tum affectum, vt hoc ipso fide careat. at
ille alter modesto seuero que silentio fi-
dem reperit, vulnera que infligit, altiùs pe-
netratura, quo à profundiore mente in-
fliguntur & veniunt.

Et tales ferè, qui alto silentio laudanda
in aliis premunt, ingentes sub modesta
fronte arrogantia montes tegunt. neque
enim aliunde prouenit parca hæc alienarū
virtutum laudatio, quàm ab animo laudis
suae auido: qui cùm aliorum commenda-
tionibus suis detractum iri veretur, seriò
cauet ne quid elabatur in alio laudandū.
apertè damnare conscientia terret, & ex-
terioris cuiusdam moderationis opinio ca-
ptata: silere posse arbitratur, nec vlla lege
ad alienas laudes vulgandas teneri. qui si
cogitaret plus sæpe moroso se obesse suo
silentio, quàm apertum criminatorem ef-
futiendi quidlibet licentia; non tam par-
cus laudator esset.

Et sanè vt homines fugiat, Deum latère
mens illa æmulationibus grauida non po-
test. videt illam propriarum laudum bal-

neo, tanquam oceano innatantem, aliorumque encomiis liuidam: nec crimen ef- fugere potest interni fastus, à quo vnico hæc silentia imperantur.

Et sanè nisi ingenti vndique cingeretur possidereturque rerum suarum arrogan- tia, vt nullo non loco ac tempore auidè laudes suas venetur, non tam se uero silen- tio aliorum præconia præmeret: quæ cum veluti solēs arbitretur officere tenuissimis lucernarum suarum luminibus, omni co- natū dies illos supprimit, magnaque eos silentij sui nebula, densaque liuoris nube regit; qui si altiùs pectoris sui latebras ex- cuteret, perfacilè fundamenta taciturni- tatis huius erueret, & in abditæ arrogan- tiæ suæ profundum nullo negotio veniret.

Quamquā palàm ac quasi aperto mar- te dicta factaque aliorum damnare, ma- ioris cuiusdam impudentiæ sit: neque ta- les aliud expectare debent, quàm vt pari licentia feriantur. ferè enim hæc diuinæ cuiusdam vindictæ remuneratio quædam est, vt damnari sua ab omnibus sentiant, qui omnium damnant; ita talionis pœna ferit hos Deus, aut permittit ea, qua ipsi reliquos, mensura donari: acciditque illis, vt cum dicendi licentia in omnes se pro- fundant, omnium etiam patiantur lin- guas,

guas, calamisq̃ue omnium percutiantur, qui nulli parcere didicerunt; & vt nihil illis rectum bonumq̃ue, quod ab alio patre natum est, ita nihil horum, probum aliis laudeq̃ue dignum videtur, aut quod nomen decusq̃ue mereatur.

Graues deinde tales omnibus esse consueuerunt, inuisi paribus, duri inferioribus, nisi quos perpetuos laudum suarum præcones nacti fuerint: Superioribus molesti. cū enim mutuam pacem turbent, amicitias ac necessitudines dissoluant, non Superioribus, non æqualibus, non inferioribus parcentes, fit vt omnium in se animos prouocent, omniumq̃ue indignationem extimulent: vnde etiam fit, vt omnes horum familiaritatem fugiant, consuetudinem auersentur, vt à qua nihil expectare possint, præter graues censuras, seuerasq̃; accusationes, eo molestiores, quo neminem propè illæsum prætereunt, damnant omnes, testes facti ac iudices omnium, maximèq̃ue magnorum virorum; in quibus ob augustam aliquam nominis amplitudinem, proniùs inuidia & æmulatione stimulante incurrunt.

Remedia.

A Malorum, quibus laudator sui agitur, extirpatione petenda sunt: innata quondam hîc superbiam invidiamque nemo non videt, quibus agitur, & alienis contabescit, ac suis pascitur laudibus. Quare ad superbiam ac invidentiæ radices securis admouenda est, contrariisq; submissionis & amoris remediis animorum hæc venena pellenda sunt.

Assuescat proinde quicumq; hic est, aliena laudare etiam minima, illa mirari, prædicare & publicare; sua tegere, deprimere & extenuare: fugiat suorum laudatores: cogitetque ferè eos nos pati gravissimos in absentia censores, quos præsentibus profusissimos sensimus laudatores.

Cogitet illa nobis speranda ab aliis, quæ nos impendimus aliis, paribusque dicta factaque nostra commendationibus, aut vituperationibus metienda.

In aliis denique, qui simili vitio tenentur, tanquam in speculo seipsum intueatur, & in aliena fœditate suam deuitet; alieno exemplo vitia emendet sua. displicent in aliis? fugiat in se displicentiora. odit domesticæ pacis turbatores, amatque
socias

focias dextras necessitudinis fraternæ ?
exequatur in se quod amat in aliis : fu-
giat quod odit in illis, factus iam aliis ma-
gister & ductor mutux caritatis, æternita-
tis memor vitæ alterius, breuitatis huius;
pœnarum & præmiorum illius, incertitu-
dinis huius.

CAPVT XIV.

*Ambitio. speciosorum munium prosecutio:
viliorem fuga & contemptus.*

MALORVM omnium in Religione
summum, & è quo tanquam ocea-
no & fontibus, reliquorum ferè vitiorum
flumina nascuntur. Quid enim sperari ab
illo potest, siue in salutem proximorum,
siue in Religionis augmentum, siue in di-
uini nominis propagationem, cui honor
dignitasque propria pro proposito sibi fi-
ne est? quique cogitationes suas omnes in
præfixum sibi dignitatum suarum scopum
iaculatur? Quid non timeri? Diuini illi no-
minis gloria, salus proximorum, Religio-
nis progressus, tamdiu cordi erunt, quam-
diu hæc idoneam ambitioni suæ materiam
iudicauerit: vbi senserit auxilio sibi ad quæ
sperabat, non esse, repellet & auersabitur,

vt votis, expectationi, conatibusque suis inimica; adeoque in depressionem ac e-
uersionem illorum studia sua conuertet,
si per calcatam Dei Religionisque glo-
riam, proximorumque salutem, viam sibi
ad honores stratam viderit.

Cæca omnis ambitio est. nihil videt
præter conceptam semel animo gloriam,
qua tanquam densa circumfusus nebula,
nullos aliorum prospectibus habet oculos.
sol luceat, sideraque micent; nihil videt
oculus obscura dignitatum suarum nube
circumuallatus. nubem suam videt, ad re-
liqua cæcutit. Non patet illi aditus nisi per
scelera ad prætensum decus; per scelera in
illud ibit. clausa illi semita est ad munus
quod ambit, nec aditum videt, nisi per di-
minutionem famæ alterius? miscebit falsa
veris, & in optimo quoque comminisce-
tur pessima; nec persequendi finem faciet,
donec detractionibus, tanquam validis
harpagonibus, innocentem à munere de-
turbauerit, vt optato potiatur. obstat for-
tior illius studiis? adulationibus expugna-
re conabitur. irriti hi cadunt doli; ada-
perta se conuertet odia, vt importunitate
ac improbitate vincat, quem non potuit
fraudibus.

Hinc ingentes domi animorum na-
scun-

scuntur conturbationes, dum mente ambitiosus inquieta, iactatione sua commouet reliquos: vt propacato equore, tempestuosa in Religiosa domo reperias maria, forbendus cum non vno, si propius accedferis, & inter hortorum pratorumque hæc quondam amœna, fornaces inuenias, ambitionum ignibus accensas, amburendus si admoueris pedem.

Misera Religionis conditio, quæ ambitioni patefecit ostia. reliqua enim cum illa admisit vitia: neque enim sola venit, ingenti scelerum omnium stipata comitatu est. nec vllum iam illi scelus, si fruatur optatis. etiam in matrem sæuiet, & per calcatum Religionis vterum ad propositum sibi decus aduolabit interrita, crudelis in genitricem.

Sed neque, si sperata consecutus ambitiosus fuerit, quiescet, noua meditabitur: perpetuo namque tanquam rotatu per aspera, mollia, plana, præcipitia, voluitur infelix. nec vlli minùs quàm sibi placet: intus inuidia depascitur, foris aduersarios patitur; nulli amicus, inimicus omniù; contemptor omnium, omniù percutitur linguis; pari mensura ferendus, qua prior ille reliquos ferit. alienæ virtutis hostis; nulli benignus, crudelis in omnes.

omnes. nullius etiam beneuolētia donandus. laudat neminem, damnat omnes, etiam quos sibi iunxit. nam si eos viderit vilioribus contentos, inter inglorios & ignavos numerat: si ad maiora exemplo suo contendentes, pro hostibus & gloriæ suæ obstructoribus habet. sed neque facile fidem adhibet ulli, suo semper ingenio reliquos metiens. suspectissima deinde illi omnia, dum singula metuit, & ingeniosa solertia, è vanis, nec cogitatis principiis miras consecutiones necit. & ferè cogitandum talem reperiēs, multa machinantem, melancholia etiam oppressum, nusquam explicatum, dum vel amittendi muneris torquetur metu, vel mœret de repulsa, vel in obtinendo etiamnum laborat, & aduersarios circumspicit.

Infelix planè ambientium in Religione conditio, qui nec noctes patiuntur quietas, dum perpetuis æstibus iactantur. nulla iam illis oratio. vota pro oratione sunt. exulat pietas, & pro pietate speratum illis decus inhæret animo; pro Dei præsentia, expectata gloria. quid? quòd vilescant animis, dum singulorum, quos commodos sibi arbitrantur, captant gratiam, etiam vilissimorum; ad quorum se genua abiicient, si idoneos arbitrabuntur fini proposito.

Hu-

Humilis contrà , sorte sua contentus
 quanta in pace degit ? nec mirum in pace
 esse qui nihil ambiat , nulli abblandiatur,
 nihil à quoquam speret. quare nec quem-
 quam veretur , aut sollicitè & anxie co-
 lit . erecta illi verba , animus celsus , nul-
 liusque , præterquam Dei indigus , verba
 plana , nec ad gratiam composita , nec ad
 simulandum formata , aut ad fallendum
 delecta. inimicus nulli , amicus omnibus ;
 molestus gratisque nulli , carus omnibus ,
 in alta quiete , omniumque admiratione
 & laude vitam ducens , vitamque finiens
 rara posteritatis grataque memoria. Supe-
 rioribus obsequens , inferioribus carus ,
 paribus acceptus , omnium ore laudatus.
 familiaritatem illius ambiunt omnes , de-
 lectantur consuetudine , pascuntur collo-
 quiis. Superiores concedi hunc sibi postu-
 lant , prehensant inferiores , paresque gra-
 tulantur sibi. qui quo maiore submissione
 repellit à se magna , hoc maiori impetu
 confluunt ad illum magna. postrema deli-
 git , prima omnes vltro obtrudunt . viliissi-
 ma ambit , summa nolenti ingeruntur.
 quoque maior sui contemptor , hoc vali-
 diore aliorum conatu extollitur. Hæc sunt
 debita virtuti præmia , quibus omnis am-
 bitiosus caret. vt bene Augustinus : *In hu-*

Z

*Serm. I.
 de vita
 mili Glorie.*

mili loco salus, in alto periculum. & eleganter Magnus Gregorius, ad ambitionis contemptum, metum, horrorem, humilitatis amorem & amplexum: Audiant humiles quàm sunt aeterna qua appetunt, quàm transitoria qua contemnunt: audiant elati, quàm sunt transitoria qua ambiunt, quàm aeterna qua perdunt. audiant humiles ex magistra voce veritatis, Omnis qui se humiliat, exaltabitur: audiât elati, Omnis qui se exaltat, humiliabitur. audiant humiles, Gloriam pracedet humilitas: audiant elati, Ante ruinam exaltatur spiritus. audiant humiles, Ad quem autem respiciã, nisi ad humilem & quietum & tementem sermones meos? audiant elati, Quid superbis terra & cinis? audiant humiles, Deus humilia respicit: audiant elati, Et alta à longè cognoscit. audiant humiles, Filius hominis non venit ministrari, sed ministrare: audiant elati, Initium omnis peccati superbia. audiant humiles, Quia redemptor noster humiliavit semetipsum factus obediens Patri usque ad mortem: audiant elati quid de eorum capite diabolo scriptum est, Ipse est rex super omnes filios superbia. Occasio ergo perditionis nostra facta est superbia diaboli, & argumentum redemptionis nostra inuenta est humilitas Dei.

Remedia.

AB humilitate petenda sunt. ambit aliquis magna, in vilissimis continendus est, ad ignobilissima loca relegandus, minimisque destinandus: ut talium assuetudine aut se vincat, conteraturque altiores spiritus, ac subiugo contineat; aut impatientia victus, Religionem à metu liberet. cōsultius enim fuerit talibus carere, quam tot domi turbarum causam alere. monendus tamen seriò, per confessarium, aut Præfectum spiritus, aliosque viros magnos. pœnitentiis etiam stimulandus: quæ si irritò cadunt conatu, & perstat ille in fastu; forti Superiorum robore & constantia continendus in humilibus erit. aut enim se vincet, animosque domabit, magno Superiorum aliorumque gaudio; aut submisionis impatiens, in apertam prorumpet defectionem, Religionemque metu liberabit.

Proderit in primis, si omnis illi materia gloriæ adimatur. obseruetur diligenter à variis, ac sicubi deliquerit, non parcatur. si quid vituperatione dignum egerit, non sileatur: si quid laude, silentio prematur. à magnorum clarorumque virorum, ma-

tronarumque confessionibus & consuetudine auocetur, adimatúrque illi vniuersim quidquid ad laudem facit aut ducit.

Forti sententia terret ambitiosos Origines: *Omnis adeundi honoris Ecclesiastici absunderetur ambitio, si se iudicandos potius, quàm iudicatu- ros, hi qui praeesse volunt populis, cogitarent.* Ambitionem verò ipsam scitè Bernardus describit: *Ambitio futile malum, secretorum virus, pestis occulta, doli artifex, mater hypocrisis, liuoris parens, vitiorum origo, tinea sanctitatis, excecatrix cordium, ex remediis morbos creans, ex medicina languorem generans.*

Nobile remedium à Diuo Gregorio habemus: *Plerumq; elatos utiliùs corripimus, si eorum correptionibus quadam laudù fomenta misceamus. inferenda namque sunt illis aut talia bona quæ in ipsis sunt, aut dicendum certè quæ poterant esse si non sunt: & tunc demum ressecanda sunt mala quæ nobis displicent, cùm priùs ad audiendum eorum placabilem mentem fecerint præmissa bona quæ placent. nam & equos indomitos blanda priùs manu tangimus, ut eos nobis plenius postmodum etiam per flagella subigamus; & amaro pigmentorum poculo mellis dulcedo adiungitur, ne ea quæ saluti profutura est, in ipso gustu aspera amaritudo sentiat-
tur: & dum gustus per dulcedinem fallitur, hu-
mor*

mor mortiferus per amaritudinem vacuatur. Ipsa ergo in elatis inuentionis exordia permista sunt laude temperanda, ut dum admittunt fauores quos diligunt, etiam correptiones recipiant quas oderunt.

CAPVT XV.

Delectus munium, locorum.

FALLIT plurimum Superiores hic delectus, nec respondet votis, plusque ferè siue temporalis, siue spiritalis auxilij ab aliis consequitur. quòd maior in his fiducia in Deum eluceat, plus in illis prudentiæ humanæ: quo fit, iusto Dei iudicio, ut spe ferè sua Superiores frustrentur, cum sæpe etiam tales patiantur aduersarios, grauesque obseruatores ac censores, quos precibus impetrarunt. Monitorum deinde ac si qua necessitas id postulet, iniungendarum pœnitentiarum libertas tollitur, cum offensionem Superiores vereantur; & qui se vocatos sciunt, liberiùs offendant, euocationis suæ spe freti, facilesque ad murmurationes sint, si minùs placentia imponantur. Nec quidquam in his promptius, quàm ad minimarum rerum displicentiam illud inculcare, Cur euocauit

uit bene constitutum? melius mihi erat alibi. Nascitur inde non loci modò, & muneris, sed & omnium propè displicentia, & murmuraciones, inde animi inquietudines, cùm nunquam explentur desideria, & præteritorum memoria præsentia displicent.

Quòd si in Superiorem minùs fortem, aut robore destitutum delectus ceciderit, sequitur facilis & ingens noxiorum iuxta ac bonorum permissio; cùm indulgentiores ferè simus in eos quos ultro vocatos meminimus: & nullus propè querelarum locus apud eos, qui mederi possent, ne delectum nostrum damnare videamur, aut imprudentiam accusare; neque consuetum illud audiamus, Habes quem petisti; obsecutus sum voluntati tuæ. antè cogitasse oportuit. bene illi alibi erat. vt omnis iam culpa in euocatorem eat. atque hinc graues sæpe multorum offensiones nascuntur, cùm Superiores delectus sui sibi consciij, ne aut offendant, aut mœrore afficiant, aut minùs commodos tales experiantur, non cōcedenda concedant. quod vbi fit, abit res in exemplum, & paria sperare reliqui non verentur, paria etiam audere: è quibus vniuersa paulatim domestica disciplina delabitur: quæ vbi refrixit ac
corrui.

corrui, à sola ferè sectione remedia expectanda sunt; mutandi nimirum plerique omnes, & ad Superiores disciplinæ arctioris, variæque amandandi loca sunt, cùm à sola propè mutuæ cohabitationis separatione salus sperari possit: ac disciplinæ amantiore in illorum locum substituendi erunt; aut sanè Superior ipso loco mutandus, & robustior illo subrogandus.

Eadem incommoda in inferioribus reperias, qui precibus locorum mutationē impetrarunt. sequitur enim plerumque pœnitudo, cùm non omnia votis respondeant; & damnamus preces nostras, & queri erubescimus, ne consilia ipsi nostra accusemus, & audiamus inconstantes: inde mœrores, ac tacitæ interni roboris emedullationes, cùm interiores animi vires exeduntur, & aperire pudet, & ad vincendum robore destituuntur. ad locorum enim novas descendere mutationes rubor vetat; & locorum tamen, sociorum, Superiorumque ferre conditiones imbellis animus negat, aut innata quædam menti aliena, pugnantque cum aliis, ac quasi hostilis & inimica conditio. ita cùm hinc verecundia terreat, isthinc molestia crescat; contabescit animus, aut in apertas prorumpit factiones, & causas aliquas com-

miniscitur, quibus inconstantiam suam regat. has si verisimiles reperiat, laxat delationibus habenas; sin minùs, comminiscitur etiam fallas, dummodo potiatur optatis, subducaturque quasi è seruitute ceruices nunquam satis domitas, nec suauis obedientiæ iugo in solidum submissas.

Profiliunt ex his initiis omnia malorum genera, nec quidquam tam à Religione alienum, quod non audeat. semel enim pudore deposito in omnia se profundit mala, & quæ antè damnauerat, probat vt sequenda: ita qui febribus tenentur, inimica antea gustui laudant, & auidius hauriunt, profutura damnant.

Accedit, quòd rarò diuina bonitas felices huic delectui successus tribuat, vt qui resignatæ obedientiæ repugnet, plusque adferat iudicij nostri, quàm in Deum fiducia: quasi enim de Domini in nos providentia diffidentes, recurrimus ad hunc seu personarum, seu locorum delectum; cui poenitentia perpetua & indiuidua comes est. quod innumeris prope aliorum exemplis discimus: quorum infelix exitus meritò terrere omnes, & auertere ab his consiliis debeat.

Iam cum ferè in inferioribus delectus hi nascantur ex amore sui, cum huic aër sit
crassior,

crassior, illi tenuior; huic minùs amœnum
cælum, illi nimis sudum; alteri plebeia ni-
miùm occupationes, minùs splendida, mi-
nus è dignitate, eruditionis opinione, vul-
gares, rariores, frequentiores, intempesti-
uæ, subita: aut Superior durior, tenacior,
morosior, oculatior, maturior, retractior,
ad suspiciones pronior, regularum obser-
uantior; aut alius suauior, liberalior, mol-
lior, faciliior, hilarior, laxior, ad omnem
concessionem profusior, indulgentior; fit
vt in ingentia se plerumque animarum
discrimina conijciant: cùm ferè ignorent
quanta domi forisq; pericula immineant.
intus nimirum latet malum, quod nisi ex-
cusserint, nulla locorum mutatione pel-
lent: cùm ferè tales libertatis amor, disci-
plinæ Religiosæ fuga, commoditatũ cor-
poris studium, adnatus animo tepor, gra-
uiorum metus & horror, ad hæc consilia
adigant; vnde fit vt speratæ apud Deum
mercedis non postrema, aut omni etiam
parte spolientur, cùm delecti muneris aut
habitationis concessio mercedis illis lo-
co sit.

Remedia.

INdifferentiæ studium, frequens excitatio in Deum fiduciæ. cui maior cura de nobis, quàm nobis ipsis incumbit.

Incommodorum delectui huic colligatorum memoria, recordatioque illorum, quibus non rarò cum interitu delectus hic coniunctus fuit.

Nihil deinde in omni Religione certius pacatiusque, quàm vniuersam sui curam Deo cõmittere; ne quid videamur detraxisse de ingenti in illum fiducia, plusque prudentiæ nostræ, quàm illius prouidentix fuisse. Ille securus viuit, qui totum se diuinæ gubernationi commisit. quàm fortiter monemur, quàm certò: *Considerate lilia agri, quomodo crescant, non laborant, neque nent. Si autem fœnum agri, quod hodie est, & cras in clibanum mittitur, Deus sic vestit; quanto magis vos modica fidei? Nolite ergo solliciti esse, dicentes, Quid manducabimus, aut quid bibemus, aut quo operiemur? hac enim omnia Gentēs inquirunt. Scit enim Pater vester, quia his omnibus indigetis. querite ergo primùm regnum Dei, & iustitiam eius: & hac omnia adiicientur vobis. Quòd si pergat delectus hic animum pulsare, consultum erit cum Præfeto.*

cto spiritus, aut si quis alius in domo vir prudens, rerum experientia edoctus, consultare; nec quidquam aggredi, nisi non tantum consulto sæpe Domino, sed aliorum iudicio præquisito, quorum potius sententiis, quam nostris stemus.

Proderit etiam aliquando cum iudicio confessarij voto se aliquo temporario obstringere, omnemque hanc delectus cogitationem negligere ac respuere, ut inimicam Deo, aut sanè ut minus ei placentem gratamque, ut obedientiæ repugnantem, adeoque ut omnis perfectionis hostem, omnisque inquietudinis matrem.

Moueant nos exempla Christi, totum se parentis obedientiæ cōmittentis: *Meus* Ioh. 4. *cibus est ut faciam voluntatem eius, qui me misit, ut perficiam opus eius.* & post illam lacrymarum, sudorum, sanguinum luctam, omnium quas vlla sæcula viderunt grauissimā, *Non quod ego volo, sed quod tu;* & apud Mar. 14 Matthæum, *Non sicut ego volo, sed sicut tu.* Mat. 26 sequamur ducem milites, & cuius præferimus nomen, imitemur facta.

Magnum victoriæ genus hîc est contraria propensioni ambire, voluntatemque valido conatu ad illa propellere, magnorum in omni Religione exemplis. nunquā sanè quidquam poscere, & in re firmare
ani-

animum tutissimum est. versanturque tales in altissima quadam pace, quidquid euenerit, diuinæ prouidentiae committentes, securi se non ambiuisse: in quo vno solari se possunt, & audenter cum Prophetis dicere: *Qui habitat in adiutorio Altissimi, in protectione Dei cali commorabitur. Nam & si ambulauero in medio umbræ mortis, non timebo mala: quoniam tu mecum es. & Non erubescam quoniam speraui in te. & In Domino sperans non infirmabor. protector enim est omnium sperantium in se. memores monentis Apostoli, Omnem sollicitudinem vestram proijcietes in eum, quoniam ipsi est cura de vobis. cum contra petitores interno externoque solatio destituantur. intus habent conscientiam redarguentem, extrâ reliquorum destituuntur auxilio, bis infelices, bis miseri.*

CAPVT XVI.

Nimia in vnam alteramue nationem propensio.

DE beata felicique diuersarum nationum in vno spirituali corpore indiscriminata coniunctione, benè Hilarius: *Populo Dei congruit sub vno patre fratres, & sub vno capite vnius corporis membra esse. non enim*

enim oculus aurem odit, nec nares os execrantur, nec manus pedem spernit. hac enim ut officiis mutuis sibi, ita & amore distracta sunt. hoc iucundum & bonum habitare fratres in vnum, in eodem esse, idem esse, nec congregatione fieri, nec amore diuersos. Propius etiam ad rem nostram S. Basilus: Quid eo beatius dici? quid Const.
 hac coniunctione, unitate ac necessitate aptius mon.
 excogitari? quid mutua inter se morum animo- c. 19.
 rumq; contemperatione gratius fingi? homines
 ex diuersis nationibus profectos, per exactam
 morum ac disciplinæ similitudinē adeò in vnum
 veluti coaluisse, ut in pluribus corporibus vnus
 modò animus esse videatur: viciissimq; plura cor-
 pora mentis vnus instrumenta cernantur. Hanc
 variarū gentium tanquam variarum vua-
 rum in vnum torcular amicam commi-
 stionem, aut variorum marmorū in vnus
 ecclesiæ ornatum coalitionem, quicun-
 que sustulerit; & nobilitate & decore suo
 vniuersum corpus nudabit, & in miseran-
 dam ridendamque solitudinem, omni ro-
 bore augustaque maiestate spoliata dis-
 perget. scinditur enim hac nationū gen-
 tiumque discriminatione vniuersum Re-
 ligionis corpus, quod sola animorum con-
 iunctio tuetur, descenditurque in validas
 partes; neque iam in vno, aut altero, sed
 totis concurritur castris, proni que in vni-
 uersæ

uersæ Religionis perniciem & interitum, laxatis habenis deuoluimur.

Nam vbi semel hic morbus occupauit animos, nullis iam propè consiliis, aut rationi locus est. exulat enim cum veritate ratio, cùm non tam rerum momentis, quàm nationum pondere ducimur.

Et quid sperari potest, quid non timeri, cùm ad fugam, aut sequelā satis est, hanc illāmue gentem ita censuisse, aut damnasse? in quo non tam rationum momenta, quàm gentium placita discutiuntur, vt satis iam sit ad damnationem, alterius à nostra natione mentem hanc esse; satis ad probationem, gentis nostræ sensum hunc esse. & veritatem ipsam non rarò manutangimus, repellimus interim cùm ab alia gente prognatam scimus, gaudemusque deterioribus domi nostræ natis, ne meliora videamur ab aliis mutuati: Desunt nostræ viri magni qui præsent, qui que salutis proximorum incumbant, vti deterioribus placet domesticis, ne ab externis meliores videamur deponere. tantum nationum studia possunt, vt destituti nostris, carere in solidum velimus melioribus, ne ab alieno solo nata nobis salus, aut petita videatur. & iam ad impugnationem damnationemque satis est, ab alia, quàm nostra gen-

te venisse consilia. etiam solem negaturi in meridie, si ab alieno in nostrum illuxerit agrum.

Denique ad aperta vniuersim descendimus odia, & perire prauis nostrorum consiliis, quàm bonis salutaribusque aliorum florere præeligimus. ac tandem eò dissentientiū animorum acerbitas venit, vt si ignorata gens sit, probemus & sequamur consilia; at vbi primùm innotuit alienæ gentis auctor, resiliamus à probatis, nouasque impugnandi causas reperiamus; priora consilia nostra, ex auctoris ignorantia prognata, damnantes. grande malum, & non iam turbandæ, sed euertendæ Religioni natum. nam cùm è variis nationibus omnium propè Religionū, tanquam validissimi exercitus robur conflatum sit, nec alia re magis virtus illius potentiaque quàm animorum coniunctione continetur; nemo non videt, disunctionibus hifce, animorumque dissensionibus, vniuersum robur, quod vna validaque connexionem firmabatur, labascere, hostibusque ludibrium fieri, inimicorumque deprædationibus exponi; & quæ terrori primùm acies erat, inuictæque mutua coalitione stabat, solis domesticis dissensionibus, nulla externa inimica manu impellente ruere.

Huc

Huc accedit, quòd hæc gentium studia etiam ad externos decurrant: & inuolui-
mur iam Principum, rerumque publica-
rum pœnitendis, & in capita nostra casuris
negotiis. tantum potest efferuescens hic
gentium amor: vt cum æmulationes odia-
que abeant in vniuersam gentem, in vni-
uersam etiam eant consilia machinatio-
nesque, exigua cura tuitionis famæ salu-
tisque nostræ: ita dum fortiùs quàm pru-
dentiùs aduersarios insequimur, vulneri-
bus locum damus, & antè sæpe ipsi cadi-
mus, quàm hostem feriamus, aut assequa-
mur.

Et sanè totum paulatim genuinæ Reli-
gionis spiritum pestifera hac nationū dis-
cretione collabascere necessum est. neque
enim inter has inuidias, æmulationes, par-
tiumque studia charitas habere locum po-
test, vnicum Religionum Ordinumque
vinculum ac firmamentum. neque vene-
nario hoc partium gentiumque studio com-
maculata Religio valetudinem diu. tueri
suam potest. ibit non multo pòst in peri-
mentes morbos potenti hoc toxico ine-
briata. & quam nulla externa mouere po-
terant arma, domestico hoc cadet malo.
stetit interrita & inuicta stante charitate?
cadet pauida labante charitate, quæ nulla
in

in re potentiùs , quàm in diuersarum nationum coniunctione illucescit.

Certè tales degeneres à Christi disciplinatu sunt. ignorat nationum discrimina Christi sanguis , quo vno arctiùs quàm omnibus patriæ vinculis colligamur. non imitamur magistrum discipuli, ducem milites, parentem filij si aliud sapimus, si non pariamur inter nos amore, quos lacrymis, sudore, sanguine , ac vocationis prærogatiua pariauit Christus. nec Apostolos in vnam gentem, sed in omnes misit. & ferè omnium gentium conuersiones ab exteris nationibus profectæ sunt, quo magis in illis diuina luceret potentia: ne quis illarum ad fidem conuersionē sanguinis propinquitati, linguarum cognitioni, amicorum opibus, similibusque tribueret.

Quot propè amoris proprii incommoda, tot huius sunt, cùm ex amore proprio nationum hæc propensio nascatur. commodior nimirum ab vberibus frequentata lingua, cibus, vestes, locij, amicus, cælum. ignaui militis signa hæc sunt. ardua poscit generosus, in quibus virtutē ostendat; gaudet asperis, in quæ magnos animos effundat. sanguinemque aut dare aut haurire pulcrum, ne inglorius, aut sicco hostili sanguine baltheo cadat: hæc prima illi

cura. ab arduis gloriam laudemque venatur. à quibus solis ingentia & viro digna decora nasci arbitratur. facit idem verus Religiosus, qui vocationis ac Christi ducis sui memor, indignatur animos patria sua claudi. angusti hi termini sunt virtuti. vniuersum contuetur orbem. semel renuntiauit patri, matri, fratribus, sororibus, amicis, patriæ, renuntiauit æternum. aut si retro flexit oculos, indignus Christi sui militiâ, indignus regno est.

Remedia.

E Superiorum ferè vigili studio speranda ac petenda sunt. initia proinde, seminaque mali huius validâ secanda & excaudicanda manu sunt.

Quòd si publicis priuatisque monitis non cesserit malum, ad pœnitentias decurrendum erit, etiam publicas in publicis delictis.

Quòd si neque hîc steterit malum, seriò de dissensionum harum auctoribus à Religione tota rescindendis deliberandum erit. Clementia est sœuire in paucos, vt vniuersi corporis valetudini consulatur.

Nec inutile fors fuerit misceri nationes, vt mutuo hoc conspectu conuictuque

coalescāt animi. plurimū enim ad coniunctionem contubernia faciunt, maximè si à prima ætate mutuo assuescant conuictu. non quòd frequentem in linguarum varietate & imperitia, missionem probem; aliquam tamen probo, & paucorum à prima adolescentia consuetudo, mirum quantum ad variarum gentium coniunctionem valeat.

Neque quenquam in quacunque gente excludendum putem à muneribus, etiam Superiorum, modò reliqua functionibus eiusmodi necessaria adsint. Nam vniuersam aliquam gentem à talibus excludere, magnam & dissensionum, adeoque & odiorum causam præbet. Nam quæ se seclusam videt, paria in aliis tentabit. atque hinc iam partium & nationum contraria & aduersantia prosiliunt studia.

Et licet inter genuinos, vereque Religiosos, fuga potius horrorque, quàm dignitatum aut munerum prosecutio, aut vota esse debeant; nescio tamen quis sensus à negatis functionibus pectus animūque feriat. præscidisse, ac in solidum negasse, quasi in vota impulisse est. offer, fastidient. nega, propendebunt. crescit à negatis amor, à concessis fastidium. vt ad expletionem satis sit potuisse: ad desiderij

prouocationem , negatum fuisse. Et vniuersim gentis alicuius exclusio validissimum alienationum ac odiorum prouocamentum est. quis enim nesciat , ex omni gente viros enasci magnos , & sæpe vnā destitui, aliam abundare ? ita vno non raro sæculo & ætate plurimi in vna republica duces imperatoresque , ac in omni scientiarum genere exurgunt magni, cum insequenti sæculo nullum bellica, aut literaria gloria clarum reperias. mutuare proinde ab aliis, cum propriis destitueris, prudentiæ est: magis etiam in Religione ; in qua non à nationum varietate, sed à dignatione, ac meritis munia distribuenda sunt. quæ res valido illam in primis vinculo colligat, & non nisi stolidissimi ingenij est, nolle ad externa circumspicere auxilia, cum domesticis destituaris. Sanè potentissimos ferè summorum imperatorum exercitus è varia gente videbis; vt mutuis emulationibus crescerent animi, dum pro gentis suæ gloria in posteritatem itura quisque pugnaret. primasque ferè orbe toto victorias à misto variarum gentium robore relatas legimus.

Proderit incommoda secum considerare, quæ è nationum discrimine nascuntur, beneque de aliarum gentium moribus

bus sentire & loqui, semperque in illis inuenire quod laudem mereatur; quæ verò meritis reprehensionibus obnoxia sunt, alto silentio premere: humaniter illos benigneque excipere, ac impensius etiam in salutem illorum incumbere: operamque suam prolixè spondere, prolixius etiam rebus exequi, peculiarem etiam familiaritatem cum illis induere, sæpiusque oportunitate data colloqui, aliquid etiam quando Religio patitur, propensionibus illorum indulgere: hilari etiam vultu excipere à moribus nostris aliena, si nihil contineant Religioni aduersum: ac facillimum esse in delictis illorum ignoscendis: parcissimè cum laude de gente sua loqui, prolixè de aliena: si quæ misceantur de gente tua minùs proba, aut damnanda etiam, cum risu ac modestia excipere; quædam fateri, quædam suauiter excutere, alioque sermonē flectere, ad laudem nimirum gentis alterius, aut quamcumque rem aliam.

CAPVT XVII.

Nimia cum uno alteroſue familiaritates.

A Emulationum hîc magnus aperitur campus. paulatim enim illæ excreſcunt in alienationes, adeoque in odia, & frequētes oblocutiones, murmurationes, detractiōes etiam; quoque magis hæ familiaritates creſcunt, eo magis etiam creſcit obloquendi facilitas. quod quò promptius fiat, cauſæ improbandi hæ priuatas familiaritates & diſquiruntur, & non magno conatu ab aliis reperiuntur. itur deinde ad talium mores, cùm aut faſtum, & reliquorum contemptū ſinguli interpretentur aliorum vitiationem & fugam; ſingulorum vitia, tanquam coalitionis cauſa ſingulis imputatur. nec famæ hîc parcitur aut gloriæ. tantum poſſunt conceptæ è familiaritatibus hiſce indignationes ac æmulationes.

Sequitur deinde in aliis fuga conſuetudinis talium, vt omnes alieniores tandem reperiant, & diffidentia plenos. quicunque enim ſe neglectum videt, contemptum etiam arbitratur, & ab innata paucorum ſuperbia naſci hæc putat, aut à ſtudio reliquis ſe præferendi. quod vbi ſemel aliorum

rum

rum animos peruasit, omni ope qua dictis, qua factis deprimere tales conantur, quos per priuatarum familiaritatum studium ad maiora conniti suspicantur.

Nascitur etiam plerumque è priuata hac tanto studio parata consuetudine, vt mutua facilè vitia imbibant, adeoque sequantur, æmula quadam morum similitudine, tanto nimirum futuri coniunctiores, quanto mutuis vitiis propinquiore. Coniunctio enim, à morum ferè similitudine, initia & incrementa sumit: hinc vt placeamus amico, aut cuius amicitiam venamur, mores effingimus; probi illi aut improbi fuerint, minima ac postrema cura: maxima, placuisse, & ingenio ac moribus se alienis conformasse est. Vincit nimirum familiaritas, quem vitium vincere non potuit: imò quos valido tentationum procurfu vincere non potuit diabolus, vincunt familiaritates. dum aut offendere nolumus, aut moerorem ingenerare, aut placere lubet, aut imitari etiam iuuat, delectatque similem amico fieri: vt quos arctior quædam necessitudo coniunxit, connectat delictorum paritas, ne nimirum ruborem incutiat amico, si imitari vitia erubescat: quasi amicitia corruat, nisi scelerum connexio statuatur.

E mutua hac etiam familiaritate, mutuas necessum exurgere adulationes. cùm enim mutuam deuitent offensionem, mutuas decantant laudes, mutuoque se scabie hac capti perfricant: probant omnia, improbant nihil, veriti ne quid alienationis enascatur.

Discindimur his familiaritatibus, imusque in partium studia, ac aduersarias molitiones: nec iam vniuersim caritas, aut amicitia stat, sed in vno aut altero capite. quæ res noxia in primis Religioni est, exponitque corpus totum iniuriarum oppugnationibus, cùm nudet latera, viribusque quæ totius corporis coniunctione continentur, spoliæ, exuatque omni robore, quod mutuo vniuersim amore firmatur.

Maiora etiam ab his amicis mala quam ab inimicis metuenda sunt. nam cùm ab his sibi quisque caueat, neque facillè quidquam illis committat, quod ruborem iniicere possit, non habent metuendi causam. cùm enim quisque se suaque sciat ab inimicis obseruari, insidias verbis rebusque tendi, nemo prudens pœnitenda elabi permittit. accedit, hostium quæcunque consilia, beneuolentiæ signa muneraque, ac iuratas etiam sponsiones suspectissima meritò esse; vt in perpetuis verborum fa-

etorumque suorum versetur excubiis quis-
quis hostes patitur. at ab amico aut perfa-
miliari quis se tueatur? quis non intima re-
ferat familiariori sibi, siue consilij, siue so-
latij, siue leuandi mœroris causâ? è qui-
bus ingentia deinde pericula damnaque
metuenda sunt, ab offenso nimirum fami-
liarioris illius animo. offensionem verò
nasci è minimis etiam rebus experientia
docemur.

Et fallaces ferè has familiaritates, dolo-
soque cinere amicitias ex his natas tegi in-
dies discimus. neque enim diutius perstât,
quàm sperata partis cuiusque emolumen-
ta ferent. vbi illa corruunt, collabascit o-
mnis amicitia, quam ferè quisque commo-
do suo metitur. excidit spe sua, & frustrata
est illum opinio, dilabitur omnis familia-
ritas. ita qui nihil sperat, cùm nihil metuat,
non faciliè aliorum venabitur amicitias,
quas quisque bono suo venatur.

Ingens deinde hæ familiaritates, diuinæ
familiaritati impedimentū iniiciunt. cre-
das ingentia flumina flammæ extinguen-
dæ iniecta. Et sanè quantum ferè amicitie
hæ crescunt, tantum diuinæ decrescunt.
quantum enim prioribus concesseris, tan-
tum diuinis ademisse videris. occuparunt
priores animū? occuparunt totum, Deum-

que exclusisti, cùm illi locum nullum reliquum feceris, qui omnem prioribus concessisti.

Demum in carne ferè consummantur hæ familiaritates, desinuntque in mutuum commodorum, honorum, similiumque rerum connexionem. cùm enim in talibus, non Dei maior gloria, non boni communis amor, aut proximorum salus, sed suum cuique emolumentum propositum sit; fit vt ab his paullatim quàm longissimè recedamus, ac in sensuales plurimum familiaritates dilabamur. semel enim seposito Deo, alioque nobis fine proposito, toti per priuatorum commodorum præcipitia ad carnem sanguinemque diuoluimur.

Remedia.

HVmanum amorem nostrum diuino amore metiri, nec ab alio, quàm à diuino principia illius petere, aut ducere: hinc fiet, vt cùm in omnibus pares diuini amoris causas reperimus, pari omnes amore complectamur, pari que familiaritate ac beneuolètia, quæ amoris famulæ quædam sunt, in omnes feramur. Hæc certa, & falli nescia regula est, à qua quantum per priuatas

uatas amicitias deflectimus, tantum à veritate aberramus, mendacio iungimur.

Frequens in nobis detestatio omnium quæ Religionis propugnacula roboraque dissoluunt: cùm verò inter prima priuata illa priuatarum familiaritatum studia sint; perfacile erit viro Religioso intelligere, quo loco illa habere debeat, qua cura ac sollicitudine vitare.

Aliquoties in anno meditationes hac de re instituere, cogitareque apud se sæpiùs, religiosam familiam nobili musicæ harmoniæ meritò comparari posse; in qua vnus dissonantia vniuersam concensus suauitatem turbat & euertit, & ridendam aliorum auribus musicam propinat. facit hoc, quicumque harmoniacum hunc Religionis concentum priuatis familiaritatibus turbat.

Iuuabit etiam non assuescere paucis, sed promiscuè omnibus, maximè recreationis temporibus, eumque arripere, quem primum fortuna obuium dederit.

Proderit vetus illud sæpiùs secum reuol-
lere, Sic ama tanquam osurus, sic odi tan-
quam amaturus. quod in magna familiari-
tate locum non habet. amamus enim in
illa tanquam semper amaturi; hinc com-
mittimus varia tanquam semper celanda,
tan-

tanquam semper amico . fallimur . nullæ propè in humanis æternæ amicitia sunt, quas leuissimus aliquando flatus dispellit, tanquam nubeculam coalitam validiores venti. Sanè nemo in erubescenda corruet, qui amauerit tanquam osurus. neque enim tali poenitenda committet , aut ad quorum propalationem erubescat.

CAPVT XVIII.

Familiaritas, & gratia quaesita externorum Principumque virorum.

SP ECIE plerumque hanc ambimus animas lucrandi, & Religioni conciliandi, maximè viros magnos: reuera plurimum ad ea amore proprio impellente trahimur, magna ferè multorum offensione, æmulatione, odio, emolumèto propè nullo, errorum & lapsuum periculo magno, vt tam carè familiaritas hæc parari non debeat, Religionis nō rarò damno ingenti, nominisque illius fœda deuenustatione. Neque enim quidquam procliuius est, quàm inter Magnorum quæstas familiaritates verbo aut factò labi: quod vbi contigerit, vno non tantùm lapsu, bona laboresque omnes sepeliuntur, vt illorum me-
moria

moriam iam nulla sit, quasi vna potenti spongia deleta, aut tanquam falce recisa sint; sed grauis insurgit indignatio, quæ in vniuersum etiam corpus transit, & tanquam à Babylonia fornace, vicina, & latè etiam posita amburit. vnius enim error abit in omnes, & delicto vnius plectuntur omnes, ab vnoque indignatio nata totum corpus amburit.

Et sanè tot in omni Religione, omnium retro sæculorum docemur exemplis, vt nullo alio magistro, opus sit in terrorem & cautelam: neque vigesimus quisque intactus ab hac aulica flamma pedem retulit. Ita amburitur quisquis propiùs accesserit, vt vix cineres referat, vel ignium vestigia, sæpiusque in fauillas abeat, quàm in lenem vstulationem.

Et experientia tot iam ætatibus docemur, perraros omnino, ea aut virtutis opinione, aut integritatis fama, aut pietatis sensu, à Magnorum familiaritate ad Religionem rediisse, qua egressi fuerant: plurimos etiam aulicam consuetudinem miserando vocationis naufragio nobilitasse; vt vix iam trigesimus charybdim hanc tabula enatarit, fortuita potiùs, quàm præprouida felicitate; reliqui irrespirabili hoc profundo absorpti sunt.

Nec

Nec facilè quemquam reperies aulicis
hiscè Magnorum moribus assuetum, qui
non ea retulerit, quæ vix annorum pluri-
morum deleri spongia potuerunt. Ita se-
mel Magnorum consuetudine delinitus &
assuetus Religiosus, vix affectum hunc nisi
cum vitæ aut infamia deponit. Iam ubi in-
ualuit illa nobilitatis prurigo, vilescit quid-
quid humilitatem, & instituti tenuitatem
sapit: atque hinc vocationis quidam con-
temptus nascitur, omniaq; displicent quæ
probata prius; dulcia nimirum in amari-
tudinem, mella in fella, medicamenta in
venena versa sunt; & quæ antè adamabat
anima, in horrorem mutata sunt: exulat
candor, & pristinæ religionis simplicitas,
evanuit pulsa sincertas, veritas abacta est;
& pro his aulici mores, politica agendi
ratio, mentiendi libido, doli & simulatio-
nes subintrarunt. Nec mirum ea adhære-
scere quæ inter aulicas consuetudines in
dies teruntur manibus.

Fugiet hanc familiaritatem, quicumque
vocationem amat, qui præcipitia vere-
tur infelici, in omni quâ patet orbis Reli-
gione, exitu funestata: quique nullos ab
illa meliores, omnes propè deteriores exi-
uisse videbit; paucissimos integra nominis,
quam intulerant, æstimatione; omnes ferè
in-

ingenti eiusdem decoloratione. præterquam quòd ea res in Religione, magna non vltimarum æmulationum mater sit. nam cùm vident reliqui ambitioso aliquẽ conatu Magnorum familiaritatibus se implicare, domesticorumque consuetudini subtrahere, quasi viliorẽ sociorum consuetudinem ac conditionem auerfetur; in auersiones etiam ipsi, adeoque & in odia decedunt, carpuntque iam etiam optima, cùm æmulatio inuidentiæque è captata magnitudine nata, religiosum alioqui pectus occupauit: contingitque plurimùm, vt, qui aliena sectatur, domestico excidat amore, ac Magnorum interim beneuolentia careat, vtrisque inuisus, aut sanè neutris probatus. Equa re mœror exurgit, & animo non satis Deo, aut cælestibus dedito melancholia exoritur, vniuersum internæ mentis robur emedullans, & quidquid est spiritus boni, radicitus excaudicans. Hinc languor, & spiritalium rerum omnium fastidiũ ac nausea: sibi que, aliisque demum grauis, miseram vitam trahit, finitque etiam miseriores.

Sequuntur externorum æmulationes inuidentiæque; qui non ferunt Religiosos tanta Magnorum vti familiaritate. nec res ferè magis vlla in oculos incurrit, aut citatiora

tiora certioraque odia prouocat. tritum namque est, quæ consequi ipsi diffidimus, aliis inuidere. hinc illæ in æmulationibus euertēdi molitiones: quasi leniendo mœrori medicamentum sit alios deturbasse; mitiusque damna feramus, si socios nacti fuerimus. Huc accedit, Principum plurimum delicta familiarioribus ascribi. prudenter beneque se habet Princeps, Principis ingenio naturæque illius benignitati tribuimus; aberrat à pròbitatis regula, in familiarē illi Religiosum omnis culpa reijcitur. non monuisse etiam aut dissimulasse in his, fecisse est.

Sequuntur & reliquorum in Religione non minùs noxiæ æmulationes, imitandi nimirū hæc studia. hinc mille excogitantur viæ, non tritæ priùs Religioni, mille inueniuntur maioribus ignoti modi. cumque per nos, perque domesticos ad optata peruenire non possumus, externos in consilium adhibemus pudendæ ambitionis nostræ. quòd si nec hac successerit via, vertimur in indignationes, in detractiões, in euersionē conatuum alienorū. tantum potest æmulationi iuncta ambitio, nulli parcit, & in maximum, in optimum quemque citatiore fertur passu. nam in aliis æmulationum materia deest. nescit enim

enim æmulum paruo contenta humilitas,
in magnis inuenit quod ambiat, quod æ-
muletur.

Ferè etiam ingentibus aulica hæc ca-
ptata familiaritas adulationibus plena est:
dum enim placere studemus, displicere
nolumus, amorem venamur, offensionem
fugimus. purpuræ proinde & gratiæ ser-
uiendum est. quare placitura dicimus, fa-
cimur, & ad omnem Principis voluntatem
vela vertimus. cumque vnicum studium
gratiam parare, partem conseruare; mo-
dis ad hanc rem idoneis vtimur. quod cum
fieri non possit, nisi pleraque ad gratiam
eant, liberum adulationibus campum a-
perimus, laxamusque indomito huic vitio
liberrimas in omnem partem habenas:
plùs laxatùri si plùs placuerimus. quæ res
ad quàm indigna Religiosos propellat, ne-
mo non videt. certè generosi spiritus hæc
esse non possunt, non cælum suspirantis,
non æterna cogitantis, non Dei sui gra-
tiam ambientis.

Omnis deinde in hac familiaritate, mo-
nendi libertas perit. quod si in Principis
confessarium Religiosus talis ascitus fue-
rit, quantis se induit conscientiae laqueis
Religiosa libertate deposita? dum mone-
re timet cuius gratiam venatur, cuius in-

dignationem veretur. & tamen ferè non monuisse hîc, deliquisse est, & Principis sui error in doctorem cadit. monuisse verò, non rarò excidisse gratia est. quid faciet? monebit? parata offensio est. tacebit? Deum habet iudicem. ita dum amittere gratiam veretur, silentio cauenda premit. grauius etiam est, dum, ne offendant, assentitur roganti, & laudat damnanda.

Periclitatur in his frequenter castitas, cùm inter aulicas sermocinationes ferè minùs pudica, & castis indigna mentibus intercurrent. Paupertatis etiam amor flaccescit, cùm plerumq; aliquid opum, commodorum, dignitatumq; etiam non cogitanti, affricetur. assuetudine enim ac quadam vitiorum familiaritate ac consuetudine, etiam quasi nolenti, aliquid adhærescere solemne est; quo magis ambienti, & vltro se in illa coniicienti? Obedientiæ etiam vis vel vniuersim tollitur, vel magna sui parte minuitur; cùm vix talibus imperare Superioribus liceat, ne fòrs in offenso subdito, offendant Principem, exurgantq; patrocinatorum ac intercessionum molitiones: quæ vbi inualuerint, prostrata iacet obedientia, non facilè caput erectura.

*Men.
const.
c. 12.*

Addit S. Basilius: *Qui maiorem in modum*
secu-

secularium hominum amicitia delectatur, eaq; re assidue cum illis esse in colloquio cupit; is ex frequenti cum illis sermone, prauas eorum affectiones in animum facile insinuauerit, & mente rursum cogitationibus mundanis completa, à præclara illa, quam erat ingressus instantia operis desciscet, & à se deinceps proscrip-
ta vita spiritualis stabilitate, quem ex animo effuderat vita prioris vomitum resorbebit, atque adeò saucius tandem concidet, miserè confixus ab hoste. Et B. Ephræm: Qui conuersationibus gaudet mundanis, sæculum nondum se odisse ostendit. nam sicut qui ignem excitat flammam suscitatur: ita & mundana colloquia, passiones & affectiones prauas in corde monachi commouent. Et Dauid ab Augusta, Ordinis Minorum: Sæpe experti sumus, tam in nobis quàm in aliis, quòd frequens exitus & conuersatio cum sæculo, & occupatio nimia negotiorum externorum, deuotionem mentis extinguit, feruorem spiritus tepescit, forte propositum virtutis emollit, cor dissoluit, studium proficiendi debilitat, delicias docet amare, tempus sine fructu expendere, verba otiosa multiplicare, iocis & trifis intendere, orationes prætermittere. Et fortiter in terrorè B. Laurentius Iustinian. O quot tēporibus nostris fuerunt, qui tanquam ardentes lampades & mundi luminaria lucebant coram hominibus, paulatim ex con-

Tom 2.
param.
46.

Lib de
discip.
cap 22.

*uersatione secularium, & confabulatione tep-
facti, ad pristina opera secularis vita miserabi-
liter redierunt! Et docemur à Seneca, vt non
Epist. 7. pigeat Religiosos imitari Stoicum factum
ex se magistrum: Nunquam mores quos ex-
tuli refero. aliquid ex eo quod composui, turba-
tur: aliquid ex his qua fugauì, redit.*

Signa verò animi in hac familiaritatis
venatione non Religiosi esse possunt: si
quis eo in illam affectu rapiatur, vt graui-
ter molestæque ferat, si ab iis retrahatur;
si maiore cura & sollicitudine illorum ne-
gotia, quàm quæ Religionis propria sunt,
suscipiat; si insciis Superioribus, negotia
illorum amplectatur, doleatque sibi eo-
rum tractationẽ à Superioribus inhiberi;
si maiori conatu & studio viros magnos,
Principesque sibi, quàm Religioni conci-
liet; si Religionis ministeria minùs specio-
sa contemnat, & indigna putet quibus se
tradat, & implicetur; si paupertatẽ & ob-
edientiam incipiat fastidire, commodis-
que suis hinc inde quæsitis studeat; si Supe-
riorum monita minùs æquo ferat animo,
simpliciumque consuetudinẽ aspernetur.

Remedia.

A Mouendi ab hac familiaritate quoscunque pronos in eam Superiores deprehēderint; aliisque occupandi & distinendi muneribus, minùs quidem speciosis, sed tutioribus minoriſque periculo obnoxiiis: demum loco etiam mouendi, alioſque ablegandi.

Proderit etiam aliquem è domesticis maximè spiritualement excitare, qui vltro amicitiam illius ambiat: quò securiùs eum poſtea, maioreſque fructu monere poſſit.

Magna etiam cura in hunc inuigilandum erit Præfecto ſpiritus, qui ratione crediti ſibi muneris, maiore auctoritate & pondere monere ac terrere poteſt, magnorum maximè exemplis, qui propè omnes à quæſita hac familiaritate ad ſæculum & Ægypti ollas tranſierunt, infortunatoſque ferè exitu vitam finierunt.

Nec erit inutile, retrahendi tales conatum, Principi magniſque viris eluſceſcere: vt, ſi quid erroris poſtmodum intercurrerit, videant non fruſtra Superiores motos fuiſſe, & in illius auocatione laboraſſe, erroresſque non iam Religioni, ſed homini adſcribantur.

Malorum quæ ex hac familiaritate nasci consueuerunt seria recordatio non parum proderit: ingentia pericula, damnaque accepta, finem deinde vocationis suæ proponere alium omnino ab aulica consuetudine. Deum denique sæpe sibi ob oculos proponere, cuius seruitio Religiosus mancipatus, & à quo filiorum prærogatiua donatus est. vt indignum sit tanti Imperatoris sacramento addictum, minoris se obsequio addicere, & ad inferiora dimittere.

Lib. 8. *Agebat illud prudentissimè, cauens innotescere*
 Confes. *personis, secundùm hoc seculum maioribus, de-*
 cap. 6. *uitans in eis omnem inquietudinẽ animi, quem*
volebat habere liberum, & quàm multis posset
horis feriatum ad quarendum aliquid, vel le-
gendum, vel audiendum de sapientia.

CAPVT XIX.

Affectus in parentes, in sanguine
iunctos.

NEc postremum, nec contemnendum in Religione malum. damna namque à nimis prodigo in suos affectu, & varia

ria & magna sequi necessum est. fauēmus propinquorum opibus ac dignitatibus, prosperiorisq̃ue fortunæ successibus. inde etiam operam nostram aut rogati impendimus, aut vltro etiam pollicemur: & negotiis iam sæcularibus, quibus antè renunciauimus, induimur & implicamur.

Accedunt non rarò ex infelici euentu, pœnitendæ, & ruborem incutientes commendationes; fitq̃ue vt qui sæculo semel ac parentibus nuntium miserunt, plus illis, quàm extra Religionem immergantur, magna sæpe aliorum inuidia, qui Religiosorum studio operaq̃ue parentibus se illorum postpositos vident; & inimicos illos non priuati tantùm, sed Religio patitur: ac non infrequenter ex amicissimis hostes parantur, cùm se priuatis Religiosorum propinquitatibus posthabitos sentiunt.

Crescit deinde obligatio apud eos, quorum operâ parentibus impetrata dignitas, aut quæcunque res alia: transitq̃ue hæc obligatio in Religionem, quam tanquam collato beneficio obstrictâ sibi arbitrâtur.

Et ferè videmus prodigum hunc in parentes amicosq̃ue affectum, totum in sæculi affectum ruere, exuto spiritali domesticorum, ipsiusq̃ue adeò Religionis affectu: vt omnis Religiosæ coniunctio-

nis æstus hac propinquorum alluione, tanquam vastissimi fluminis prolapsu, extinguatur. neque enim affectus hic propinquis tantum adhæret, transit ad opes & dignitates, ad eaque omnia, ad quæ studia illa, cogitationesq; feruntur. Frequentatæ enim res sæculi, affectuum in parentes materia, nescio qua Religiosam mentem fuligine aspergant, ac tanquam sepiatingant: nam cum frequenter illa menti obuersentur, manibus etiam tangantur, non leuia sui relinquere vestigia, nemo prudentior mirabitur: imbibimusq; paulatim pro Religioso, sæculi spiritum & mores, tanquam lana imbrem, valida nube fufum: etiam amare incipimus, quod procurare non pudet, ambire etiam, & vocatione sæpe deserta, ad sæculi dignitates commodaque cogitationes flectere ac transferre.

Præeunt deinde tales exemplo suo reliquis, prouocantq; ad par in suos studium, & ad æmulationes Religioso indignas, ad alienationes etiam animorum; dum indignantur reliqui, improbantque has commendationes, effusumq; in suos affectum; cum semel mundo, suisque mortui, salutem incumbere animarum, non suorum indulgere deberent amor.

Enimio deinde propinquorum affectu, ferè in carnem & sanguinè Religiosi prolabuntur: vt affectus ille suorum de propinquo carnis affectum iaculetur, accendatque recludatque tot annorum cineribus reconditum impuritatis ignem; & plurimū ex his initiis ad illicita quæque ruunt, cum aut sororis, aut neptis, aut alicuius sanguine iunctæ, femineis ac mollioribus assuescunt colloquiis; liberioribusque prospectibus. dum enim non timent mala in propinquo sanguine, minùs cautè prouideque versantur: caduntq; non rarò propinquis hisce insidiis, aut sanè causam illæ præbent, pulso priore metu, puritatis custode, familiarioris cum aliis similis sexus consuetudinis: è qua celeri procursu reliqua postmodum mala mortem allatura promanant.

Sequitur & aliud malum Religioni in primis noxium. facit enim frequentata hæc cum propinquis consuetudo, vt multa iam liberius in sinum illum Religiosi profundant; domestica dicta, facta consiliaque retegant: nec quidquam tam reconditum sanctumque, quod tantis affectibus claudatur. narrantur aliorum imperfectiones, animorum in hæc aut illa vitia propensiones; & hæc ferè innata qua-

dam naturæ propensione in maius tolluntur, virtutes deprimuntur: si quid dignum laude, extenuatur: siquid reprehensione, immensum augetur. atque hæc mulierculis sæpe committuntur, à quibus propero cursu, non sine insigni augmento abit ad alios.

E qua re & mala nascuntur plurima, quæ cuique obuium est videre: & tanquam iniecto fræno, aut compede, sperata reprimuntur bona: Religionis nomen minuitur: salutisquæ proximorum propagatio arctatur, dum illorum virtuti detrahitur, à quorum singulari industria, nominisquæ æstimatione magna salutis proximorum pars pendebat.

Et ut reliqua non terreant, terrete nos
Luc. 14. meritò debeant verba Domini: *Si quis venit ad me, & non odit patrem suum, & matrem, & uxorem, & filios, & fratres, & sorores, adhuc autem & animam suam, non potest meus esse discipulus.* Seuera omnino sententia. cuius erit, si non fuerit Domini discipulus?
Luc. 16. *Nemo seruus potest duobus dominis seruire; aut enim unum odiet, & alterum diligit; aut uni adhærebit, & alterum contemnet: non potestis Deo seruire & mammonæ.* Hinc illa sponsi ad fidelem animam desponsandam
Psat. 44 sibi verba: *Audi filia, & vide, & inclina aurem tuam:*

tuam: & obliuiscere populum tuum, & domum patris tui. Et concupiscet rex decorem tuum: quoniam ipse est Dominus Deus tuus. Magna prærogatiua animæ obliuiscantis domum patris sui, vt concupiscat Rex decorem eius, deducatque illam in cubiculum genitricis suæ, fiatque illi sponsus, atque inter vbera illius commoretur, dignetur illam associatam iam sibi reginam & sponsam osculo oris sui.

Et verò quid sperari de Religioso potest, cui adhuc patriæ affectus inhæret infixus animo? non compatiuntur se mutuo patriæ amor, & Deus sponsus. illam si amas, destituendus sponsus est; hunc si vis sponsum, deferenda patria est. Acutè Hugo Victorinus: *Delicatus ille est adhuc, cui patria dulcis est: fortis autè, cui omne solum patria est: perfectus verò, cui totus mundus exilium est. Ille mundo amorem fixit, iste sparsit, hic extinxit.*

*Lib 3.
Did.
erud.
cap. 20.*

Remedia.

VT qui propensiores in propinquos sunt, non permittantur soli cum illis versari, sed adiungatur socius, linguæ & rerum intelligens, & spiritus boni.

Rarior omnino permittatur collocutio.
Interdicatur seuerè commendatio omnīs,

mnis, & si qua deprehensa, non permittatur impunita.

Mittantur ad ea loca, in quibus nulla commendationum harum commoditas esse possit.

Moneantur Superiores, ut diligenter dispiciant, ne quas aut ad suos scribere patiantur litteras, aut ab iis accipiant negotiorum administras.

Ipsi Superiores exemplo suis præeant, caueantque ab omni omnino propensionis in suos ostentatione; idque adeò provide ac seriò, ut nec verbo in hoc genere labantur: fugiantque, quacunque mentione iniecta, omnem harum rerum materiam, & apertè à se repellant.

Magnorum in Religione virorum exempla proponantur, qui omnem hunc affectum fortiter calcarunt, ac in se aliisque damnarunt, & ferè patria domo egressi remotissimè ab omni cognatione vitam duxerunt.

Iuuabit etiam pericula damnaque ab affectu hoc in non ultimis virorum nata proponere, ut horum exemplo propensiores terreantur.

CAPVT XX.

Commendationes ad Ecclesiasticas, aut seculares dignitates

IN numeris permixtae periculis.

Quia dubiae in impetratione. quod si non succedant rogata, in nos plurimum cadit indignatio; cum arbitrantur per nos stetisse, quo minus consecuti fuerint. ita ferè euenire solet, cum omnia nobis ab vno pollicemur, cum aut potentiae, aut gratiae fidimus, conatum licet omnem explicauerit; si frustrati spe sumus, in illum ipsum indignationem vertimus, & negatae, aut non consecutae rei causam in patroni negligentiam coniicimus: è qua ferè opinione, nullo licet plurimum fundamento nitatur; animorum nascuntur alienationes, & amicitiae in odia commutantur.

Quia incertae in euentu, & impetrati muneris administratione; vnde graua timeri aliquando reipublicae pericula possunt. quid, si se aperiant improbi, qui latebant mores? quid, si laesae maiestatis crimina? quanti conscientiae exurgunt remorsus, verecundia? quanta pericula auctori & promotori? Ferè enim promoti à se delictis

lictis inuoluitur: ac licet magna innocentia tegatur, semper tamen in probatissimo vestigium aliquod liuoris aut vulneris manet: neque facile clientis à se notam patronus eluet, maximè in iis, quæ Principem, aut rem publicam tangunt, in quibus tanquam indomitis furentibusque fluctibus, aut tanquam insanis montibus, rupibusue, sedibus ab imo diuulsis, non vicini tantum, sed & longè positi vna ruina consepeliuntur.

Ferè aduersarios iusto Dei iudicio, commendatione nostra prouectos experimur. quod plurimis in vtraque dignitate Ecclesiastica & sæculari exemplis doceri potest eo magis, quo plus sæpe operæ studijque impendimus. Nec mirum, viro hoc Religioso euenire, cum se extra modestiæ & regularum suarum limites extulerit. nam & illi ipsi, qui patrocina nostra poscunt, licet patrocina hæc probent; Religiosos tamen patronos non probant, cum non ignorent, longissimè à Religioso instituto sæcularia patrocina abesse debere. vtuntur tamen ijs vt proditoribus reges; non amant, non colunt: timent magis, & potentiam hanc in alieno solo metuunt; amaturi, si in sæcularibus resideret: in Religioso, cuius omne studium salus propria & proximorum esse de-

debeat, oderunt veriùs quàm amant ridentque tacitè secum, tanquam frænos aureos, iubamque leoninam in ouino vertice.

Offensio dein nascitur omnium illorum, qui se neglectos à nobis arbitrantur. Hinc pro vnus dubia sperata beneuolentia, plures inimicos paramus; quorum odia longè Religioni perniciosiora sunt vnus commendati fauoribus, ijsque plerumque incertis ac dubijs, ac in perniciem potiùs quàm subsidium tendentibus.

Graue etiam Religioni accrescit onus, cùm pluribus eadem præstanda veniunt, maximè sanguine iunctis, amicis, aut qui tales videri volunt, beneficis, alijsque huius generis non paucis; vt tota iam Religio in negotiationis quandam curiam, aut patrocinantium atrium vertatur: nam cùm nemo ferè in illa sit, qui non aliquem habeat clientem, aut amicum cuius commodis studeat, per facile videre est, quanta imminet moles à Religioso instituto alienissima. Vnde fit vt crescētibus paulatim commendationibus, quæ innumeram secum negotiorum turbam trahunt, elanguescat spiritus, dilabaturque primæuus ille rigor; & qui ad Deum, animorum salutem, Religionis augmentum ducebat, ad sæculi mo-

res & imitationem deducat.

Grauiadein damna metuenda vniuersæ Religioni, cùm vnusfactum errorque toti Ordini adscribitur. ita ferè euenire solet, vnus delicto plectuntur omnes: arbitreris tanquam è paradisi traduce, crimina transire in socios; & quos sociauit amor, imprudentiæ colligari nexu, tanquam si vnus insipientiæ, temeritatis, arrogantiae, vanitatis nota signentur omnes. virtutes nimirum singulorum, vitia omnium sunt. quare nemo alterius virtute coronatur; vicio vnus damnantur omnes. quo maior cura adhibenda est, vt ab omnibus, quæ quoquo modo in vniuersum redundant corpus, abstineant singuli.

In generatur etiam plurimorum animis politicismi opinio, cùm pluribus eandem dignitatem ambientibus, operam nostram addicimus: qui enim se vident frustratos, & vni de facto operam nostram impensam, veniunt in non immeritam politicismi de nobis suspicionem; peritque omnis conceptæ æstimationis opinio, cùm tales iam non in Religiosorum, sed in aulicorum numerum referant; tantam in posterum verbis fidem adhibitori, quantam operæ competerint. Vnde nec in salutis negotio certa iam stat fiducia, cùm exemplo vno edocti,
aliud

aliud arbitrentur verbis exprimi, aliud mente contineri. quæ res vniuersam salutis animarum spem euertit & eludit, tanquam si aut vna falce quidquid erat messis futuræ demetas, aut vnus frigor ardoribus omnem torcularis spem fallas, aut vna denique nouacula omnem bonorum operum spem præscindas.

Accedit demum non leuis obligatio apud eos, quorum in commendationibus operâ vñ sumus; qui beneficium hoc non in vnum hominem sed in totam Religionem collatum arbitrantur. Quare obstrictam se hanc putant habere, paria aut maiora expectantes, & cum tempus aut ambitio suadent, suo quasi iure poscentes: quibus si neget, cum beneficia acceperis, durum. nam & gratitudo quædam obstrictos nos tenet, & impensus in nos labor, fauorque iure suo paria deposcunt; aut si rogati operam negamus, præter ingratitudinis notam, animorum alienationes, odia quoque expectanda sunt, quæ in vniuersum Ordinem transfundantur.

Remedia.

OMnium vbique commendationum interdictio: nam si vel tenuem rimâ, quocunque demum prætextu, illis aperuerimus,

rimus, integra postmodum pandentur ostia:serpit enim hoc studium,vbi inchoaueris,ac instar canceri aut scabiei,ex vngue ac capillo vno vniuersum occupat hominem.dulce venenum,quod magnos etiam viros à leuibus initijs, tanquam riuulis, in ipsa commendationum maria impulit, è quibus salua rate nunquam enatarunt: sed neque subducere eam,cùm vellent,potuerunt.in altum enim prouecti,medios inter procellosos fluctus, nequidquam littora portumque spectarunt.

Seuera in transgressores punitio, vt & ipsi desuescant, & alij terreantur, ne paria audeant:quos enim pariauit delictum,pariare & pœna debet; imò grauiori pœna post primi punitionem,secundi transgressores puniendi sunt.nam primo exemplum deerat, vt aliquid excusationis videretur posse prætexere, secundis nulla excusatio reliqua est.

Exemplorum in infortunato ac infelici euentu frequens commemoratio, qualia in terrorem & fugam, siue domestica, siue externa nunquam deesse possunt. obrui-mur enim multitudine,nec quisquam vlla memoria se illis miscuit, cuius non hisce flammis ambustæ pennæ timenda posteris dederunt exempla, pœnitenda-
que

que reliquerunt vestigia.

Damna periculaque Religioni è varia commendatione nata recensita iuuabunt.

Fuga etiam sæcularium negotiorum, ac inter Religiosos limites certa rigidaque arctatio: in id solum intenti, operamque laboremque pollicentes, quod in salutem tendit animarum: quod vnum veri Religiosi est, reliqua tantum ab hoc spiritu absunt, quantum à proximorum salute recedunt.

Nulla cuiuscunque negotij etiam pij susceptio in scio Superiore; quem tamē ne nolentem in suam trahat sententiam inferior, curandum est: nam ubi precibus, tantum armata dextra, res extorquetur, magna simplicis obedientiæ pars deperit, raroque felici successu, res peraguntur: quin imò infortunato ferè exitu donum funestant.

CAPVT XXI.

Paupertatis neglectus.

QUIM immemor quasi votorum suorum, quæ distinxerunt labia sua, ad opes & perituram se rerum studium conuertit, incipiuntque placere, quæ generoso ausu contempsit prius, admirari etiam & vo-

uere atque infectari, quæ forti calcatu pro-
triuerat antè, factus ex hoste amator &
laudator opum. miserima planè conditio,
dum, quæ re ipsa pondera excussit, repetit,
& sub pusillo ingemiscere delectat, qui
vno iactu, exonerauerat humeros sub
immani mole fatiscientes: eoque miserior,
quo minoribus implagatus detinetur, qui
vniuersa perfregerat retia, tanquam si pas-
serum laqueis teneatur, qui leonum pla-
gas excusserat.

Et sanè post ingentes sæpe thesauros nõ
semel calcatos, indignis viro reculis irreti-
ri, cõmiseratione dignissima resest: breuia-
rio tenetur elegantiori, icuncula capitur
formosiore; veste delectatur hic laxiori, ille
strictiore, comptiore alius: vt meritò in ad-
mirationem rapiantur quotquot viderint
valentem antè & robore plenum imple-
xum inherere minimis, qui maxima diffila-
uerat tanquam plumas vento raptas, aut
festucas fluctibus illisas.

Magis etiam mirandum cùm magnus
ille diuitiarum cõtemptor, qui per iocum
& lusum magno impetu adlabentes, & vn-
dique afflatas opes percussisset, postre-
mis inhæserit reculis; post Philistæa nimi-
rum agmina æreasque diffractas portas,
Dalilæ fascijs, fæminea implexis manu.

Turpe

Turpe viro, magis etiam Religioso, maxime cum repudiata repetit, & amare incipit, quæ odisse didicerat. Infelix omnino infortunataque vicissitudo, è seculi totius regnorum imperiorumque etiam cōtempore, amatorem nasci spretarum rerum, & adrepere ad ea, quæ valido antea impulsu, magna omnium laude, sæculo regnique maior, vt Religioso cæloque indigna protriuerat.

Varia ex hīs sequuntur mala, dum ambire & amare Religiosus audet, quæ neglexerat prius, & sæpe veteranus commodis inhiare, quæ spreuerat tiro. hinc enim inquietudo nascitur animorum, nec quies menti vlla, donec optatis fruatur. Sed neque in consecutis statur. semel enim habendi admissa auiditas ad noua deuoluitur; vt è minimis tanquam è semine ingentes succrescere arbores videas, latissimis postmodum ramis vicina quæque sterili sua vmbra obtegētes. nam & in exemplum & imitationem res hæc reliquos trahit, dū noxia emulatione priuatis quibusdā commodis suis student, amantque quæ oderunt antè: inde iam secreta prosiliunt consilia, & ab externis mutuamur, ad quorum nomen exhorrescebamus antè.

Decurritur deinde ad priuatorum com-

modorum studium, & dum ab amicis aut pœnitentibus reculas emendicamus; libertatem proijcimus, pro pulmento nimirum primogenita vendentes. ingensexinde ex amissarum aut Superiorû voluntate subductarû rerum priuatione mœror nascitur, crederes regno exutum regem, aut amplissimis possessionibus sæculi possessorem. Profiliunt ex his iniitijs integra murmurationû plaustra, & maiora iam audet animus, tegitque necessitatis quodam prætextu, tanquam pulchro velamine fœdam proprietatum sentinam. ingeniosa nimirum ad vitiorum suorum tuitionem auiditas, amorque proprius est: & qui antea ad priuatarum rerum possessionem expauescebat, nunc illam etiam tuetur, & subdola ratiocinatione propugnat. & plurimum auidam hanc proprietatis famem, priuatorum honorum sitis comitatur, incipitque Religiosus hac titillari & exasperari: & qui vltro pleno se sinu expandentem gloriam repulerat, obuijs etiam fugientem prosequitur vlnis; nec erubescit ad prosecutionem, qui prius erubescibat ad vltioneam oblationem. indiuiduo enim ferè nexu opes & honor iunguntur; vt qui illas amet & ambiat, honore delectetur.

Omnia deinde paulatim corporis com-
moda

moda irrepunt, amorque rerum harum totum occupat hominem: incipiunt displicere duriora, & quidquid leuiorem veramque religiosam disciplinam sapit. Accedit ciborum & potus auaritia, vnoque impetu tanquam ruptis aggeribus omnia corporis commoda inuolant: cibus proinde parcior potusque moderatior virtutum propè reliquarum vehiculum, pro minùs ingenua parcimonia ac pro sordesciente etià auaritia habetur; prodigalitas & liberior in escam potumque profusio virtutis nomen sortitur: & auarus iam audit, quisquis mensas religiosa moderatione circumscribit, quisquis libidinum fomitem excludit, quisquis ignibus materiam subtrahit; liberalis verò quisquis prodigit parcenda, & animorum in saginato corpore flammæ nutrit.

Accedit quòd omnis paulatim pietas in talibus refrigescat, omnis Religionis amor congelascat, omnis disciplinæ rigor consepeliatur. nam cum in paupertate tanquàm in fundamēto omnis religiosi ædificij structura formetur; illa collabente, omnem necessum est reliquam structuram collabescere, nec rimas tantum ducere, sed vniuersim corruere; cū primus omnino gradus lapisque angularis, cui reliqua Reli-

giosa domus innititur, ab auri opumque contemptu originem trahat.

Iam cum Beati pauperes spiritu à Domino dicantur, non infelices erunt paupertatis supra omnes opes à Domino amatae contemptores, desertores, osores? & quam infelices, illius in Religione post sacra Deo vota, transgressores? ut meritò quidam dicat: *De radice peculiaritatis, vel amore pecunie gignuntur vitia hac: inobedientia, superbia, auaritia, contumelia, vana gloria, extollentia, voracitas, mendacium, luxuria.* & , *Turbat pacem cum proximo, subiicit hominem diabolo, auertit animam à Deo, ut nusquam feratur affectus quam de conseruando peculio, iuxta illud, Vbi est thesaurus tuus, ibi est & cor tuum.* & pergit, *Rarò salutis remedia admittit proprietarius, à paruis ad maiora precipitatur, sub specie boni & necessitatis. è conquistis bonis oritur displicentia sui status, murmurat, detrahit, iudicat omnes, transferre se cogitat ad tutiorem locum, sub colore profectus, viaticum putat sua apostasia insolenter respondere Superiori, quarit causas discessus, alios nititur deprauare.* & antè: *Inter fratres concors & amica perstat consonantia fraternæ caritatis, cum nihil habet vnus, quod non omnes. inter proprietarios rixæ sunt, discordia, diuisiones. Res communes non sunt materia litis, sed cum*
quis

Beati. 6

*quis vult sibi appropriare, surgunt inquietatiua
 pacis, iuxta illud, Conturbat domum suam qui
 sectatur auaritiam. Ob hoc vitium Cyprianus
 Diaconum suum sepultura Ecclesia priuauit, &
 patres sepultura asini tumulandos voluerunt.
 quanto ergo magis punietur in inferno, qui sic
 punitur in mundo?*

Paupertatis verò neglectores, proprio-
 rumque commodorum amatores vir ma-
 gnus fures vocat, & Achan, Anania & Sa-
 phiræ comparat: latrones, quòd plurimos
 exemplo suo iugulēt: sacrilegos, cùm Deo
 in pauperibus data prodigant: proditores,
 cùm domesticos defraudent bonis: apo-
 statas, cùm abiiciant repellantq; à se pau-
 pertatem, cui arctiori vinculo, quàm ve-
 stibus locoque religioso astringuntur: ido-
 lolas, cū auaritia, Apostolo teste, sit ido-
 lorum seruitus: mendaces & hypocritas,
 Spiritui sancto ad Ananiæ imitationem
 mentientes: plenos dolo & diabolo.

Remedia.

A CHRISTI primorumque Sanctorum
 exemplis petēda sunt: quorum si ali-
 quando gloriæ participes esse velimus, et-
 iam opum contemptu parari debemus.
 Christi sanè in Propheta suo verba sunt:

Psal. 87. Pauper sum ego, & in laboribus à iuuentute mea.

Psal. 39. & Ego mendicus sum & pauper.

A recordatione seuerissimæ dictæ in Epulone ac diuitiarum sectatoribus sententiæ. & apud Lucam quanta interminatione insurgit? *Qui non renuntiat omnibus quæ possidet, non potest meus esse discipulus. & Apostolus: Qui volunt diuites fieri, incidunt in tentationem, & in laqueum diaboli, & desideria multa inutilia & nocua, quæ mergunt homines in interitum & perditionem. radix enim omnium malorum est cupiditas: quam quidam appetentes, errauerunt à fide, & inseruerunt se doloribus multis.* & Dominus: *Amen dico vobis, quia diues difficile intrabit in regnum calorum. & iterum dico vobis, Facilius est camelum per foramen acus transire, quàm diuitem intrare in regnum calorum.*

A frequenti opum ac cælestium thesaurorum, centuplæque redhibitionis & sponfionis recordatione. hinc illud, *Beati pauperes spiritu, quoniam ipsorum est regnum calorum.* & Iacobus: *Nonne Deus elegit pauperes in hoc mundo, diuites in fide, & heredes regni, quod repromisit Deus diligentibus se? & auxilium apud Isaiam pauperi habemus: Factus es fortitudo pauperi, fortitudo egeno in tribulatione sua, spes à turbine, umbraculum ab aestu. ut ingenti fiducia pleni, certam in vnum Deum*

Deum spem coniiciamus, certi impossibile esse destitui sperantem in Domino, cuius hæc verba sunt, *Ego pars & hereditas tua.*

Num.
18.

A damnis passim omni propè Religioni datis & acceptis à possessionum opumque coaceruatione.

Danda Superioribus hîc opera, nequid ad honestam religiosamque sustentationem desit, ne necessariis Religiosi destituti, ad paranda sibi illa animos studiumque conuertant. meminerint huius: *Liberalis & bona prouisio Prælati, omnium necessariorum: unicuique necessaria dentur sine exceptione personarum. ut quemadmodum sibi prouidere desiderat, ita & subditis: nam ex indigentia necessitatis, ex mala prouisione, ex tenacitate Prælati sæpe oritur hoc vitium.* Caueant proinde Prælati, ne subditis occasionem proprietatis subministrent, vel necessaria subtrahendo, vel superflua admittendo.

Plurimum in hac, ut in omni alia re, Superiorum exempla proderunt; ne non necessarijs abundant, ne superfluis stipentur, ne ad delectationem aut ornatum aut priuatum commodum rebus utantur, communibusque contenti, singularia deuitent.

Ea demum res ingens reliquis ad veræ paupertatis amorem irritamentum est: neque enim Superiore præeunte, quidquam facile

facile cuiquam graue videbitur: & sola sæpe erubescencia deterrebit subditos, pudorque è Superioris in paupertatem affectu collectus, ne ad maiora commodioraque manum porrigamus: neue ad sæculi opes commodaque, sæculi desertores circumspeciamus.

CAPVT XXII.

Singularia in cibo, potu, vestitu, reliquisque corporis commodis.

A Emulationum & murmurationum in Religione causa, ac dissensionum seminarium. nam si Superior hoc malo laborat, perpetuam sugillandi materiam præbet, eò magis quò omnium in illum oculi intenti; eoque nocentiùs, quò illius exemplum transit ad plures, seminaque in posteritatem spargit, prouocatq; reliquos, viamque secuturis sternit ad paria aut maiora etiam audenda. sæpe enim, quò exempla desint, à noxiis abstinemus; at vbi præiis maiorũ factis referatus est aditus, proni ad libertatem commodaque decurrimus: nec imitari pudet, ad cuius initia erubescimus; & cùm pudeat audire primum, in imitatione gloriamur.

Eoque

Et quæ grauius hoc malum est, quod non se intra primi transgressoris terminos cōtineat, sed singuli ferè aliquid adiciant noui, hic in cubiculo, ille in vestibus, alius in cibo & potu, non nemo in omnibus; ac tandem in delicias & luxum, sæculumque totum res abeat. è quibus infelicibus initiis paupertas Religionis murus corrui, nudaturque; vniuersa Religio propugnaculo, exuiturque suis viribus, robore destituta.

Accedit ciborum hunc reliquorumque commodorum delectum, ipsis plerumque Superioribus grauem adgenerare molestiarum causam. nam cum in plerisque Religionibus perpetui non sint, fit vt munere defuncti, ægrè consuetis commodis careant; patianturque non postremas in illorum defraudatione difficultates, multorum ex in fabula facti, & acerbiorum irrisionum materies.

Si inferior malo hoc tenetur, sociorum in se æmulationes excitat, oblocutiones etiam, percutiturque ferè tot linguis ac iudiciis, quot capita in vna domo sociata habet. Iam exemplo suo ad paria prærogatiua reliquos prouocat, maximè eos qui meritis, laboribus functionibusque superiores, pares, aut non inferiores sunt. adolescentioresque etiam ad paria aliquando auden-

audenda incitat : neque enim quidquam in vtramque partem , vitiorum ac virtutum, maiorum exemplo potentius est.

Graues deinde tales Superioribus sunt, & plerumq; illorum conuictum auersantur, subterfugiunt oblatos, ac cum mœrore quodam patiuntur domesticos; dum aut negare non audent ne offendât, aut concedere non audent ne reliquos ad paria prouocent.

Quòd si Superiorum vnum beneuolum nacti fuerint, reliquos patiuntur aduersos; ita vt quod aut naturali quadam munificentia, aut priuato affectu concesserit vnus, negaturi sint alij. quæ negatio durissima in consuetis est. prosiliuntque exinde omniũ propè generum tentationes, tristitiæ ac mœrores, cor exedentes, ac murmurationum integra plaustra. quòd si fortiter in sententia steterint Superiores, non raro tabescunt tales, ac quasi emedullatis ossibus decinerefcunt; si grauiorum metu aliquid à constantia remiserint, fastidiosos patiuntur, ac vniuersæ familiæ pacem euertunt.

Iam quotquot commodis suis auidè, & supra quàm Religiosam modestiam, ac patipertatem decet inhiantes vides, eos ferè in carnem & sanguinem labi compe-
ries,

ries, ac in inchoatæ tandem vocationis desertionem. cùm tepescat primò in his omnis Religionis spiritus, qui fomentis hisce tanquam iniectis puluinaribus suffocatur. neque aliud ferè certius signum est, languentis in vocatione, ac à primo fervore degenerantis animi. vnde ingens spiritualis nausea nascitur; à qua ferè vehemens flamma carni iniicitur.

Repugnat etiam hæc singularitas mutuo amorì: qui paritate roboratur & crescit, imparitate subvertitur. ignorant filiorum discrimina vbera necessitati nata, vniusque patris filij prærogatiuam degeneratione nesciunt. nimirum quos vterus vberaque pariarunt, pariare debet amor. què minuit quisquis de prærogatiua censerì desiderat; quisquis sub eodem patre matreque Religione, potiora sibi arrogat, aut concedi desiderat.

Illud verò mali huius magnitudinem auget, quòd superbiæ tanquam fundamento inædificetur. qui enim præ reliquis singularia ambit, plus sibi deberi quàm aliis censet: si consequatur, plus sibi merito suo cõcessum quàm aliis gaudet. singularis esse voluit Lucifer, dum parari Deo studuit: si in ordine reliquorum angelorum stetisset, æternùm stetisset. prærogatiua

tiva illum vota æternaturis flammis addixerunt.

Remedia.

A Superioris exemplo petenda, qui si fortiter intra consuetos se Religionis terminos teneat; vel solo rubore reliquos continebit, terrebitque ab hoc parum Religioso conatu. Sanè si fortem in hoc genere se præbuerit, commodorumque contemptorem; non difficulter reliquos ab hac spe excludet, terrebitque ab illorum petitione. memor proinde sit illius Sapiientis: *Rectorem posuerunt te, esto inter illos, sicut unus ex illis. ut nihil habeat, vel diligat pomposum, mundanum aut vanum, sed omnia quæ habet, Ecclesiasticam personam & statum suum deceant, & humilitatem ostendant: nihil in omnibus appareat, quod iactantiam vel curiositatem sapiat. non est enim humilis cordis indicium, curiosa querere, pretiosa affectare, excelsa ambire.* Et sanè indignum viro est cælestia cogitanti, ad quæ natus, ad vilia hæc se abiicere, & primogenita cum Esau pultibus commutare.

*Bon. de
6. alis,
66.*

Exempla hîc deinde omnium ætatum in omni Religione magnorum virorum valent: qui per calcata corporis commoda, ad magna claraque in terris cæloque

no-

nomina detulerunt. exempla etiam generosorum militum, qui vltro assuescunt duris, auersantur mollia, quibus vt corpora, ita & animi effeminantur. nescit mens ad magna se erigere, quæ vilioribus deprimitur.

Terrendi denique multorum magnorum lapsibus erunt, quicunque ad hæc auidè aspirant. & admonendi gula dediti, ne in *Greg. in*
 eo quod escarum delectationi incumbunt, luxu- *Pastor.*
 ria se mucrone transfigant, & quanta sibi per *P. 3. c. 19*
 esum loquacitas, quanta mentis leuitas insidietur, aspiciant: ne dum ventri molliter seruiunt, vitiorum laqueis crudeliter astringantur. tanto enim longius à secundo parente receditur, quanto per immoderatum usum dum manus ad cibum tenditur, parentis primi lapsus iteratur.

Incommoda etiam frequenter ob oculos ponenda, quæ ex hoc singulare delectu sequi nata sunt: idque in publicis exhortationibus, conferentiis, ac priuatis etiam Superiorum aliorumque monitis.

Remediorum verò potentissimum est nihil vlli præ reliquis indulgere. præscindenda proinde omnis sub initium occasio est, ne serò remedia cogites postquam inualuere mala. in scintilla nimirum sua extinguendum incendium est.

CAPVT XXIII.

*Neglectus munditiei & modestiæ
religiøsæ.*

LICET mundities in omni exteriore cultu non sit Anachoretis, & ab hominum consuetudine ac familiaritate remotis necessaria; illis tamen qui proximorum saluti promouendæ student, perquam necessaria videtur. ne dum è sordium conspectu & odoratu in personarû fastidium veniunt, doctrinam etiam institutionemque contemnant. ferè enim certa sperati fructus spes est, placuisse. quicunque proinde ex instituti ratione ad aliorum salutem vocantur, munditiei studeant.

Nolo curiosiores vestium compositores, nolo capillorum structores, nolo sæcularem ambitum, moresque ad aulam compositos, ad externam beneuolentiam captandam figulatos, ac quasi è capsa & acu prodeuntes, nolo ornatum luxus ac deliciarum indicem: munditiem volo grauitatis & interioris nitoris ac munditiei testem. nolo sordes. neque enim sanctimonix aut solidæ pietatis hæ signa sunt: plusque non rarò fastus ac arrogantix in ex-

tremo quodam vestium corporisque neglectu, quàm in curiosiore delectu est. mediocritatem tenuisse viri & virtutis est. non splendeat proinde, nec sordeat vestis, ut sine cultu culta sit, & dum paupertatem Religiosus amat, non amet sordes quibus fastidium nauseamque prouocet: sed neque exquisitiore compositione vanitatem signet. Sanè nec affectata sordes, nec exquisitus cultus Religiosum decent: hic delicias, illæ animum neglectum ac remissum, aut inanis gloriæ studium designant. nam cum ferè habitus hominem suum loquatur, sit ut exterior constitutio interioris animi indicium sit, tanquam si quis è vestibulo de domo sententiam ferat, è fronte oculisque mentem designet, è verbis pectus cuiusque recludat. non quòd hæc falli nesciant, sed quòd plurimum externi mores ingenium cuiusque prodant.

Qui ergo aliorum sibi salutem proposuit, vitiorum extirpationem, virtutum insitionem; nec fastum præ se ferat nec contemptum, ne suadellæ ostia claudat, ne sordibus terreat, horrore exanimet, mollioreuè cultu aliquid de probitatis opinione amittat. virilem habitum morefque virtus deposcit, maturos, graues. Non

loquatur vestis feminam, sed neque sordet aut agrestem & inhumanam negligentiam aut barbariem aliorum oculis ingerat. nemo è speculo & crinali acu ad vitiorum odia, virtutumque amorem potens prudensque persuasor prodiit; nemoque facile in quæ voluit animos flexit benevolentia destitutus. cùm ergo horrorem sordet, accuratiorque compositio molliem testentur; vtrumque prudens animarum auceps fugiet, media sectabitur, extrema deferet; nec fœda à se illuie reliquos terreat, nec munditiem tantum colet; sed vbi nitore in familiaritatem pellexerit, in virtutis amorem pertrahet.

Tota etiam domus nitorem præ se ferret, magis etiam singulorum cubicula: quorum concinna aut neglecta compositio, inhabitantis ferè animum moresque designant, compositos, incompositos. & incredibile propè est, quantum domus totius apta concinnitas externorum animos in admirationem & amorem trahat, quantumque sordes deterreant, ac in contemptum ducant: vt plerique è domestica compositione de incolentium moribus statuunt. magis etiam in Religione: in qua in minimo deflexisse magnum videtur, maximè cùm ea innata omnibus opinio sit,

fit, ab interna animorum constitutione externa profluere, talemque cuiusque mentem esse, qualem mores factaque testantur, nec aliam. proditor interiorum mores sunt. neque certior interiorum index reperiri potest, ut frons, oculi, verba, vultus, corporis iactatio, lentitas celeritasque incessus, modesta aut sordida, cultior aut neglectior habitudo totum hominem suum loquatur. etiam ipse odor nescio quid virtutum vitiorumque spiret. tetrum omnes auersantur, nimiam vestium fragrantiam, impurioris molliorisque animi signum designare arbitratur. Quid? quod inter prima tuendae valetudinis adiumenta munditia sit.

Dici deinde non potest quantum siue ad imitationem, siue ad persuadendum religiosa morum compositio valeat, vultus totius modestia ac maturitas, decens membrorum omnium compositio, frons serenior, oculi modicè deiectioni, & verecundiam signantes, os genaeque pudorem testantes, manuum totiusque corporis seria maturitas. ut vel haec sola ingentia non semel incitamenta fuerint vitae melioris. potentiora nimirum ad suadendam facta verbis sunt, plusque potest muta morum locutio, quam fecundissima verborum

flumina, diuite quocunque fonte manantia. ita non rarò plus Superioris aspectus ad seueritatem compositus quàm acerbiora verba potuerunt : vt lasciuior etiam quisque si in seueram matyramque vultus compositionem inciderit, comprimat meditados ignes, ac tanquam fulmine percussus cogitata recondat, & audaciæ suæ cursum pudoris freno retrahat : vt sola sæpe vultus castimonia satis sit ad validè procurfantes flammæ restinguendas. credas integra superfundi ignibus flumina, ita momento sistitur omnis æstus, cùm in verè recundos seuerosque maturosque mores incurrat.

Iam ipsa oculorum casta maturitas, verè recunda deiection, quantas peccatorum occasiones tanquam falce secat? quantis contra liberior illorum procurfatio ostia referat hostibus? quanti deinde omni ætate vno licentior oculorum intuitu ceciderunt? quanti starent si stetissent oculi littoribus suis cõtenti? quantos verò vnus mulierculæ curiosior circumspectio subiugum misit? quot captiuas animas vna audacior oculorum iactatio in triumphum duxit? quanti æternis pascuntur ignibus, viuerent caloribus gaudiis, si proditor oculus non prodidisset animas? quanti deniq;

mutuis

mutuis oculorum propudiosis ignibus decinerati in inglorias fauillas abierūt? adeo vt vel semel aliquid vidisse minūs castum multorum annorum materiam suggerat. quid, quòd in omnem etiam ætatem? tantum potest prouida arctiorque oculorum cohibitio, tantum licentiosior peregrinatio. Idem de reliquo corpore dici potest, ore, auditu, tactu, incessu. quæ omnia si ad religiosam modestię regulam componantur, ingenti decore Religionem illustrant, magnamque sui admirationem amoremque prouocant: cùm contrà lasciuior liberiorque ostentatio dedecus inurat, auctoritatem minuat, probitatis opinionem tollat, speratamque animarum messem fallat.

Remedia.

A Superiorum in primis vigili, ac in omnem partem intenta cura petenda sunt, crebris monitionibus, cubiculorum singulorum totiusque domus frequentibus lustrationibus.

A nouitiorum seria institutione magnarum rerum pars pendet. ferè enim in omnem ætatem adhæret quod primis illis annis imbiberunt. seriò proinde ab ipso Religionis exordio excitandi erunt

Epist.

113. ad

Soph.

ad munditici cultum & amorem, ad modestiæ admirationem & studium. quæ vna, Bernardo teste, *cervicem submittit, ponit supercilia, componit vultum, ligat oculos; cachinnos cohibet, moderatur linguam, gulam frenat, iram sedat, firmat incessum*, omnemque corporis motum ad exterioris etiam cuiusdam elegantiae normam, religiosamque compositionem fingit.

Pœnitentijs deinde à sordibus deterrendi, præmijsque laudibusque ad munditiam, decentemque corporis compositionem impellendi sunt.

Commodorum etiam è nitore, incommodorumque è sordido neglectu nascentium consideratione iuvare singuli poterunt.

Excitandum denique in singulis vehemens salutis proximorum desiderium, quæ res ad nitorem impellet, cum benevolentia ante omnia captanda sit illorum quorum salutem studemus: quam nemo sordidior neglectu ac cultu, & externo squalore nauseam prouocaturus parabit. honestatis enim pulcritudine ferè omnes capiuntur, munditia, maturaque morum consuetudine gaudent, & lubentes hõrum monita admittunt.

CAPVT XXIV.

*Sæculares mores, risus, ioci, minusve
religiøsæ recreationes.*

QVÆ paulatim animos ad se rapiunt, auocant ab instituti & perfectionis amore. Irrepunt hæc mala à leuibus primum initiis ad summa, vt nihil iam præter nomen & togam in Religioso videas: mores sæculum non redolent, sed exprimunt. Et sanè qualem externo conuictu & conuersatione Religiosum videris, talem interiùs cogita. respondent interioribus externa, cùm hæc ab illis proficiuntur; vt meritò mentiri habitu Religiosum dixeris, qui sæculum moribus, veste Religiosum præfert.

Sed neque consistere vocationis amor cum sæculi moribus potest: exprimunt amorem mores. sæculum loquuntur? à sæculi amore nascuntur. amarent vocationem? amorem hunc mores referret. aliud ostendant? aliud amant. Neque certior index interni affectus est. nescit amor mentiri. prodit affectum, flammæque spargit, quibus intus ardet. vt omne iudicium constitutionis internæ, ab externis moribus

Dd 5 fumen-

sumendum sit: neque enim alios testes habemus, non certiores, minusque fraudibus expositos. Deum quis loquitur? possedit animum Deus. vana inaniaque loquitur? possedit animum mundus. nemo è vase odorato vino pleno venena promit: nemo ex impuro fonte aquam puram. nimirum,

Matt. 7 rum, non potest arbor bona malos fructus facere:

Mat. 12 cere: nec arbor mala bonos fructus facere. & Bonus homo de bono thesauro profert bona: & malus homo de malo thesauro profert mala. nec

Matt. 7 quisquam colligit de spinis vuas, aut de tribulis ficus.

Sequuntur ex his multorum offensiones, animorumque alienationes, conceptaque de Religione opinionis ingens diminutio. neque enim cum his moribus integra stare opinio potest, nec prudens de interno homine aliud iudiciū ferri, quàm quod mores exprimunt.

Atque hinc illud sequitur, vt collapsa semel sanctimonix aut sanctitatis opinione, exigua in sanioribus intercurrentibus monitis, fides resideat, fructus aut admodum tenuis aut nullus, totaque spiritualis emolumenti spes corruat: nemo illis paulo circumspectior arcana credat, neque facile animam committat; nemo prudentior ad virtutem magistros hos deligat, quos
ad

ad sæculum moribus præire potiùs, quàm
ad cælestia videt, nasciturque inde vetus
illud, Exemplo præeat, qui docere volet:
&, Talem te finge, qualem alios desideras:
Res monitis præluceant, facta dictionem
ducant: Illudque in alio spera, non quod
animo foues, quod verbis exornas; sed
quod rebus factisque exprimis, memor
grauissimę censurę D. Bernardi, *Inter sacu-* Lib. 2.
lares nugæ, nugæ sunt: in ore Sacerdotis bla- de Con-
sphemiæ. sider.

Exemplo etiam talium in paria trahun-
tur reliqui, maximè iuniores; in quibus
necdum ad viuum & radices, domita &
excisa sæculi vanitas, leui hoc exemplo-
rum flabello exurgit in arborem, veteres-
que inanitim vanitatum fructus: & ferè
quoscunque in moribus deprehendimus
effusiores, & sæculum suum loquentes, il-
los postmodum vidimus, ab his infelicibus
initiiis, in carne prolapsos. præludunt enim
illa carni & sanguini, viamque insternunt
perituræ animæ.

Illud etiam ex his malum nascitur, vt
tales plerumque domesticam turbent pæ-
cem, vniuersam disciplinā euertant, exem-
ploque suo regularū inducant neglectum,
ac instituti denique totius contemptum:
a cuius vniuersim placitis morum vanita-

te recedunt, cùm nihil aliud quàm sæculum sapiant, sæculum loquantur. nam vt nihil minùs cogitent, fit tamen vt vsu quodam, ac sæcularium morum consuetudine, tantum ab omni religiosa modestia ac disciplina recedant, quantum ad sæculi mores accedunt; tantumque religiosarum rerum neglectum inducant, quantum sæcularium morum adducunt. dum enim hos imitari discunt, amare etiam assuescunt, & in deliciis habere; vnde fit, vt religiosæ modestiæ mores fastidio incipiant esse, nauseamque pariant animo sæculi moribus imbuto: maximè si à frequentatione, vt fit, altiùs infederint, & quasi in naturam abierint.

Iniuriam deinde Deo non leuem irrogare videtur qui linguam ipsi sacratam iocis verbisque non satis castis polluit. tanquam si quis nobilissimam gemmam sterquilinio contegat. cumque viuum Spiritus sancti templum Religiosus omnis sit, peculiari illi voto sacratum, quid arbitramur facturum, cùm dicata sibi membra ad sæculi mores transferri viderit? Angelos sanè super vno peccatore pœnitentiam agente gaudere docemur. quid facient super degenerare à maiorum institutis Religioso, sæculi moribus implicito? magno pro-

profectò aduersarius, qui circuit quærens quem deuoret, gaudio repletur, qui sciat viam per hæc ad quæcunque crimina ster-
ni, soletque se colloquiis hisce medium miscere, cùm piis cordatisque se misceat Deus. vbi enim duo congregati sunt in nomine Domini, ibi ductor ipse auctor-
que colloquiorum horum est.

Signum verò hæc colloquia sunt tepen-
tis & languentis in amore Dei. nam quis
amans non vltro lubensque prorumpit in
amatum? imò omnis amans perpetuus in
amantis laudibus est. nam cùm ille pectus
vniuersum occupauerit, non potest non
verbis effundere igneum amorem suum
corde clausum. in illo eloquens est, in aliis
infans; verborum in reliquis inops, hîc di-
ues est; parcus in aliis, in his prodigus.
quanto verò ardentius amat, tanto prom-
ptior in illius laude frequentiorque est.
neque vnquam amanti materia deficit.
mare magnum amor est: nauigat illud
quicumque amat. deesse nauiganti aqua
non potest, nec amanti laudes: vt non
laudasse, non amasse; adeoque de amato
siluisse, non amasse sit. Certè sola ego illū
veste Religiosum arbitror, qui parcus in
Dei, prodigus in sæculi moribus ac laudi-
bus est. parcus non esset si amaret, & Re-
ligio-

Matth.
12.

ligiosus esset si amaret . quare cùm parcus in illis sit, nec amat, nec Religiosus est. iam cùm verba sæculum loquantur, veste Religiosus , animo non est. cùm hunc alium verba prodant. dictum olim: *Ex verbis tuis iustificaberis, ex verbis tuis damnaberis* . nec potest animus religiosus esse in ore non religioso.

Et ferè quicunque in sæculi mores verbaque effusiores fuerunt , exuta tandem Religione, totum sæculum induerunt. nec mirum . induerant antè animo . nec poterat non totum se aliquando effundere animus talis, neque diu habitu solo mentiri Religionem . quòd si qua necessitate commodisque suadentibus in Religione perstet, monstrum non Religiosus est, tanquam si quis capiti equino hominis adnectat pectus; Religiosæ nimirum vesti animum, verba, moresque sæculares.

Remedia.

EX intenta Superiorum in omnium mores vigilantia peti debent, ut in femine suo occidantur hi mores, cùm nulla re maiora incrementa sumant, quàm Superiorum incuria & neglectu. Serio in accuratam regularum omnium observationem in-

incumbat, qua vel sola mores componuntur, domesticamque disciplinam fortiter tueatur. Describit eam Bernardus: *Disciplina virtus est, quæ corporis & mentis habitum componit, cervicem submittit, ponit supercilia, componit vultum, ligat oculos, cachinnos cohibet, moderatur linguam, gulam frenat, iram sedat, format incessum.* Accuratè Religiosum instruit Hugo: *Temperanda est etiam facies, & modifcanda in gestu suo, ita ut nec proteruè exasperetur, nec molliter dissoluatur. Sed semper habeat rigidam dulcedinem, dulcemq; rigorem, secundum illud Ecclesiastici, Ex visu cognoscitur vir, & ab occurso faciei cognoscitur sensatus. Motus corporis, & risus dentium, & incessus hominis enuntiant de illo qualis sit. quia per illud quod foris, sine bene, sine male agitur, interior animi qualitas intuituum oculis patèter indicatur.* Idem: *Disciplina honesta conuersationis ex quatuor perpendi potest, ex gestu, motu, affatu & conuictu. gestus autem reprehensibilis est, si est aut mollis, aut dissolutus, aut tardus, aut incitatus. mollis significat lasciuum, dissolutus negligentem, tardus pigrum, citatus siue impetuosus inconstantem.*

*Epist.
113. ad
Sophia.*

*De di-
sciplin.
Monachorum*

Iuuabit in primis, si Præfectus spiritus fortiter insistat componendis suorum moribus ad modestiæ regulam.

Proderit etiam, si iunioribus, & ad sæcula-

cularem profusionem propensioribus, miscantur in recreationibus potissimum viri graues; nec permittantur iuuenes à seniorum se conspectu proripere. habeant semper quem obseruent, cuius oculum vereantur, cuius exemplo ad modestiam componantur, cuius, quando necessum, monitis comprimantur.

Quòd si quis post varia antè nequidquã tentata, maiore remedio eguerit, semouendus ille ad tempus à reliquorum recreationibus ac consuetudine fuerit, vt assuecat modestiæ, alijque hac seueritate mores temperent. Neque enim amor tantum, sed verecundia & metus magnum in Religione momentum afferunt.

Spiritualibus etiam exercitijs extra consuetum tempus assumptis & imperatis iuari talis poterit, vt sæpius ea etiam per annum peragat, donec se reducat ad eam morum maturitatem, quam iure suo Religio postulat.

Proderit vehementer, ante omnem recreationem fortiter animo Religioso dignam recreationem proponere, post singulas verò breuissimè eas animo percurrere, cogitareque illud, *Omne verbum otiosum quod locuti fuerint homines, reddent rationem de eo in die iudicij.* Simul etiam tacitum
secum

secum cogitare altam animi pacem tranquillitatemque post religiosè transactam recreationem, inquietudinem verò à vana recreatione insurgentem, malaque plurima quæ ferè recreationes has sequuntur; illudque magnorum virorum, Verbum leue in Religiosi ore blasphemiam esse, non quòd talis sit, sed quòd paulatim eò Religiosum ducat.

Vtile etiam fuerit, præsentem nobis Deum proponere, inspectorem, iudicem, præmiatorem. eoque modo recreationes omnes peragere, quo non illo solùm, sed & externis spectatoribus peractas vellemus.

Denique consultissimum fuerit semper aliquem è maturioribus domus iuniorum recreationibus interesse: ipsumque adeò Superiorem, quātum occupationes ferūt, colloco esse, è quo moderari illas possit.

CAPVT XXV.

Conuiuiorum frequentatio.

SIUE illa domi nostræ, siue apud externos instituantur, noxia in primis sunt. intepestcit enim his paulatim Religionis spiritus, qui cibi potusque magnam moderationem exigit, & ferè ieiuniis pascitur.

E e

Ita

Ita omni sæculo, quotquot arctius se Deo deuouerunt, ab insigni victus potusque moderatione initia duxerunt: quotquot verò laxata maiorum institutione, ad lautiores se mensas profuderunt, spiritum, quem ciborum continentia imbiberaut, exuerunt, & ad malorum demum extrema delapsi sunt.

Et ferè pari, quo frequentantur conuiuia ardore, pari spiritus, aut tanquam flammis exeditur, aut tanquam flumine aut spongia eluitur; vt quantum accessit creuitque mensarum, tantum decesserit decreueritque genuini spiritus. ita augmenta decrementa que à cibo potuque, spiritus iam inde à primordio mutuatur. neque vnquam in benè pasto saginatoque corpore, & escis vndique stipato, religiosam mentem, & solius Dei cupidam reperiēs. Nō possunt simul stabulare Deus & mensæ. quantum concesseris vni, tantum necesse detrahas alteri. quare si quē videris in mensas proniorem, eum in spiritu compèries retractiorem: quoque plūs quisque cibo potuque maduerit, hoc plūs spiritu exaruit. vt delicijs emedullari ac enervari spiritale robur deprehēdamus. Nam cū ciborum potusque copia, tanquam oleo libidinum crescant flammæ, perfacile qui-

uis

uis videat, restingui his cōstibus internarum
fluenta gratiarum. neque alia potentior li-
bidinum materia; quàm saginatum far-
tumque cibus corpus. vt validissima volu-
ptatum incentiua à cibo potuque nascan-
tur. Et ferè videmus eos qui victus mode-
ratione spiritu inceperunt, eiusdem libe-
riore consuetudine carne consummasse: &
vt nullus lapsus sequatur, minùs tamen ca-
stæ narrationes, quales inter pocula nasci
proclive est, potentibus tentationibus ma-
teriam in omnem ætatem suggerere solēt:
vt taceam ad illecebras femineum com-
positum ornatum, mollia verba, lasciuien-
tes oculos, quarum vel in medijs orationi-
bus recordatio ingentes animo parit mo-
lestias.

Sequitur hunc ciborum affectum, labo-
rum fuga, otij amor. languescit enim ad la-
bores corpus cibo fatigatum. colloquia
deinde venatur & fabulas, risus, iocos, lu-
sus, & quidquid sæculum de menfarum ac
conuiuiorum apparatu promittere solet.
terniturque his via ad mutuas detractio-
nes, quas ferè ex otio tanquam è fonte flu-
mina promanare videmus. prosiliuntque
tandem ex his liberiores locutiones, car-
nem & sanguinem redolentes, castitatis
omnisque puritatis hostes. inde etiam mi-

nus prouida oculorum custodia, blandior-
que prospectus, quam religiosam casti-
moniam, maturamq, seueritatem deceat.
itur demum ad verba libidine natantia,
parumque castas libertates, ac demum ad
malorum profunda. Nec mirum si duobus
his ignibus substructum corpus accenda-
tur, & appetere discat quod ignorabat.
neque sanè quidquam promptius quam
duabus his potentibus flammis inarde-
scere.

Plenas etiam ex his videas Religiosas
domus emulationibus, dum paria concedi
sibi quisque contendit. & vt ingeniosa cu-
piditas est, modi excogitatur & inueniun-
tur, quibus impetremus quod volumus.
quod si præclusa via est, murmuraciones
nascuntur. cum enim quæ prona hæc cu-
piditas implacabili auuiditate poscit, ne-
gantur, aut minùs quam vellent prodigè
largiuntur; exurgunt querimoniæ & ob-
locutiones, in quas reliquos etiam facile
propellunt, eosque maximè, qui non infe-
riore propensione in cibum potumque fe-
runtur. plena etiam conuiuia reperias de-
tractionibus, cum familiare sit inter men-
sas poculaq; in alios incurrere, liberiusque
effutire silenda, aliorumque mores carpe-
re, dicta factaque improbare, damnanda
lau-

laudare, laudanda dāmnare. à quibus si Religiosus sibi temperet, domum tamen ea refert quæ aliis narret. nec crimē agnoscitur quod palām inter pocula acceptum. nihil deinde tam sanctum tamque reconditum quod non deuomat vinum, impatiens secretorum: publicanturque persæpe ea à quibus fama vitaque pendet. nesciunt secretum vina: adeoque publicasse illis gloria est, & candidi pectoris symbolum. etiam domestica suaque retegere mala, pulcrum.

Offensiones deinde externorum sequi proclive est: qui si Religiosos videant in hæc proniores, & supra religiosam continentiam in cibum potumque effusiores; non immeritò offenduntur, contemnuntque non delinquentes tantum, sed vniuersam Religionem, cum ex paucorum horum affectu reliquos metiantur. magis etiam, cum liberiora, minusque religiosa insonuerint verba, moresque sæculum potius quam pietatem loquentes viderint, quod ferè inter pocula, in omni mensali deliciarumque profusione usu venire videmus, ut immemores sui, religiosæque modestiæ, cibo potuque impellente, plus longè de mundi vanitate, quam de religiosa referant maturitate. quæ res & scanda-

lum parit, & nominis æstimationem minuit, & proximorum in primis salutis aduersatur. Et sanctè prodigium sit in tanta prouocantium ciborum copia, vinoque prodigè propinato, modum statuere, ac se intra modestiæ ac continentiæ limites continere. dum prouocati veremur ne neglexisse videamur, aut honori detraxisse, aut amicitia minus concessisse, aut denique non satis affectui indulxisse.

Estque hoc huic vitio inditum, vt nulla moderatione exsatiatur, maioraque semper concupiscat: nec expleatur, donec insigni aliquo lapsu se nomenque suum dehonestauerit. sed neque hîc finis: vt oculis priuatos arbitrere, ita nec mala quidè, licet graua, in quæ inciderunt, vident, rapiunturque in dies ad deteriora. adeò difficile est modum in his statuere, vt etiam post præcipitia nouam quærant ruinæ materiam. Periclitatur deinde in his vehementer paupertas, cùm in tanta rerum varietate, immemores illius, multa profundimus veriùs quàm vtamur, & appetere discimus religiosæ tenuitati ignorata, desipiuntque domestica, & religiosæ mensæ quibus antè delectabamur fastidium pariunt. gustata nimirum copia inopiam detestatur, nauseatque iam animus super tenui

tenui cibo, qui per conuiuia lautioribus assuescit.

Neque domesticæ in hoc genere mensæ, minùs quàm externorum noxiæ sunt, maximè cùm ad eas vocantur externi. nam cùm dignitatũ illorum rationem habere volumus, fit plurimùm vt religiosos transgrediamur limites, pulso modestiæ rigore, effundimurque in apparatus sæculo magis, quàm Religione dignum. nec hoc non rarò cum offensione etiam conuiuiarum.

Accedit talibus alios ad paria excitari, & Superiorum exemplo ambire his similia, & imitari. Inde frequentantur domi conuiuia, & repetuntur mensæ ab instituto alienæ. dumque his externorũ gratiam venamur, fit iusto Dei iudicio, vt illa excidamus: neque enim per conuiuia beneuolentiam captare religiosum est.

Disciplina deinde domestica soluitur, dum protrahuntur mensæ, Religiosi quique his occupationibus distinentur. Iam dum inassueti talibus indulgent, & valetudinem lædunt, & religiosæ obliuiscuntur modestiæ, & inlatentès ignes excitant, vitiaque aliquando eruptura, lateque crescente consuetudine damna datura.

Illud etiam in his non caret incommodo, quòd lautius habiti externi, domesti-

cis exin suis, aliisque mensarum apparatus referant, augeant etiam: ac præ se nonnunquam liberaliorem tractationem vultu voceque referant. quæ res & Religione indigna, & meritam offensionis materiam præbet, & plurimum æstimationis detrahit, & proximorum saluti, ac diuinæ gloriæ propagationi non leui impedimento esse solet.

Neque in vno alteroque stare hæc conuiuia possunt: nam cum plurimi sint, quibus aut obstringimur beneficiis, aut quorum opera nouè semper egemus; multi quid dignitate, opibus, nobilitate, amicitia pares videri velint, pares etiam inuitatione esse volunt. Concedis omnibus? quid non iure metuendum? negas vni, concedis alteri? sequitur de prærogatiua hac indignatio, quæ etiam ad odia transit: vt aut omnibus concedendum, aut negandum sit omnibus. omnibus concedere, indignum Religioso. omnibus ergo negandum. & sanè quocunque te vertas, vix reperiri temperamentum potest. vnum enim admittere, altero neglecto non possumus. frequentanda proinde ac repetenda conuiuia erunt. verùm quis finis euntibus in orbem amicis, beneficiis, conuiujs? crescentibus etenim illis, hæc etiam crescere ne-

necessum est. quæ res incommoda quantæ secum trahat, nemo paullò prudentior non videat: cùm & vniuersam domesticam soluat disciplinam, modestiæque ac religiosæ castimonix mores, in vanos sæcularesque vertat; vt non iam vltra religiosam, sed externam domum præferat.

Tolliturque ex his pars maxima, in monendo ac suadendo, libertas. nam cùm deuinctum te teneat conuiuator tuus, fit vt non parum de libertate decedat. veremur enim offendere cuius beneficio obstricti tenemur. displicere nimirum volumus à quo mensale beneficiū accepimus, & erubescimus etiam in delictis monere, cuius munificentiam experti sumus. Misera conditio, pro tam vilibus libertatem vendere, imò pro tam leuibus æterna proijcere. nam cùm ferè conuiuia remunerationis ac quasi mercedis cuiusdam loco instituantur, meritam hîc mercedem accepisse videbimur priuandi æterna. & plurimum conuiuio vno omnem se gratitudinis obligationē exsoluisse sæculares arbitrantur. noui nos Esau facti, pro pulmento primogenita vendentes: vt meritò ab Apostolo moneamur, *Sobrii estote & vigilate, i. Pet. 5. quia aduersarius vester diabolus tanquam leo rugiens, circuit, quarens quem deuoret.* Sanè

inter vina ac lautiores mensas perfacile illi est exarmatum aduersarium ferire. ita cædit Amnon, Simon, Holofernes etiam muliebri manu: quo magis nos armata inferorum dextera. Et quam tentationem superabit qui deliciis succumbit? qui tam mollibus frangitur prostermiturque, quomodo interruentes leones & hostiles acies stabit interritus? Indignum viro, magis etiam Religioso, vinci à vino; à tam molli, generosum pectus Christi toties sanguine delibutum, sanguine pastum. & terret nos Sapiens: *Cui va? cuius patri va? cui rixa? cui fovea? cui sine causa vulnera? cui suffusio oculorum? nonne his qui commorantur in vino, & student calicibus epotandis? ne intuearis vinum quando flauescit, cum splenderit in vitro color eius: ingreditur blandè, sed in nouissimo mordebit ut coluber, & sicut regulus venena diffundet.*

Remedia.

MOderanda conuiuia erunt, & tanquam iniecto fræno reprimenda, vi etiam coërcenda. sæpiusque versetur animo, quare te Religioni dederis, sacraueris Deo. & illud Hieronymi: *Facile contemnitur clericus, qui sæpe vocatus ad prandium, ire non recusat. Consolutores nos potius in mæroribus suis,*

*Epist.
ad Nepotian.*

suis, quàm conuiuas in prosperis nouerint homines.

In solidum si conuiuia amoueantur, tutissimum erit. nam moderationem ægrè reperies, neque facilè ad mediocritatem deduces: inexplibilis enim quædam conuiuiorum sitis mentem occupat, quæ semel se ei dederit. Nec satiatur hæc auuiditas concessis, nec expletur modicis. & tanquam sphærica corpora, quæ supernè labuntur, non antè finem voluendi, quàm præcipitij faciunt: ita animus semel hoc malo possessus, nullum pronitati suæ finē statuit, donec ad extrema deuenerit, ut finis illi sit, cecidisse.

Seriis pœnitentiis, monitisque grauioribus delinquentes auocandi sunt. Superiores etiam à functionibus amouendi, quorum exempla eo nocentiora sunt, quo singula eorum facta, domesticis posterisque non rarò documenta & prouocamenta in imitationem sunt.

Proderit, exemplis eorum qui omni sæculo à conuiuandi pronitate ad graua delapsi sunt, reliquos deterrere. nec exempla deesse poterunt in omni Religiosorum Ordine, domestica tamen plus ad motum & terrorē poterunt, quanquam & externa in hoc genere iuuabunt.

Iuua-

Iuuabit considerare sæpiùs, quàm paucis natura contenta sit, quàm modico satietur. quanto etiam paratiores è tenui mensa ad magna surgamus, ad studia, consilia danda, imperia, virtutum exercitia, cælestium cogitationes, tentationum victoriam, hostium proculcationem.

Lib. 2.

in Iouinian.

Bene Hieronym. *Grādis exultatio animi est, cum paruo contentus fueris mundum habere sub pedibus, & omnem eius potentiam, epulas, libidines, propter quæ diuitia comparantur, vilibus mutare cibus, & crassiore tunica compensare: citò enim expletur natura necessitas. frigus & fames, simplici vestitu & cibo expelli potest. addit: Sapientia operam dare non possumus, si abundantiam mensa cogitemus, quæ labore nimio & cura indiget. & monemur à Sapiente: Melius est ire ad domum luctus quàm ad domum conuiuij. causam addit: In illa enim finis cunctorum admonetur hominum, & viuens cogitat quid futurum sit.*

Eccles.

7.

CAPVT XXVI.

Munerum acceptatio, largitio.

NON magna hæc res cuipiam videatur, maximè in rebus non magnis; grande tamen malum est, eoquē nocentius,

tius, quo sub amoris ac beneuolentiæ testatione mollius animo illabitur. antè nimirum venenum præcordia occupauit, quàm bibisse nos sciamus: neque enim ad animorum obstrictionem potentius quidquam in humanis reperias; vt vinctulis iam tanquã validissimis compedibus constriktum teneas, quem muneribus quasi retibus implagasti. Et verò certius etiam beneficiis hostem, quàm armis fregeris, faciliusque inimicam mentem muneribus sub iugum, quàm ferro miseris. Ingens omnino vis munerum est; quæ seuerissimos etiam iudices, nulliusque minis, purpura, ac ne propinquo quidem sanguine à recto bonoque flectendos, ab innata seueritate & æquitate dimouit. vt munus in iudice accepisse, propè vicisse sit. expugnauit nimirum arcem quamuis præualido præsidio infestam, qui aurum immisit; perdidit, qui accepit. hinc illud Sapientis: *Conturbat domum suam, qui sectatur avaritiã; qui autem odit munera, viuet.* Prou. 15 & illud: *Xenia & donaria excacant oculos iudicum, & quasi mutus in ore auertit correptionem.* Ecclesi. 10

Et exemplis docemur omnium sæculorum, vt nesciam an validius aliud ad expugnationem in omni hominum genere reperiri possit. hoc prudētes sapiētia exuuntur,

tur, prouidí circumspectione spoliatur, docti eruditione destituuntur, continentes castimonia nudantur, fidentes spe sua frustrantur; amicitia labascit, deferuescit zelus, intepestcit pietas, succidit fiducia, exarmatur exercitus, emedullantur robora, & quidquid terris magnum est, ad humilem descendit arenam. Ita quidquid in vnaquaque re summum est, si accesserint munera, deflorescit, vt exaruisse virtutem omnium credas ab horú tactu. quid? quòd longè etiam posita improbo quodam afflatu venenent, vt vel vidisse noxium sit. bene Cassianus: *Oblatio muneris, tinea est regiminis.*

Si à Superioribus hæc nascuntur, nescio quo modo in mores vitamque illius nos trahant, vt etiam damnanda laudemus, imitemur.

Si ab inferioribus, credas tanquam falce præcisos disciplinæ neruos: ita intepestcit rigor, & correctionis succiduntur genua. succedit simulatio, dum offendere nolumus, quorum beneficiis tenemur, aut à quibus maiora speramus.

Si à patribus, mutua marcescit correctio, dum indignum censemus Superiori in benefico socio nocitura prodere. quid? quòd perfacilè etiam in illorum mores eamus,

ne videamur à benefactoribus degenerare? aulicos referūt mores? imitatur. obloquūtur? addimus aliquid de nostro. detrahunt? probamus. in cibum potumque feruntur? iungimur socij. in risum, & sæculares iocos solvuntur? reddimus paria. liberiora, minusque casta proferunt? arridemus: nimirum ne silentio nostro dicta factaque illorum improbare videamur, decurrimus ad paria vitia: neque displiceamus quorum beneficiis irretiti tenemur, mores restringimus, & induimur iisdem malis, ut dictorum factorumque similitudine placeamus.

Si ab externis beneficia accipimus; perit in monendo, consulendo, corripiendo libertatis pars maxima: nam & pretio illam benefactor emit, & nos vendidimus: minuit deinde veneratio auctoritatem, offensionisque timor magnam libertatis partem adimit, dum veremur ne monitione nostra elanguescat benefica manus, & exarescat donorum fons, monitis tanquam æstibus repressus.

Quid? quod ab eodem offensionis timore, & placendi studio, non raro improbanda probemus, probaque respuamus; vitia si non laudamus, extenuamus, placituraque etiam in sceleribus consilia damus.

mus. nimirum displicere nolumus, ne beneficiorum spe excidamus.

Quòd si à femina veniant munera, in priuatum maximè vsus vertenda, maius etiam periculū est. quoque hic sexus mollior teneriorque est, hoc maiora etiam damna metuenda sunt, & nescio quid etiam seuerissimis ac castissimis mentibus afflent tenerioris affectus. solaque non rarò muliebrium donorum memoria, valentissimi ac religiosissimi viri pectus tanquā molli, sed potenti tamen iaculo transfadigit. & dum munera placent, incipit place-re donatrix. Ludit deinde in muneribus, tanquam in amoris quodā symbolo, mollior affectus. & illa antè mens, multorum sæpe annorum spiritalibus exercitationibus roborata, ac quasi in ferrum chalybemque versa, muliebriū donorum mal-leis concussa, fatiscit, succiditque paulatim, donec suauioris huius elementi frequenti stillicidio exesa & euigorata, in vagum puluerem cineremque dilabatur: & quæ nullis antè minis territa, non armis fracta, inuicta mundo & inferis steterat, mollissimis hisce femineis vinculis, omni ferrea compede firmitus tenetur. credas Samsonis capillum vniuersi roboris germen, muliebri manu demessum.

Huc

Huc accedit, non vna nos experientia doctos, aliquid aliquando in his muneribus diabolicæ latuisse fraudis; nec antè animo quieuisse qui acceperant, quàm à se dona propulsaissent, tamque diu tanquam immanissimis squissimisque iactatos æstibus, ac quadam quasi flamma ac fornicibus inæstuisse, atque adeò arsisse totos, quamdiu muliebria hæc munera circumferrent: quibus ut primùm sese exuerant, resedisse tempestates, restinctas flammæ, & ad pristinam animorum rediisse malaciam & tranquillitatem.

Accedit, munera hæc familiaritatis ac fiduciæ cuiusdam maioris præpuntia quedam esse, nec pudet præeuntem sequi, neque ad colloquia iam illius erubescimus, cuius donis inhiamus. transitque iam talis aut in matrem si senior, aut in filiam si iunior est. inde licentior exurgit cōsuetudo, nec peccatum in tanta propinquitate veremur. liberiora hinc exuto pudore nascuntur imperia: neque ea dicere nunc veremur, ad quorum antè memoriam erubescibamus. Benè Hieronym. *Crebra munuscula, & sudariola, & fasciolas, & vestes ornatas, & oblatos ac degustatos cibos, blandasque, & dulces litterulas sanctus amor non habet. Hæc sunt incitamenta vel amoris retinacula.*

*Et ist.
ac Ne-
pe iam.*

Exurgunt denique ex his domesticorum æmulationes, externorum offensiones, vtrorumque obloquia & murmurationes: & imitari delectat, quod damnari non videmus. trahimur enim commodorum spe, & rapimur in nocitura exempla. nec præcipitia sentimus, nisi in ipsis, serò in medio lapsu tutiora cogitantes. antè oportuit.

Ingens prærogatiua apud Isaiam mænèra detestantiũ meritò mouere nos debeat, & calcar addere, ad seriam illorum detestationem: *Qui ambulat in iustitiis, & loquitur veritatem, & proicit auaritiam ex calumniã, & excutit manum suã ab omni munere; iste in excelsis habitabit, regem in decore suo videbit.* Armemus pectus hoc robore. quò sub his spongiis ferrum, sub hoc fauo in latentia venena vitemus. mollia licet iacula sint, & feminea sæpe dextera missa, tincta perimente toxico sunt: vt tetigisse in mortem satis sit. Et sanè vel sola diues illa Prophetæ sponsio meritò mouere nos debeat, *Habitabit in excelsis, regem in decore suo videbit.* quid vel sperari aut voveri poterat maius? alterius sæculi felicitatem omnem complexus est. habitatio æternitatem designat, visio in decore diuinam fruitionem. vt omnia consecutus fuerit qui munera excusserit.

Remedia.

Refecanda omnia hæc munera priuat-
 tis collata, maximè à mulieribus &
 pœnitentibus: quæ non vni noxia fuisse,
 experientia edocti sumus. dandaque ope-
 ra, vt pœnitentes intelligant religiosis mo-
 ribus vetita hæc munera esse, ac si quæ de-
 derint, Superiorum iudicio pro cuiusque
 necessitate distribuenda. consultumque
 fuerit, alteri potius, quàm confessario hæc
 concedi. vt si materia ad vestes, similiaque
 corpori necessaria donantur, ea alterius
 necessitatibus impendatur. confessario
 verò, si egerit, aliunde prospiciatur. in-
 gentes alioqui hæc res, præter recensita
 pericula, excitabit æmulationes, & ad pa-
 ria à suis impetranda dona prouocabit a-
 lios. vel sanè abundabunt hi, egebunt alij;
 quæ ingens materia dissensionum est, & à
 paupertate, quam Religiosi profitentur, a-
 liena, cuius nitorem non parum obfuscet.

Iuuabit non infrequenter secum reuol-
 uere verba D. Hieronymi: *Nescio quomodo* da
etiam ipse qui deprecatur vt tribuat, cum acce- Mar-
pèris, viliorẽ te iudicat: & mirum in modum coll
si eum rogantem contempseris, plùs te post vene-
rabitur.

Proderit in primis si Superiores exemplo suo reliquis præeant, excludantque à se quantum fieri poterit, omnem omnino munerum largitionem, aut in priuatum vsum acceptationem.

Pœnitentiis etiam prouiores in hanc rem terrendi, si quando in horum aliquo peccauerint: nec parcendum hîc ætati, ne concessio eat in exemplum.

CAPVT XXVIII.

Adulatio.

INdignum in Religioso vitium, cuius omnes cogitationes debent esse cælestes, omne studium placendi vni Deo. degeneres sanè à vera Religione animos ostēdit, quicumque se ad humana studiosius quàm par est conuertit. facit hoc omnis adulator, qui in aliorum se effundit beneuolentiam, quam vt consequatur in omnē se vertit formam. virtute non potest? virtutem mentitur. satis enim illi placuisse est. adeò si vitis placeat, vitia induet: & totum se in illa immerget, si natasse in illis, placuisse sit.

Quo magis vitandum malum Religioso est qui aliquid Christiani ac virilis animi

mi pectore clausum tenet. quid enim tam indignum Christiano ac Religioso quàm mentiri, sine quo nulla diu stare adulatio potest? cùm omnis illa mēdacio vestiatur. detrahe vestes, mendacium & informis apparebit nuditas, ridenda non admiranda. neque enim aliud est adulatio quàm perpetuis propè oratio vestita mendaciis. aut enim infra aut supra fidem adulantis verba sunt. dum enim placere studet, si laudibus aliquem capi videat, auget illas longè etiam supra verum, vt placeat magis. si nihil quod laudem mereatur reperit, è suo cerebro noua comminiscitur. quid? quòd non rarò, cùm nihil præter vitia reperit, etiam illa ipsa in laude ponat, & damnanda probet. quo fit vt in maiora impellat scelera. laudasse enim hæc, ad paria aut maiora impulisse est.

Ingens vitium, quando in Principes & Superiores incurrit: quorum crimina improbamque vitam moresque laudasse, ad similia calcar addidisse est, & natura aut educatione ad illa properantes, grauius etiam propulisse est. tanquam si quem præcipitio vicinum iniecta manu protrudas, quò facilior proniorque lapsus sit. vt dictū verè, Tolle laudatores & magnam scelerum materiam sustuleris. neque quisquam

facile improbata omnibus aut aggreditur aut iterat. laudem & propugnatorem crimina poscunt ut repetantur. tolle hæc fomenta, ligna ignibus; & partem longè maximam ademeris. Vera nimirum Magni

4. Mor.

cap. 25.

Prov. 1.

Gregorij verba sunt: *Incessanter crescit culpa fauoribus nutrita. curari autem vulnus negligitur, quod dignum premio laudis videtur. unde bene per Salomonem dicitur, Fili mi, si te lactauerint peccatores, ne acquiescas eis. peccatores enim lactant, cum vel perpetranda mala blandimentis inferunt, vel perpetrata fauoribus extollunt. an non lactatur de quo per Psalmistam dicitur, Quoniam laudatur peccator in desiderijs anima sua, & cum iniqua egerit iniquus, benedicunt?*

Suspectum proinde omni viro probo hoc hominum genus esse debet: neque enim illi tam animi sui sensus exprimunt, quàm voluntatibus aliorum subseruiunt ac obsecundantur. mores ingeniumque cuiusque obseruant, & quod cuique auditu iucundum referunt. vera an falsa pro eodem habent: satis illis dixisse, placuisse. quin adeò, ferè aliud sentiunt, dicunt aliud: ut probasse adulatoris improbasse, laudasse damnasse sit. si quem proinde videris in os laudantem, mente damnare cogita. aliud nimirum reclusum habet anima, aliud de-

depromit ore. ac sanè malè de te sentit quisquis coràm laudat; arbitratur enim te gloriæ nominisq̃ue quadam scabie teneri. profundit proinde laudes, eo copiosiores, quò maiori te harum prurigne titillari arbitratur. non faceret si te virum putaret, si res diuino iudicio metientem, si æterna cogitantē, si reposita cælo præmia, si non ab humano doloſo ore, fallaci dictione, sed ab omnium conscio Deo falliq̃ue ignaro mercedem sperantem videret. Laudat? mollem cenſet, & ad præconia insurgentem, aqueum nimirum, facilem in bullam; in ventum, & ad omnem flatum vela pandentem. ludit proinde inter hæc amica ac votiua carbaſa, & in omnem partem molli Fauonio impellit hanc ratem ignaram sui, discriminumq̃ue ſuorum. quæ eo periculis propior eſt, quo ſecurior indormit his ventis, ludibrium paullò poſt futura fluctibus ſera pœnitentia.

Comparari deinde meritò aſſentator omnis proditori poteſt, qui blandis & ad dolum compoſitis verbis, diuite ſponſione, in inſidias & fraudes impruidos impellit: medico etiam qui inani & falſa ſpe ægrum lactat, pluſq̃ue bonarum valetudinum ſpargit, quo vicinior morti eſt. Facit omnis aſſentator, e mentitis incautos lau-

Moral.
31. c. 20.

In psal.
59.

dibus in verarum virtutum opinionē trahit, damna tegit, pericula minuit, aut vniuersim tollit, eoque magis cautiusque, quo viciniore illis sunt. Magnus Gregorius adulatorū linguas locustis cōparat, quòd omnem virtutum virorem adulatione sua corrumpant. Augustinus verò duo ait esse genera persecutorum, vituperantium & laudantium; plūs tamen persequi adulatorum linguam quàm persequentium manum.

Plenis etiam faucibus politicisimū adulator cōbibit, quem in eos maximè deuomit, quorum gratiam venatur. cū enim virtutibus destitutus, factorū claritate nomen parare non possit, decurrit ad fraudes cōmune improborū subsidiū, vt quod probitate desperat, dolis cōsequatur. cū enim beneuolentiā alicuius sibi suisque rebus persuaferit cōmodam aut necessariam esse, quacunque illam via parare studet. veris nudatur, protrudet falsa. satis illi si optata consecutus fuerit, quocumque demum flumine deducatur ad hunc portum.

Noxium in primis Religioni genus, cū Superiores eos deliberationibus admovent, consiliorumque ac secretorum participes faciunt. cū enim ferè non è mente sua, sed è Superiorum voluntate sententiam dicant, fit vt non pro veritate, sed pro-

proponentium affectu consilia explicent, in eam partem prolabendi, in quam Superiorem viderint propensum. ita fit ut dum captandæ illorum beneuolentiæ insudant, sola placitura depromant. vnde fit ut malis remedia nulla admoueantur, ac nec nocitura quidem & in interitum ductura, Superioribus indicentur, displicendi metu. Hinc paullatim zizaniorum more serpunt neglecta mala, & mora vires sumunt, donec fera eradicationis spe terram latè occupent.

Accedit, plurimùm tales quæ hîc laudantur, alibi damnare; quæ apud hos probantur, apud illos improbare, siue innata quadam naturæ inconstantia, siue omnibus placendi studio. vnde fit ut nihil stabile firmumque sperari ab his possit, nihil illis tutò credi; prodituri commissæ quæcunque si è re sua futurum arbitrentur. nulli deinde ex vero amici, sed fortunæ cuiusque sunt, omnium sesuccessibus expandentes, omnium subseruientes: tam faciles in proditionem, quàm faciles in assensum, ut nulla illis fides adhiberi, nulla verbis fiducia possit.

Remedia.

Consultum erit suspectos assentatores Comnes, ac pro hostibus ex insidiis in-

furgentibus habere, familiaritate sua excludere, consuetudinem fugere. si inferiores sunt, pœnitentiis monitisque frequentibus ab hoc vitio, indignitate ac fœditate huius proposita, arcere: per domesticum etiam confessorium, aliosque viros cordatos ab irreligiosa hac consuetudine auocare. quæ omnia si concurrant, non magno negotio euellatur hæc malum. vbi enim viderint serios vbique Superiores, qui assentationem omnem improbent, qui candorem ament, adulationem auersentur, qui sinceros & regia inambulantes via, familiaritate sibi astringant, reliquos neglegant; facile se ad illorum mores component. quod si deserri se à reliquis viderint, optimorumque quorumcumque familiaritate destitui, alia longè consilia morefque induent.

Iuuabit etiam tales si subditi fuerint loco mouere, & iis Superioribus subdere; qui ab omni assentatione alienissimi sunt: si Superiores sunt, à gubernatione amouendi, & aliis occupandi erunt. ne horum mores reliqui imitentur, & incipiat placere quod in capite ac ductore suo vident, & pro virtute vitium habeatur.

Proderit etiam frequens cogitatio incommodorū quæ ex hoc vitio nasci consue-

sueuerunt. Frequentata deinde cælestium cogitatio, vnicumque studium placendi Deo. sic enim vilescunt humana, nec gratiam aut beneuolentiam captabimus hominum, solius Dei contenti.

CAPVT XXVIII.

Politica agendi ratio.

QUæ res ingentem diffidentiam parit, mutuæque alienationis vel inter primas causa est; maximè vbi hæc ratio innotescit, quam diu celare in tam varijs dictorumque factorumque obseruatoribus impossibile est. atque hinc perpetua quædam nascitur diffidentia, vt in illo quasi iusto metu, dum seu Superiores, seu inferiores detinentur, nihil sperari possit boni.

Nam si Superior hoc malo laborat, frustra genuinam conscientiæ rationem sperabit. nemo ad hunc vt ad patrem & medicum recurret. omnes vt minùs sincerû, & cui fidi non possit, aut secretiora credi, auersabuntur. contingitque illis, vt dum affectu plano sinceroque res tractant, fidem tamen non inueniant: quòd resecta semel politica agendi ratio perpetuam ingeneret suspicionem nulla arte eluendam. Agit seuerè? seueritate sua displicet. mollior & benignè? seueritatem his tegi arbitran-

trantur, animumque alieniorem, & fraudibus dolisque vicinum. tegitur nimirum hoc cinere ignis, paulò post in flammam & incendia erupturus; integunturque pulchro hoc velamine nocitura venena, si quis propius tangat.

Iam adulationibus omnia plena videas. exulat candor, & è politico Superiorum ingenio, reliquorum finguntur mores: ut secularis iam Principis aulam, alienissimam à religiosa familia reperiās.

Atque hinc in Superioribus imperia nascuntur sæcularia; in inferioribus seruilis obsequentia. dolis interim fraudibusque plena sunt omnia; & ille iam prudentissimus habetur, qui solertissimè socium circumuenit. veris falsisque rebus, aut calumnijs etiam ac criminationibus, iuxta habetur; res modò votis respondeat. solertia proinde, ac quadam sæculari agendarum rerum dexteritate, simulataque beneuolentia, ac ementita sæpius pietate tota Religio continetur. verba amorem præferunt, intus aluntur odia. externa beneuolentia animorum dissensiones, improbasque & Religiosis indignas æmulationes tegunt, dum suis singuli commodis student, & per aliorum emendicatas extrinsecus amicitias, gradum sibi ad optata struunt. inani-
bus

bus plurimos pollicitationibus, vanaque
 speludentes; solis ferè verbis diuities, nisi
 qua parte aliorum promotiones votis co-
 gitationibusque suis subseruiunt. Habes in
 hanc rem illud Gregorii: *Est speciale dupli-* Past.
cium malum, quia dum peruersa & duplici par. 3.
actione ceteros fallunt, quasi prastantiùs ceteris cap. 12.
prudentes se esse gloriantur: & quia districtio-
nem retributionis non considerant, de damnis
suis miserè exultant. audiant quomodo super il-
los propheta Sophonias vim diuina animaduer-
sionis intendat dicens, Ecce dies Domini venit
magnus & horribilis, dies illa, dies ira, dies tene-
brarum & caliginis, dies nebulae & turbinis, dies
tuba & clangoris super omnes ciuitates munitas,
& super omnes angulos excelsos. Quid enim per
ciuitates munitas exprimitur nisi suspecta men-
tes, & fallaci semper defensione circumdatae? Et
quid per excelsos angulos, nisi duplicitas mentis
intelligitur? Dies igitur Domini, vindicta atque
animaduersionis plena, super ciuitates munitas
& super excelsos angulos venit, quia ira extre-
mi iudicij humana corda defensionibus contra
veritatem clausa destruit, & duplicitatibus in-
uoluta dissoluit.

Si inferior vitio hoc tenetur, omni apud
 Superiorem fide caret. nihil illi tutò cer-
 toque credet. verebitur omnia, nec vera
 dicenti fidem adhibebit, omniaque eius
 dicta

dicta factaque, licet à virtute profecta, in deteriorem partem interpretabitur.

Quòd si vtrumque malum hoc possederit, nusquam fides, dolis verò mutuisque adulationibus plenissima reperias, conspirationibus etiam, fallacibusque in optimos non rarò machinationibus, quæ ad euertendos maximos etiam viros sufficiant. Neque interim inter eos qui politico hoc spiritu aguntur, certa aut fides, aut animorum coniunctio consistere potest: cùm enim è suo iudicio metiantur alios, timoribus referta sunt omnia. verentur dolos quales animo se suo fouere sciunt, neque diutiùs externæ huic coniunctioni inhaerent, quàm commodis eam suis vtilem sibi fore persuaferint: quæ vbi consecuti fuerint, in aperta mentitus hic amor abit odia.

Signa in his vides animi, sibi ac virtuti diffidentis. qui si virtute excultus foret, nō descenderet ad has fraudes artificiaque: cùm sat multa domi suæ nata ornamenta ad maiora haberet. quibus dum se destitutum videt, confugit ad hæc externa, & à sæcularibus mutuatur, quò se consiliaque sua tueatur. quo fit vt sola iam vestis Religionem, reliqua sæculum loquantur. exultat exinde omnis candor sinceritasque reli-

religiosa, charitatis custos : succedunt fucata, pulsaque veritate è perpetuis mendacijs intertexta verba. laudant, assentiuntur, ampla promittunt; alia omnia cogitanda sunt, & sponsonibus aduersantia: vt laudasse, damnasse; sponpondisse, negasse sit.

Iam quid indignius viro Christiano, Religioso, (cuius vniuersa professio habitusque simplicitatem candoremque loquitur) quàm continuis contexta oratio mendacijs? parui hæc animi sunt, sibi que virtuti que suæ diffidentis. generosa mens antè vitam ponit, quàm illam mēdacio commaculet. nescit magni animus mentiri, pusilli & muliebris pectoris mendacia sunt.

Et meticulosos ferè hos, immites ac crudeles reperies, vbi rerum potiti fuerint. neque in vltos magis insurgunt ac sæuiunt, quàm quos paribus fallacijs ad maiora conniti vident, conscij fallaciarum animique sui, veritine paribus aliorum dolis circumueniantur & corruant, quibus ipsi iam antè non vnum in fraudulenta præcipitia impulerunt.

Scinditur hinc vniuersim mutua charitas: qua vna Religio omnis stare consuevit. nam vbi fiducia, candor, veritas exulât, mutuam etiam charitatem exulare necessum

Eccli.
28.

sum est. Hinc dura illa Sapientis imprecatio: *Susurro & bilinguis maledictus: multos enim turbat pacem habentes.*

Nascuntur demum partium studia, & dum politico magis spiritu, quàm Religionis amore feruntur, solerti singuli prudentia illis adhærent & abblandiuntur, quos conatibus suis vtilis fore arbitrantur: reliquos negligunt ac contemnunt. è quorum neglectu ac cōtemptu parem in aliis neglectum, ac contemptum sequi proclive ac quasi necessum est: vt iam in partes toti descendant, in mutuas animorum alienationes, mutuorum consiliorum ac conatum subuersiones, in sociarum amicarumque sibi partium promotiones, alienarum depressiones. denique tanquam in aduersaria ac inimica acie pro se quisque pugnat, ferturque in alios tanquam iniuratos conatum suorum hostes; ex insidiis tamen plurimum, quod proprium atque adnatum huic spiritui est: quæ si non successerint, ad aperta etiam arma odiaque decurritur. nec iam vltrà Religio, sed inimica stant in vna domo, ac sub eiusdem Religionis signis agmina. eo nocentiora, quo magis domestica. nam ab extraneis non magno fors se quis negotio conatuque tueatur, à domestico hoste difficile, ac
propè

propè impossibile est: cùm mutuus conui-
ctus, mutua colloquia, nihil propè rectum
patiantur, mutuaque consilia privati rete-
gant parietes; vt omnia, etiam tutissima
suspectissima sint, secretissima periculis
plena, vt vix iam sibi ipsi quis credat. oculo-
lata arbitrantur omnia, ac in cubiculi sui
pariete thalamoque aduersarios verentur
oculos. Sanè in vultu, mutuoque prospe-
ctu profutura, aut nocitura legunt. tan-
tum in omnem indagandorum consiliorum
partem solertissima hæc valet improbitas:
Verba nimirum bilinguis quasi simplicia, & Prom.
ipsa perueniunt usque ad interiora ventris. 18.

Misera planè Religionis conditio, cùm
spiritu hoc semel imbuta, ac quasi posses-
sa, veteri pulsa charitate, simplicitate, can-
dore, politicis hisce flatibus, tanquam flu-
ctibus in profundum, ac interitum sui ra-
pitur. quo magis fugienda ac detestanda
hæc pestis est, ingentibusque animis in hæc
mala insurgendum. nec supersedendum
labori; donec stirpitis grande hoc malum
euellatur, vt ne vestigia quidem spiritus
huius remaneant quòd si euellendi mitior
clementiorque delit via, ferro etiam sæ-
uendum, & partium sectionibus. ingens
pictas est secare & vrere, nec noxiæ parti
parcere, vt vniuerso periclitanti corpori

succurras: noxiaque è contra & crudelis clementia est, perituræ & noxiæ parti parcere, qua reliquum pereat corpus.

Exurgit demum ex his ambitio: nam ubi semel à politico hoc spiritu genuinus & primogenius subactus ac depressus spiritus est, ac tanquam in languido quodam sopore consepultus iacet; nil reliquum est, quàm ut singuli ad prima quæque magisque illustria in Religione munia contendant: ad quæ ut aliquando pertingant, captanda eorum gratia est, quorum fauor operaque utilis ad propositum sibi finem esse queat. quæ res ad indignissima quæque tales impellit, dum se variorum moribus ingeniisque & à Religione alienis accommodare coguntur, plurimaque servilis planè ingenij munia obire, voluntatibusque etiam aliorum non rarò parum religiosi morem gerere, ne nimirum alienos aduersariosque patiantur, quorum opera studioque in votorum suorum desideriorumque consecutionibus egere se arbitrantur.

Inconstans omnis politicus est, nulli certæ personæ aut rei inhærens. si commoda ferant, ad contraria prioribus vita propellerur, damnabit probata, iterumque laudata damnabit. idque in æterno quodam metu.

metu. *Possedit enim timor hypocritas.* cum *Isaia 33.*
 iisdem artibus circumueniri metuat, qui-
 bus alios in fraudem impulit. Accedit per-
 petuus timor, ne fors in apertum doli
 erumpant, quos in tanta mutuo conuiuē-
 tium sibi ingeniorum varietate & solertia,
 diu tegere impossibile est. Et iusto sanè Dei
 iudicio, suis ferè politici capiuntur artibus,
 retibus implagantur suis, politicis suis,
 tanquam veneno, ense, fune suo. neque
 diu tales in alta pace esse possunt. *Gaudium* *Iob 20.*
enim hypocrite ad instar puncti. nec potest
 ibi solidum esse gaudiū, vbi perpetuis ven-
 tis fluctibusque perpetuæ coguntur tem-
 pestates.

Similes politici sunt purpurissa & stibio
 formam mentientium. e mentita enim
 verborum beneuolentia humanitatem
 amicitiamque mentiuntur, quibus crude-
 litatē & infidos tegunt animos: vt meritò
 quis dicat sepulcra dealbata, monumenta
 marmore tecta. retege, intus latent sordes,
 quæ pedore suo vicina remotaque com-
 pleant. Hinc grauis illa Sapientis intermi-
 natio: *Væ duplici corde, & labiis scelestis.* *Eccl. 10.*
 Scele-
 lesta sanè politicorum labia sunt, quæ sub
 melle & saccaro venena tegunt, sub molli
 spongia nouaculam premunt, sub roseo
 ore & labris virus iaculantur, sub lilio &

viola toxica recondunt. à quorum ore cadunt barbara illa verba, Si violanda fides, regnandi caussa violanda est. Et sanè nihil tam sanctum, quod mens politicis imbuta opinionibus non violet, si proposito sibi fini aduersari putauerit. suus enim cuique politico honor, emolumentū suū, pro summo bono est: minusque veretur offensam magni Dei, quàm propositæ sibi rei frustrationem. vti iure detestetur hos Sapiens:

- Prou. 8. Arrogantem & superbum & os bilingue detestor. quæ ergo poterit esse spes hypocritæ?*
- Iob 27. Nunquid Deus audiet clamorem eius, cùm venerit super eum angustia? aut poterit in Omnipotente delectari; & innocere Deum omnipotente?*
- Sap. 1. Fortiter Sapiens: Spiritus sanctus disciplina effugiet fictum. neque habitare in eo pectore sapientia potest, à quo sapientiæ mater veritas exulat; neque Religionis in eo spiritus, à quo Religionis abest candor,*
- Ecclesi. 3. veri amoris symbolum. & verum illud: Cor ingrediens duas vias, non habebit successus. Grauiissima in omnem politicum comminatio Prophetæ est: Maledictus homo qui confidit in homine, & ponit carnè brachium suum, & à Domino recedit cor eius. Erit enim quasi myrica in deserto, & non videbit cùm venerit bonum: sed habitabit in siccitate in deserto, in terra s. luginis, & inhabitabili. Benedictus vir*
- qui

qui confidit in Domino, & erit Dominus fiducia eius. Et erit quasi lignum quod transplantatur super aquas, quod ad humorem mittit radices suas: & non timebit cum venerit aestus. Et erit folium eius viride, & in tempore siccitatis non erit sollicitum, nec aliquando desinet facere fructum. Præuū est cor hominum & inscrutabile: quis cognoscet illud? ego Dominus scrutans cor, & probans renes: qui do unicuique iuxta viam suam, & iuxta fructum adinventionum suarum. Quis ponit carnē brachium suum, nisi qui prudentiæ solertiæque suæ fidens, remedia à diuina fiducia non mutuatur, sed à rebus prouidè callideque à se excogitatis: quibus innixus blandoque linguæ ac oculorum lusu, reliquos in suam sententiam subdola inescatione pertrahendos arbitratur? cum ipse ferè iisdem artibus cadat, à diuina manu temperatis: neque enim permittet Deus altis illum radices agere. *Spes namque hypocrite peribit, & cogitatio illius sterilis: & si in ramis in tempore germinauerint, infirmis posita à vento commouebuntur, & à nimietate ventorum eradicabuntur. confringentur enim rami inconsummati, & fructus illorum inutiles, & acerbi ad manducandum, & ad nihilum apti.*

Iob 8.

Iob 15.

Sap. 4.

Remedia.

Nihil in humanis sperare, nihil vereri: hinc probamus & laudamus passim quæ vel placent vel displicent ijs, quorum aut potentiam veremur, aut beneficia speramus.

Nullius gratiam ambire, ne placendi studio à vero rectoque deflectamus.

Deum, & vocationis suæ bonum, animarumque salutem in omnibus di&is factisque præ oculis habere: reliqua contemnere. hæc qui fecerit, stabit interritus, nec ceruices linguamque gratiæ flectet: nec à vero bonoque minis aut purpura terribitur, aut præmio trahetur. Cogitet, maiorem se esse Christi sanguine, hereditate, præmio, quam vt tam illustrem animam assimilata Deo, aliorum complacentiæ mancipet. à Deo solo mercedem speret æternitate commensurandam. talem se esse qualis illo iudice censetur, nec alium. nihilque ad demeriti meritiq; mensuram humanam censuram addere.

Iuuerit in primis harum rerum studiosos ab omni nobilium consuetudine arce-
re. quòd horum ferè familiaritate crescat malum: & ad ea loca muniaque destinare,

in

in quibus talium materia negata est. nec parcendum si quando in hoc vitio deprehensi fuerint. omnisque omnino talium familiaritas vitanda est. & ab ipsa adeò Religionè tanquam pestes rescandendi, quotquot huic vitio obnoxij sunt. si Superiores fuerint, remouendi in solidum ab omni munere erunt, & aliis minùs noxiis occupandi.

Proderit recordatio monentis & interminantis Sapientis omnem duplici corde: *Ne fueris hypocrita in conspectu hominum; & Eccles. 1 non scandalizeris in labiis tuis. attende in illis, ne fortè cadas, & adducas animæ tuæ inhonorationem, & reuelet Deus absconsa tua, & in medio synagoga elidat te: quoniam cor tuum plenum est dolo & fallacia.* Et imprecatio magni Regis: *Disperdat Dominus vniuersa labia dolo- Psal. 11. sa, & linguam magniloquam. addit minas: Di- Psal. 51. lexiisti omnia verba precipitationis, lingua dolosa. propterea Deus destruet te in finem, eucllet te, & emigrabit te de tabernaculo tuo: & radicem tuam de terra viuentium.* Monetque omnes Apostolus: *Qui vult vitam diligere, 1. Pet. 3 & dies videre bonos, coërceat linguam suam à malo, & labia eius ne loquantur dolum.*

Admonendos vult Gregorius Magnus: *Vt quàm grauis sit, quem cum culpa sustinent, duplicitatis laborem agnoscant. dum enim de-* Past.
par. 3.
cap. 12.

prehendi metunt, semper improbas defensiones quarunt, semper pavidis suspicionibus agitantur. Nihil autem est ad defendendum, puritate tutius, nihil ad dicendum veritate facilius. nam dum falsitatem suam tueri conatur, duro cor labore fatigatur. hinc namque scriptum est, Labor labiorum suorum operiet eos. hinc per Ieremiam dicitur, Vocerunt linguam suam loqui mendacium, ut iniquè agerent, laborauerunt. audiant quod scriptum est, Qui ambulat simpliciter ambulat confidenter. fiducia enim magna securitatis, est simplicitas actionis. audiant quod Scriptura testatur, Cum simplicibus sermocinatio eius. Deo enim sermocinari, est per illustrationem suæ præsentiae humanis mentibus arcana reuelare. Cum simplicibus igitur sermocinari dicitur: quia de supernis mysteriis illorum mentes radio suæ visionis illuminat, quos nulla umbra duplicitatis obscurat.

CAPVT XXIX.

Aulici mores.

DVLCE Religionis venenum. Influxunt hi ciuitatis & vrbauitatis prætextu. ut inurbani inciuilesque iam habeantur, ac rusticis moribus, qui aulica illa aspergine non sunt tincti, Religionis nimirum
toxi-

toxico, quo quidquid est genuini ac primigenij Religionis spiritus, suffocatur. Hinc illæ aulicæ compellationes, salutationes, scriptiones, relegatâ in vniuersum, ac quasi in exilium pulsâ religiosâ maiorum simplicitate, candore, veritate: in quorum locum succedunt simulationes, fraudes, politica agendi ratio, & è meris contexta oratio mendaciis, ad grâtiâ verba composita, putidisque narrationibus confertæ narrationes. præsentibus laudamus, mordemus absentes; venientibus magna beneuolentiæ ostentatione occurrimus, amplexamur, stringimus, ad genua decrescimus, intus æmulationibus, inuidentiâ, odio natamus. rogati non tantum, sed vltro spondemus; nos nostraq; omnia aliorum obsequiis deuouemus, ac tantum non in seruos & mancipia sacramus, cum animus liuore stipatus, alia omnia cogitet, hostilitatemque magis dolosque damnaque, quam obsequia meditetur, aut vt quàm mitissimè, nihil eorum quæ dicit cogitet: officiosis nimirum hisce mendaciis aures aliorum locupletamus. quæ res, cum hominem dedeceant, cui vultum erectum, verba mentem exprimentia natura dedit; tum minùs Christianū decent, qui Christi nomine insignitus, etiam verba

illius moresque nominis professione imitandos sibi proposuit, longissimè ab aulica oratione dissentientes; minimeque in Religiosum cadere illa debent, qui habitu reliquoque vitæ genere candorem ac veri studium profitetur.

Hosce mores siue Superior, siue inferior induat, grande malum est; nisi quod in Superiore grauius: facilius enim ad alios delabitur, & trahitur in exemplum. Inde diffidentia nascitur: nam quis fidat hisce moribus imbuto, cuius omnia propè verba aliud volunt, quàm oratione promittunt? quis illi conscientiam vulneraque retegat? quis decurrat vt ad patrem, quem verba resque aulicum loquuntur, non patrem? quis volens lubensque obsequetur imperanti, cuius imperia non à Religionis amore, sed à despotica aulicaque ratione nata videt, ac in eiusdem finem tendere?

Si inferior his moribus tenetur, caret omni apud Superiorem fide, nec quidquam tutò illi credet.

Si vterque, mutuis fraudibus adulationibusque plena sunt omnia. nec iam vltra Religiosa domus, sed mendaciorum officina exurgit; omnisque omnino Religionis spiritus aulica hac sponsia vniuersim deletur; nec quicquam iam illius, præter habitum

bitum reperiens rebus inanem: ac demum, pulsus virtutibus, aulica succedunt vitia; ambitio, adulatio, doli, detractiones, aliorum contemptus, odia, commodorum & dignitatum procuratio, otij amor, laborum fuga, vltimumque malorum caro & sanguis: neque illum diu castitas tutabitur, quem aulici possederunt mores, castimonie hostes, omnisque libidinis administri.

Et ubi semel religiosus spiritus non elanguit, sed aulicis hisce moribus pulsus, ac tanquam flumine extinctus est; quid nisi caro, & quæ illi coniuncta timenda sunt? nec potest in illo pectore diutius religiosæ puritatis instituti que sui amor residere, quod aulici occuparunt mores, castis piisque Religionum moribus è diametro pugnantes. Quos rectè sepulcra dealbata *Greg. Pa/. p. 3. cap 36.* speciosa exterius, sed mortuorum effibus plena interius Veritas vocat. quia vitiorum mala intus contegunt, humanis verò oculis quorundam demonstratione operum de solo foris iustitiæ colore blandiuntur. admonendi sunt ut considerent, quia dum prauos se in occultis exhibent, sed tamen exempla de se publicè in bonis operibus præbent, ostendunt sequenda quæ fugiunt, clamant amanda quæ oderunt; viuunt postremò aliis, sibi moriuntur.

Tota deinde conceptæ probitatis opinio perit.

perit. necque hi mores latere diu possunt: in oculos incurrunt omnium iudiciis feriendi. Et quis iam externorum talibus se familiarum, liberos, conscientiamque suam credat? quis Principum, nobilium, aulicorumque virorum, se suaque committet illis, cum è suis moribus metientur hos Religiosos? è sua fide illos? ut omnis omnino speratus animarum fructus depereat, cum similes sibi arbitrentur animo, quos oratione moribusque similes perspexerint.

Remedia.

INter prima, aulæ aulicorumque fuga est. neque enim fieri potest, quin ex assidua illorum frequentatione non plurimum etiam aulici adhæreat pulueris: nam & non cogitantibus aliquid aspergitur, & nolentibus quædam ex continuo usu adrepunt. tantum familiaritas potest. Idem accidit in venenis. tange, & damna expecta. in vitiis omnibus idem reperies. ne vitæ, & obrepent quasi dormienti, magis etiam si frequentaueris, aut lateri illorum diu latus adiunxeris.

Si natura aliquem trahat ad aulam, imperio arcendus erit, poenitentiis etiam, & seueriore disciplina, si contrauenerit. ac ni
emen.

emendatio accesserit, ad remotissima ab aulis loca destinandus, omneque illi litterarum cum aulicis commercium interdicendum erit.

Si Superior fuerit, nec post frequentata monita destiterit, functione sua exuendus erit, & ad ea loca ablegandus, in quibus nulla nec ipsi, nec ipsius exemplo aliis aulica damna timeri possunt.

Exemplis terrendi eorum, quibus aulæ aulicorumque consuetudo moreque omni propè sæculo exitio fuerunt, latamque ruinæ causam dederunt; ut vix quinquagesimus quisque eum in Religionem retulerit spiritum, quem in aulam attulerat, domoque extulerat. quod in omni Religioforum hominum genere reperies.

Exemplis etiam magnorum orbe toto virorum, qui aulam omnem, ut certam Religionis pestem, totis conatibus animisque auersati sunt. quod si illos necessitas ad aulicorum frequentationem aliquando coëgit, subduxerunt se tamen, & aulicis hisce fluctibus eripuerunt ratem, non ignari in eumentita hac malacia, tempestatum. Nec mirum: sciebant enim ubi primum pedum alterum aulæ intulissent, præcipitio alterum proximum esse. ut mirum sit, tot magnorum exemplis edoctos, venari
tamen

tamen Religiosos aulas, aulicorumq; imitari mores. Prudenter quicunq; hac prurigine titillatur, dum aulam cogitat, præcipitia indiuiduo illi nexu coniuncta medietatur; dum mores prouocant, damna prospicit; dum externæ inuitat venerationes, animos intuetur liuore & odio graues, & in sociorum ruinam paratos. Principum allicit fauor? scit dictum verè, Si benefeceris, leuior pluma est gratia: verbo si deliqueris, plumbeas iras gerunt. vt semel excidisse, æternum sit; & plurimum sanguine, aut ingenti dedecore error lauandus est.

Denique quicumque Religiosus aulicis hisce moribus tangitur, pulsaturque in sequelam, secum familiæ suæ non postremos viros recenseat, qui se aulicorū consuetudini moribusque dederunt; videatque an vigesimus quisque integra salute, nominisque æstimatione pedem retulerit: memorque illius, Quia me vestigia terrēt, perhorrescat ad aulæ nomen, fugiatque illius mores, vt ense iugulo inhaerentem, vt præcipitia lapsa bunda pedi, vt venena propinata labris, vt infelici propè omnium exitu signatos.

Proderitque magnorum ruinas recreationum tempore frequenter recensere,
qui

qui ab aulicis moribus, ad calamitatū extrema deuenerunt, & inglorij vitam finiuerunt, vocatione plurimū deserta, in exemplum miserando ferè exitu posteritati dati.

CAPVT XXX.

Clancularia agendi ratio.

QUÆ vbi innotuit, vt eiusmodi res diu latere non possunt, ingentem in Superiore ingenerant diffidentiam, suspensionesque præbent in omni genere varias, adeò vt nec in apertis quidem, & quæ nulla fraude teguntur, fidem adhibeat. Hinc animorum insequuntur alienationes, cū etiam subditus obseruat Superiorem hac diffidentia laborare.

Iam qui assuescunt talibus, non procul à ruina sunt: crescit enim hoc studium celandi res omnes Superiorem, & à leuibus initiis, & ab vnius generis rebus itur ad magna, & omnia: atque hinc machinationes clanculariæ, subdolaq; consilia sua tegendi ac explicandi rationes; & vt Superiorum oculos fugimus, ita paulatim etiam sociorum, à quorum conspectu nos nostraque subducimus. quæ res plurimū infelici exitu finiuntur.

Neque

Neque ferè quidquam aut Superioribus, aut sociis magis ingratum euenire solet, quàm callidæ hæ circumuentiones, ac simulatæ agendi rationes, fraudibusque tanquam nebula intectæ, cum alia omnia, quàm agimus, simulamus.

Nec quisquam facilè cum eo coalescit, quem deprehendit occultis molitionibus inharere; vt non iam Superioribus tantum, sed omnibus omnino incipiat talis esse grauis, fugiantque huius familiariorè consuetudinem: cum ferè tales quo magis consilia sua tegant, eo in aliorum vitam moresque diligentiores scrutatores, grauiioresque censores sint. omnibus proinde ingrati, sibi etiam cum perpetua hac tegendi sollicitudine graues, periculisque innumeris expositi, quid expectent, nisi inter hæc discrimina infaustum exitum?

Neque vlli maioribus aut fraudibus, aut periculis obnoxij sunt, quàm qui consilia resque suas tanto studio ac molimine Superiores celant. Nec erit hoc difficile in omni rerum genere ostendere, maximè vbi variæ tentationes animum pulsauerint, & non leuia à talibus vulnera aut expectentur, aut data acceptaque fuerint; nec Superiori tanquam parenti & medico morbum retegimus. Quid enim

hîc timeri aliud potest, quàm è proximo interitus? Et tales ferè fidentiùs cum externis, quàm cum Superioribus agunt; consilia sua aperiunt illis, celant Superiores, ac proinde magis iuncti sæcularibus, plus etiam referunt sæcularis quàm religiosi spiritus.

Accedit, studium hoc vñtum esse diaboli, qui in id vires, quas habet, exerit, vt celentur nocitura, morbus tegatur, vulnera non explicentur, discrimina, & quidquid meritò timeri malorum potest, alto prematur silentio. Illud nimirum illi sæuendi commodissimum tempus est, cùm quasi alto somno consopitis custodibus, nudata iacent castra, propugnatoribus viduata: quod fit, cùm Superiores fiducia pleni, periculorum, subditorum sibi, ignari, malis indormiunt.

Et sanè Superiorum etiam vigilantiam fallere perfacile est humani generis hosti, quando inferiorem ad noxiam taciturnitatem, priuataque consilia induxerit. quæ res in vñus capitis discrimine non consistit: quærunt enim ferè tales, & inveniunt eos, qui paribus tenentur malis; crescitque exinde è communicato noxio consilio morbi malignitas, ac in manifestam tandem erumpit pestem: se-

H h quun-

quunturque toti nonnunquam Ordini erubescenda. Ita à non magnis initiis ad maxima damna decurritur, & ad machinationes in instituti euerfionem natas descenditur.

Signum verò celandi hoc studium, inglorij & vilis animi est, cum per fraudes quærimus quod per virtutem qua caremus negatū est. sequitur familiare vitium, virtutibus suis diffidentium, mendacium, viro indignum; quo magis Religioso: ingens deinde inconstantia, iuxta illud Apostoli: *Vir duplex animo inconstans est in omnibus viis suis.* qualem necesse est esse omnē illum qui per occultas machinationes res suas stabilire cogitat, serpentum more, qui se prius in latebras condunt, quàm cogitatum virus explicent. Fugiet hæc vir Religiosus, metuens illud Sapientis: *Deuoratio pessima super bilinguem.* vt meritò talis destituatur à Domino, & in peccati poenam, in interitum relinquatur. cumque infelici euētu callida consilia sua claudi viderit, mœroribus obrutus contabescat, miserrimamque per æumnas vitam trahat. Et certè quicumque hoc vitio tenetur, cum necesse est, aut pertinacissimi ingenij esse, aut de virtute sua præfidentis, aut de aliorū prudētia integritate-
que

que diffidentis, aut insigni fastu & arrogantia, aut aliquid machinari improbandum, quod latere vult alios, & in quo testem erubescat. quare & in perpetuo versatur metu, continuaque pulsatur sollicitudine, ne consilia prodantur, ne profiliat in apertum fraudes, ne retegantur doli. Sanè non nisi à Diabolo occultatio hæc consiliorum venit. tenebrarum ille & anfractuum auctor est, vt in fraudem incautos ignarosque malorum trahat: Dei consilia in luce versantur, noctem oderunt, dici amica, inimica tenebrarum sunt. amabit hæc quicumque Deum amat; certus ab illo nihil posse in fraudem & interitum nasci: fugiet illa quicumque salutem amat, certus à Diabolo nil posse in salutem proficisci, nihil sperari.

Remedia.

Seria in omnem partem excubatione in Superiore opus est, vt si quid deprehenderit clanculariæ molitionis, ad radices excindat, quin adeò cum semine illas ipsas euellat. si quæ etiam secreta frequentiaque colloquia, & ab aliis semota, aut in tempestiuis horis & locis habita; reseceat vt noxia, mutuæque animorum coniun-

ctioni aduersantia ; eliminètque è domo sua quidquid clandestinas conuentiones sapit, quidquid à publico candore abducit.

Frequens cogitatio incommodorum, quæ ex hoc vitio nascuntur, maximè cum exempla nobis proponimus illorum, quibus hæc agendi ratio infelicitè successit.

Ex nostro dein iudicio si metiamur aliorum, facilis victoria erit, cùm ob oculos posuerimus aliquem hoc malo tactum, damnabimus indubiè, fugiemusque illam consuetudinem perpetuas veriti fraudes. idem proinde nobis euenturum si cogitemus, facilè ab hisce semitis pedem retrahemus. magis etiam iuuabit infelices horum exitus cogitare, damnaque ingentia ex hoc malo nata.

Iam si considerauerimus, quantis discriminibus hæc res obnoxia sit, cùm propriis consiliis fidentes, vias decurrimus minùs tritas, & Religioni aduersas, obedientiæ inimicas; non magno negotio malum hoc vitabimus. Neque enim in humanis quidquam ad fugam, vitationem & horrorem certius est, periculorum & incommodorum commemoratione. Quid enim grauius Religioso, quàm semper in metu esse, ne consilia, quæ tecta desiderat, innotescant aliis, aut Superiori? quod vbi euen-

rit, ingens diffidentia in omnibus enascitur, quæ nulla post arte, aut candore eximi potest. Semel enim concepta huius rei opinio, propè perpetua est: ut ferè necesse sit loci mutationē cogitare, vnicumque adeò propè remedium hoc est, quod à Superiorum, locorum sociorumq; mutatione sumendum est.

Fortibus deinde pœnitentiis insistentum erit Superiori, ut & delinquentes iuventur, & reliqui à similibus terreantur.

Cogitandum deinde sæpe, quid sperari ex hac re possit, quid timeri. minimarum rerum spes, ingentium timor est. tutiora certioraque prudens eliget.

CAPVT XXXI.

Simulatae amicitiae. Occulta odia.

Sapientis verba sunt: *Homo qui blandis* Prou.
Et siq; sermonibus loquitur amico suo, rete 29.
expandit gressibus eius. Indignum homine, ac multò etiam magis Religioso vitium hoc est, & aulicis moribus adnatum, nec aliud, quàm proditorium nomen meretur. execrandum omnibus, ac in vltimas terras ablegandum. neque enim parcit vlli, ac ne parenti quidem, quem hæc humanæ asso-

ciationis fœderisq̃ue pestis occupauit. indignissimus Christiano nomine, dignissimus quem omnes præsentiſſimis venenis nocentiorẽ detestentur ac fugiant. nam quis huius fidei se suaũe credat? & optatior hostis est, qui aperta bella mouet, à cuius ferro tutare te potes. arma namque armis contineas, & enseẽ ense reprimas. à domestici hostis insidijs quis nos defensabit? maximè dum sub amico vultu hostilem tegit animum, fella vino miscens, & electibilibus quibusque cibis venena temperans. Cuius tanta prudentia est, vt in explicata benigna que fronte, ore ridẽte, blandè ludentibus oculis, inimicam mentem videat? Etiam sapientissimus capiẽtur his lachrymis, nec effugiet insidias mentientis amici. & vita hæc longè omnium miserrima est, cùm nescias cui fidas. plena hinc omnia suspicionibus. nusquam exporrectus animus, & regia gradiens via. timoribus natant pectora perpetua anxietate grauida. nam aut inimicũ præferunt ora verbaque, & iusta timoris causa est: aut loquuntur amicum, & terrent te hostiles animi, amico velamine tecti. ita dum nusquam fides, in æterno versamur metu: pendula semper dubiaque mente, vnde mœrores & melancholia quædam enasci-

tur. Fraudibus deinde replentur omnia, mutuisque cadimus insidiis. evanescit vniuersum Religionis spiritus, cādidus & simplex, & in aperto ad lucem habitans: succedunt doli, aulici mores, incerta consilia, nebulæ vbique & densæ noctes, & nouacula spongiâ tecta. Et sanè verissimum illud Sapiētis est: *Meliora sunt vulnera diligentis, quàm fraudulenta oscula odientis.* illa in salutem, hæc in mortem eunt. Prou. 27.

Si inferior morbo hoc laborat, præcipitia sibi, damna Religioni parat: neque enim talis ægritudinem suam explicabit Superiori, aut ægram reteget mentem ruinæ proximam. vnde fiet, vt imperaturus sit illi Superior, in interitum illius, & in Religionis totius dedecus itura. quòd si in latētium sub benigno vultu odiorum cognitionem Superior venerit; ingens animorum nascitur alienatio, auersaturque hunc vt familiæ pestem, vt Religionis portentum, vt domesticæ pacis turbatorem, alienæ virtutis osorem.

Si Superiorem malum hoc occupaue-
rit, misera inferiorum conditio est. non tu-
tò illi quidquam, aut tanquam patri com-
mitti potest. & quis sua credet hosti? suspe-
cta deinde illius verba, consilia, imperia,
dicta que facta que sunt omnia. consequi-

turque vt ne quidem cùm verum dicat, sinceroque patrioque suos prosequatur affectu, fidem inueniat; cùm semper vereantur; ne verborum blanditijs odia, & hostiles integantur animi.

Plurima deinde mala ex hac simulata & ementita amicitia profiliunt: mutuum hinc dictorum factorumque nascuntur obseruatores, grauesque censores, occulti nominis boni famæque detractores, secretorum violatores, domesticæ quietis turbatores, odiorum seminatores, infidarum mentium auctores, oblocutionum & in Superiores conspirationum propugnatores, ducesque ad illa, alienæ virtutis improbi æmulatores, ingratitude principes & ductores. Inde fit, vt omnium à se animos alienent, odia prouocent; nec minùs hos quàm certam Religionis pestem & venena auersentur; fugiant vt mutuæ charitatis hostes iuratos, vt amicitie proditores, vt violatæ conjunctionis incentores, inuidentiæ impulsores, vt Religiosi roboris fallaces substructores & euersores, omniumque propè malorum causam.

Prov. 3. Grauius in hos insurgit Sapiens: *Nemo liaris amico tuo malum, cùm ille in te habeat fiduciam: quia abominatio Domini est omnis illusor, & cum simplicitus sermocinatio eius.* Forti-

ter in hoc vitium quod Israël occupaverat insurgit Ieremias: *Vnusquisque se à proximo suo custodiat, & in omni fratre suo non habebit fiduciam: quia omnis frater supplantans supplantabit, & omnis amicus fraudulenter incedet, & vir fratrem suum deridebit, & veritatem non loquentur. docuerunt enim linguam suam loqui mendacium, ut iniquè agerent, laboraverunt. habitatio eius in medio doli. sagitta vulnerans lingua eorum, dolum locuta est in ore suo: pacem cum amico suo loquitur, & occuliè ponit ei insidias. nunquid super illis non visitabo, dicit Dominus, aut in gente huiusmodi non ulciscetur anima mea?* Cap. 9.

Remedia.

A Seuera in tales punitione petenda sunt. Nihil hîc parcendum. functionibus omnibus excludendi, vilissimis occupandi; seriò monendi, proposita delicti huius fœditate. ablegandi ad probationis domum, ut nouum à Tironibus spiritum hauriant. A familiaritate illorum reliqui deterrendi, iuniores maximè, quorum molliores animi facilè hac contagione capiuntur: dandaque opera ne quis illis familiarius adhæreat. irrepunt suauiter, nec antè venena sua iaculantur, quàm al-

terius obstrictam sibi mentem teneant. in-
itiis proinde resistendum, & præscinden-
da omnis consuetudo est.

Qui verò malum hoc ab alio patitur, si
decurrat cum magno Iob ad Dominum,
sequaturque in omnibus consilium illius,
errare non poterit. habet enim magnum
Iob 12. ex se doctorem: *Qui deridetur ab amico suo
sicut ego, inuocabit Deum, & exaudiet eum: de-
ridetur enim iusti simplicitas.*

Iuuabit priuatis monitis proniores in
hoc malum seriò seuerèque monere; mi-
nis etiam adhibitis, grauibuscque in trans-
gressores pœnitentiis, quò & emendentur
præuaricatores, & reliqui terreantur.

Quòd si eruperit malum, & in reliquo-
rum domesticorum cognitionem venerit,
arcendi ab aliorum familiaritate erunt,
excludendique à reliquorum consuetudi-
ne. palamque grauiter in hoc vitium insur-
gendum, damnis propositis.

CAPVT XXXII.

Secretorum Violatio.

INimica hæc omni bonæ gubernatio-
ni est, ad quam necessaria est tenacissi-
ma secretorum obseruatio: cuius violatio-
ne

ne res ferè maximæ, regnaque perierunt integra: vt meritò quis dixerit, euertendis imperiis rebusque natum malum. Ita hostilium consiliorum cognitio inter prima feliciter imperandi documenta meritò ponitur. hinc etiam secretorum violatio inter maximè imperiis noxia, & inter læsæ maiestatis crimina adnumeratur.

Neque potest diu feliciter gubernatio consistere, nec fortunato terminari exitu, quæ tacenda prodit: planè vt nihil sit tam inimicum bonæ gubernationi, tam pestilens, quàm silenda vulgare; cùm vnà sæpe agendarum rerum prosperitas à silendorum tenacitate dependeat. Vulgasti? periiit benè gerendi rei occasio; & elapsa non rarò manibus præda est, verbo vno aut altero intempestiuè prolato: imperiaque non postrema iacent, ad cineres in ludibrium magnorum improuida secretorum violatione deducta.

Neque vlllo modo ad gubernacula ad-mouendus, qui femineo hoc vitio laborat. Viri est frænos linguæ iniicere, laxare mulieris. & antè vitam ponere, quàm concre-dita retegere, viri est imperio nati: effutire commissæ muliebris ingenij est, & ad colū & acum nati. Nam quid ab eo speres, cui nihil tutò credi potest? qui cōsilia in fron-
te,

Pron.
25:

te & manibus ferat? parêre fòrs poterit, imperare non poterit. Verum nimis illud Sapientis est: *Sicut vrbs patens, & absque murorum ambitu, ita vir qui non potest in loquendo cohibere spiritum suum.*

Nulla deinde sincera reddendæ conscientiae ratio sperari potest: à qua tamen vna, magna pars bonæ gubernationis pendet, vt sine qua prudens tutaque gubernatio non diu consistere possit.

Nemo deinde cuiquam tutò quidquam credet, nemo vulnera, pericula, morbos, malaque sua aperiet. nam quis arcana credat, animique vulgãdos morbos? quis quæ sæpe pudor vel cogitare erubescat, vt quorum vel memoria sine rubore non transeat, euulgatori committat? vt iam in omnium oculis versetur, quod proprios etiam oculos pertimescebat. & imprudens meritò habeatur, qui abdita mentis pectorisque illi credat, de cuius silentio merita suboriri dubitatio potest.

Sed neque solida vlla amicitia stabit, nullus amor vitio hoc imperante: cùm omnẽ mutuae benevolentiae fiduciam tollat, cui amor omnis innititur.

Occasio deinde non vltima, secreti violatio est, politicè agendi, aliudque verbis, aliud inclusum pectore tenendi; cùm violatio-

lationis huius metus aliorum verba cogat
flectere: nam quæ sinceritas sperari potest,
vbi perpetuus refectionis adstat timor?

Grauis etiam hinc turbarum causa, cum
sæpe ob noua aliqua enata, aut minus an-
tè prouisa, minusque nota, cogantur Su-
periores sententiam mutare. quod, vbi res
prodita, aut non sine vitio quodam incon-
stantiæ, aut cum aliorum ingenti turbatio-
ne necessum est fieri: aut sanè necessitas
quædam Superiori imponitur in minus
tuta prolabendi, ne aut externos aut suos
offendat, aut animorum in se alienationes
prouocet.

Accedit, tales usu quodam & quæuis
effutiendi consuetudine, externis etiam
intima quæque domus aperire. hic pœni-
tenti sibi mulierculæ, ille familiari sibi viro;
quæ domos denique peruagantur & op-
pida: quin & defectus animorumque vā-
riæ propensiones, delicta vitiaque, si quæ
sunt, seu vero, seu falso non rarò adscripta,
Superiorum decreta, monita, & quidquid
denuum priuatis æternum claudendum
parietibus erat, ostiatim ac plateatim de-
currit. tantum potest praua consuetudo;
vt quæ vel sanguine firmanda forent, spār-
gamus ac propalemus primi; ac tanquam
semen Chanaan, & deteriores etiam filij,
dede-

dedecorantes matrem , prospectandam
ridendamque præbemus aliis. quæ res eo
grauior est, quo minima etiam Religionis,
maxima apud externos habentur: eò ma-
gis , quòd in immensum res illæ crescant,
nec per vnus ora, sine insigni aliquo aug-
mento transeant.

Sequuntur deinde ex hoc capite detra-
ctiones plurimæ, nulla postea pœnitentia
aut lacrymis eluendæ; adhærentque adeò
constanter firmiterque, vt nullis virtuti-
bus eruere conceptam semel de se opinio-
nem queant, qui passi sunt hæc linguæ ma-
la. Nimirum vt videamur fidere externis,
vt amari se sentiant , vt in mutuam illos fi-
duciam affectumque impellamus, vt sen-
tiant se hac narratarum rerum prærogati-
ua donari, effundimus etiam in virgines
& matronas beneficas domestica propè
omnia, mores omnium. ea interim fiducia
sumus, vt celanda hæc arbitremur. falli-
mur, nulla est, quæ non vnam pluresque
amicas habeat , in cuius sinum muliebri
more profundat omnia, vel hoc etiam so-
lo nomine, vt sentiant aliæ, quo apud con-
fessarium loco sint, quibus domestica o-
mnia tanquam domesticis credantur. Sa-
nè quisquis prudenter vitam instituit, cer-
tò sibi persuadeat, nihil adeò grande &
per-

perenni silentio premendum, etiam in ipsa confessione, cuicunq; committi mulieri, quod non aliquando vulgandum sit. ut ille prudens sit, qui nihil illis credit, ne in secretiore quidem sanctissimæ confessionis tribunali, quacunque præcautione sponsonibusque firmatum, quod non certò sibi persuadeat, tanquam tympanis ac tubis decantandum aliquando in foro & compitis. Illa proinde dicet vir prudens, ad quorum propalationē non erubescat: neque enim talis facilè labetur in pœnitēda, aut se nomenque suum animumque periculis exponet grauioris mali, aut committet quæ vel leui quadam indignatione, vel innata naturæ inconstantia, vel alterius solertia, vel noua veteriue amicitia & familiaritate pellecta mulier profundet: quæ nec mala quidem sua delictaque diu premere didicit, maximè si ab alia paribus fiduciæ narrationibus prouocetur.

Remedia.

GRauis punitio illorum, qui in hoc muliebri vitium cadunt: qualis est, remotio ab omni munere, nulla consiliorū agendarumque rerum communicatio, ablegatio etiam ad alia loca minùs cognitioni

tioni commoda, ac proinde minùs etiam secretorum violationi obnoxia.

Seriæ pœnitentię, etiã publicæ, quando res in aliorum cognitionem venit, publicæque reprehensiones acres.

Frequentia & seria monita, quotiescunque vel in minimo peccatum est: ita ut nunquam in hoc vitio parcat, aut dissimulatione delictum prætereatur. Sciat se observari qui hoc malo laborat, & nunc amore, nunc pœnis, nunc proposita rei indignitate terreatur.

Consultum fuerit, si alij horum consuetudinem fugiant, sentiantq; hoc qui huic se vitio dederunt: pudor & verecundia magnum incitamentũ victoriæ est. Sciant hoc malũ latere non posse. prodit se ipsum, & propalatione sui improbitatem aut imprudentiam ostendit. Monemur hîc à Sapiente: *Qui ambulat fraudulenter, reuelat arcana: qui autem fidelis est, celat amici commissum.* ut arcanorum reuelatio, à fraudulenta & infida plurimùm mentè proficiscatur: fidelis enim commissã concreditaque sibi alto premit silentio: qua enim fide ab amico rem accepit, eadem seruat. credit ille, & in huius sinum reposuit? non fallit si amat, si committentis affectui respondeat. si prodit, amicus non est. fallit. infidus est.

nihil

nihil illi proinde credendum. nam ut inimicus non sit, ingenti laborat imprudentia, pertuso similis vasi. quis sapiens vina sua huic committat? quis consilia proditori? proditor omnis commissorum violator est.

CAPVT XXXIII.

*Infidus animus. Alieni explorator,
& delator.*

Vicinum Superioribus vitium, & ferè à placendi studio natum. deterius est, quando à nocendi libidine nascitur. primùm ab amico aut patròno gratificandi desiderio provenit. cùm enim vident aliquid inter amicum & alium æmulationum, aut mutuarum suspicionum intercedere, id què è muneris siue iam parti, siue sperati quadam coriualitate; miscent se hi medios, amicitiam simulant, gratiam venantur. inde ubi se in illam sinuauerint, partis maximè oppositæ delatione, gratifiquè quibusdam detractionum relationibus, perfacile ab animo verborum his aculeis exulcerato extorquent ea quæ non iucundum sæpe audire est priori illi amico aut patròno; maximè si consilia propo-

tosque menti fines subdola hac beneuolentiae ostentatione intellexerint, aut si quid in alium dictum scriptumue acerbius. quarum rerum omnium explorator ille & dux & auctor fuit, fallaci quadam maledicentia, simulataque calumniatione alterum in paria prouocans; maximè si patroni illius sui in hunc criminationes falsò licet recensitas, & à se excogitatas retulerit. quo tanquam stimulo in indignationem primùm illum impellit, inde etiam in conuitia, simulata semper inimici in altero, amici verò in hoc persona.

Et ferè vsu venit, vt deteriora referant, plurimaque de suo misceant, ad prioris illius pectus potentiùs exacerbandum. validam odiorum causam subministrantes, conceptasque priùs animis scintillas, in ingentes ignes noxiis his infidissimi oris flabris excitantes.

Sin non tam placendi vni, quàm nocendi alteri studio hæc retia tendantur, detestandi etiam magis sunt, vt quos solum odium ad has fraudes impulerit. quod non tam humanæ mentis, quàm diabolicæ crudelitatis vitium est; maximè cùm in innocentem, nullaque illius hostilitate prouocati, effera nocendi libidine, in aliena damna rapimur, idque beneuolentiæ quodam

dam mantello tecti; tanquam saporato pulmento toxica miscentes. ad quæ proiectissima scelera nemo Religiosus venit, nisi omnem antè Religionis spiritum exuerit, vindicisque Dei timorem excusserit, factus sibi ipsi improbitatis dux & magister.

Sequuntur ex his initiis mala innumera. ac inter prima lethale Religionibus omnibus detractio vitium, non fortuito, aut linguæ quadam incontinentia, aut à prauo habitu natum, aut aliorum narrationibus prouocatū, sed ab insigni maleuolentia & præcogitatione, ac præmeditata improbitate profectū. quæ res veniam nullam meretur, nec sat graui pœna puniri potest: soluit enim omne humanæ coniunctionis commercium, omne mutuæ charitatis vinculum, omnem fraterni affectus necessitudinem, omnem Religiosæ domus tranquillitatem, omnem spiritualis amoris nexum, omne fiduciæ robur.

Succeduntque illorum loco nullo ingenio, aut arte reparanda, damna: in verbis factisque pulla securitate trepidatio: in omni etiam familiari colloquutione, candore fugato, fraudum anxia sollicitudo; ac tanquam inter inimicas acies versanti, attonitus quidam timor: quaqua parte insidiis septo, hostilis quidam metus. nulla hîc

læta dies, nullum gaudium explicatum; ponderantur tanquam in trutina verba singula, & in omni oratione retia & compedes circumspectamus. iam & incessus ipse & inambulationes nescio quid metuendum contineant. dumque omnis fiducia fidesque exulat, taciti contabescunt animi, ac quasi in saxa ac rupes congelascunt.

Misera omnino vita, & non hostium acerrimis vouenda: ut extrema præligēda pauperies, vincula sint & carceres inter lætum hilaremque panem & aquam, quàm inter orbis delicias ac diademata ad omnē congressum verbaque mens attonita, dubia, insidiis benevolentiam mentientium circumsepta, perpetuisque suspicionum æstibus, tanquam decumanis fluctibus iactata, ut infelicissima in continuis tempestatum harum circumuolutionibus omnique acerbior morte censi vita debeat.

Tales sunt quorum meminit Ecclesiasticus: *In labiis suis indulcat inimicus, & in corde suo insidiatur ut subuertat te in foueam. In oculis suis lacrymatur inimicus: & si inuenerit tempus, non satiabitur sanguine: & si incurrerint mala, inuenies eum illic priorem. In oculis suis lacrymatur inimicus, & quasi adinuans suffodit plantas tuas. Caput suum mouebis, & plaudet*

manu. De inimico amicitia simulante hæc verba. cuius cum distillent labia fauam, mellaque fundant, lacrymaeque amorem testentur, hostilitatem facta loquuntur. de quo illud verè: Dens putridus, & pes lassus, Prou. 25 qui sperat super infideli in die angustiae, & amittit pallium in die frigoris. Sicut enim aramentum Eccli. 12 aruginat nequitia illius: & si humiliatus vadat curuus, adijce animum tuum, & custodi te ab illo. Non statuas illum penes te, nec sedeat ad dexteram tuam: ne fortè conuersus in locum tuum, inquirat cathedram tuam. talis etenim Eccli. 6. est amicus secundum tempus suum, & non permanebit in die tribulationis: est amicus qui conuertitur ad inimicitia: & est amicus, qui odium & rixam & conuitia denudabit: est amicus socius mensæ, & non permanebit in die necessitatis. Excitabit etiam tribulationes, nec parcat animæ moerenti, nec iacentis sanguini. impinguatur namque aduersis, & ridebit in interitu aliorum, omni bellua crudelior. Lactat amicum suum, & ducit eum per Prou. 16 viam non bonam, viam insidiarum & mortis. & dum amicum simulat, hostilia in incauto exequitur. bis sceleratus, simulatione & fine. Et sicut noxius est qui mittit sagittas & lanceas in mortem: ita vir qui fraudulenter nocet amico suo: & cum fuerit deprehensus, dicit, Ludens feci. nimirū ludit in amico san-

guine. hoc solo iudicio suo infelix, quòd cogitata ad optatum animo suo exitum deducere non potuerit. nec finem tamen improbitati, nisi in suo aut alieno sanguine statuet. Hic exitus infidæ mentis. perit, aut perimit: & miserando exitu amici, aut infelici suo, infidum animum signat, Deo hominibusque iuxtà inuisus. de quo illud

Isaia 29 Prophetæ dici potest: *Va qui profundi estis corde, ut à Domino abscondatis consilium: quorum sunt in tenebris opera. & dicunt, Quis videt nos, & quis nouit nos? peruersa est hæc vestra cogitatio. quasi si lutum contra figulum cogitet, & dicat opus factori suo, Non fecisti me; & figmentum dicat fictori suo, Non intelligis. Profundi cordis omnis infidus est alieni obseruator & substructor. ac licet fraudulenta consilia sua apud homines tegat, Deum habet cordium scrutatorem, qui educet è tenebris insidias in proximorum perniciem structas. quem si cogitarent inspectorem & vindicem, non descenderent ad noxias has fraudes, tanquam si machinationum harum nullum aliquando habituri essent discussorem, nullum iudicem. audiant Sapientem: Benignus est enim spiritus sapientia, & non liberabit maledicum à labiis suis: quoniã renum illius testis est Deus, & cordis illius scrutator est verus, & lingue eius auditor. quoniam*

spiri-

Spiritus Domini repleuit orbem terrarum: propter hoc qui loquitur iniqua, non potest latere, nec prateriet illum corripiens iudicium. In cogitationibus enim impij interrogatio erit: sermonum autem illius auditio ad Deum veniet, ad correptionē iniquitatum illius. Custodite ergo vos à murmuratione, qua nihil prodest, & à detractiōe parcite lingua. quoniam sermo obscurus in vacuum non ibit. os autem quod mentitur, occidit animam.

Remedia.

A Vitij huius fœditate & grauitate petenda: quam à communi mortaliū omnium sententia mutuare possumus. qui licet proditiōes non rarò bono suo venentur & probent, & pretio etiam parent, proditores tamen execrantur: quorum infame omni retrò ætate apud omnes nationes, omniq̃ue sæculorum memoria nomen est. quoq̃ue vnaquæque generosior gens est, hoc proditoris nomen maiore in horrore habet. venalia nimirum alieni honoris, gloriæ & commodorum mancipia, indigna quæ hominis nomine censeantur, quo magis ab omni Religione eliminanda. Monemur sic à Sapiente: *Noli Eccli. consiliari cum eo qui tibi insidiatur, & à Zelanti- 37.*

Prov.
20.

bus te absconde consilium. & , Ei qui reuelat mysteria, & ambulat fraudulentur, & dilatat labia sua, ne commiscearis.

Fouendus contra fidus animus, qui nec proposita morte alieni proditor fiet. talem quicumque nactus fuerit, inter verticis sui gemmas primam statuatur, colaturque ut caelo datum, obseruet ut oculi pupillam, benefaciat ut animae suae, intimaque sibi familiaritate iungat. rarissimus enim horum usus, ac inter millia unus aliquando, aut alter. quo studiosius quaerendi, fouendi, tutandi sunt. ut videant qui contrario virtuti huic tenentur vitio, quanta sit fidei pectoris prerogatiua. omnibus hoc opibus regnisque praestat: parari enim haec industria laboreque possunt; animus fidus, secreti tenax, nulla mercede aut tormentis vincendus, à solo caelo sperari debet. amicus fuit in prosperis? magis etiam erit in aduersis. stetit inter secunda? non cadet inter aduersantia: quin fortius firmabit gradum, & ostendet se non purpuræ aut fortunæ, sed amico natum, cum quo per aduersantia lætior ibit, quam sine illo in gloria. Serpens nimirum, sitis, ardor, arenæ, dulcia amoris sunt, propone diademata: contemnet, si prodendus amicus est. opes & honores: ridebit, si alieni explo-

plorator delatorque esse iubeatur. sponde plena manu voluptates: nulla illi maior voluptas est, quàm pro fidei firmitate ac tuitione vitam proicere. deince functionibus omnibus, exue muneribus, ad extrema terrarum populorumque relega, indue compedibus: gaudebit, si pro fide, & negata proditione patiat, & dulce ducet pro tam bona causa pati: imò si destituatur ab amico, & hostem patiat ex amico; stabit tamen in gradu, nec semel datam fallit fidem; & hostilitatem hanc errori tribuet, commiserabiturque amico tanquam è febribus phrenetico & mente capto: morboque inimicum hunc ex amico animum, tribuet, non homini. ac nec iniuriis quidem damnisque prouocatus, aliud quàm commiserationem reponet, qualem solemus mania laborantibus. Beatus qui hunc nactus fuerit: non enim quidquam in hac vita voueri aut concedi potest optatius aut maius, quàm si nactus aliquem fueris, in cuius sinum tutò reponas quidquid animo habes malè, quidquid bonè, securus de fide, certusque de custodia. Bene Sapiens: *Amicus fidelis, protectio fortis: qui autem inuenit illum, inuenit thesaurum. Amico fideli nulla est comparatio: & non est digna ponderatio auri & argenti contra* Eccli. 6.

bonitatem fidei illius. amicus fidelis medicamentum vitæ & immortalitatis. qui metuit Dominum, inueniet illum.

CAPVT XXXIV.

*Ingratus animus, beneficiorum
immemor.*

DEo hominibusque inuisum malum: quod cum in omni hominum genere detestandum sit, tum multò maximè in Religioso, & mitior longè aperta hostilitas est. Nam quid magis cum ratione pugnat, quàm cui benefeceris, pati inimicum? & omni hoste acerbior, ingratus est. nam inimicum æmulum suum auersari nihil nouum; odio etiam prosequi, cum mutua sæpe damna data & accepta, sat ampla odiorum causa intercurrent, nemo miretur. at post beneficia accepta dataque, in beneficium largitorem insurgere, & pro beneficijs odia detractionesque reponere, bellæ verius, quàm hominis est.

Ingratitudinem vorò vitia plurimùm reliqua sequi, experientia nos docet. neque enim illa intra solius nudæque ingratitude limites se continet: prosilit ferè ad odia, famæque ac bonæ æstimationis dimi-

diminutionem, dictorum factorumque fugillationes. Semel enim verecundia exuta, ne ingratitudinis ab alijs damnemur, decurrimus ad acceptorum beneficiorum extenuationem. inde etiam damnamus donatorem, merita nostra extollimus, dona deprimimus. quòd si magnitudine sua celari dona & beneficia non possunt, aliò donatoris mentem torquemus, & suis illum commodis, non nostris dona contulisse contendimus: vt cùm rem nō possumus, mentem damnemus. ita sagaci ingratitudine inuolamus in amicos. Inde iam in apertas dilabimur detractiones ac hostilitates: ac primò apud vnum alterumue, tandemque pudore exuto palàm in omnium oculis.

Fœdum in Religione vitium. & ferè reperies pari hos ingratitudine ab alijs percuti, qua in Superiores benefactores suos fauierunt: plerumque etiam mœoribus opprimi, ac melancholia quadam excidi & extingui. nam cùm benefactores à se auerterint, nec quisquam se illis suaque credat, fidat nemo, imò quisque consuetudinem familiaritatemque fugiat; fit vt contabescant malis, sibi aliisque graues.

Qui si Superiores sint, non faciliè suorum animos possidebūt: neque quisquam
tali

tali duce ad pericula decurret, nemo ultro labores suscipiet, nemo gaudens sudorem fundet, quem scit ingratitudine munerandum. nulli ad ardua mens stabit, aut ad generosa manum porriget, quam didicit non vacuam tantum remittendam, & nullo dignandam premio, sed insigni aliqua ingrati animi testatione feriendam. hinc pro laudibus, & benevolentia signis, sicciora inferior pumice, satyroque quodam dente pronunciata verba referet, aut indignantem etiam orationem, factaque, clara & illustria licet, deprimentem. quibus modis etiam probissimorum, & ad labores promptissimorum animos exasperant. Ingrato enim benefacere durum, sudoremque ingratitudine siccanti ac detergenti profundere graue est. inuitos proinde ac reluctantes suos ad ardua quaque reperiunt.

Si inferiores hoc malo tenentur, omnium à se Superiorum animos auertunt, alienissimosque experiuntur, ac diffidentia plenos, nec quidquam laude aut gloria dignum magnumue committentes: nullo- rum etiam consiliorum participes faciunt, nullaque familiaritate dignantur: nulla premiorum munerumque prerogatiua condecorant. nam quis ingrato aut se, aut
sua

sua credat, aut beneficiis obstringat, quem nulla munificentia vincit, nulla liberalitas mollit? obduruit nimirum frons illius, & durior ferro beneficia repellit, & in auctorem pro munere conuitia retorquet.

Nulla deinde apud ingratum secreti firmitas. abditissima quæque propalabit. nihilque tam sanctum, à quo veneratione tactus absteineat. gaudebit etiam conditorum sibi refectione, & inuidia duce, ad recondita quæque protendet manum, felicemque se æstimabit, si quid muneratoris sui erubescendum vulgauerit. hostem credas in inuidiæ scelere lætabundum, ac tanquam parta ex inimico victoria triumphantem. ut, si delectus detur, hostem longè præ ingrato diligas. nam ut ille acerbissimus sit, sanguinisque tui sitierrimus, beneficijs tamen vinctus. nec vlla re magis crudeles inimicasque mentes, damnisque & odio efferatas, quàm beneficijs mitigabis & molles. pergit illa exasperata furere? perge benefacere. repellit ab hostili manu munera? duplica, & vinctus, sedabisque tandem sanguineam hanc sitim, frangesque inimicos animos furore licet ebrios, deducesque ad placidam quietem; inde in admirationem, in factorum suorum detestationem, tandemque in laudem & amorem.

rem. & cùm nolit beneficijs vinci, paria conatur reponere. quique generosa mente inimicitias fouit, odiaque sparsit; eadem mentis generositate victus, beneficia tanquam missilia iaculabitur.

Ingrato verò quanto plus benefeceris, tanto magis exasperaueris. beneficia enim illi materies odiorum sunt, non secus ac ligna oleumque flammatarum materia. Nec domandi hoc pectus remedium vllum. subtrahe beneficia, liuore & mœroribus quidquid interni in illo roboris est, emedullabis; cōfer, insurget in benefactorem, tanquam si arma furenti præbeas; nega, in se sæuiet, nulli, ac ne sibi quidem amicus.

Contrà verò animo grato, ac beneficiorum memore nihil cuiquam iucundius gratiusque euenire potest. Pulchrum sanè, & cælo dignum certamen, animi graticum munifici largitoris beneficentia: cùm nec gratitudine hic se vinci patitur, nec beneficijs ille. gaudet benefacere generosus animus, & beneficium existimat, dona posse conferre grato. & prouocat quasi nolentes in beneficia gratus. cui etiam re-nuenti plena manu generosior omnis munera largitur. Ingenti deinde fiducia in talem fertur quisquis animo erecto est, am-bitque vltro amicitias, & felicem se consuetudine

fuetudine illius arbitratur. nec quidquam tam magnum est, quod non in gratiam illius lubens profundat, vitam etiam positurus, si qua grauior necessitas postulauerit. Nec minor in animo grato magnitudo est; se suaque sanguinemque lætus profundet in benefactoris sui causâ, nec fortunam huius, sed animum sequetur, ac in aduersis, iuxta ac secundis fidem tenebit. Ingruunt tempestates? vltro se illis pro benefactore inuoluet. petitur huius pectus? latus opponet suum. audit detrahentes? laudes opponet. delicta videt? excusabit, si potest, aut certè mitigabit verbis. si lenimen rei grauitas non patitur, ingenti animi sensu miserabitur benefactoris sui, & ad preces apud Deum, lacrymasque decurret; gratæque interim memoriâ in quacunque fortuna benefactorem suum prosequetur: & vbi se occasio dederit, virtutes enarrabit, delicta humanæ fragilitati tribuet.

Remedia.

FVge ingratos animos, consuetudinem deuota, contubernio repelle, nihil crede, ne te obstrictum teneant.

Nihil quod laudem mereatur committe, vilioribus destina, magnorum familiaritatibus

ritatibus subtrahe, à publicis functionibus exclude.

Frequentatis sæpe per annum spiritualibus exercitiis, priorum librorum assiduis lectionibus, fortibus Præfecti spiritus monitis, adiuuandus erit.

Proderit etiam si in ualeitudinis tempore pronam in se paternamque senserit Superioris mentem. quæ res si ingratum illius animum non flectat, à solo Deo remedia poscenda & speranda sunt. cuius sunt non aliena abs hac re apud Lucani verba:

Luc. 6. Diligite inimicos vestros. benefacite, & mutuum date. & eritis filij Altissimi: quia ipse benignus est super ingratos & malos.

Vitij etiam huius magnitudine terri quisque meritò debeat. describit eam

Serm. 51 in Cât. Ingratitudo ventus est urens, siccans sibi fontem pietatis, rorem misericordie, fluentia gratia. &

Sap. 16. de ingrato Sapiens: Ingrati spes tanquam hibernalis glacies tabescet, & disperiet tanquam

De ver. bis Apost. non habemus & non perdamus quod habemus. Solet enim Deus eadem ingratis animis

inferre, quæ seruo nequam suffodienti ta-

Mat. 25. lentum domini sui: Tollite ab eo talentum, & date ei qui habet decem talenta. omni enim ha-
benti

benti dabitur, & abundabit: ei autem qui non habet, & quod videtur habere, auferetur ab eo. & inutilem seruum eijcite in tenebras exteriores: illi erit fletus, & stridor dentium.

CAPVT XXXV.

Nimia ad externa diffusio.

Sive illa à quadam naturæ inquietudine, & necdum in plenum domito sæcularium affectu proueniat, siue extædio ariditatis interioris, dum in externis mens solatîa quærit, quibus interiùs caret; non leue vtroque malum est. Euenire enim solet, vt, dum se totum animus in externa profundit, adhærescat etiam non cogitanti non parum sæcularis & mundani pulueris, quibus obtenebratur spiritualis oculus, ne ea deprehēdat, quæ & ipsi & Religioni noxia sunt, quæque illum paulatim à genuino & primæuo vocationis spiritu abducunt. ita à tam paruis initiis mens tota obtegitur: minimarum nimirum arenarum congestio crescit in montem, fertilesque etiam agros infæcunditate & sterilitate sua contegit. *Cum enim propter temporis breuitatem, & diei malitiam vix necessariis sufficiamus disponendis, si superuacuis &*

*Bonau.
de 6.
alis c. 7.*

alienis volumus occupari negotijs, negligimus
 utiliora & meliora: cùm distractus animus ad
 plura, fit minor ad singula providè peragenda.
 Inde fit aliquoties, cùm Pralati & Ecclesiastici
 nimis se exterioribus occupationibus implicant,
 adificiorum, agrorum & vinearum & similium,
 quibus fructuosius carerent, ut non solum me-
 liora interim negligant, sed etiam conscientiam
 sapius inquinant, & ex usu exteriorum tene-
 brescat mentis oculus ad contemplationem spiri-
 talium & interiorum, & tepescat ad desiderium
 supernorum. Sicut enim humores noxij affluunt,
 ubi fuerit in corpore lesio, nisi cautè remouean-
 tur, ne fiat ibi tumor vel ulcus: ita & negotia
 crescunt ad extinctionem spiritus, qui se iis ac-
 quicuerit occupari. Super omnia verò debet se-
 metipsum rector circumspicere, ne alijs provi-
 dens, seipsum negligat, neque alios saluans, seipsum
 in periculum demergat. quid enim prodest ho-
Mat. 16 mini, si uniuersum mundum lucretur, anima
 verò sua detrimentum patiatur?

Desipiunt etiam in dies magis magis-
 que interna, dum delectamur externis,
 nec potest animus his obsessus, celestia si-
 ne pugna admittere. Multis deinde, licet
 magna cautela & circumspèctione uta-
 tur, necessum est se homo implicet, quæ
 aut minùs vocationi consona, aut ab illa
 etiam aliena: labiturque aliquando in pœ-
 niten-

nitenda, corporique vniuerso nocitura.

Et incredibile est, ad quanta damna è leuibz initiis decurratur. Guttè nimirum & stillicidia tenui licet filo desudata excauant rupes. à tam molli raroque lapsu vincuntur multorum sæculorum opera, & quæ decumanos vicerunt fregeruntque fluctus, guttatim depluente lymphæ sedibus pelluntur. Idem vsu venire videmus in Religioso. steterat quaquaparte irruentibus tentationibus, dum se domesticis contineret parietibus, & superior etiam omnibus inferorum conatibus stabat interritus; vt primùm veteres egressus limites, plusculùm se in sæculum diffudit, cœpit labascere, & dissimilis iam esse sui. Nec mirum. cùm enim Religionis clauderetur terminis, perpetua quadam interni spiritus pascebatur alimonia, tanquam cælesti manna, firmabaturque domestico orationis propugnaculo aduersus procurfantes hostiles acies; at postquam destitutus his præsidiis, nudum exposuit latus inimico ferro, quid nisi vulnera expectet cædemque?

Nec pessima quæque primo ingruunt prolapsu. pedetentim ad præcipitia ducimur, eo ferè passu, quo ad externa diffundimur. à minimis scilicet initiis, ad latissi-

ma damna descenditur. Et trahimur primò agendi quadam cupiditate : & videri Religiosus amat , quisquis sæcularibus se rebus immiscet . aut sanè è leui quadam fastidientis animi nausea , ac spiritualium lassitudine , profundit se ad externa , tanquam nausæ aut inualetudini suæ remedium aut solatium quæsiturus . Interrumpendus nimirum spiritualium ille cursus erat , ne aut contentione frangeretur animus , aut eiusdem spiritalis cibi fastidio teneretur . infelici commutatione à cœlestibus ad sæcularia decurritur , quasi in medicinam ac solatium . Ex quo fit , vt quomens profundius perituris illis immergitur , hoc potentiùs eripiatùr æternis : pari ferè passu , vt quantum illis accessit , tantum his decedat .

Neque diu tales Deo coniunctos videas , cum disiungantur per externa . patiunturque difficultates maximas , vt ad statuta orationum tempora se recipiant . & vt conatum adhibeant , effunditur statim omnis in iis collectus fructus , quasi si demessam messem dispergas in ventos . inde arescunt animi , spolianturque ac nudantur opibus internis omnibus , vt nec suæ , nec propagandæ proximorum salutis aut Dei gloriæ idonei sint . contingitque illis , quod validis

dis fluctibus ac tempestatibus iactatis, ut stomachi pariantur fastidia, nauscentque super omni spiritali cibo, viribus destituti. transeunt deinde ad carnem & corporis commoda, illisque vicina. cumque narrationibus impleantur ingentiū passim distractionum, facile in easdem domi forisque effunduntur. assurgunt exinde animi. & quo pluribus miscentur, maioremque externarum rerum cognitionem consequuntur, plus etiam fastus induunt. hinc domesticæ exurgunt æmulationes, pariaque in imitationem studia. quæ res ad parum sæpe affinia religiosæ modestiæ ac moderationis cōsilia impellit. Nec restegi diu potest. decurritur ad externos, & æmulationum semina latè sparguntur, damnanturque in Religiosis sæculares mores, partiumque studia, plurimumque de sanctitatis ac maturitatis opinione decedit: è quo sperata multorum salus vniuersa propè collabascit. Bene Antiochus: *La-* Homil. 102.
quei & pedica sunt aspirantibus ad salutem sa-
cularium congressus, ac proluxa eorum confa-
bulationes mentem prorsus auocant à Dei glori-
ficatione & spiritali latitia. & magnus Gre-
 gorius: *Valdè difficile est, ut lingua secularium* Lib 3. Dial. cap. 15.
mentem non inquinat quam tangit: quia dum
plerumque eis ad quadam loquenda condescen-
 dimus,

dimus, paulisper assueti hanc ipsam locutionem, qua nobis indigna est, etiam delectabiliter tenemus: ut ex ea iam redire non libeat, ad quam veluti ex condescensione deducti venimus inuiti. sicq; sit, ut ab odiosis ad noxia, à leuioribus ad grauiora verba veniamus: & os nostrum ab omnipotenti Domino tanto iam minùs exaudiatur in prece, quanto ampliùs inquinamur stulta locutione.

Quòd si quæ necessitas ex obedientia nata cogat ad illa, meminerit vocationis, Dei quæ sui, & properantis æternitatis: ad illum quæ quoties per interualla licebit, eo ardentius euolabit, quo minus temporis conceditur; assuescat quæ in mediis etiam externarum rerum occupationibus cælum inambulare, frequentibus quæ imo ductis pectore suspiriis communè omnium parentem pulsare, in illum densas immittere preces, tanquam telorum syluam; calentia iaculari vota, tanquam nubibus contorta fulmina; perennes profundere lacrymas, tanquam euripi fortunata maria, beata negotiorum & lacrymarum reciprocatione. Felices occupationes, tam beatissimæ animorum condimentis: sic enim fiet, ut nec cariem sentiant, nec putredinem metuant, nec viam ad ruinam domino sternant. At Superiorem prudenter

ter in hac re Gregorius monet : *Sit rector internorum curam in exteriorum occupatione non minuens, externorum providentiam in internorum occupatione non relinquens : ne aut exterioribus deditus ab intimis corruat, aut solis interioribus occupatus, qua foris debet proximis non impendat.* *In Pastor p. 2. c. 7.*

Remedia.

ORationis studium, considerationis in Superiore hora seriò impensa : examina conscientiae non perfunctoriè adhibita : adspirationum ad Deum frequens usus, etiam in mediis saecularium rerum tractationibus.

Frequens etiam piorum librorum lectio, actionumque saecularium per spiritualia exercitia interruptio.

Superfluarum rerum resectio, maximeque speciosarum, & quae plus habent externi decoris, quam animarum fructus.

Colloquiorum & visitationum rarior usus, quae si quando per alios non minori fructu peragi posse sperare licet, in alios potius transferantur, quò liberiùs ipse interno homini suo vacet.

Saecularium occupationum fuga, quae eo difficilior erit, quo mens semel tota illis

immerfa, altè in religiofa toga fæcularem imbibit fuccum. Quare nifi talis validè feipfum reprimat, propenfionem domet, affectum potenter comprimat, non facilè victoriam fperabit.

Amandatio ad alias habitationes & munia, in quibus minus periculum eft externæ effufionis, fpecfque maior fpiritualis collectionis, folitudo maior, occupationes rariores, populus infrequentior, minor cognitio.

Iteratæ per annum fpiritualium exercitiorum recollectiones plurimùm hîc iuuant: in quibus fi metuenda damna periculaque, exempla que non poftremorum in Religione virorum, infelici exitu fignata ferio & non curfim examinêtur, ingentia fperari emolumenta poffunt. Frequens etiam cogitatio verborû horum, Ad quid venifti? quid fæculum moribus factis que repetis fæculi defertor? multùm per omnem partem proderit; minæque inten-

Luc. 9. tantis Dei: *Nemo mittens manum fuam ad aratrum, & respiciens retro, aptus eft regno Dei.*

Matt. 6 & illud: *Nemo poteft duobus dominis feruire. aut enim vnum odio habebit, & alterum diliget: aut vnum fuflinebit, & alterû contemnet.*

Proderit etiam nullam rem aggredi, fine præuia fecum recollectione, feriumque dicto-

dictorum factorumque re peracta examen instituere, sicubi erratum, aut à religiosa modestia, à primorum parentum maturitate, ab instituti regula decessum. proderitq; in primis, si diebus singulis quadrans vnus sub noctem seponatur, quo diei illius cum externis peracta recolamus. nullamque vniuersim omnino rem inscio Superiore suscipiamus, ac nec vltro nos negotiis immergamus. Quòd si frequentes externorum accedant interpellationes, afuescat eas Religiosus piis interspergere colloquiis; vt si pergant molesti esse, aliquid semper referant boni: aut tædio piarum rerum affecti interpellare desinant.

Excitatio in se diuini amoris, diuinarumque rerum, multum in hoc genere valet. neque enim talis facile se patietur ab illis deduci, ad externa duci. nam qui ad hæc se trahi permittit, amorem in hæc suum testatur. non raperetur, si non amaret. rapitur: amoris indicium est. exuat hunc amorem, diuinum induat, & vicerit: meminertique verborum D. Gregorij: *Qui* ^{4. Moral. c. 30} *ad appetenda æternitatis atria accenditur, dignum profectò est, vt ab hoc temporalitatis amore lassetur, vt tanto frigescat à studio saculi, quanto surgit ardentior in amorẽ Dei. quem scilicet si perfectè arripit, mundum etiam plenè*

*derelinquit. & eo funditus temporalibus moritur, quo ad supernam vitam aliùs afflatu æternitatis animatur. & eodem capite: Qui in auctoris sui amore roborantur, quo magis in concupita Dei fortitudine conualescunt, eo à propria virtute deficiunt: & quo robustiùs æterna appetunt, eo à temporalibus salubri defectio-
ne lassantur.*

CAPVT XXXVI.

Castitatis neglectus.

CVM aut fiducia nostri, aut aduersariorum contemptu, aut periculorum neglectu in præcipitia ruimus improvidi, damnaque non reparanda accipimus. hîc oculorû liberiore iactatione ludimus; ibi aurium curiosiore aucupatione vellicamur; alibi lasciuiori inuoluimur lectioni. succedit familiaritas sexus alterius, diuturniora colloquia, captata solitudo, prolixiores repetitæ & frequentatæ confessiones, spiritales instructiones familiariores, munerum mutuæ acceptationes, secretorum vltrò citroque cõsiliorum communicatiopes, ingens peramica silentia commissorum fiducia, officiosæ & sæculum redolentes salutationes, scriptiones
comi-

comitate & beneuolentia plenæ; nec qualis inter patrem filiamque ueneratio, sed qualis inter sponfas sponfosque honorum præuentio.

Inde iam profiliunt nocituræ libertates, mutuus aspectus, exporrectæ frontes, hilaritudines, uerba risum prouocantia, gestus leuior, minusque religiosa corporis compositio, membrorum iactatio, narrationes similitudinesque è matrimonio petitæ, quibus paulatim & pudor ponatur, ac tota demum uerecundia exuatur: succedunt faciliores manuum contactus, & qui antea ad vestes ac vestigia propè pedum erubescibat, nunc constanti vultu & oculos inuictur lasciuiantes, & labia oraque legit ridentia, & prouocantes amicat genas, nec exhorrescit ad nudatum pectus magni lupanaris anteaambulæ, omnisque omnino libidinis prouocatorium. *De caminis nimirum scintilla profiliunt, de ferro rubi-*

*Cypr.
1 e sing.
cleric.*

go nutritur, morbes aspides sibilant: & mulier fundit concupiscentiæ pestilentiam: in risum aliquando dissoluitur, nunc blanditias exhibet, & quod est uenenosius super cuncta, psallere delectatur aut cantare, cuius cantu tolerabilius est audire basiliscum sibilantem.

Augmenta lumunt hæc per interualla; neque quisquam repente fit pessimus: quin

imò

imò sub pietatis pallio, sub spiritalis instructionis prætextu latent & teguntur hæc nocitura, & in mortem pedetentim abitura, ac quodam quasi perenni stillicidio excavantur & exteruntur religiosa pectora firmissimæ quondam rupes, & tot antè dæmonum machinationibus, tot inferarum legionum valido procursu superiores, femineo cadunt oculo; tam molli, vt ita dicam, elemento chalybe fabricata corda, ferro cincta. ita virorum primi & maximi, & stellæ solesq; futuri cælo, muliebri corruunt manu, Samsones Dalilæ, Dauides Bersabeæ, Salomones plurimum blanditiæ.

Ac supina omnino opus negligētia ac spiritalium neglectu ac tepore in eo qui post annos in Religione decursos in carnem labitur. cū enim experientia doceamur nouitios à sæculo recentes, vix ex altissimo vitiorum oceano ereptos, madentes adhuc & criminum fluctibus non semel insepultos, ægreque caput attollētes, aut è media etiamnū prauarum affectionū fornace calentes & ambustos, necdum degustata virtutum pulchritudine, orationum robore, mortificationum firmitate, in magna animi puritate primos Religionis annos decurrere; rara oculorum auriumque

cu-

custodia, celerique quarumcumque occasionum fuga, ingenti que omnium quæ ad voluptatem quoquo modo ducunt horrore ac detestatione; mirum planè videri debet post variorum annorum in Religione educationem, labi viros religiosos, meditationum orationumque præfidiis excultos, post variarum virtutum documenta, post exercitam & ad arma spiritalia paratam mentem, post continentiae callum, post corpus pœnitentijs dissculptum, post tot hostiles acies, tot inferorum agmina superata, protritam & calcatam non semel carnem, nobilissimos denique à mundo triumphos actos; mirum planè & prodigio simile labi in muliercula Religiosum, hunc lasciviæ oculo captum, illum feminea voce delusum, alium leui cōtactu tanquam compede constrictum, quin & petulantioris penicilli conspectu tanquam à Babylonijs ignibus arsisse non neminem; plurimos etiam tanquā niuem sole medio, muliebribus colliquatos radijs, aut ad domesticas illarum flammæ, tanquā à potenti fulgure emedullatos, multosque à solo petulco & ludibundo in femina calamo iacuisse prostratos, arbitreris Herculeæ claua aut cæstibus protritos.

Verum si altius principia legamus, &
præ-

præcipitij causas propiùs intueamur, non ab ultimo illo immanis ac miserandi prolapsus momento, sed à semitis longa ad illum manu ducentibus initia sumenda erunt; à Sacramentorum nimirum, orationis, meditationis, examinum conscientiæ, spiritualium librorum, pœnitentiarû, manifestationis animi morborum, sobrietatis ac modestiæ neglectu ac contemptu, à præfidenti fiducia sui, regularum violatione, frequentatis muliebribus colloquiis, sociorum fuga, secreti captatione, otij amore, laboris declinatione, cibi potusque commodorumque corporis prosecutione, alijsque his similibus ad infames feminos scopulos paulatim prolapsos reperiemus. Non vna hora, die, mense cecidit veteranus: anni viam ad ruinam strauerunt, & tanquã blattæ & tineæ leui licet corrosione, vniuersum paulatim robur emedullarunt. A tam paruis initiis ad malorum extrema inuictus ille, dũ Religionis amor regularumque obseruatio staret, veterani animus prolapsus est: stillicidia hæc nimirum incauto annorum prolapsu sana exederunt. tam suaui elementi guttata molities tanquã leui spongia, aut amico osculo, quidquid erat saxei roboris, extriuit. ita à scintilla vrbes iam nullæ, & à modico veneno

nenno Herculeæ iacent vires ignibus pabulum.

Vitabit hæc modica quisquis salutem amat, quisquis præcipitia, quisquis exempla cogitat.

Remedia.

A Superioribus partim, partim ab inferioribus petenda sunt. proderit, si Superior in omnem occasionē intentum oculum teneat, nusquam operam suam in hac materia deesse patiat, nusquā etiam in minimis in hoc genere parcat. parcere hīc odisse ac perdidisse est. excubet serio ne qua parte regularum observatio infringatur, ne in te pesceat in orationis ac mortificationis studio spiritus, ne primus lægescat ardor. initijs ante omnia occurrat, nec medicamenta differat in validiorem morbum, ne curationem in ferrum & ignem reijcere cogatur: occasiones omnes ad viuum rescindat, etiam ense non damnanda, si ad damnanda quoquo modo ducant, reuellat: queratur æger, laudabit periculis ereptus, neque prudens sublatas ægritudinum causas dolebit. peritissimus ille medicorum est, qui præprouida cura antevertit mala. nec iustam querimoniam causam habet, quem ad exactam regularum
ac

ac constitutionum obseruationem, vigilans Superioris sollicitudo cogit. arguat in Superiore inferior diffidētiam & inanium suspicionum seriem: consultius est illum Superioris diffidentia circumuallatum stare, quàm minima illius fiducia non reparanda præcipitia pati.

Qui roborauerit ac obduruerit animum diuinarū meditationū ac orationū studio, qui conscientiae suæ latebras bis per diem diligens non perfunctorius scrutator excusserit, qui quidquid quacunque via irrepserit malorū celeri poenitentia deleuerit, qui spiritalium librorum lectione nullo non die pectus firmauerit, qui frequentibus per diem aspirationibus mentē ab humanis abduxerit, addiuiua sustulerit, qui se suaque omnia, animorum in omnem partē affectiones, irruentiumque tentationum fluctus ac procellas Superiori non minùs candidè quàm integrè, vt medico, vt patri, vt matri reserauerit; non facilè ad erubescenda labetur.

Anocituris deinde magna cura animus auocandus, à quacunque feminea familiaritate, à muliebri visitatione, à colloquijs quocunque prætextu prolixioribus, ab earundē personarū confessionibus frequentioribus, à munerum vltro citroque erogatio-

gationibus, à mutuis scriptionibus, à molliori cura, & patrocinijs subsidijſq; tenuioribus procurandis, à laſciuentiũ calamarum lectionibus, à liberiorũ penicillorum circumſpectione, ab auida blandiorum verborum captatione, à diuturniore alterius ſexus præſentia & ſermocinatione, à curioſiore rerum verborumque non caſtorum inueſtigatione. Neque enim quacunque demum ex cauſa Religioſo immorandum talibus, neque altiùs veſtigia parum caſtis ſemitis imprimenda; celeri potjùs hæc volatu quàm grefſu tranſcurrenda, & vt per ardentes prunas, per inimica agmina, per aduerſarium ferrum, per interimentia venena præpropere curſu ſaltuq; tranſilienda ſunt; etiã in medijs abditiffimarum confeſſionum diſquiſitionibus, ne aut ignorata diſcantur, aut explicata amburant, aut à penitiorẽ agnitione altiùs imprimantur ànimo, quàm vt valido poſt conatu excuti poſſint. Credi enim non poteſt, quàm immania pectori incendia è minima ſcintilla ſuboriãtur, quantaque vniuerſam mentem è tenuiſſimis initijs flamma depaſcat; vt ſemel curioſiores oculos conieciffe, ſemelaures præbuiſſe, vix multorum poſtmodum annorum lacrymis elui poſſit: quin imò non

rarò non nisi cum vita, lucta è tantilla re nata deponitur.

CAPVT XXXVII.

Nimia fiducia sui in rebus agendis, feminarumque consuetudine.

CVM etiam sæculi prudētes monēant, Cprovidi esse, aliorum potiùs in causa sua consiliis, quàm propriis niti. ferè enim labimur in nostris, & affectu trahimur potiùs quàm ratione: neque magis obuium ac familiare est, quàm probare quæ placent: euenitque in his, quod nebula tectis, quibus verarum rerum prospectus omnis intercluditur; quod per rubrum vitrum obiecta intuentibus, qui res omnes rubro colore tinctas arbitrantur, nec errorem hunc, nisi amouerint vitrum, deponunt. Vitrum hoc priuatus affectus cuiusque est, qui rem omnem colore suo tingit, nec patitur veritatem detegi.

Quantis verò periculis fiducia hæc nimia exposita sit, facilè videbit, qui innumeras errorum in rebus humanis causas cogitauerit, maximè in rebus arduis, & quæ rem publicam, quæ Principes viros, quæ Religionis vniuersæ nomen bonum tan-

tangunt, in quibus semel errasse, ferè perpetuum est. Ita nulla arte reuocari error ille potest, qui vniuersam rempublicam traxit in ruinam. Grauis error, & ab ambitione natus, & plurimùm lapsui vicinus.

Audire, in deliberationem vocare, nunquam non à magnis & prudentibus probatum, è quibus qui deliberationem instituit, optima seligat ac tutissima. Scio primum illum locum in prudentia tenere, qui in pectore suo senatum ac consilia, fugiendaque sequendaque reperit: proximum illi, qui ex aliorum consiliis sanissima deligit. at quanti priores sunt? vix è millibus vnum aut alterum inuenias: & vt talem nactus fueris, sensum tamen aliorum explorasse, obesse non potest, prodesse potest. vt prudenter Sapiens: *Vbi non est gubernator, populus corruet: salus autem vbi multa consilia.* Prou. II

Nec diffiteor in subitis audacissima aliquando, tutissima consilia esse; sed perrarò ad hæc extrema compellimur. & tutiora sequitur, dum res locusque permittunt, qui peritos audit, & rationum illorum momenta serius indagator excutit: nam vt nihil aliud, hoc sanè qui alios in deliberationem admouet, consequitur, vt tot propugnatores ferè habeat, quot consiliarios;

si negligat, tot oppugnatores referat.

Neque quisquam propè est, qui non aliquid aliquando suggerat rei bonæ; vt non rarò etiam in infimis non pœnitenda reperiās. Accedit alta quædam quietudo mentis, cùm mens deliberationis conscia, nihil temere, aut proprię libidinis impulsu aggressam se nouit; cùm contrà in vario metu sint omnia, solusque, si quid aduersi inexpectatum aduenerit, damna, variorumque iudicia ferre cogatur, protectore destitutus.

Neque facilè quisquam antè neglectus, re ad extrema, aut vltimam desperationē deducta, manum admouebit, ne in tam dubio exitu honoris nihil, dedecoris referat plurimum. quin imò reperiās non paucos, qui quòd in consilio capiendò neglecti videantur, non improbent modò, sed & variis substructionibus subdolisque machinationibus probatissima etiam euertere conentur, & miscere damnanda, qui sententiam rogati, probassent. Non quòd omnes velim in consilium adhiberi, sed peritissimos quosque ac primos, quibus vel longa experientia, vel muneris ratio, vel ingenij iudiciiue bonitas lucem ad varia præfert.

Nulla verò in re magis elucet hoc malum,

lum, vulneraque non medicanda infligit, damnaque non reparanda dare consuevit nimia hæc fiducia sui, quam ubi de castitate agitur: & ferè cecidisse reperies, quos nimia fiducia sui longiùs à littore prouexit, & maria hæc multorum mortibus infamia tentare suasilit. Fiducia hæc inter hos scopulos & breuia nauiganti naufragio proxima est. enauigauit qui timuit, qui que non suo solius consilio fluctibus hisce domesticam commisit ratem.

Præcipitia demum hîc sunt. Caueat quisquis salutem amat. vno leui flatu aut prolabentis in hoc lubrico vestigij lapsu, salus continetur. Ne fide quisquis salutem amas. præcipitio fiducia hæc omnis proxima est.

Et sanè in labili admodum figit pedem, quicumque hunc campum impavidus calcât. Syrtes & breuia cogita, scopulos & decumanos fluctus, cum à tirone Oceani inexperto nauigantur. tot omnium atatum naucleri peritissimi in hoc profundo naufragium fecerunt, & in extrema senectute, post enauigata maria, torrentem non rarò repererunt, in quo perirent. tot veterani milites, post innumeròs triumphos, & hostium cædes, post campos cadaueribus fatigatos, sudem inuenerunt,

quo caderent: tot prudentia & eruditione clari, cano iam capite ludibriū facti sunt, & mundo fabula. & sperabit nescio quis ingenti plenus fiducia sui, medios inter femineos fluctus, tabula salutem? inermis inter armatas has mulierum acies illæsum corpus? effugia denique ac tuta receptacula adolescens inter illius sexus insidias laqueosque compedesque; medius? ingens error est, post tantorum naufragia, cædes & vulnera, meliora sibi fatua fiducia spondere.

Et sanè quisquis non timuit, aut iam lapsus est, & prostrata iacet victima infami muliebri manu ingulanda; aut lapsui proximus est. ut meritò stolidum illum dixerim, qui post orbe toto magnorū strages, inermis victoriam sperat, & audet iratos hos prouocare fluctus palmari scaphæ confusus, quos tot armatæ rates nequidquam integra carina tentarunt.

Et verò monent prudentes, à solo timore & fuga salutē in hac lucta sperari posse: nec quemquam in hac pugna periisse, qui non plurimum à nimia fiducia sui, viam sibi ad ruinam struxerit. Venena cogita, nullus illa, valida quamuis manu, prudens contigit. nemo serpentem, frigoribus licet torpentem, impunè deliniuit. Hercules,

les, & Samson, & quidquid firmum, roborisque plenum, hinc cadit. superant venena robur: at nocentior omni veneno mulier est: ludus basiliscus est, & nulla iam hyæna est, si cum illius oculis & voce conferatur. Timebit proinde hæc toxica, quisquis iudicem Deum timet, & inferni pœnas; quisquis salutem amat, & reposita cælo præmia: nec erubescet audire timidus, ut securè infidum hoc enatet mare, tantorum submersionibus infame, ut tutò venena hæc effugiat, tot magnorum luctuoso exitu nobilitata; ut integro demum corpore, femineo se huic gladio eripiat, tot primorum orbe toto sanguine & cædibus ebrio.

Prudenter Cyprianus monet, & fidentes instruit: *Adversaria est confidentia qua De singul.
periculis vitam suam pro certo commendat, & Clavic.*
lubrica spes est que inter fomenta peccati saluari se sperat. incerta victoria est inter hostilia arma pugnare, & impossibilis liberatio est flammis circumdari, & non ardere. & alius: Expedit multo, bene timere, quàm malè fidere, & utilius est ut infirmum se homo cognoscat ut fortis existat, quàm fortis videri velit, infirmus ut emergat. eiusdem illa sunt: Nemo de suo corde presumat quando profert sermonem, nemo de suis viribus confidat quando suffert tentationem. quia

ut bona prudenter loquamur, à Deo est, non nostra sapientia; & ut mala fortiter perferamus, ab illo est, non nostra patientia. & Sapiens: Habe fiduciam in Domino ex toto corde tuo, & ne
2. Cor. 1. innitaris prudentia tua. & Apostolus: Non sumus fidentes in nobis, sed in Deo.

Remedia.

AB exemplis tutissima sunt. felix ille qui alieno periculo doctus, neminem suo docet. Percurramus humanarum propè rerum omnia. Imperatores, dum nimia fiducia roboris sui, hoste contempto, ardua petunt, vniuersam gloriam infami exitu macularunt. Peritissimus quisque nautarum, dum nimium elemento suo fissus, altius prouehitur, naufragium passus est. Et non summi natatores, pugiles, torrentibus sorbentur, & imbelli ac rustico ferro cadunt? Eadem in omni hominum genere reperies: quo magis timore armadum pectus, metu cingenda latera; tutum te hinc comites præstabunt, & inter pericula prouidum & securum.

Cogita deinde, quanti in carnem delapsi; & disces ab hac fiducia in præcipitia hæc turbatos, dum robori virtuti quæ suæ fidunt: & dum non firmat illecebris aures, non

non frenant oculos, linguam, manus, nec tanquã compede stringũt domesticas has feras, in medio felici cursu, ludibrium facti sunt orbi, & in exemplum iam aliorum positi. Audet Religiosus quocunque prætextu diutiũs colloqui? familiariũs, liberioreque deinde aspectu & cachinno, metuque ac verecundia exũta? etiam in contactum ibit, inde ad extrema malorum.

Vtile fuerit, nihil in eo genere aggredi inconsulto Præfecto spiritus, & aliorum potiũs, quã suæ sententiæ niti, ac tuta quæque vereri. Prudens Imperator in alta pace bella cogitat, adeoq; & bella parat, ne imparatũ hæc improuidumque opprimant. Paret etiam spiritalis athleta in pace bella: muniat pectus lorica timoris Domini: armet caput cælesti, non sua fiducia plenus: & quo minus se bellorum ostentat, hoc præsentior sibi magis etiam timeat, & à magna malacia magnas tempestates expectet. hoc propinquior periculo, quo molliũs hoc elementum ludit. Ne fide huic tranquillitati. maiora sub hoc ridente vultu damna latent; voragines & scopuli teguntur hac serenitate. Nihil proinde inter omnia remedia præsentius, quã nulli fidere, vereri omnes; etiam in sorore femina cogitare, & in fratre virum. Deum

denique omnibus præsentem, præmiatorem & iudicem, etiam cogitationum reconditissimarum.

Prov. 3. Monemur vniuersim à Sapiente: *Habe fiduciam in Domino ex toto corde tuo, & ne innitaris prudentia tua, in omnibus viis cogita illum, & ipse diriget gressus tuos, ne sis sapiens apud te metipsum.*

CAPVT XXXVIII.

Feminarum familiaritas quocunque prætextu, confessionum, instructionum spiritualium, boni temporalis, aegritudinum.

ET sanè magis periculum adit, qui dolo circumuenitur, quàm quem hostis aperto aggreditur marte, & palàm. in fraude nulla ferè virtus, aut robur iuuat, cùm incautim in insidias labamur, & antè cadamus, quàm periculum senferimus. Et familiaritates tales minùs sunt suspectæ, minusque timentur, cùm sub ratione boni mala tegant. Ita cadunt primi parentes, & Amasa, & Abner dolo so Ioabi ferro, & hominum pars magna.

Et quis inter tripudia, & lætitiæ signa ferrum vereatur, & caput Ioanis in disco, & inter oscula Iudæ Magistrum prodi? sub
tam

tam pio nimirum velamine nocitura, & perimentia latent venena. Iam in omni Religione, omniumque hominum genere, quàm grauib; multorum lapsibus strata ad ruinam via est!

Familiare in hoc malo est, excusationes pretextere, Res leuis est; quid periculi è tantilla re? Sed & scintilla res leuis est, & tamen quàm latam non vno sæculo dedit flammam? flamma, non scintilla, mulier omnis est, adeoque ignis est, quo orbis non semel conflagrauit. Et venenum modicum, non venenum est? quàm multi vitam modico illius haustu finuerunt? nulum muliere venenū potentius est: frons, oculi, genæ, labra, vox, risus, manus, vestes toxico plenæ sunt. & non magna pars hominum cadit hoc veneno? Vidit ille, audiuit, leuiter & fortuito tetigit alter, & captus est. Quare monet Sapiens: *Virg. Eccli. 9.*
nem ne conspicias, ne forte scandalizeris in decore illius. auerte faciem à muliere compta, & ne circumspicias speciem alienam. propter speciem mulieris multi perierunt: & ex hoc concupiscentia quasi ignis exardescit. ita à paruis, ab vno nimirum oculorum iactu, ad magna dilabimur.

• Et non leuia sæpe sunt bellorum initia, quibus totus propè non semel exarsit orbis?

bis? Grauiora in omni muliere reperiēs,
 & intestinorum, tanquam ciuiliū bello-
 rum causas maximas. plenæ historiæ sunt.
 Nulla deinde res leuis dicenda, quæ ducit
 ad interitum, & qua primi maximique,
 omni historia teste, ex omni hominum
 genere ceciderunt. hinc illud Cypriani:
*Quantos leones domuit una muliebris infirmi-
 tas delicata! qua cum sit vilis & misera, de ma-
 gnis prædam capit.*

Non sentio, & roboris sat videor tot an-
 nis collegisse, quibus nullo nocumento
 inter illas versor. Non minimus morbus,
 & sine sensu irrepens, initio neglectus,
 interitum, parauit etiā valentissimis, &
 annorum numero per aspera & dura fir-
 matis? non minima vulnera, & sine sensu
 accepta, ad sectionem & vstionem & mor-
 tem ducunt? Noli antea actæ probitati fi-
 dere. peritissimi ferè gladiatores ignauo
 cadunt ferro. primi natatores post tranata
 flumina & maria torrentibus obruuntur.

*Ad Ne-
 potian.*

Prudenter Hieronymus: *Nec in præterita
 castitate confidas. Nec Samsonē fortior, nec Da-
 nide sanctior, nec Salomone potes esse sapien-
 tior. Memento semper, quòd paradisi colonum
 de possessione sua mulier eiecerit. Et vt te con-
 cedam vacare periculo, altera fors pars
 non vacat. & tot exemplis docti sumus*
 non

non vacasse. Benè quidam mulierem virumque sali comparat & aquę. sal ex aqua est. iniice aquę, redit ad amicum sibi elementum. Oleo alius molli mulierem comparat, ignibus virum: adde oleum ignibus, an exstingues flammam? Tertullianus omnem virum mulieri, omnem mulierem viro gladium ait esse. Et vt vtrunque desit periculum, scandalo non vacat hæc familiaritas, & exemplo præimus iunioribus ad libertatem, inde ad interitum.

Soror est, neptis, sanguine iuncta. At quoties in talibus lufit error? quàm multi perierunt propinqua hac flamma? quoties natarunt campi consanguineo ferro? non minus periculi à consanguinea muliere. Lot magnus vir in filiabus cadit: Amnon in Thamar sorore: Ruben, &c.

Verùm prudens & proba matrona, aut virgo est, annis prouecta, instituti nostri amans. Eo magis metue: nam hæc natura sua trahunt in fiduciam, dumque minùs timentur, occultiùs illabuntur. Dum silet mare, ac quasi ignauo sopitum iacet somno, tunc peritissimus quisque maximè inuigilat. mentitur hæc serenitas, ac de propinquo minatur. Periculosior omni Oceano mulier est; dum blanditur, sæuit; dum ridet, venena iaculatur. Ne fide iacenti

si negligat, tot oppugnatores referat.

Neque quisquam propè est, qui non aliquid aliquando suggerat rei bonæ; vt non rarò etiam in infimis non pœnitenda reperiās. Accedit alta quædam quietudo mentis, cùm mens deliberationis conscia, nihil temere, aut proprię libidinis impulsu aggressam se nouit; cùm contrà in vario metu sint omnia, solusque, si quid aduersi inexpectatum aduenerit, damna, variorumque iudicia ferre cogatur, protectore destitutus.

Neque facilè quisquam antè neglectus, re ad extrema, aut vltimam desperationē deducta, manum admouebit, ne in tam dubio exitu honoris nihil, dedecoris referat plurimum. quin imò reperiās non paucos, qui quòd in consilio capiendò neglecti videantur, non improbent modò, sed & variis substructionibus subdolisque machinationibus probatissima etiam euertere conentur, & miscere damnanda, qui sententiam rogati, probassent. Non quòd omnes velim in consilium adhiberi, sed peritissimos quosque ac primos, quibus vel longa experientia, vel muneris ratio, vel ingenij iudiciiue bonitas lucem ad varia præfert.

Nulla verò in re magis elucet hoc malum,

lum, vulneraque non medicanda infligit, damnaque non reparanda dare consuevit nimia hæc fiducia sui, quam ubi de castitate agitur: & ferè cecidisse reperies, quos nimia fiducia sui longius à littore prouexit, & maria hæc multorum mortibus infamia tentare suasilit. Fiducia hæc inter hos scopulos & breuia nauiganti naufragio proxima est. enauigauit qui timuit, qui que non suo solius consilio fluctibus hisce domesticam commisit ratem.

Præcipitia demum hîc sunt. Caueat quisquis salutem amat. vno leui flatu aut prolabentis in hoc lubrico vestigij lapsu, salus continetur. Ne fide quisquis salutem amas. præcipitio fiducia hæc omnis proxima est.

Et sanè in labili admodum figit pedem, quicumque hunc campum impavidus calcet. Syrtes & breuia cogita, scopulos & decumanos fluctus, cum à tirone Oceani inexperto nauigantur. tot omnium atatum naucleri peritissimi in hoc profundo naufragium fecerunt, & in extrema senectute, post enauigata maria, torrentem non rarò repererunt, in quo perirent. tot veterani milites, post innumeros triumphos, & hostium cædes, post campos cadaveribus fatigatos, sudem inuenerunt,

quo caderent: tot prudentia & eruditione clari, cano iam capite ludibriū facti sunt, & mundo fabula. & sperabit nescio quis ingenti plenus fiducia sui, medios inter femineos fluctus, tabula salutem? inermis interarmatas has mulierum acies illæsum corpus? effugia denique ac tuta receptacula adolescens inter illius sexus insidias laqueosque compedesque; medius? ingens error est, post tantorum naufragia, cædes & vulnera, meliora sibi fatua fiducia spondere.

Et sanè quisquis non timuit, aut iam lapsus est, & prostrata iacet victima infami muliebri manu ingulanda; aut lapsui proximus est. ut meritò stolidum illum dixerim, qui post orbem toto magnorū strages, inermis victoriam sperat, & audet iratos hos prouocare fluctus palmari scaphæ confusus, quos tot armatæ rates nequidquam integra carina tentarunt.

Et verò monent prudentes, à solo timore & fuga salutē in hac lucta sperari posse: nec quemquam in hac pugna periisse, qui non plurimum à nimia fiducia sui, viam sibi ad ruinam struxerit. Venena cogita, nullus illa, valida quamuis manu, prudens contigit. nemo serpentem, frigorebus licet torpentem, impunè deliniuit. Hercules,

les, & Samson, & quidquid firmum, roborisque plenum, hîc cadit. superant venena robur: at nocentior omni veneno mulier est: ludus basiliscus est, & nulla iam hyæna est, si cum illius oculis & voce conferatur. Timebit proinde hæc toxica, quisquis iudicem Deum timet, & inferni pœnas; quisquis salutem amat, & reposita cælo præmia: nec erubescet audire timidus, ut securè infidum hoc enatet mare, tantorum submersionibus infame, ut tutò venena hæc effugiat, tot magnorum luctuoso exitu nobilitata; ut integro demum corpore, femineo se huic gladio eripiat, tot primorum orbe toto sanguine & cædibus ebrio.

Prudenter Cyprianus monet, & fidentes instruit: *Adversaria est confidentia quæ De sin-*
periculis vitam suam pro certo commendat, & gnl.
lubrica spes est quæ inter fomenta peccati saluari Clavic.
se sperat. incerta victoria est inter hostilia arma
pugnare, & impossibilis liberatio est flammis cir-
cundari, & non ardere. & alius: Expedit multo,
bene timere, quàm malè fidere, & utilius est ut
infirmum se homo cognoscat ut fortis existat,
quàm fortis videri velit, infirmus ut emergat.
eiufdem illa sunt: Nemo de suo corde præs-
umat quando profert sermonem, nemo de suis vi-
ribus confidat quando suffert tentationem. quia

ut bona prudenter loquamur, à Deo est, non nostra sapientia; & ut mala fortiter perferamus, ab illo est, non nostra patientia. & Sapiens: Habe fiduciam in Domino ex toto corde tuo, & ne innitaris prudentiæ tuæ. & Apostolus: Non sumus fidentes in nobis, sed in Deo.

Remedia.

AB exemplis tutissima sunt. felix ille qui alieno periculo doctus, neminem suo docet. Percurrâmus humanarum propè rerum omnia. Imperatores, dum nimia fiducia roboris sui, hoste contempto, ardua petunt, vniuersam gloriam infami exitu macularunt. Peritissimus quisque nautarum, dum nimium elemento suo fissus, altius prouehitur, naufragium passus est. Et non summi natatores, pugiles, torrentibus sorbentur, & imbelli ac rustico ferro cadunt? Eadem in omni hominum genere reperies: quo magis timore armadum pectus, metu cingenda latera; tutum te hîc comites præstabunt, & inter pericula prouidum & securum.

Cogita deinde, quanti in carnem delapsi; & disces ab hac fiducia in præcipitia hæc turbatos, dum robori virtuti quæ suæ fidunt: & dum non firmât illecebris aures, non

non frenant oculos, linguam, manus, nec tanquã compede stringũt domesticas has feras, in medio felici cursu, ludibrium facti sunt orbi, & in exemplum iam aliorum positi. Audet Religiosus quocunque prætextu diutiũs colloqui? familiariũs, liberio- reque deinde aspectu & cachinno, metu- que ac verecundia exũta? etiam in conta- ctum ibit, inde ad extrema malorum.

Vtile fuerit, nihil in eo genere aggredi inconsulto Præfecto spiritus, & aliorum potiũs, quã suæ sententiæ niti, ac tuta quæque vereri. Prudens Imperator in alta pace bella cogitat, adeoq; & bella parat, ne imparatũ hæc improuidumque oppri- mant. Paret etiam spiritualis athleta in pa- ce bella: muniat pectus lorica timoris Do- mini: armet caput cælesti, non sua fiducia plenus: & quo minus se bellorum osten- tat, hoc præsentior sibi magis etiam ti- meat, & à magna malacia magnas tem- pestates expectet. hoc propinquior peri- culo, quo molliũs hoc elementum ludit. Ne fide huic tranquillitati. maiora sub hoc ridente vultu damna latent; voragines & scopuli teguntur hac serenitate. Nihil pro- inde inter omnia remedia præsentius, quã nulli fidere, vereri omnes; etiam in sorore sc̃minã cogitare, & in fratre virum. Deum

denique omnibus præsentem, præmiatorem & iudicem, etiam cogitationum reconditissimarum.

Prov. 3. Monemur vniuersim à Sapiente: *Habe fiduciam in Domino ex toto corde tuo, & ne innitaris prudentia tua, in omnibus viis cogita illum, & ipse diriget gressus tuos, ne sis sapiens apud temetipsum.*

CAPVT XXXVIII.

Feminarum familiaritas quocunque prætextu, confessionum, instructionum spiritualium, boni temporalis, aegritudinum.

ET sanè magis periculum adit, qui dolo circumuenitur, quàm quem hostis aperto aggreditur marte, & palàm. in fraude nulla ferè virtus, aut robur iuuat, cùm incautim in insidias labamur, & antè cadamus, quàm periculum senferimus. Et familiaritates tales minùs sunt suspectæ, minusque timentur, cùm sub ratione boni mala tegant. Ita cadunt primi parentes, & Amasa, & Abner dolofo Ioabi ferro, & hominum pars magna.

Et quis inter tripudia, & lætitiæ signa ferrum vereatur, & caput Ioàñis in disco, & inter oscula Iudæ Magistrum prodi? sub
tam

tam pio nimirum velamine nocitura, & perimentia latent venena. Iam in omni Religione, omniumque hominum genere, quàm grauibus multorum lapsibus strata ad ruinam via est!

Familiare in hoc malo est, excusationes prætexere, Res levis est; quid periculi è tantilla re? Sed & scintilla res levis est, & tamen quàm latam non vno sæculo dedit flammam? flamma, non scintilla, mulier omnis est, adeoque ignis est, quo orbis non semel conflagrauit. Et venenum modicum, non venenum est? quàm multi vitam modico illius haustu finiuerunt? nulum muliere venenū potentius est: frons, oculi, genæ, labra, vox, risus, manus, vestes toxico plenæ sunt. & non magna pars hominum cadit hoc veneno? Vidit ille, audiuit, leuiter & fortuito tetigit alter, & captus est. Quare monet Sapiens: *Virg. Eccli. 9.*
nem ne conspicias, ne forte scandalizeris in decore illius. auerte faciem à muliere compta, & ne circumspicias speciem alienam. propter speciem mulieris multi perierunt: & ex hoc concupiscentia quasi ignis exardescit. ita à paruis, ab vno nimirum oculorum iactu, ad magna dilabimur.

• Et non leuia sæpe sunt bellorum initia, quibus totus propè non semel exarsit orbis?

bis? Grauiora in omni muliere reperies, & intestinorum, tanquam ciuiliū bellorum causas maximas. plenæ historiæ sunt. Nulla deinde res leuis dicenda, quæ ducit ad interitum, & qua primi maximique, omni historia teste, ex omni hominum genere ceciderunt. hinc illud Cypriani: *Quantos leones domuit vna muliebris infirmitas delicata! quæ cum sit vilis & misera, de magnis pradam capit.*

Non sentio, & roboris sat videor tot annis collegisse, quibus nullo nocumento inter illas versor. Non minimus morbus, & sine sensu irrepens, initio neglectus, interitum, parauit etiā valentissimis, & annorum numero per aspera & dura firmatis? non minima vulnera, & sine sensu accepta, ad sectionem & vstionem & mortem ducunt? Noli antea actæ probitati fidere. peritissimi ferè gladiatores ignauo cadunt ferro. primi natatores post tranata flumina & maria torrentibus obruuntur.

Ad Nepotianum. Prudenter Hieronymus: *Nec in præterita castitate confidas. Nec Samson fortior, nec Danide sanctior, nec Salomone potes esse sapientior. Memento semper, quod paradisi colonum de possessione sua mulier eiccerit. Et vt te concedam vacare periculo, altera fors pars non vacat. & tot exemplis docti sumus*
non

non vacasse. Benè quidam mulierem virumque sali comparat & aquæ. sal ex aqua est. iniice aquæ, redit ad amicum sibi elementum. Oleo alius molli mulierem comparat, ignibus virum: adde oleum ignibus, an extingues flammæ? Tertullianus omnem virum mulieri, omnem mulierem viro gladium ait esse. Et ut vtrimque desit periculum, scandalo non vacat hæc familiaritas, & exemplo præimus iunioribus ad libertatem, inde ad interitum.

Soror est, neptis, sanguine iuncta. At quoties in talibus ludit error? quàm multi perierunt propinqua hac flamma? quoties natarunt campi consanguineo ferro? non minus periculi à consanguinea muliere. Lot magnus vir in filiabus cadit: Amnon in Thamar sorore: Ruben, &c.

Verùm prudens & proba matrona, aut virgo est, annis prouecta, instituti nostri amans. Eo magis metue: nam hæc natura sua trahunt in fiduciam, dumque minùs timentur, occultiùs illabuntur. Dum silet mare, ac quasi ignauo sopitum iacet somno, tunc peritissimus quisque maximè inuigilat. mentitur hæc serenitas, ac de propinquo minatur. Periculosior omni Oceanus mulier est; dum blanditur, sæuit; dum ridet, venena iaculatur. Ne fide iacenti

centi huic elemento; sub hac consanguinea nube imber, grando, fulmina latent perimentia. Si instituti nostri amans, & benefactrix; magis etiam honori illius & famæ & saluti consulendum est, ne hac familiaritate periclitetur.

Nulli timor & fuga noxia, omnibus propè familiaritas & fiducia exitio fuit in hoc agone. Et sanè alterum è præcipitio pendentem pedem habet, quicumque sub hac specie boni fidentiùs ac familiariùs versatur. Illabitur hoc venenum incogitanti, & virus infundit incautis: eo nocentiùs, quo cautiùs: miraturque ruinam, vulnera, mortem, qui nec præcipitia, nec ferrum, nec venena senserat. Ille prudenter rem instituit, vitamque moresque ad aliorum exempla componit, qui quæ facta olim, euenire posse arbitratur sibi, aliorum periculo edoctus.

Et verò nulli ætati tutò has necessitudines credi posse, tot in cano vertice pudibundi nos lapsus docent: vt ausim dicere, plures me vidisse post quadragesimum adeò & post quinquagesimum annum, quàm ante illum infami & miserando exitu prolapsos; dum annis credunt, nec damna metuunt ætatis prærogatiua suffulti. Neque nouum, post sexagesimum casti-

monia

moniaꝝ annum in vtroque sexu erubescēda vidisse; vt tunc inciperent ardere, cū corde fibrisque gelatis capulo proximi alterius vitæ prænuntiis premerentur.

Misera conditio, post tot annorum integritatem, ad æternū deflenda venire. Tantum potest familiaritas, & amica muliebris veneni cōsuetudo: vt etiam glaciei flammās iniiciat, & arentia exhaustis medullis ossa inuerecundo impleat igne. Cauebit quisquis priorum sæculorum exempla metuit, quisquis posteritati exemplum in se statuere non vult. nulla ad peccandum ætas grandior. Quid? quod non pauci in illa ætate peccatum amarint, cū peccandi emortua materies esset: ignes spirarunt, cū nullis fornacibus accendi viderentur posse. Vitabit proinde familiaritatē omnem, quisquis alterius vitæ memor, æternitate proposita, Deum sibi statuet inspectorem, accusatorem, iudicem, præmiaq; & flammās nullo æuo finiendas.

Scrupulositas prætenditur Superiorum. ita vigilantiam ipsorum in inuidiam vocamus. Nemo nimis timuit in re salutis. Cautius ambulat, rariusque cadit, cui etiam tuta suspecta sunt. Præsumptio omnis ruine proxima est; & prudentiæ comes timor est. Tales excusatores similes iis videntur, qui

qui phrenesi laborant, morbum non sentiunt, sanos etiam se esse arbitrantur, cum ingenti intus ardeant flamma, & ferè morti proximi sint.

Corporalis demum aliqua necessitas, qualis in inualetudine euenire solet, à non postremis quarundam regionum Religiosis & nescio qua veteri consuetudine adducitur. nimirum in auxilium ferendum sexus ille pronior, ægrisque fouendis curandisque accommodatior, ac natura quasi in solatium factus.

Ingeniosa omnis improbitas est. causas sceleribus inuenit, & dum periculum suum amat, damna minuit, necessitatem auget, metum seponit; eo malo vicinior, quo securius propiusque inter flammam ambulat.

Certè si qua res alia, hæc periculorum plenissima est. virum Deo sacratum, sanctiore etiam castimonie voto obstrictum, muliebribus non tantum deliniri colloquiis, sed pudore posito, manibus componi, foueri, demulceri? & prudens credet virilem ignem, femineo hoc oleo iniecto non exurgere in flammam? credet veneno tangi, & innoxium illæsumque abire? aut virum morbo sexum omnem deposuisse. ac in feminam degenerasse? credet mulier.

lierculam non æstuarè hoc contactu, aut hanc etiam virum factam? aut vtrumque in marmora & chalybem abiuisse, vt sine sensu ludant oculi & manus, & in mediis flammis congelascant membra saxa de carne nata?

Et vt pericula taceam, vbi pudor castimonie comes? nam quis nesciat multa in ægritudine intercurrere, quæ propiores liberioresque manus & oculos poscunt? & salua castitate integris oculis, manu, pectore, ire quemquam in alienos contactus & aspectus? toties poni componique non iam lectum & stragulam vestè, sed membra & corpus, & lapidem semper esse, sensusque expertem?

At senior aliqua matrona est, ætate moribusque matura. quasi non liberius in senè sine vteri metu peccetur: & dum timore pulso, minùs metuitur, celerius non labamur? & fors senior illa iuenculam sibi sociam adiunget, vt quæ vno igne non potuit, duobus in viro exurgat flamma. Vna videlicet non satis erat ægro, & senior à valentiorè iuuanda, vt mutua vicissitudine mutuos labores leuarent, & somno oppressa seniore, aut quacunque ex causa absente, vicarias & auxiliares iuencula, viridi adhuc robore & ætate, manus ægro-

tanti viro præberet, ac in extremis etiam necessitatibus, mater esse inciperet, quæ virum ignorabat; & materna ac sponsæ libertate, ægrienti manus admoueret, nec viriles tamen ictus sentiret, nec sexuum discrimina disceret, nec è virgine sua egrederetur, aut pudorẽ exueret. Nollem hæc miracula temerario ausu sperare; maximè cùm aliud omni historia sæculorum omnium doceamur. etiam in fuga pericula, quo magis in liberiore aspectu & contactu? aut eminus ignes exurgunt in flammæ, de propinquo in glaciem? & in vasta eremo, Hieronymus & Nazianzenus, & tot olim magnorum millia per tot maria, & immania terrarum spatia, absentes, in longa macie, vigiliis, pœnitentiis exeso & emarcido corpore, hostiles hosce alterius sexus ignes senserunt. sed & è prima iuuenta, post quadraginta annorum consulptæ libidinis funera, in extremum senium, post tot interualla, improbi ignes exsurrexerunt, idque valentiùs sæpe quàm in ipsa adolescentia: & de propinquo glaciem promittent? Non veniunt hæc à cælestium amore, non ab anima diuinis ignibus calente. ab humani generis hoste veniunt: qui subdolis his insidiis quos aperto Marte non potuit, incautos, nimiaque fiducia

ducia sui laborantes trahit in interitum sempiternum.

Remedia.

AB exemplis petenda sunt, Sanctorum-
que monitis. Inter tot mulieres suas,
solo aspectu alienæ cadit David, & addit
homicidium; ita non solet in vno crimine
libido stare. Salomon addit voluptati ido-
latriam. Samson post tot fraudum ex-
empla, sola ruina docetur. Ioannes & Pau-
lus post quadragesimum & sexagesimum
eremiannum miraculis clari in virgine ca-
dunt, alter etiam cædem addit. & plenæ
sunt omnes historiæ.

Fuga in his, & occasionum omnium vi-
tatio, certissima & tutissima victoria est.

Parcitas in loquendo, ac maturitas, ac
ad seueritatem magis, quàm ad suauita-
tem composita conuersatio, laudata sem-
per à viris prudentibus fuit; & inutile,
ac non necessariorum colloquiorum rese-
ctio. priuatorumque munerum accepta-
tiones aut donationes, magna & prudenti
circumspectione instituendæ sunt: trahunt
enim hæc sola memoria sui, & affectus mu-
tua hæc donaria afflant, altius non rarò,
quàm vt modica cura & laboribus eruan-
tur, imprimenda.

Suspectissima omnia habere quæcunque hunc sexum tangunt, & minima etiam pro maximis arbitrari, leuissima pro periculo proximis, tutissimum genus est.

Nulli fidere, nulli te tuaque credere; nihil committere, ad cuius euulgationem erubescas: nihil dicere, ne quidem inter confessionum secreta, quod non dictum velis, & aliquo etiam ornatu & mendacio vestiri.

Hostem si in omni muliere cogitaueris, si venena, si flammæ; non facile te huic sexui credes: tange, & tanquam pice & toxico cõtaminaberis: intueri, tantum non peristi. nam siue vultum, oculos, vocem, ornatum, compositionem totam cogitaueris, insidias & dolos & compedes & retia reperies incautis improuidisque tensa, quibus simplices animæ, & tantum columbæ in fraudem inducantur, vt antè se captas videant, quàm pericula cogitauerint, & serò priorem libertatem circumspectent parietibus clausæ. Tantum metue, & hostilia omnia cogita, & fraudibus periculisque superior eris.

In Superiore maiore etiam opus est circumspeditione, quo huius exemplum abiecit ad plures, cùm licere sibi arbitrentur inferiores quidquid in illo viderint.

In morbis maior etiam cautio adhibenda, quo sub necessitatis prætextu ad nocitura descendimus. amputanda, ac tanquam nouacula ac falce omnis in his præscindenda muliebris familiaritas, consuetudo, visitatio, colloquia. Plus enim in his periculi, quo minus timoris est. ille non facile labitur, qui etiam in plano, aliorum infortunio doctus, scit se posse labi. temerarius ille est, & ruinę proximus, qui inter pendula præcipitia tanquam in humili decurrit. vir proinde viro decumbenti inuigilet, auxiliatricesque manus, famulamque dexteram admoueat mulier nulla, ac ne soror quidem propius corpori ancilletur. quin & verecundia in Religioso matrem subueretur, & vulgandi in illa pudoris sui testem veretur.

Et sanè indignum Religioso & viro est, mollissimis muliercularum manibus foueri. verùm mortis metus ad quæ non cogit, at consultius longè mori, quàm his flammis ardere. & non deteriore morte cadit qui femineis ignibus decineratur, quàm qui æstuantibus febribus animam conditori suo reddit.

Si inferior fuerit, fortiter resistendum, muliebriaque hæc noxia subsidia validè neganda. dolet. mitius est dolere quàm

muliebribus flāmis exuri. mœrore obruitur? clementiùs hoc integitur, quàm ignibus infepelitur. constanter proinde arceat hunc sexum, nec vllis se precibus vinci flectique permittat Superior, rationem de concredita sibi anima Deo redditurus. & non melius est modicum hîc ingemiscere, quàm in æternis ignibus, nequidquam medicam diuinam manum inclamare, olim mitem, olim etiam patris ac matris, nunc post muliebria hausta venena, solius in vindictam iudicis, & seueri, flectique æternum nescij iudicis? Pius sanè per omnia ille Superior, amantissimisque suorum est, qui momentanea hæc feminea solatia æternum nocitura negat. durus ille est, qui peritura hæc solatia æternum peremptura admittit.

CAPVT XXXIX.

*Frequentes & proluxæ feminarum
confessiones.*

Ingentium non in Religione tantum, sed in omnibus qui excipiendis confessionibus occupantur, malorum origo. è quo propè quidquid excogitari potest vitiorum nascitur, maximè cum eadem frequen-

quentiùs audiuntur, plurimumque in ijs temporis impenditur. crescit enim è consuetudine familiaritas, è familiaritate libertas; & qui priùs ad mulieris vocem erubescibat, nunc pudore seposito, etiam intueri & arridere non reformidat, & ad libera etiam verba, risum iocosque provocare. sequuntur dictorum factorumque narrationes prolixiores, & ferè sæcularibus permixtæ: ac tandem è tam crebra frequentia, domestica quasi quædam licentia; nec iam tantum patris, sed & fratris, & per familiaris amici personam induit. inde metus, omnis pudicitie custos, exulat: & dum pulso timore, mali que suspitione deterfa, tanquam cum filia pater, aut veriùs tanquam cum eiusdem sexus amico versatur, ferè incautus antè cecidit, quàm muliebria hæc præcipitia prospexit; antè que in feminea retia, & insidias prolapsus est, quàm pericula prouideret.

Scio sub prætextu spiritualis necessitatis colloquia primò ferè trahi, & non rarò etiam affectu pio: sed qui impruidos, zelo que minùs prudenti ducat in ruinam. & plerumque pulchra hæc velamina improbæ rei prætexuntur. nebulae hæ sunt, quæ diuinum solem mentium oculis excludunt, præripiuntque meliores diuinæ lucis ra-

dios, quibus & amoris & timoris diuini uerior lux animis prælucebat; qua subducta, tanquam per incertum noctis medias inter tenebras mens conuoluitur, ignara iam sui, periculorumque suorum.

Nam ut quis credat tam crebra prolixaque in illo sexu colloquia de Deo, deque salute sola esse, integraque hæc castimoniam & modestiam fama stare, stolidum potius, quam vanum est. magis etiam si credat, in tanta frequentia primam verecundiam, cautelam, prouidentiam, metumque consistere. nam quæ primis congressibus modicis & rarioribus hærebat mens dubia, pendula de euentu, nec sibi satis ficiens, adeoque & tuta omnia timens, ea assiduitate & consuetudine, damna nec uidet, nec veretur. familiaria enim sibi, ac quasi domestica pericula cum fecerit, ne sentit quidem: arbitreris occalluisse ad hæc venena, quæ quo minus timentur, eo nocentiores aculeos figunt, nulla postmodum arte medicandos, nulla refrigerandos.

Accedunt aliorum in similes familiaritates æmulæ propensiones, cum singuli sibi licere arbitrantur, quod uni permittitur. hinc frequentissima nascuntur colloquia; & confessionum sedes, narrationum & fabularum fiunt: sedilia: ut tales videas
ab

ab his sedibus redire plenos nouarum rerum, dictorumque factorumque aliorum; illas etiam domū referre domesticas propè res omnes. ita mutuis narrationibus, quasi mutue beneuolentiæ tesseriis mutua necessitudo firmatur, in intimæ cuiusdam fiduciæ testationem. narrantur deinde vtrimque audita domi; illæ quæ à Confessariis acceperunt, profundunt in sociorum sinum: Confessarij in sociorum. & ne desit quod dicant, eidem singuli insistent semitæ: nec pericula plurimis aut omnibus iam communia timent, nisi post lapsum.

Plurimorum deinde tam externorum, quàm domesticorum suboriuntur offensiones, qui tam crebra ac diuturna earundem muliercularum intuentur colloquia, & deteriora cogitant: & res ipsa grauem non bonarum cogitationum materiam suggerit.

Iam cum non omnibus eadem familiaritatum officia præstentur, exurgunt reliquarum æmulationes, obloquia, suspiciones prauæ: quæ ex suo ingenio cum alias metiantur, perfacile vident, ex his lignis & ignibus non nisi metuenda incendia nasci. cumque non ignorent necessitudinum harum pericula, quæ ipsæ fortè non

semel pàssæ ,eadem in aliis carpunt : & vt naturâ in omnem deterrimarû rerum suspicionē pronæ sunt, factæ ex seipsis magistræ; pessima quæque & ominantur & narrant, non sine grauis Confessarij talis dedecore. quod etiam in vniuersum corpus redundat , & vnus iam delictum abicit in omnes; cùm vniuersim Ordini, quorundam delicta tribuuntur. neque quisquã sibi persuadet, Ordinis non esse, quæ aut annuentibus Superioribus, aut non emendantibus eueniunt.

Grauiissimum verò est, si ipsi Superiores hoc malo laborent. quorum facta documenta, ac propè præcepta reliquis sunt, ac quasi ad imitandum imperia. nec iam delictum putant inferiores, quod Superiore duce faciunt, nec pericula metuunt illo præeunte.

Et ferè quidquid vnquam in Religione malorum , quidquid lapsuum natum est, ex hac crebra diuturnaque , confessionis, aut spiritualis documenti prætextu, cum iisdē mulierculis colloctione ortum est. Vt maxima eorum pars, qui deserta vocatione sæculum petierunt, ac in scelera antè, aut non multo pòst prolapsi sunt, ex his initiis ad extrema illa malorum deuenierint. pauci que adeò non tantùm ad carnem

nem & sanguinem, sed ad reliqua vitia & scelera deuenerunt, qui non ex hac frequentia ad præcipitia hæc descenderint. nam & munera hinc originem ducunt, & variarum detractiōum ingens vltro citroque materia enascitur. euulgantur domestica omnia, nec quidquam tam reconditum sanctumque; , quod mulierculæ non cōmittatur, & inter hæc, pœnitenda non rarò, ac nulla in posteritatem arte eluenda: sequuntur feminarum visitationes, & sociorum in ijs fuga & vitatio: sæculares deinde mores, nimiaque in delationibus credulitas, & his non inferiora plurima. quæ omnia ex hac frequentata confessionum prolixitate noxia fœcunditate pullulant, infelicis seminis infelicia germina, in Religionis interitum nata.

Et sanè indignum viro docto, religioso, & ad maiora nato, paucis mulierculis tantum temporis vitæque impendere, tot horas malè locare; ne aut destituamur illis, aut plures cōciliemus, ipsi antè illaqueandi, & sub pulcro hoc spiritalis auxiliij velamine, muliebribus retibus implagandi. maximè cūm alliciendi placendi que hoc studium, sine domesticorum offensione non transeat: cūm mutux hinc nascantur æmulationes, mētus, mutuique ad se has illasue

illasque pelliciendi conatus. quas res non infrequenter contemptus Confessariorum sequitur. neque enim fieri potest quin inter hos conatus, prolisasque sermocinationes, aliquid minus prudens, minus religiosum, minusque generosum ac virile elabatur, viciatim postmodum non sine rubore effundendum.

Remedia.

A Superiorum vigilantia, & solerti industria petenda sunt: qui si in omnem partem excubauerint, non magno negotio mala hæc discutient, maximè si seria accesserint monita, atque in delinquentes poenitentia.

Si post secundam tertiamque monitionem emendatio non successerit, tentanda erit loci mutatio. quòd si nec mutatione mores mutauerit, ab omni faminarum confessione arcendus erit.

Proderit etiam tales variis occupari, & aliis potius, quàm excipiendis confessionibus distineri; aut sanè tot negotiis muneribusque obrui, ut vel tempus desit prolixioribus hisce colloquiis.

Per Præfectum etiam spiritus tales iuuandi erunt, ac per frequentes spirituales annuas collectiones.

Con-

Consultum etiam erit aliquoties hos in anno aliorum negotiorum prætextu ad alia loca destinare, vt aliorum moribus paulatim assuescant pœnitentes, & desuescant illius. à quibus etiam, captata occasione, pericula docenda erunt, damnaque, quæ ferè crebras diuturnasque confessiones sequuntur.

Vniuersim etiam iuuabit, si à Superiori familiari aliquando colloquio, aut recreationis tempore exempla narrètur eorum, quæ & plurima & graua sunt, qui è talibus initiis in grauissima quæque, ac demum ad Religionis desertionem delapsi sunt.

Iuuabit etiam cogitatio præsentis Dei, omnia intuentis, & ad iudicium adducentis. finem etiam prolixarum harum confessionum examinare. si spiritalis est, cogitet plus semper periculi his annexum quam spei bonæ, maioraque vtrimque damna quam bona data relataque esse. si temporalis alicuius commodi, meminerit Deum se habere patrem, qui vigiles seriosque regularum obseruatores non destituet in inopiam: cogitetque plus semper maturitate morum, paucorumque religiosorum verborum pondere, quam prolixis molli- busque colloquiis parari.

CAPVT XL.

Feminarum visitationes.

QVocunque demum prætextu illæ fiant, noxię in primis Religioso sunt, ac omnium etiam maximè confessorio; cui modis omnibus expedit plurimum verecundiæ pœnitentibus suis ac venerationis inhærere: vt eum nulla pœnitens mulier sine rubore audeat intueri, aut sine verecundia extra confessionis tempus adire, aut loqui: vtque eam rerum, quas in confessione tractauit, memoria, perenni quadã verecundia ac veneratione, à Confessarij familiarj congressu terreat. eueniet alioqui, vt familiarioribus colloquiis & pudorem paulatim & venerationem exuat. ac vbi quædam in Confessario, quod perfacilè in familiari consuetudine fieri consuevit, minùs aut religiosa, aut infra conceptam estimationis spem deprehenderit, incipiat contemnere, quem antè venerabatur vt patrem.

Nec rarò euenire solet, vt familiaritas hæc visitationibus parta libertatem confitendi tollat, maximè si quid grauius, aut verecundum intercesserit, cuius memoria

ria præsentiam Confessarii vereantur; aut sanè inuerecundiam quandam ingeneret: vt quæ antè non nisi ingenti rubore in ipsa confessione, nunc etiam in familiari colloquio inuerecundè exprimant, vt meritò moneat Ecclesiastes, & ab omni familiari congressu, in quo ferè liberius excurrunt oculi, terreat: *Speciem mulieris alienæ multi admirati, reprobī facti sunt: colloquium enim illius quasi ignis exardescit.* Ecclesi. 9.

Visitationes deinde illæ, quid nisi ingentium malorum materies sint, ego non video. miscentur verò vltro citroque colloquia, ridetur etiam, & liberiores decurrunt oculi, omnisque paulatim pudor detergitur; gestus solutior, cachinni, ioci, narrationesque subsequuntur minùs religiosæ; pedetentim deinde socios testesque dictorum factorumque fugimus, & solitudinē amamus, ambimus etiam. profiliunt ex hinc colloquia familiariora: non qualia inter patrem & filiam reuerentem & pudicam, sed qualia inter maritum & coniugem, vt nullus iam pudor verbis, ac non multò post nec factis. semel verò pudore pulso, quàm grauiam metuenda sint, nemo non videt: quæ enim primò ad Confessarij, tanquam serij ac grauiissimi parentis, vocem expauescebat; nunc in illius oculis

culis & vultu, tanquam in mariti, aut fratris, aut sororis ludit, iaculaturque non rarò, etià ignara, potentia fulgura, ossium medullas exedentia, hauritque vicissim non castos ignes: & antè vtrinq; flammæ exurgunt, quàm scintillas senserunt. prudenter Sapiens: *In medio mulierum noli commorari: de vestimentis enim procedit tinea, & à muliere iniquitas viri.* & Basilius: *Cum femina semper esse, & feminam non cognoscere plus est quàm mortuos suscitare.*

Eccli.

4^l.Te ve-
ra uirg.

Neque in vnius visitatione sistitur. plures adeundæ, ne exurgant inter non impares æmulationes, ne se desertas querantur; ne postpositæ, ad alium Confessarium animum adiciant. Ita cùm plurium visitationibus Confessarius distinetur, plurium paulatim ardet flammis, plurium percussus vultu, oculis, gestu, voce.

Offensiones ex his nascuntur externorum sanè graues, & grauiores offensionibus suspiciones: ingentiaque exurgunt scandala oblocutionesque, & deteriores factis narrationes. nec auctoritati tantum multum decedit, sed vniuersa tanquam spongia detergitur. & quidquid antè collectum boni nominis, tanquam flumine deletur: vt nulla iam verbis fides, nulla monitis auctoritas, fiducia nulla sit. omni

pro-

probitatis, sanctimonix, castimonix opinionione depulsa.

Domesticorum etiam aut offensiones, aut, quod deterius, imitationes subsequuntur. ita prout omnes ad deteriora sumus. & delectat sequi, ad cuius cogitationem sine exemplo perhorrescebamur. erubescamus autem, & timore septi, nec verbo visitationem aut colloquia sustinebamur: accessit exemplum, & prout in illa ruimus; laudemque etiam venamur, ad cuius autem nomen rubore suffundebamur. tantum dux potest & exemplum, maxime in iunioribus, quibus necdum per aetatem, rerumque periculorumque experientiam aduersus has illecebras robur inualuit. Nec quidquam facilius, quam teneras ceruices, ac quasi de matris etiamnum lacte, flectere in quamcunque partem, rapereque ad hanc mulierum mollia & blanda, non vno magnorum etiam & primorum orbe toto virorum naufragio infamia. ut nihil mirandum, si in illos scorpilos imperiti naucleri, & tempestatum fluctuumque inexperti illidant ratem.

Serpit dein haec visitationum frequentia ad reliquos, ac totae iam domus effunduntur ad illas, pietatis ferè aut commodi alicuius praetextu: ita ferè electibilibus ve-

venena miscentur; nemo illa absynthio aut felle miscuit: quæ gustui in primis amica, toxico ab inimica manu natât. facit idem diabolus, spe spiritualis emolumenti ad hæc muliebres visitationes inhortatur, ad epulas reuera basilisci, ad venena molli sibilo tecta. ne fide, quisquis Deum amas. altè hîc serpens habitat. iaculabitur toxica opportunitate natâ. & vbi incautus fiducia tui extra omnem metum fueris, altiùs venena hauries, quàm vt illa vlla medica manus depellat; seròque ingemisces, & nihil-profuturas lacrymas, irritaque suspiria dabis, cùm intima depasta senties, ac non nisi cum anima nocitura deuomes.

Neque consistere hoc malum in vno potest. prouocatæ enim vnus alteriusuè proritamento reliquæ, ac quadam æmulatione sociarum, eadem cõcedi sibi à Confessariis suis poscunt, quæ aliis euenire vident. negat aliquis? deserto hoc negatore suo, decurrent ad liberalem illum visitatorem, à quo paria sperent ac consequantur. è quibus initiis ingentes animorum nascuntur dissensiones, ac in tacita quadam, ac aperta tandem odia abitur.

Remedia.

IN solidum omnes omnino visitationes muliebres secare consultū erit, nisi aut certa ægrotudo, aut grauis aliqua necessitas aliud deposcat.

Propendentes in eiusmodi quā monitis, magnorumque non in vna Religione lapsibus, miserandisque in omnem posteritatem ituris exemplis, quā pœnitentiis coercendi, loco etiam mouendi, audiendisque confessionibus excludendi.

Transgressores in aliorum exemplum & terrorem graui pœna mulctandi, nullique quacunque prærogatiua fulgeat, eruditionis, pietatis, ætatis, dignitatis in hoc genere parcendum. neque vlla nimia hîc seueritas esse potest. vt ille clementissimus censerî debeat, qui fortissimè punit, scuitque in noxium membrum, ne contagione huius vniuersum corpus periclitetur.

In necessariis ægrotudinum visitationibus, si perpetuus fidus Religioni socius claudat latus, oculosque in omnem partem intentos habeat, magno in omnibus securitati adiumento erit.

Iam vt frequentior mulierum visitatio, tanquam venenorum attrectatio, noxia est,

ita sæpiùs ab ijsdem visitari non minori periculo subiacet. quare non inferior in hac re Superiorum prouidentia, vigilantique cura quàm in priore necessaria erit.

CAPVT XLI.

Sociorum fuga & vitatio.

VIA hac est ad ruinam multorum, magnorumque lapsibus infamis in Religione scopulus, maximè cùm de mulieribus agitur: in quarum consuetudine ac familiaritate, qui lociorum vitat præsentiam, hunc ruinæ proximum esse, necessarium est. Multis hoc in omni Religione exemplis, veteribus recentioribusque doceri potest. Iam, si proba, si casta, si timore Domini munita conuersatio nostra est, quid sociorum veremur oculos? Amare potius debemus socios dictorum factorumque, & innocentiae nostræ testandæ, ac vitandorum periculorum, scandalique & suspicionis in aliis auertendæ causa. Securos enim tutioresque nos reddunt ab improbis callidisque mulierum illecebris, & ab æmulorum, inuidorum, ac odio etiam Religionem persequentium liuoribus & malignitate. Quas enim non possunt,
inui-

inuidia, aut nominis nostri odio flagrant-
tes, aut alicuius priuati viri magni, calu-
mñas struere? quibus non criminationi-
bus obruere, si innocentia testes absint?
& quomodo innocentia contra improbi-
tatem se tuebitur testibus destituta? Opta-
re proinde prudens omnis actionum su-
arum testem debet; & erubescere ac ex-
horrescere, quoties solum se quocunque
locorum, muliercula, sponte an fortuito
dèprehenderit.

Iam cùm nusquam aduersarius desit
quærens quem deuoret, omnemque oc-
casionem captet; magna illi à socio remo-
ra iniicitur. nam vt flammæ, & medicata
libidine tela iaculetur, accendatque non
casto pectus igne; non erumpit tamẽ flam-
ma: cùm sociorum vigilantia, tanquam in-
iecto flumine restinguitur hic ardor, &
quasi obiecta rupe repercutitur, foras fors
erupturus ni repercussionem reperisset.

Quid? quòd ipsa non rarò forma, & se-
creti securitas nimis magna incitamenta
sint ad reconditas multorum sæpe anno-
rum flammæ excitandas. Incredibile enim
dictu quantum momentum ad scelera se-
cretum adferat; vt, si publicationis timo-
rem inijcias, maxima facinorum pars cor-
ruat. neque quisquam facilè ad vulganda

decurrit: secretum crimina amant, quæ tamdiu appetuntur, quamdiu celanda sperantur. vt primùm vulgationis metus incussus, tanquã iniecta frigida cor gelascit.

Cumque in omni hominum genere plurima exstent exempla non vltimorum virorum, qui ex incomitata hac fiducia, aut periculis & præcipitio proximi fuerunt, aut nulla prouidentia, ac pœnitundine reparanda damna acceperunt, nemo paulò prudentior illorum exemplis edoctus ad vltronea hæc discrimina se abiiciet. magis etiam cùm cogitauerit, non vnum ardentis mulieris fraude circumuentum non semel, ad Iosephi illius magni necessitatem adaçtum fuisse: cùm etiam mentita corporis inualetudine animi morbum mulier proderet, & alliceret non ignotis huic sexui illicibus prouocamentis, in omnem mollitiem compositis, cadentibus calidè crocodilæis lacrymis in interitum fufis, traheretque reluctantem, & ad periculum suum admirabundum, ac ad solitudinem suam serò propè trepidantem.

Et plures omnino spectatissimæ probitatis vidimus, quos non vnæ muliebres insidiæ cautiore, & tuta omnia timentes dederunt. quid? quòd intentatæ non semel fraudes ab iis, quarum castimonia nulla

vnquam vel tenui suspicionis vmbra notata fuerat? Quò cautiùs híc procedendū: nec ætati, nec probitati, nec sanguini, ac propinquitati fidendum. Vbicunque solitudo est, damna metue, subduc ratem, sequentur tempestates: portumq; pete, dum integra naui potes; ne dum voles, insurgentibus indignabundis femineis fluctibus, excludaris littoribus, & frustra terram spectes, irretitus malis, vndisq; immane voluentibus delassatus, & ab inenatabili hoc profundo absorptus, sera ô nimium pœnitudine: Prudens nauclerus subducit nauem tempestati; fatuus immitit, & in medio cursu, fluctibus ludibrium factus, sorbetur nequidquam opem sociosq; circumspectās. retulit nimirum audaciæ præmium, exemplum posteritati factus, temerarij ausus. nec est periti medici curationem ad extrema reiicere, dubio plurimum euentu, certo periculo: præcauere cum potest morbum, medicaq; antè currere manu prudentis est. non est generosi militis, per ludum risumq; in vltronea se discrimina conijcere nulla spe gloriæ, dubio infelicis successus metu. & quis prudens explicabit vires, vitam, sanguinem, emolumenta si subtrahas, solaq; damna miniteris? campum virtus desiderat non

indignum amplitudine sua. vltro non accersit pericula sapiens præmio frustrandus. si se obtulerint, si incurrerint, fortiter excipiet, doctus antè animâ ponere quàm cedere. Imitabitur Religiosus. non committet animæ suæ ratem infidis muliebris oceani fluctibus: nunquam certiùs sorbent quàm dum ludunt, dum serenitatem mentiuntur. auxiliariis hîc opus est copijs. nemo se fluctibus committit solum vitæ suæ prodigus, socias adiungit operas frangendis illis domandisq̃ue: euenturoq̃ue eminusq̃ue licet minitabundo, occurret morbo, nec vulnera exspectabit in medelam: nec periculis se temerarius obiiçiet, præmio nullo, damno in interitû, ingloriamq̃ue mortem ruituro.

Præbet sanè sociorum desertor iustam Superiori causam ingentis diffidentia. vt nihil iam illi tutò credat, qui post magnorum incauta præcipitia eadem aggrediat. signumq̃ue omnino est aliquid ipsum moliri, quod secretum postulat, publicari timeat non potest hoc à virtute nasci, quæ nec testem, nec proditorẽ suum veretur. &

Ioan. 3. seriò monemur ab Apostolo: *Omnis qui male agit odit lucem, vt non arguantur opera eius: qui autem facit veritatem, venit ad lucem, vt manifestentur opera eius, quia in Deo sunt facta.*

non

non erubescit manifestari veritas, amat lucem. Fortiter idem Apostolus: *Quoniã Deus lux est, & tenebra in eo non sunt vlla. Si dixerimus, quoniam societatem habemus cum eo, & in tenebris ambulamus; mentimur, & veritatẽ non facimus: si autẽ in luce ambulamus, sicut & ipse est in luce, societate habemus ad inuicem.* Hanc societate altẽ imbibimus, cùm illã sociorũ præsentia testamur. neq; certẽ talis aut offendit in tenebris; aut per nocturna præcipitia delabitur incautus, cũ diem secũ habeat sociũ: sol enim cuiq; diesq; socius est.

Et vt periculum absit, non consulitur socij integritati: cùm non vnus exclusus à socio pericula adiuerit, damnaque tulerit, nec quam innocentiam domo sociatus extulerat, desertus à socio retulerit. vt merito hĩc illud Prophetæ dici possit: *Si speculator viderit gladium venientem, & non insonuerit buccina, & populus se non custodierit, veneritq; gladius, & tulerit de eis animam: ille quidem in iniquitate sua captus est, sanguinem autem eius de manu speculatoris requiram.* Speculator omnis socius est: à cuius manibus deserti in interitũ socij animam iure deposcet Dominus. Neque tot exemplis doctus ignorare pestiferum solitariae mulieris gladium poterat. Et vt periculum vtrimque absit, mali tamen suspicio abesse

non potest, quæ sola famæ lædendæ sufficit. quam quisquis sapit fugiet, memor plurimos hostium calumniis oppressos, ignauo exitu vitam finiuisse. neque se tantum sociumque, sed Religionem vniuersam in nominis discrimen vocat, cum vnius delictum trāseat in omnes. quid? quòd iniusta semel macula, ferè æternet, nec vlla temporis aut æternitatis spōgia deleatur. Plurimum deinde propagandæ proximorum salutis obesse hæc res solet: cum ex captata solitudine, sociorumque fuga, in plurimorum animis nascantur non castarum cogitationum opiniones: hinc fuga, à non castæ consuetudinis timore, vt minùs iam audenter se suaque fidei talium committant.

Remedia.

A Seria periculorum consideratione petenda crunt: ab exemplis etiam non postremorum virorum, qui pedetentim his initiis ad malorum extrema deueniunt. Neque potest desiderata hæc cum mulieribus solitudo, ac sine teste colloctio aut carere periculis, aut ab alio animo, quàm lapsui proximo proficisci: nam qui testem refugit, aliquid necessum habeat, quod ignorari desiderat, quodque vulgari me-

metuit. qui enim sua omnia non veretur propalari, nec magis oculos humanos timet, quàm omnia videntis Dei; is gaudebit etiam testium multitudine, eo magis extra periculum & calumniam futurus, quo plures habuerit dictorum factorumque suorum inspectores ac censores.

Denique sociorum hæc associatio prodesse, nō obesse potest; vitatio obesse, non prodesse potest. ac tuta semper in re salutis, dubijs, periculoque plenis præponenda sunt. In rebus huius sæculi fortunæ se fors exponere aliquis possit; in animæ & salutis, stolidum est, intuta dubiaque sequi, tutioribus neglectis.

A Superiorum deinde vigili cura remedia petenda sunt, vt nullum incomitatum dimittat; non ætati, non eruditioni, aliisque donis præfidens sine teste quemquam patiatur: tutissima deligat; neque aut suos, aut Religionem in æstimationis discrimen adducat. Quòd si quem in hoc genere deliquisse deprehendat, det operam vt non impunitus abeat, maximè ne exemplo vnius, reliquis ad audenda paria strata videatur via.

Consultum etiam fuerit amouere tales munere & loco, neque permittere, vt diutius in aliqua sede pedem figant, ne dum alicui

alicui diutiùs affiguntur loco, consuetudo & familiaritas enascatur, quam non rarò secreti captatio sequi solet, maximè in iis, quos in hanc rem propensiores experientia docuit: quo magis illis inuigilandum, & ignibus his materia subtrahenda temporis est, ne ad remedia decurramus, cùm flamma domum occupauerit, ac possederit vniuersam. Principijs leui manu malis occurratur. quòd si inualuerint, nec toto restingui flumine, nec vlla aut arte, aut scientia auerti possunt, vt à sola demum sectione medela sperari & possit & debeat.

Amorem in se excitet vocationis salutisq̃ suæ, nec magno molimine femineos hos vitabit scopulos, nec allidet ad hæc breuia salutis suæ ratem. solaq̃ integritatis instituti fama, omnẽ Religionis amatorem ab his cogitationibus auocabit: maximè si sibi periculorum vndique circumstantium magnitudinem seriò proposuerit. in quibus à socio destitui idẽ est, ac si quis ingenti vndique hostili exercitu obsessus, armis ac propugnaculis se exuat, nudumq̃ ferro latus obijciat, cùm socius cuique pro armis ac propugnaculis sit. Timeat proinde, diffidat exarmato robori suo. *à muliere enim initium peccati, & per illam omnes morimur.* non se suaq̃ credat il-

li quisquis sapit, memor Sapientis: *Ne des* Eccle. 9.
mulieri partem animæ tuæ, ne ingreditur in
virtutem tuam, & confundaris. nulla verò
 maior certiorq; occasio in virtutem ingre-
 diendi, ac tanquam subiugum mittendi,
 quàm cùm solitudo amplum illecebrarū
 campum præbet. cùm semotis testibus, li-
 beriùs illices excurrunt oculi, mollia na-
 tant labia, frons in dolum exporrigitur, tot
 compedes, laquei, retia, quot verba, magis
 etiam si fluant tanquam à crocodilo lacry-
 mæ. *nouissima enim illius amara quasi absyn-* Prov. 5.
thium, & acuta quasi gladius biceps, pedes eius
descendunt in mortem, & ad inferos gressus il-
lius penetrant. Careret omni hoc periculo, si
 non careret socio. & ipsa sæpe solitudo è
 casta, non castam dedit; nec permisit quæ
 intrauerat innocuam innocentiam exire.
 Cauebit proinde seriò quisquis Deum, vo-
 cationem, se, sociumque amat, ne vel mo-
 mento infociatus mulieri adhæreat: cogi-
 tet nullum propè lapsum sociato euenisse,
 omnem infociatis accidisse. Et iam olim
 monet Hieronymus: *Si propter officiū cleri-*
catus, aut vidua visitatur aut virgo, nunquam
domum solus introcas. & Solus cum sola secretò
& absque arbitro vel teste non sed eas. & Au- Epi. 109.
gustinus: Vbicunque ergo simul estis in Eccle-
sia, & ubicunque femina sunt, inuicem ve-
stram

stram pudicitiam custodite. Deus autem qui habitat in vobis, etiam isto modo custodiet vos ex vobis.

CAPVT XLII.

*Indeliberata agendorum resolutio,
& executio.*

QUæ ferè præcipitio proxima est. lapsus sanè de propinquo minatur: neque enim prævideri res omnis tam subito, aut illarum circumstantiæ possunt: quarum neglectu labimur frequenter in poenitenda. Prudēs omnino seriò res, & quidquid illas circumstat, discutit, propinqua scrutatur & remota, nec præsentia modò, sed & futura, & quidquid è talis similis rei delectu, tanquam principijs semel positis, sequi consuevit, aut probabile futurum est. quæ qui negligit, rei nominisq; sui adibit discrimina non leuia, cogeturq; sententias suas ingenti sæpe rubore, famæq; non vulgari iactura retractare, fateriq; errorem suum: non fuisse nimirum hæc aut illa à se præcogitata, negligentem discussionem, præproperam executionem, & vetus illud imprudentiæ, Non arbitrabar, non putabam.

Grauis hic error in Superiore est, qui &
iudi-

iudicis & medici personam præfert; grauiaque ex hoc damna tam vniuersim, quàm singillatim dari solent.

Exempla in omni hominū genere reperies, militiæ Ducibus, Regibus, viris magnis: quorum plerique præcipiti hoc consiliorum delectu, se rempublicamque vna ruina sepelierunt. Nec desunt exempla in Religionibus domestica, nō tantum temporalium rerum damno, sed magnorum virorum etiam præpropere exitu, dum in ferendis sententijs præcipites Superiores innocentes, magnosque, & Religionis gloriæ natos, vno propè momento euerterūt.

Fugiet proinde prudens Superior hos temerarij ausus scopulos, & indeliberata præcipitia. Si accusator aut delator accesserit, perpēdet singula, nec intactum quidquam à discussione relinquet: disquiret num quid humani hīc intercurrat affectus; num quis proprius ludat amor; num quæ inerret æmulatio; acceptāne, aut data iniuria; verbōne, aut factō læsus; num audita tantum, & ab alijs narrata. ingenium etiam vnius cuiusque tacitus secum discutiet; num pronus in credulitatem, in delationem, augendis rebus, etiam supra fidem extollēdis assuetus, pronus ad suspiciones: simul etiam quis ille, cuius nomen defer-

tur,

tur, qua ante hoc tempus fama, qua integritate, quibus impræsentiarum moribus, qua fide in rebus versetur: qua apud domesticos externosque existimatione. nec erit difficile singula singulis conferendo, aliquid aut veri, aut probabilioris rei sagaci indagatione cognoscere.

Illud in primis vtile, lentè in omni hac re progredi, nec quasi vno filo rem exequi, sed temporis aliquid intermediij concedere, si quo modo res moram patitur; ac per intervalla ad illam accedere. Maturefcunt sæpe res morâ, & concessum tempus veritatem reteggit: cùm multa frequenter intercurrent, quæ deliberantem quasi ducta manu ad destinatum veri scopum adducunt.

Habet hoc etiam locum in priuatis. & plurimùm calida consilia sæpe noxia sunt, maximè in rebus magnis, in quibus ferè grauissima incommoda altiùs habitant, ac in imo latent, quæ non facilè, nisi morâ eruas. tempus deposcunt, quæ consēpulta profundius iacent, vt in solem lucemque educantur.

Quare in omni re, quæ quoquo modo moram permittit, à præpropera sententia cauendum est, difficultatesque ac discrimina animo suo proponenda; & quidquid
metus,

metus, prudentiæ comes, suggerere potest: plusque semper aliquid timori, quam nimiae spei largiendum. minus enim plerumque metus, quam confidentiæ peccatum est; facilioremque timor veniam, quam præsumptio meretur. ac sæpè quam timor culpam contraxit, diligentia emendari potest: confidentiæ delicta perquam raro emendes.

Bene Sapiens: *Vidisti hominem sapientem* Prom.
sibi videri? magis illo spem habebit insipiens. 26.
 Olim hæc verba D. Bonaventura: *Stultus* De 6.
enim sibi non confidens, querit consilium à sa- alis c. 7.
pientibus, ne decipiatur: ille autem de re plus
quàm debet, præsumat: etiam ubi errat, rectè se
plerumque sentire deceptus putat. Inter omnes
autem tentationes, videtur ista periculosior cui-
que Christiano, scilicet proprio sensui nimis in-
niti. Cùm enim nemo reperiatur ita perspicacis
intelligentiæ, quin possit in aliquibus falli; qui
hoc solum & totum reputat iustum quod ipse
senserit, astuto aduersario ad varias seductiones
sub specie boni, liberum aditum pandit. unde
cautum est semper rectori consilia libenter au-
dire, & humiliter querere. Et in hoc triplex
utilitas consistit. Primò, si alij idem sentirent,
quod & ipse, securior est quòd non decipiatur.
Secundò, quidquid fecerit cum prudentiũ con-
silio, si aliquid inde euenerit contrarij, minus ei
 O O poterit

poterit imputari, quàm si de suo tantùm sensu id
 fecisset. Tertiò, quòd sape in merito humilitatis
 talis Deus dei ei agnoscere per se, vel alium, quod
 antè non intellexit. hinc Moyses, cui Deus facie
 ad faciem loquebatur, consiliùm Iethro soceri sui
 gratum habuit & seruauit. Sunt autem duo ge-
 nera hominum, quorum consilia prudens rector
 non facile debet recipere, scilicet adulatores &
 detractores. primi istorum seducunt eum, ut
 magis de se, quàm expedit præsumat, iuxta illud,
 Qui beatum te dicunt, ipsi te decipiunt, & viam
 gressuum tuorum dissipant. Secundi inducunt
 eum ut peius quàm debet, de aliis suspicando
 sentiat, & sape innocentes condemnet, priusquàm
 veritatem rei plenè cognoscat, dicente Scriptu-
 ra, Aures principum simplices, & ex sua natura
 alios aestimantes, callida fraude decipiuntur. Et
 malis quorundam suggestiõibus regum studia
 deprauantur, ut eos, qui credita sibi officia dili-
 genter obseruant, & ita cuncta agunt, ut omni
 laude sint digni, mendaciorum cuniculis conen-
 tur subuertere. Cùm autem tribus de causis so-
 leat requiri consiliùm, scilicet propter emenda-
 tionem, ut discatur de quo dubitatur: propter
 auctoritatem, ut magis habeat vigoris, quod per
 tales consultum fuerit: & propter pacem, ne ha-
 beant aliqui occasionem murmurandi. propter
 primam causam consulendi sunt prudentiores;
 propter secundam nominatiores; propter ter-
 tiam

tiam, ad quos negotium pertinere videtur.

Quisquis proinde prudenter instituere res volet, consilia in re sua aliorum scrutabitur & sequetur. sic enim fiet

Primò, vt sententiæ suæ contra obtrectatores habeat propugnatores, quos fors habiturus erat oppugnatores. ferè enim omnes in contemptum neglectū rapiunt; & præteritos, spretos fuisse arbitrantur. quare probissima licet consilia damnant, probassent consulti, improbant neglecti. Quin adeò, quos aduersarios & sententiæ tuæ hostes habes, si in consilium adhibueris, flectes, & plurimùm quò voles, duces. tantum potest aliorum iudiciis detulisse. negligis? hostes iuratos cogita. qui si aperto Marte aut non audent, aut non possunt; ex insidiis, optima etiam ac laudatissima quæque, si alia negata via est, structis variè calumniis subuertere conabuntur.

Secundò, ne facilè aliorum à vero certoque labaris. cùm oculatiores ferè plures sint, resque è variorum iudiciorum concertationibus fortiùs discutiantur, certiusque cognoscantur. Nec nouum in humanis magnisq; viris ab infimis profutura discere. nolle illa ab aliena manu accipere imprudentiæ summæ. solius ingenij sui viribus præfidere, arrogantia maximæ est.

semper verò prudentes, aliena consilia in re sua probarunt. Quòd si in quibusdam, propria, & in pectore cuiusque nata, alienis fortunatiora fuisse deprehendas; non tam ratione illa prudentiora, quàm euentu feliciora fuisse cogita. ab euentu autem res iudicare, demētīq; & plebeij per omnia ingenij est, quod fortuitis potiùs casibus, quàm ratione res metitur. Fortunas aliquis suas, seque ipsum, cùm posset naui, tabulæ in mediis furentis Oceani fluctibus commisit; ex ingenti hic præcipitio fortunata audaciq; volutatione terram tenuit; imperitus natandi rapidissimis alius se vorticibus immisit factus pila fluctibus; ille in vnum aleæ iactum vniuersum patrimonium proiecit; incermem se non nemo armatis quaquā hostibus obiecit; solus alter temerario ausu cum Magno Macedone, in armatam hostilem urbem se coniecit; quidam mulieri arcana capite luenda credidit. & feliciter illis res omnes prospereq; successerunt. perierunt inter hæc millia, & temerarios conatus infortunato exitu signarunt. paucis admodum, felicioribus quàm prudentioribus, supra omne votum res illæ ceciderunt. non tamen ideo aut imitanda hæc aut probanda. neque laudem temeritas mereri potest. felici aliquē euentu

euentu beare potest, prudenti non potest. sed & fortunatus audire temerarius potest, prudens non potest: plus namque talis fortunæ quàm virtuti aut rationi debet, fortunataq; illius felicitas laudari, sapientia non potest. & quis neget eximiam aliquando gloriam, fortunæ potiùs, quàm virtutis beneficium fuisse?

Tertiò, vt in quocunque infortunato rerum successu promptam excusationem habeat. suo nimirum non fletisse iudicio, secutum aliorum. fecisse quod sapientes in re sua solent, aliorum sententiam suæ prætulisse. Neque alia facilior venia est, quàm cum quis prudentū consilia secutus, euentus felicitate caruit. & magna ferè talis altaque pace fruitur quocunque demum successu res euenerint, cum habeat hunc domesticū testem, Feci quod potui, quod debui, quod assolent prudentes, sapientiæ legibus obsecutus aliorum consiliis mea postposui. aliter res cecidit: humana hæc sunt. nec præcaueri semper damna, nec anteuerti fortuita, consiliis possunt: maximè cum à libera subdolaque voluntate alterius, quam nec flectere, nec scire etiam possumus, non rarò respondeant. Nihil sanè facilius quàm prudentissimè cogitata inuertere. ad euerfionem causa vna

fatis, ad stabiliēda plurima necessaria sunt. cumque innumeræ improbitati pateant viæ, virtutis vna est. illa in plano, hæc in arduis sedem fixit. & euertere vni facillimū, quod vix plurimorum industria prudentiaque stabiliri potest. multis nimirū prudentia eget, temeritas paucis.

Nihil ergo inconsultò, maximè Superior, aggredietur, lubensque de minimis etiam sententiam aliorum disquiret, gaudebit discere, & gloriæ, securitatis, tranquillitatisque suæ non vltimam partem ducet, aliena consilia prætulisse suis. ita enim & meritam reprehensionē vitabit, & tot propugnatores quot consiliorum auctores habebit, & tutius certiusque res aggredietur, & in aduersis solatia opemque experietur; & si quando infelix, nunquam tamen temerarius audiet.

Remedia.

A Nimum ad deliberationem adferre ab affectu liberum, vt nihil antè certò tecum statuas; plurima tamē in vtramque partem valitura tacitus tecum cogites. Seriam deinde proponendarū rerum deliberationem, si tempus patitur, instituas, cūm moncat Sapiens; *Omnia cum consilio*

filio fac, & post factum non pœnitebit. Si negata mora est, ac quasi in arena consilia sumenda sunt, nec dilationem res concedit; ea tamen adhibeto, quæ præsens permittit conditio rerum: nec ab impetu aut fortuitis, sed à ratione feraris.

In consilium adhibere propositarum rerum non imperitos, & dandis consiliis assuetos: singula dein discutere, quæ obuia, quæque metuenda sunt, quæ speranda commoda damnaque, in omnem denique partem, propositam rem vertere. Benè Basiliius: *Communicandum cum iis qui eiusdem nobiscum animi sunt, fideiq; atque intelligentia sua certum documentum dederunt. ut intentio nostra, si mala sit, corrigatur; si bona, confirmetur.* Interr. 229.

Sanè ut alia omittam, consequitur serius deliberator, ut consiliorū suorum habeat patronos, parataque hac fruatur tranquillitate, Feci quod licuit; præter opinionem res ceciderunt; adhibui, quod in humanis solet, consilia prudentum. exitum, qui ferè fortuitus est, damnare possunt; præpropera ac indeliberata consilia non possunt, ubi diligens seriaque consultatio præcessit. Monet è Sapiente Gregorius: *Sine consilio nihil facias, & post factum non pœnitebit,* Paff. p. 3. c. 16.
& palpebra tua præcedant gressus tuos. palpebra
 O o 4 quippe

quippe gressus præcedunt, cùm operationem nostram consilia recta præueniunt: qui enim considerando prauidet quid facit, gressus tendit, oculos claudit. pergendo uer conficiit, sed prauidendo sibi metipsi non antecedit. atque idcirco citius corrui, quia quò pedem operis ponere debeat, per palpebram consilij non attendit.

Huc accedit, quòd in præcipiti agendarum rerum, & non deliberata resolutione, licet non infeliciter res ceciderint, eleuent tamen plerique si improbare rem non possunt, ac fortuitæ rei prosperos successus adscribunt, non prudentiæ imperantis.

Exempla sibi proponere, quibus hæc agendi ratio ingentia damna dedit, exitu ferè infortunato. Plenè his sunt omnium Regum, Principum, Rerumpublicarum, omni ætate & populo historiæ, quæ è præcipiti ac indeliberato consilio, regnorum meminerunt, quorum facilius est nomina quàm cinerem designare. ita temerario impulsu vno, tota totis agris consépulta iacent imperia, ignotissima posteritati, ni proditor calamus funesta nomina in exemplum prodidisset.

Remouenda denique ab omni gubernatione erunt hæc præpropera & iudicij sui ingenia, quæ magis ad obsequendum,

ac imperata exequenda, quàm adimperandum nata sunt.

CAPVT XLIII.

Diffidentia.

QUæ res vbi religiosam domum per-
uadit, nihil magni sperari potest:
nam siue Superior diffidat suis, siue Supe-
riori inferiores, damna sola timebda sunt;
aut sanè nulla in magnis arduisque spe-
randa progressio est. iacent proinde do-
mus tales, ac quasi in ignauo sopore per-
eunt. nec quidquam præclarum sponde-
bunt, quamdiu diffidentia locum suum te-
nebit: vt frustra excelsa, aut in posterita-
tem abitura, aut in salutem multorum, ab
his animis expectes.

Ingens omnino languor diffidentiam
comitatur, ac spiritalis omnium rerum
nausea: nam siue subditus Superiori, siue
hic illi diffidat, siue utrosque diffidentia
occupauerit; neglectus propè omnium è
timore natus sequitur, ac secretorum ple-
rumque consiliorum captatio: nam cum in
apertos non profiliant campos, ex insidijs
res aggrediuntur; dolisque, quod è virtu-
tum plano non possunt, consiliorum stu-

diorumque aliorum nascuntur euerfores, dum singuli indignantur, clam se quædam fieri, & tacita iniri consilia.

Diffidentia hæc, Superioris si obsedit pectus, nulli quidquam credet, quod laudem mereatur. iam cum exequi ipse omnia non possit, alijs diffidat, fit ut angustissimis terminis fructus claudatur.

Decrescit deinde etiam animus inferioribus, nec se ad magna erigunt, aut conatum rebus admouent, cum Superiorem patiantur omnia etiam tutissima metuentem, nec se ad grandia extendentem, aut ad victura porrigentem manum.

Sed cum neque sua credant Superiori, fit ut tenuem Superior illorum cognitionem consequatur, iacetque in his omnis conscientie redditio: ac si qua necessitas eos cogat, superficiem tantum radunt, non descendunt ad pectus, aut ad mala cor rodentia: quo fit ut Superiorem necesse sit in graues errores incurrere, cum committat ignorance suorum non committenda, muniaque credat, quibus tuto credi non possunt, nec sine discrimine sæpè suorum, nominisque boni corporis vniuersi.

Graues deinde utrimque nascuntur animorum dissensiones, mutue suspiciones, criminationes; clancularia deinde con-

consilia mutuam gloriam, nominis apud domesticos externosque æstimationem, ad honoratiora promotionem, conatusque omnes, subdolis machinationibus euertendi.

Pessimum illud, quòd ferè è suspicionibus ad aliorum damnationem decurrant. nam cum sibi quisque diffidentiae testis sit, fraudumque è diffidentia natarum; sit ut eadem de alijs sentiant, suo reliquos pede metientes: è quibus deinde suspicionibus non tantum ad iudicia ferenda descendunt, sed ad cogitationes suas opere exequendas, omne studium in eo ponentes, ut structis socium insidijs præueniant; metuentes ne paribus aliorum dolis circumueniantur.

Aperit diffidentia hæc viam ad politici-
smum, cum tectis omnia dolis repleantur. socios simulato verborum lenocinio demulcent, candorem simulantes, quo facilius securiusque venena sua spargant. adulationibus plena sunt omnia, dum amicitiam fiduciamque simulant, diffidentia pleni.

Nasci hoc malum consuevit

Primò, ex ingenti fastu. quo qui laborat nullum sibi prudentia, rerum experientia, ingenio, eruditione, probitate parem ar-
bi-

bitratur:damnatque in his reliquos, etiam Superiorem. quare cum prudentiæ illius virtuti que diffidat, fit ut se suaque illi non credat.

Secundò, ex nudis suspicionibus. cum de mutua in se voluntate affectuque diffidunt, de mutua secreti fide, candore, probitate. idque è causis è sola suspitione desumptis.

Tertiò, è pusillanimitate quadam animi. cum non alijs tantum, sed sibi, virtuti, robori, ingenio, eruditioni, eloquentiæ, memoriæ, promptitudini, dexteritati, probitati, constantiæ diffidunt.

Quartò, è recondito & inlatenti malo. cum noxia quadam verecundia ægritudinem suam Superiori inferior detegere vetetur; aut sanè tacito quodam improbo metu, quo impedimentum timet à Superiore iniiciendum, si detecta consilia fuerint.

Quintò, è diffidentia quadam diuina. *Luc. 10.* qui si Domini verbis, *Qui vos audit, me audit; & qui vos spernit, me spernit*, fidem adhiberent, perfacile se suaque Superiori crederent. unde fit, ut ferè tales Deus relinquat in manu consilij sui, destituatque cælesti sua gratia, ac ductrice manu sua in via spiritali, in qua errasse æternum est.

Quòd si labi tales contigerit, nec consulen-

fulentem, nec eleuantē, nec propugnante[m], adeoque nec miserantem reperient. sequiturque ex his initiis perpetua quædam inquietudo mentis. nulla enim ibi pax, malacia nulla, sed æternæ infelices tempestates ac iactationes sunt, æternusq; naufragij metus. Miserrima omnino conditio, quibus nulli, & qui nullis amici. quales omnes illi sunt, qui hoc diffidentia[m] malo tenentur.

Contingit verò non rarò tales dum domestica diffidentia laborant, ad externa consilia decurrere, etiam ad muliebria: cum ita ferè natura comparatum sit, vt in alicuius sinum nostra diffundamus. diffidimus domesticis, imus ad externos. quæ res quanta secum trahat mala, nemo non videat. quòd si quem fors inter domesticos idem detineat morbus, mutua venena bibuntur, mutuo toxico perituri, quo citiùs pereant. nec res hæc tunc in paucis stare solet, plures occupat. donec totam familiam lata diffidentia occupauerit.

Remedia.

SI Superior vniuersim hac diffidentia in omnes laboret, nec aut aliorum exemplis, aut rationibus erigere se potest; consultius

sultius est talem aliis occupari, nec gubernationi admouere: sin in vno alteroûe consistit hoc malum, nec deponere potest, à personarum mutationibus remedia poscenda sunt.

Si laborat hac diffidentia inferior ex innato quodam naturæ metu, ab omnibus omnino Superioribus animandus erit aliorum exemplis, quibus ea fiducia felicissimè cessit, & cedit in dies. in qua re plurimum potest Superiorum exterior benignitas, fiduciæ re ipsa ostentatio, familiaritas, affectus verbis etiam adiutus, animatio rebus prosperè gestis, ad maiora etiam prouocatio & incitatio, additusque animus laude.

Si non vltra vnum alterumûe Superiorem diffidentia hæc protenditur, postquã varia frustra remedia tentata sunt, ad locorum mutationem decurrendum erit: plurimum tamen in hac re potest discreta Superioris charitas, fiduciæ ostentatio, blanda compellatio, animusque liberalis, & heroico similis: colloquia etiam interdum prolixiora, associatio in rebus arduis, in consilium etiam nonnunquam magnarum rerum euocatio, si personæ qualitas patitur.

Proderit hîc diuinæ in se fiduciæ prouo-

uocatio : qui non patietur fidentem in se
 in fraudem impelli . nunquam proinde
 res humana metiatur prudentia, metiatur
 diuina . falli hęc non potest, fallere non
 vult. stabit sponsonibus suis Deus : *Super Psal. 90*
aspidem & basiliscum ambulabis : & conculcabis
leonē & draconem. mentiri non potest Deus.
 addit : *Quoniam in me sperauit, liberabo eum :*
protegam eum, quoniam cognouit nomē meum.
clamabit ad me, & ego exaudiam eum : cum ipso
sum in tribulatione : eripiam eum, & glorificabo
eum : longitudine dierum replebo eum : & osten-
dam illi salutare meum. & antè : *Cadent à latere*
tuo mille, & decem millia à dextris tuis : ad te
autem non appropinquabit. Quæ sperari pos-
 sunt certiora, quę maiora? audeat sperare
 homo, non patietur se vinci Deus, & ma-
 iora votis dabit, docemur hoc omnium æ-
 tatum exemplis. erigat proinde se in spem
 magnam, & audeat sponfore Deo in Su-
 perioris sinum se suaque profundere, po-
 sita noxia verecundia. vulnera retegat. re-
 texisse sæpe curasse fuit. vt non tam se-
 quatur, quàm comitetur refectionem cu-
 ratio. Et sanè magnæ hic candor conso-
 lationis mater est, tranquillitatis ac secu-
 ritatis magnæ. facile hoc erit humili, &
 submissè de se sentienti. gaudet hic depri-
 mi, & beneficium arbitratur posse latere.
 scit

scit ille à solius Dei iudicio veram magnitudinem tenuitatemque pendere . incerta humana sunt, & innumeris ferè erroribus permixta. ille errare non potest, decipi non potest. quare illi soli innititur, certus de euentu : securus de præmio.

CAPVT XLIV.

Dissensiones.

Certissima Religionis, licet optimè constituta, pernicies. nam cum mutuo illam amore, tanquam vinculo colligari, tanquam glutino coniungi, tanquam propugnaculo roborari, nemo ignorare possit; sit vt qui illa dissoluit, quidquid in Religione firmum, solidum stabileq; erat, euertat: vt nihil iam expectare debeamus, quàm vniuersæ ruinam. ita vno hoc malo mala omnia continentur.

Amore enim minima crescere, maxima dissensionibus decrescere norunt omnes: illo stare etiam per se imbellia, ac aduersantium rabiem excutere vt pilas; hac validissima; etiam quæ sæculis steterant, momento propè corruere videmus. nulla sanè tam mollis manus, quæ non ad miraculum & prodigium, amore si constringatur, per-
stet

stet inuicta, minis, furoribus, tempestatibus superior. Si ceciderit, hostium mole, veriùs quàm robore oppressa, non cadit inulta, non ingloria, hostili sanguini inse-pulta; minitanti etiam post mortem aduersa ostentat vulnera, inimico cruore tincta, ipsoque adeò emortuo vultu nusquam animos defuisse ostendit.

Nulla contrà tam firma manus, tam roboris plena, armata licet sæculorum ferro, propugnaculis cinctà, ingenio adiuta, exercitatione roborata, quæ non mutuis dissensionibus diuisa collidatur, & ruat nullius alterius impulsu. etiam rupes & saxa si disiungas, solis imbribus colliquefcunt; tam molli elemento tam firma validaque: adde calcem, molle vinculum, sed vinculum tamen; nec fluctibus, nec irato mari cedunt: infrendeat licet, sæuasque barbarasque intentet minas; rident effera hanc rabiem, omnibusque superiora, augustum extollunt verticem cedere nescia. tantum prodest colligari. intueri paleam; quid fragilius? conuolue in fasciculum, nulla Herculeæ dextera cōminuat. serico quid tenerius? conuolue in funem nauticum, quæ Samsoneæ manus confringat? vt iam facilius videatur columnarum elisio, ærearum portarum euulsio, tot homi-

num asini mandibula cædes, totque Herculei labores, quàm tenerrimarum, si singula spectes, rerum comminutio. vsque ad eò constringi mutuoque innodari iuuat.

Sanè vt nihil in Religione nobilius amore est, nihil quod in omnium animis oculisque maiorem admirationem excitet; nihil quod illam validiùs firmet, nihil quod hostibus magis formidandam, & inuictam reddat, nihil quod ad æmulorum etiam stuporem & confessionem magis exornet ac illustret: ita nulla illi perniciosior pestis obuenire potest, quàm quæ tanquam vna falce demetit hæc magna, vna diuulsione nudat hoc ornatu & robore. euenire hoc mutuis animorum dissensionibus, etiam pueris decantatum. vt nil miremur in claustris Sapientem: *Septimum detestatur anima mea, qui seminat inter fratres discordias.*

Surgunt denique ex hoc malo mutux æmulationes, inuidentiæ, liuores, oblocutiones, risus, depressiones, contemptus, detractiones: nec quidquã sperari laude aut gloria dignum potest, cùm plus solis his dissensionibus decedat depereatque, quã singulorum labor & industria spondere audeat: plusque dissentientes hæc linguæ deuenuissent, quàm singulorum conatus collustrare possint. neque Religio iam vlla est,

est, quæ solo amoris quodam nexu stare solet; hunc qui sustulit, illam de medio tulit: neque enim diu stare potest, quod nullo vinculo colligatur, quodque omni parte dissectum iacet, quod armis exutum, nudum ostentat latus inimico ferro, quod viduatum clypeo & protectrice dextera iugulum præbet hosti, nouacula secandū.

Habemus hæc cōfirmata à Domino: *Omne regnum diuisum contra se, desolabitur, & omnis ciuitas, vel domus diuisa contra se non stabit.* Mat. 12

Contingunt hæc Religioni, mutuo amore spoliata, quo vno inuicta stabat hostibus terror, minis omnibus altior, cedere nescia, ignara commoueri, nulli ceruicem iugo, præterquam Christi edocta flectere, nulli potentia decrescere, inferiorum etiam potestatibus timenda; cum per ferrū & sanguinem, perque mille pœnarum genera, ludus illi esset, ire ad Christum suum: rosæ & violæ, ignis & flammæ, per quas purior iam animus euolabat in amati sui sinum. at vbi nudata amore, & per hunc spoliata armis, propugnaculis exuta, propugnantibus destituta, inarmatū præbuit corpus; facta est ludibrium hostibus, puerisque materia risus, feminisque adeo ingens diuesque fabularum narrationumque series. stabat amor mutuus, mutuo sociatus

nodo? stabat Religio orbi miraculum; per-
iit amor? iacet illa quocunq; plebeio pro-
terenda pede. stat amor? quot hostes, tot
admiratores; quot æmulos, tot imitatores;
quot amicos, tot laudatores habet: eua-
nuit amor? tanquam leui spongia rustica
manu delentur hæc magna. stat amor?
mutuus fuit sudor, mutuo labore prouo-
catus: elanguit amor? concrescit sudor
mutua ignauia constrictus. & quæ fluebant
flumina, vicinaque rigabant pascua, densa
concreta glacie iacent. euenitque quod
in ampla hereditate, cum dissentientibus
animis, decurritur ad forenses rixas, certa
perdēde hereditatis breuia: vt, sicut ascititij
sanguisugæ quidquid erat in lætissima for-
tuna sanguinis boni, pestifero sucu hau-
riunt; ita alieni comedant robur nostrum,
animi nimirum opes, mutua antè amicitia
felici euentu partas, mutuis nunc dissen-
sionibus tanquam leuissimam paleam dis-
sipandas; vt qui fuimus terrori, ludibrium
nascamur hostibus, & victoriæ illorū am-
pla materies, horreisque illorum fœcunda
nimiū messis. Nulla iam propè cura salu-
tis proximorum, dum sibi student singuli,
laborant sibi, commodisque vacante suis,
insidiantur alienis, mutuosque evertunt
conatus, facti mutuo domestici hostes: à
qui-

quibus ne oculatissimus quidem, & in omnem partem annorum experientia præprouidus se tueatur.

Ab externo non magno se fors negotio quis defendat, ab eiusdem contubernij, propè impossibile est: maximè si foris inimica oppugnet acies, qualis ab inferorum rabie, à sæculi illecebris nunquam deest. semper hostilia stant foris agmina: domesticæ si accesserint insidiæ, mutuis animorum dissensionibus excitatæ; nulla iam spes super. & concidit etiam valentissimi animus, ubi præter externum ferrum, domestica patitur tela: cùm exsiccati sudores suos sentit inuidentiæ panno, ne fecundo fluxu suo proxima rigent prata rore suo destituta; cùm non infortunatè sparsa locuplete manu sua semina in plurimarum salutem animarum, exuri videt æmulationis flamma; cùm in seriorum laborū procursu ad viuum proscindendo, subdolas suorum perfert machinationes: quibus tanquam domestica falce, latissimi culmi, diuite spica vestiti, in viridi etiam tum spe luxuriantes præscinduntur.

Et quis animus sit ad magna, aut cui tantum robur, qui, dum socios patitur hostes, in externum feratur hostem, & ad generosos ausus protendat dexteram? cùm non

tantum domestico destitutum se sentit auxilio: sed pati hostes, quos habere debebat propugnatores, & pro auxiliariis copiis procurstantes inimicas acies sustinere. dura hæc res, & quæ mortales superet vires. Quare ut primum se prodit interna hæc animorum colluctatio, tanquam dissectis quaqua nervis, languescit omne robur, & generosior cuiusque mens tanquam fulmine icta concinere scit, abitque in vagum pulverem ventorum lufum.

Iam ut primum ad externos animorum hæc dissensiones promanauerint, quid sperari potest, quid timeri non debet? nam ut silentio diu premantur, nec erumpant aliquando foras, optari potest, sperari non potest. neque enim diu contineri hæc flammæ possunt, quin depulso cinere prorumpant in apertum: hic verbis, ibi signis & factis, alibi contrariis studiis; quanquam subdola primum circuitione, inde plano quodam odio produntur: quæ res omnem omnino spem sementis bonæ funditus evertit; cum etiam eant in partes externi, singuli que suos tueantur, facti suorum patroni: magis etiam quando delabimur ad protectrices, & agmina iam mulierum pro suis pugnant, insurguntque pro innata sibi impotentia in æmulos patronorum ductorumque

rumque suorum. unde ingentia prorumpunt scandala, nullo torrente, ac ne lacrymarum fluminibus, aut quacunque posthuma poenitudine diluenda.

Exulat deinde omnis pietas, cum & Christus exulet ab illa domo, à qua mutua exulat caritas: neque enim aut ille dissentientium pater esse potest, aut hi eius filij.

Beati nimirum pacifici, quoniam illius filij vocabuntur. Matt. 5. non sunt ergo filij animis dissentientes. at ubi nulli filij, nec pater est.

Infelix conditio, ac miseranda familiae constitutio; quæ cum ignoret Deum patrem, nec hereditatem sperare potest, solis filiis promissam, solis largiendam.

sed neque discipuli Domini sunt. cum ipse dicat: *In hoc cognoscent omnes quod discipuli mei estis, si dilectionem habueritis ad inuicem.* Ioan. 13.

neque Deum diligunt, cum audeat discipulus quem diligebat Dominus: *Si quis dixerit, Quoniam diligo Deum, & fratrem suum odit, mendax est.* 1. Ioan. 4.

neque enim est dissensionis Deus, sed pacis. & 1. Cor. 14. *Mandatum habemus à Deo, ut qui diligit Deum, diligat & fratrem suum.* 1. Ioan. 4. additque illud testatissimū amoris diuini signum: *Si diligimus inuicem, Deus in nobis manet, & caritas eius in nobis perfecta est.*

Vt enim mutux animorū dissensiones densam inter Deum & nos iniiciunt nubem, imò & noctem, quæ lu-

cis illius prospectum omnem adimit: ita mutuus amor pulsas tenebris, discussa que dissensionum nebula, prospectandum nobis Deum tradit: eo certius, quo potentiore mutuo ardemus igne, mutua que castiore ardemus flamma, diuinorum radiis excitata.

In Past.
par. 3.
c. 24.

Fortiter Gregorius in dissensionum auctores insurgit: *Audiant iurgiorum disseminatores, Beati pacifici quoniam filij Dei vocabuntur. atque è diuerso colligant, quia si filij Dei vocantur, qui pacem faciunt; proculdubio Satanae sunt filij, qui pacem confundunt: quia nihil pretiosius est Deo virtute dilectionis, nihil est desiderabilius diabolo extinctione caritatis. Quisquis ergo seminando iurgia dilectionem proximorum perimit, hosti Dei familiaris seruit. & alibi: Quod si Zelum amarum habetis inter vos, & contentiones sunt in corde vestro: nolite gloriari, & mendaces esse aduersum veritatem. non est ista sapientia descendens de sursum, sed terrena, animalis, diabolica: quæ autem de sursum est sapientia, primum pudica est, deinde pacifica: pudica videlicet, quia castè intelligit; pacifica autem, quia per elationem se minimè à proximorum societate disiungit.*

Ibid.
c. 23.

Remedia.

VAlidè secare, quicquid huic animo-
rum coniunctioni contrarium est :
nulli & nusquam parcere. sola pietas hîc
est sauire ferro & ignibus. initiis tamen
maximè insistendum, seriò in omnem par-
tem inuigilando, secando graui admoni-
tione; minis ac pœnitentiis etiam terrendi
auctores: spiritualibus exercitiis domandi,
privatis publicisque pœnis, interdictione
etiam consuetudinum ac familiaritatum
aliorum, fortibus per hebdomadâ exhor-
tationibus, vt totis viribus insurgatur in
hoc malum. nec quidquam in hoc genere
tam leue, quod non graue habeatur.

Iuuabit in primis seria sollicitudo Præ-
fecti spiritus, qui acrioribus monitis, re-
mediisq̃ue etiam seuerioribus sauiat in
auctores: nunc terrendo, nunc blandè et-
iam monendo, nihil eorum omittat, quæ
ad excindendam hanc pestem valeant.

Quòd si pergat tamen, serpatq̃ue hoc
malum, ad remedium vltimum, dimissio-
nem veniendum erit. neque vlli in hoc ge-
nere parcendum. Magno sanè beneficio
Religionem affecerit, quicumque à reliquo
corpore dissensionum auctores secuerit.

ſcquit, qui parcit; beneficium, qui ſecat, præſtat, bis clemens.

Qui verò in ſe has animorum alienationes ſentit, pericula ſecum conſideret, damna, infelicesſque auctorum talium exitus, quare ſi quid offenſæ intercurrerit, nunquam noctem nocti ſuperinducat, memor

Ephes. 4 Apoſtoli: *Sol non occidat ſuper iracundiam veſtram.* Expreſſit hoc verſu Orientius:

Pelle odium, contemne minas, depone rigorem,

Offenſam teneant tempora nulla tuam :

Vt te ſol blanda ſervantem vincula pacis

Deſerat abſcedens, inueniat rediens.

Matt. 5. & *Si offers munus tuum ad altare: & ibi recordatus fueris, quòd frater tuus habet aliquid aduerſum te: relinque ibi munus tuum ante altare, & vade priùs reconciliari fratri tuo, & tunc veniens offeres munus tuum.* Complexus id vno verſu Prudentius:

Nil placitum ſine pace Deo, non munus ad aram.

Beneuolentię proinde ſtudiis præueniat omnes: familiariusſque cum iis agat quos alieniores expertus fuerit. digniores illis partes cōcedat, bene de abſentibus loquatur, ac laudet etiam: peculiareſq; pro iis ad Deum preces fundat; pœnitētia etiā quoties deliquerit, vltro ſibi aliqua irrogata.

Neque interim cogitandum eſt, omnes ſemper, quocunque etiam ſtudio conatuque

tuque adhibito, futuros iudicij nostri. imò stolidum est, omnium iudicia ad nostrum transferre velle: stolidissimumque dissentire voluntate, quia iudicio dissentimus. neque enim sperandum est, posse omnes in humanis ad eandem iudicij normā traduci. fatuusque illorum error est, qui cum aliquem viderint iudicio, & voluntate differre arbitrentur; cum amicissimi mutuis frequenter iudiciis, in maxima voluntatis coniunctione, dissideant.

Iuuat it verò plurimum potentem in se diuinum amorem excitare. quo tanquam ingenti supposito igne, ardentes in proximos amoris flammæ exurgant: omnesque dissensionum nubes, valido diuinorum vento pellantur.

CAPVT XLV.

Detractiones.

Nascitur hoc malū ex inuidia & odio, dum felicioribus aliorum successibus inuidemus, nec assequi possumus; atque hinc odia, & animorum alienationes.

Ex æmulatione: dum pares esse volumus, aut etiam superiores. hinc mille cogitantur modi, paria aut etiam maiora consequendi; ac si probi probatiq̃ue haberi

berinon possunt, à minùs probatis, impro-
bisque subsidia petuntur; & quod virtus
non potuit, vitium reperit. scelera nimirū
fertilia sunt, & fœcundam hisce cogita-
tionibus viam sternunt; ac quod non po-
tuit pietas, improbi moresinuenerunt &
dederunt, vt, si aditus omnes clausi sint
probitati, tota improbitati pateant ostia:
donec tandē decurratur ad illud notum,
Sociorum detractio. vt his demum gradi-
bus semitam insternant sibi ad commodi-
tates & nomen magnum.

Ex habitu malo prauoque, cūm maledi-
cendi consuetudine altè hoc malum im-
bibimus: tunc enim etiam non cogitanti-
bus elabitur nociturum telum, eliciturum
sanguinem. grande malum, cūm quasi per
iocum in consanguineo ludimus iugulo,
& ridentes barbara ferocitate in propin-
quo pectore sequimus. Efferū, & infra bel-
luas id semper fuit, mutuo inter mensas
ferculaque madere sanguine, & vulneri-
bus coronata circumducere pocula, ma-
gis etiam sanguine potari. At ego nescio
an immanius crudeliusque sit, inter ludi-
cras narrationes cachinnis sæpe & salibus
conditas, sociorum famam spargere, quæ
vitâ ipsâ honoratissimo cuique carior esse
debeat. illa semel ponitur, semel morte vna
fini-

finitur: fama cui semel calcatur, mille mor-
tibus cadit, & ad singulos auditores noua
cæde funestatur.

Ex iudicij solertiæque obtentu, dum
ex dictorum factorumque alienorum so-
lerti indagatione, iudicij famam venamur.
hinc dicta sæpe factaque, quæ nec dicta,
nec facta, nec cogitata vnquam; dubia
pro certis, falsa pro veris, coniectanea pro
compertis narrantur, singuli que tales sunt,
quales sibi prona fingit solertia: quæ dum
vera non inuenit, falsa comminiscitur,
contenta læsisse. certa incerta que pro eo-
dem habentur, si cecidit, qui patitur, qua-
cunque ex causa, parva victoria est; & tri-
umphus materies est, socium præuenisse;
eo ferè maior, quo innocentior cecidit:
nam nocentē prostrauisse, non magnum,
& vix in tali inuidiæ locus est. magnum
sit oportet & illustre, quod in æmulatio-
nem prouocet; è qua postmodum tanquam
è fecunda matrice ingens detractionum
soboles nascitur, nulli magno parcitura.

Ex zeli, & communis boni aut priuati
alicuius prætextu, iustitiæque, ac maioris
etiam gloriæ Dei, sub boni nimirum spe-
cie, in fratrum sæuimus iugulo: nec crimē
arbitramur, cui præfigitur nomen hone-
sti, reuera proprii honoris & gloriæ aut
com-

modi causa. tantum potest amor proprius; scelera in virtutem vertit, & illius stola crimina vestit, palla tegit, sanguinemque fudisse, pepercisse est: nam cum crudele habeatur in socium saevire, prætexitur immanitati virtus; ita tyrannidi iustitiæ præfigitur nomen, & persecutor gladius invenit in Christiano sanguine quod damna- ret, contemptum legum & deorum. Neque vnquam crudelissimo cuique ferocitati suæ causa defuit, nullusque in sanguinem propter ipsum iuit: nemo in famæ alterius detractionem propter ipsam; semper aliquid quod improbitati suæ obtendat, invidentia proprii amoris soboles invenit.

Mala, quæ hinc nascuntur, ingentia in omni Religione sunt.

Primò, pacem turbant propriam: neque enim potest in vera pace esse, qui internam circumfert barbarum & inquietudinum causam.

Secundò, alienam etiam pacem conuellunt, cum causam præbeant aliis barbarum internarum, suspicionum, alienationum, ac in varia consilia & studia impellant: nam ubi se quis sociorum insidiis peti videt, exuit socialem animum, induit inimicum; & prætexitur hostilitati virtutis

nomen, propugnatio nominis sui, è qua in alienam decurritur oppugnationem, tanquam propriæ tuitioni necessariam. Ex his initiis quantæ exurgant commotiones, nemo non videt.

Tertiò, charitatem, mutuamque animorum coniunctionē scindunt: quæ consistit in benè de se mutuo consentientium concordia, vt idem sapiamus, idem sentiamus omnes.

Quartò, vniuersum Religionis robur eneruant, quod in mutua animorū coniunctione consistit.

Quintò, minuitur deinde Dei & Religionis gloria: cū enim proximis detrahatur, redduntur minùs idonei Dei gloriæ aut Religionis propagandæ. nam quis se suæque illi credat, cui quidquid erat æstimationis bonæ (qua ferè sola mortaliū plerique trahuntur in sequelam) vocatur in discrimen, omnisq; profeminandæ virtutis (quæ fama plurimùm continetur) spes linguarum istarum nouaculâ præscinditur?

Sextò, vulnerum etiam multitudine mali grauitas dignoscitur. quoties enim ad novos semel iaculata detractio mittitur, toties pro delicti grauitate, aut vulnus retulit, aut cecidit proximus. ita omnium

Eccli. 18

auribus aut cadit, aut vulnus accipit, cui detrahitur. Fortiter & verè in hac re Sapiens: *Flagelli plaga liuorem facit, plaga autem lingua comminuet ossa. multi ceciderunt in ore gladij, sed non sic quasi qui interierunt per linguam suam. Beatus qui tectus est à lingua nequam, qui in iracundiam illius non transiuit, & qui non attraxit iugum illius, & in vinculis eius non est ligatus. iugum enim illius iugum ferreum est, & vinculum illius vinculum areum est. mors illius mors nequissima, & utilis potius infernus quàm illa.*

Septimò, ex restitutionis dein difficultate delicti huius magnitudo crescit. semel enim opinio vagata, serpit ad plurimos, obambulat prouincias, ac non rarò Religio-nem vniuersam, vt notissimus iam sit omnibus, cuius nec plerique capillum norunt. Laudas quem antè vituperasti? nihil agis: primà enim validiùs inhærent, & iam abierunt ad plures; maximè cùm nocitura fœcūdiùs serpent, profutura seriùs proueniant. Quòd si cōtingat hunc deligi in Superiorem, quanta gubernationē illius turbant præiudicia? quàm diffidentes reperit subditorū animos, ac tuta etià omnia metuentes? quid? quòd non rarò infamia hæc eat ad externos, cū pari inter eos facilitate, qua inter domesticos parietes, euulgētur.

Octa-

Octauò, auget magnitudinem mali, quòd in absentes & ignotos sæuiant hæ linguæ; nec tuitioni locus, cùm qui patitur non rarò vulnera sua ignoret: aut si sciat, nesciat auctorem. ita incauti & ignari obruuntur.

Nonò, crescit criminis huius grauitas, cùm non in vno, aut paucis capitibus consistat, sed ad vniuersum transeat corpus: hinc vnus infamiâ tanquam flammâ, vniuersum corpus amburitur. ita crudeles in omnes sunt, quicunque in vnum sæuiunt. nam cùm ea sit in Religione coniunctio, vt vnâ veriùs animam in pluribus corporibus, quàm plures dixeris; fit vt vulnera in omnes eant, ac per vnus latus contrucidentur omnes.

Augetur improbitas, cùm sub commiserationis cuiusdam velamento nocitura venena sparguntur. vnde illud Bernardi: *Detractores autem quodam simulata verecundia fuco, conceptam malitiam, quam retinere non possant, adumbrare conantur. videas à detractore alta præmitti suspiria, sicq; cum quadam grauitate & tarditate, voce mæsta, dimissis superciliis, & voce plangenti egredi maledictionem, & quidem tanto persuasibiliorem, quanto creditur ab his qui audiunt corde non inuido, sed magis condolenti affectu quàm malitiosè*

Serm.

24. in

Cant.

proferri. Doleo, inquit, vehementer pro eo quòd diligo eum satis, & nunquam potui de hac re corrigere eum. & aliàs mihi quidem bene compertum fuerat de eo istud: sed per me nunquam innotuisset. at quoniam per alterum patefacta res est, negare non potui, reuera ita est.

Remedia.

A Frequenti examine conscientiaè petenda.

A seriis, ante omnem congressum & confabulationem, propositis, tanquam in præcautionem animo conceptis.

A certis statisque post omnem linguæ lapsum vltroneis pœnitentiis.

A Superiorum vigili cura, grauibus etiam in delinquentes irrogatis pœnitentiis. Neque diffiteri possumus, ignauâ Superiorum conniuentiâ ea incrementa hoc malum sumere, vt tandem à desperatione remedia sumenda sint, duriora nimirum & acriora, etiam resectione à reliquo corpore, ne vniuersum contagione hac periclitetur. Ita delatores falsos flagellis ac fustibus cædi, & in exilium pelli Vespasianus imperauit; viuos etiam exuri Augustus mandauit; neruis cædi Mauritius Imperator; capitali pœna affici M. Antoninus Pius mandauit. Et sanè nunquam in hoc deli-

delicto parcendum. omnis hinc pietas à sæuitia nomen sumit. ille pius, qui vt vniuersim prospiceret, sæuijt in vnum, aut paucos huic vitio obnoxios, in exemplum aliorum, in medelam omnium.

Iuuabit etiam ex mente Sapientis obnoxios huic vitio fugere, congressum vitare. *Cum detractoribus non commiscearis, quoniam repente consurget perditio eorum.* Prov. 24. etiam tales cum regio Propheta persequi. *Detrahentem secretò proximo suo hunc persequebar.* Psalm. 100. vultuque displicentiam ostendere: Prov. 25. vt enim *ventus aquilo dissipat pluuiam,* ita *facies tristis linguam detrahentem.* & vniuersim dicere cū non vno hinc possumus, Tolle auditores, non erunt detractores. vt pari vtrosque sententia feriat D. Bernardus: *Detractor & lubens auditor vterque diabolum* Inferm. *portat in lingua. si pauper es, vilem & abiectum reputat; si diues, ambitiosum, auarum, cupidum; si affabilis, dissolutum; si predicator vel doctor, honoris & humani fauoris quesitorem; si tacens, inutilem; si ieiunans, hypocritam; si comedens, voratorem.*

Cū verò detractiones frequenter nascantur, ex aduentantiū hospitem liberiore sermocinatione, curiosiore indagatione, mutuaq; in aliorū vitia moresq; scrutatione; omni conatu insudandū erit Superi-

ori, vt non patiatur tales impunitos abire. nec in hospitibus ipsis à seria maturaq; monitione absteineat. In domiciliorum etiam mutationibus, cauendum sedulò ne quacunq; è caussa in aliorum mores curiosius inquiramus; ne & narrantibus detractionum causam præbeamus, & nos ipsi varijs postmodum circa tales suspitionibus ac diffidentiis iactemur.

Cauendum etiam, ne quas quisque patitur difficultates, etiam consilij & auxilij prætextu, in aliorum promiscuè sinu profundat, cum ferè graues his rebus detractiones misceantur. quare siquæ nos necessitas premat, Superior consulendus erit, aut domesticus Confessarius, aut si quis vir grauis prudensq; in ea familia sit, de cuius integritate, fide, secretiq; custodia nulla ratio dubitandi sit. in qua tamen ab omni detractionum genere abstinendum erit, maximè si Superior inuoluetur.

CAPVT XLVI.

Delationes è suspicionibus natae.

SIne illæ verbo, siue scriptis litteris fiant, Snoxiæ in primis sunt. ac nescio an res vlla perniciosior, dum è suo iudicio singu-

li metiuntur alios , & consequentias è mente sua nectunt è quibusdã aut visis, aut auditis, quas pro testatis verisq̃ue venditant. immanis, planeq̃ue effera in Religione consuetudo. audita plerumque ab alijs, nulla penitioris cognitionis examinatione præmissa, nulla narrantis ac deferentis fide, & credimus ipsi, & spargimus. nec auditis contenti, aliud ex alio inferimus: & quæ intulimus, tanquam dicta factaq̃ue referimus. quæ si propiùs certiusq̃ue disquisiverimus, nec dicta, nec facta, ac ne cogitata quidem reperiemus. & faciles pleriq̃ue ad has res sunt, pariq̃ue quæ credulitate sunt, facilitate ad scribendum sunt. indigna planè res religioso calamo, & quæ plus habet barbaræ feritatis, & gentilitiæ ac politicæ improbitatis, quàm religiois simplicitatis, aut zeli.

Neque ego video , quam in religiosa mente hæc res excusationem admittat. nimirum, Putabam, & verebar, ne Religio in hoc viro, dicto, facto, detrimentum pateretur. volui occurrere damnis venientibus. Excusationes ab odio, & impijs æmulationibus, vel ab insigni stolidaq̃ue impudentia natæ. Sanè in rebus potissimùm grauib, & quæ famam nominisq̃ue estimationem tangunt, non nisi certa testa-

taque dicenda esse, Christiana caritas monet. nam quis vel Sanctorum innoxius habebitur, si è suspicionibus ad delationes procurrendum erit? & quisnam delatorum horum est, qui sibi hoc euenire gaudeat? imò quis non ad similes delationes è suspicionibus natus perhorrescat? quis nò inclamet, dignissimos hosce narratores scriptoresque omni pœna esse? & quam veniã merebimur, qui quod in alijs damnamus, concedendum nobis arbitramur? & qua conscientia audet Religiosus non antè certissima & compertissima sibi, vulgare? aut socij sui, ac non rarò Superioris famam nomenque in dubium vocare? imitantur hi religiosam vocem, hyænæ sunt, & omni adeò Bonaso venenosiores, qui fecundissimos sociorum agros, & horreo Dominico natos, fœda oris calami que egerie sua, in steriles vertunt arenas, cineremque vento dispellendum.

Et hi non rarò sub sanctimonix quadam specie, bonique communis, in falsissimas delabuntur narrationes & suspensiones. & impingunt alijs crimina, errores, mores, quos nulla sæpe ætas, nulla postera virtus eluet. eoque magis nocent, quo speciem aliquam sanctimonix, ac religiosæ modestiæ præferunt. Hæc enim ea sunt, quæ fi-
dem

dem verbis scriptisque faciunt. pulchra nimirum velamina, quibus nocentissima teguntur venena, nunquam virus positura. diræ Religionis pestes: quibus maximè quique viri, omni ætate, etiam in probatissimis Religionibus perierunt: cùm fidem apud alios narrationibus scriptionibusque suis à suspicione promanantibus peperissent, maximè si apud Superiores:

Et sanè nullis hæ accusationes è tam dubijs incertisque initijs prognatæ, elui lacrymis aut pœnitentijs possunt. faciliorque in omni propè scelere venia, quàm in his delationibus esse debeât. fragilitate namque quadam humana reliqua propè perpetrantur; scriptiones narrationesque hæ, non nisi aut ex aperto, aut è tecto profiliunt odio, æmulaque virtutis aut dignitatis alterius improbitate: nostra omnia probatissima vellemus; aliorum, nisi è mente sint nostra, damnamus. si quid factum inconsultis nobis, improbum est, aut sanè minùs probum, probissimum licet re ipsa fuerit: si quid nobis auctoribus, stolidissimum quamuis, ac minùs probum, prudentissimum ac probissimum continuò erit. Ut ad probitatem sapientiamque satis sit, venire è mente nostra; ad fatuitatem & improbitatem, venire è mente aliena.

Quæ reseogruior est, quòd incertis
ferè auctoribus, ignoratis saltem, vulnera
hæc dentur: nec tueri se quisquam possit.
nam si auctor innotesceret, sæpe, imò plu-
rimùm, ad calumniam detegendam, solius
auctoris cognitio satis foret. qui priuato
non rarò emolumento, aut è re quapiam
subtracta, aut negata, è serijs aliorum mo-
nitionibus, è suspicionibus neglectæ aut
præteritæ dignitatis, è priuatorum com-
modorum frustrationibus ducuntur, in-
deque ad narrationes, & scriptiones prosi-
liunt. Non vocasti in consilium, non secu-
tus sententiam es, alium prætulisti, inopi-
nanti illi hæc, aut præter spem euenerunt,
alia omnia sibi sponderat, pollicebatur
magna, excidit speratis. hinc illæ animo-
rum tempestates & fluctus, quæ in illarum
rerû auctorem tota deuomunt naufragia.

Infelix maximè Superiorum conditio.
Concedis quidquid hoc hominum genus
postulat? grauis plerumque sequitur offen-
sio multorum, & in omnem prudentiam
peccasti. & nullo propè beneficio hos vin-
ces, nisi omnia concesseris. omnia conce-
dere nec tutum, nec Religio permittit. ne-
gas? fulmina tibi, & iaculatæ calamo rupes
metuendæ sunt.

Infortunata etiam inferiorum ratio, si
quan-

quando in Superiorem facilem ad suspensiones, aut ad delationes è suspicionibus natas, inciderint: qui nec narratores, nec scriptores hosce comprimit; nec antequàm ad fidem & monita profiliat, accuratiùs rem disquirat; aut facilis ipse ad suspensiones, inferiorum dicta & facta in deteriorem semper partem interpretatur. è qua re præter perpetuam mentis anxietatem, ingens diffidentia nascitur. è quo illud etiam provenit, ut cum fidem apud Superiorem inferior non inueniat, animos ad magna properantes deponat, laborem fugiat, ignaumque otium sectetur, alienaque à Superiore mente, etiam in obedientia tepescat, amore omni ac reuerentia pulsa. unde magna oblocutionum porrigitur materia, indignationum, æmulationum, contemptus, odiorumque tandem, ac immanium ubique detractionum, nulla habitatione conscientie aut Dei. insidias nimirum, fraudibus, credulitate nimia, opinionibus falsis, e mentitis commentis structas, paribus artibus propulsare conatur.

E qua re omnium succedit turbatio, miscentur infima summis, ac quasi in domestico ferro ac veneno, intuta infidaque sunt omnia; metu, terroribus ac sollicitudine plena. nulla quies animis, nulla fides

vlli, trepidatio ac doli omnium mentes occuparunt; & ille iam solertissimus, prudentissimus ac felicissimus habetur, qui quacunque demum arte socium prostrauit. veris an falsis, iuxta habetur. satis est vicisse, hostem strauisse. quod vbi euenit, non tam iam Religio, quàm gentilitia quædam Principis aula est: in qua ille primus maximusque, qui per calcatos plurimos deuenit ad summam, ipse fors non multò post calcandus. ea ferè in his dolis vicissitudo rerum est. non perennant hæ machinationes. & plerumque socij talium in mutam insurgunt perniciem. neque enim diu in malo stare societas solet; & quos coniunxit, disiungit improbitas, eadem vtriusque causa.

Est autem hoc vitium eo deterius quo latius patet. vt audeat Hieronymus:

*Epist. ad
Celsan-
tiam.*

Pauci admodum sunt, qui huic vitio renuntient: raroq; inuenies qui ita vitam suam irreprehensibilem exhibere velint, vt non libenter reprehendant alienam. tantæque huius mali libido mentes hominum inuasit, vt etiam qui procul ab alijs vitijs recesserunt, in istud tamen quasi in extremum diaboli laqueum incidant. Tu verò hoc malum ita effuge, vt non modò ipse non detrahas, sed nec alij quidem detrahenti aliquando credas.

Reme-

Remedia.

A Superiore maximè pendent: qui si difficilis ad fidem præstandam delationibus fuerit, non magna delatores hi damna dabunt; minora etiam, si seriò narratas res examinauerit, & vbi falsa deprehenderit, non patiat impunitos abire auctores. cuius rei si exempla aliqua illustria dederit, nemo faciliè è suspicionibus ad accusationes deuolabit: at vbi viderit, non tantùm impunitos, sed & præmio quasi decoratos delatores hos abire, facilesque illis aures animumque præberi, fidemque adhiberi, ac optimos quosque falsis his delationibus circumuentos iacere inglorios; ad ea mentem calamumque applicant, ad quæ serio, maturo, seueroque Superiore nunquam descendissent.

Quòd si Superior ipse malo hoc laboret, naturaque feratur in suspensiones nulla ratione firmatas, fidat nemini, ac ne familiarissimo quidem, ipsaque iam illi probitas suspecta sit, ametque ambiatque hos scriptores narratoresque; nihil reliquum est, quàm vt tales aliis quàm Superioris functionibus distineantur. quòd si in supremo capite residet hoc malum, ad preces ac
Dcum

Deum confugiendum erit, qui solus huic malo remedium adhibere potest.

Proderit in primis, si in omni delatione, tacitus apud se Superior cōsideret, eadem grauioraque è paribus initiis ac suspicionibus de se dici posse. se proinde si delati loco statuerit, cogitaueritque quid in simili causa concedi sibi vellet, non magno negotio remedium malo reperiet.

CAPVT XLVII.

Credulitas nimia in delationibus.

INgens, maximè in Superiore, malum, cùm facilis in delationes, credulus in narrata, descendit in executiones falsis sæpè delationibus innitentes. præproperum vitium, quo nō pauci magnorum circumuenti, exercitus, respublicas, regna & imperia in vñam secum ruinam traxerunt, omnibus ipsi, ac vita demum exuti. Cadūt hoc malo primi exercituum ductores, primi in toga, primi in muneribus, & à purpura primi: cùm faciles in criminationes Principes, antè perimunt, bonis fortunisque exuunt, exilio damnant, quàm ex verorem intellexerint; luuntque post præpropera consilia ex credulitate nata, fera &
non

non reuocanda, nec remedianda pœnitudo.

Eadem in omni hominum genere reperies. quod non in vno aliquando resedit Religioso, viro magno. grande malum, & Religioni in primis noxiū: hoc enim vno, primi non rarò virtute, ingenio, eruditione, rerumque agendarum dexteritate, in gloriam vitam ducunt, & à quibus sperari poterant maxima, iacent neglecti, & ignavos transigunt annos, quos rara felicitate, & Religionis bono decurrere poterant. & secuta non rarò mors in primis ingenijs, dum neglectum hunc è falsa denunciatione natum, credulitate fctum, superare non potuerunt, indignitate victi; maximè dum innocentia tegerentur, animusque sibi constaret recti bonique conscius: nec purgandi locum relictum viderent, Superioris animo delatione præoccupato & obseffo.

Comes deinde credulitati temeritas est, prorumpitque quicumque illa tenetur, in temerarios plurimùm ausus, ac nulli magis quàm ipsi pœnitendos; vt nihil aberrauerim si præcipitio non tantùm proximam, sed è præcipitio pendulam credulitatem dixerò, minimo motu in præceps agendam.

Malum supra quàm credi potest, vt omni

ni reipub. sic Religioni noxium. neque magni quidquā sperari iam potest, postquam animum credula hæc facilitas occupauerit. nam vt in omni propè contubernio non desunt, qui Superiorum venantur aures, ingerunt placentia; si propensos in delationes sentiant, proni iam ipsi ad hæc mala totis viribus ruunt in gratas Superioribus delationes, & materiam credulitati suggerunt fœcundi flammæ harum incētores, ab omni meritò Religione eliminandi. nam quæ tuta innocentia erit, cū delatoribus Superiorum credulitate vltro ostia aperiantur, prouocenturque illorum facilitate in malefidas plurimū narrationes? aut quis cuique animus ad magna, si & hæc patere calumniæ videbit? continebit se quisque deteriorum metu, nec vires in apertum diffundet, stringet potius, quas plurimorum bono laxare poterat, habenas; & inter ignauas cogitationes vitam transiget, multorum alioqui saluti impendendam.

Cū deinde credulus omnis facilis sit in suspensiones, maximè sinistras, & timoribus plenas, suspecta que habeat omnia, & in minimis maxima perhorrescat; fit vt inquietam vitam transigat, nulli fidus, nulli fidat: atque hinc perpetuis agitated animo-

morum fluctibus, continuis tempestatibus iactatur: nulloque certo stabilique litore constitutus, in omnem partem pulsatur, ignarus cui stationi adhærescat, cui credat. quam rem longissime ab omni Religionis tranquillitate, portuque illius abesse nemo non videat.

Neque tamen nimia in alios esse confidentia consultum est; sed neque diffidentia nimia. non obfirmet animum ad omnem delationem, non aperiat ad omnem; ut nec omnia, nec nihil credat: medius inter Charybdes Scyllasque. has tutus enauigabit; tentabit utrimque breuia prudentiæ suæ bolide, vitabitque prouida circumspeditione sua, quidquid quaqua parte naufragio timendum. nam & nulli fidem adhibere, soliſque oculis suis credere, pertinacis ingenij est, sibiſque potiùs quàm publico nati; omnia credere, ingentis plena periculi res est, & imperio imprimis noxia. ut meritò dicat Sapiens: *Qui credit citò, Eccl. 19*
leuis est corde, & minorabitur. & Audisti verbū aduersus proximum tuum? commoriatur in te, fidens quoniam non te dirumpet. à facie verbi parturit fatuus, tanquam gemitus partus infantis.

Remedia.

Moram dare, certumque sibi tempus præscribere, vtilissimum erit; ferè enim calida in his delationibus consilia pœnitenda sunt.

Nunquam ad sententiam, quacunque etiam in re descendere parte inaudita.

Reo potissimâ semper aurem præbere, plusque huic, quàm accusatori indulgere.

Suspectum omnem delatorem habere, ne qua auersionis, æmulationis, inuidentię, aut odiorum causa intercedat. Conditiõ de in illius perpendenda, vita, mores, ingenium: num consuetudine, aut natura facilis ad delationem, pronusque ad suspiciones, & res supra fidem augendas. examinandi etiam sigillatim si qui verbis factisue interfuerint, ponderandaque singula. circumstantię etiam accuratè dispiciendæ, & quidquid fidem facere ac derogare potest. considerandum etiam, audieritne delator, an aliorum ore referat, aliorum oculis, an suis: considerabit proinde prudens gubernator singula, audiet omnes, repellet neminem, credet paucis, ac non nisi longo usu probatissimis: discutiet narrata, personam intuebitur deferentis & dela-

delati; num quæ odia & emulationes intercurrent, num quæ animorum commotiones, aut nocendi studium; quibus rationibus delatæ res firmentur, quibus testibus, qua ex causa dicta factaq; qua mente. vitam etiam intuebitur vtriusque præteritam, moresq; præsentis; plusque semper reo tribuet, quàm accusatori, in rationum maximè personarumque paritate, aut non magna imparitate. Deo seriis precibus, tacitisque, etiam in rebus secretis, aliorum orationibus res commedanda.

In omni delatione cogitare, posse subesse falsum, posse falli delatorem, posse affectu in transuersum duci, posse aliud intercessisse, quod aut delictum minuat, aut vniuersum tollat; aliaque huius generis.

Prudenter monet Hieronymus: *Nec ob-* *Epist. ad
Celsan-
tiam.*
treſſatoribus auctoritatem de consensu tribuas,
ne eorū vitium nutrias annuendo. Noli, inquit
Scriptura, consentaneus esse cum derogantibus
aduersus proximum tuum, & non accipies super
illum peccatum. & alibi: Sepi aures tuas spinis,
& noli audire linguam nequam. nihil enim tam
inquietat animum. nihil est quod ita mobilem
mentem ac leuem faciat, quàm facile totum cre-
dere, & obtreſſatorum verba temerario mentis
assensu sequi. Hinc enim crebra diffensiones,
hinc odia iniusta nascuntur. hoc est quod sæpe de

amicissimis etiam inimicos facit, dum concordēs quidem, sed credulas animas maleloqua lingua dissociat.

CAPVT XLVIII.

Nimia commendationes & depressiones.

SUspēctum dicendi genus, & quod fidem verbis adimit, eleuatque omnia propē rationum pondera & momenta. nimis enim propensam in alterutram partem voluntatem ostendit. quare suspicionem non tam rationis, quā affectus ingenerat; facitque ut etiam rationibus, aliqui solidis, non parum derogetur. priuata namque aliqua talem necessitudine, cæco quodam amoris affectu, aut speratis emolumentis, & dignitatum ac commodorum suorum accessionibus, duci auditores arbitrantur.

Inde grandia nascuntur præiudicia, amoris aut odij, & neutri fides adhibetur, vtrique abrogatur, cū in illo rationem ab amore, in hoc ab odio vinci arbitrentur. temperabit proinde dictionem, & plus illi modestiæ, quā caloris intersperget quisquis apud viros rerum intelligentes fidem sperat. in populo plebeque infima,
plus

plus sæpe potest calor, & verborū, tanquā fluctuum congeries & cōvolutiones. cū impetu ferè potiùs, quàm maturo rerum verborumque pondere ducatur; modestiam, compositosq; ad maturitatem mores pro tarditate, & ingenita naturæ lentitate numerat: æqualitatem verò ac dictionis quandam malaciam in ignauo pectore, & ingloria mente ponit; ventis gaudet, & pleno grauidatis Austro velis, vt qui impetu, ac quasi vorticibus magis feratur, quàm ratione.

Hoc interim certum, non esse religiosi candoris, res verbis augere, & illarum tenuitatem Augusto ornatu vellire, aut infra meritam laudem ponere; aut debito spoliatis cultu, naufragas, ac tanquam fluctibus excussas in mediis arenis destituere.

Sed nec Christianæ simplicitatis est, mendacio amorem odiaque iuuare, & infra supraque verum res tollere, aut deprimere. Neque de bona conscientia veniunt hæc placentia verba, & ad gratiam mendacio vestita: nascunturque ex his maiora damna, quàm quisquam prima fronte arbitretur. Sæpe enim Superiores in functionibus dispartendis fidem commendationibus adhibent: & dum sequuntur cæcos hosce laudatores & ductores, non rarò in

præcipitia scopulosque plurimos impellunt. si verò nimius depressionibus aures mentemque admouerint, in poenitenda labuntur, dum idoneos in primis, & ad magna natos, muneribus exuunt, aut non admouet, vano hoc metu, ex improbo commento nato, repellente. Ita fit, vt indignissimus quisque ad clauum sedeat, in Syrtes & breuiâ nauem daturus; arceanturque à gubernaculis, quorum industriâ tutò per decumanos etiam fluctus, sequentibus Austris nauigari poterat.

Quòd si Superior hoc malo teneatur, perit omnis illi apud suos fides. nam & dum verissima narrat, in neutram partem librato affectu, semper aliquid aut profusæ, ac supra verum prodigæ laudis, aut infra verum auaræ ac amulæ tenacitatis subesse suspicantur: neque fides iam tantum illi in augmento aut decremento adempta, sed in omni omnino re; cùm tam facile illi esse arbitrentur, vniuersam rem, quàm illius partem mendacio aut tollere, aut eleuare. Imitatur verbis paternum affectum? pulchris verbis alienum animum regi suspicantur. promittit sollicitudinem diuino orationis fluxu, & vbera quædam ostentat matris? inopiam his regi rerum, & mentiri vbera vterumque matrem putant.

tant. fidem addicit, & in fiduciam suos locuplete sponsione pellicit; opes exterius ostentari, egestatem intus habitare omninantur. sinceritatem & candorem oratione spondet? plus etiam verentur, quo plus spondet. Neque quisquam huic se suaque credet; verebitur secreti fidem: cum ferè tales pronos ad quavis effutienda reperiamus. quàm enim faciles ad augmenta ac decrementa rerum sunt, tam plurimum faciles in omniū narrationem reperies. continebit enim difficile rem ipsam, qui intra veri terminos continere illas nescit. inde iam illa nascuntur inferiorum de Superiore dicta, Antiquum obtinet, ne crede. crescit illius aut decrescit oratio ab affectu, res alia est. facit more suo, & pro inueterata consuetudine pulchra veste deformem statuam induit, aut vili palla pulchram tegit. alius dixisset, crederemus: nam verba rebus aptari, tanquam strictam vestem corpori, à qua nullus huic decor, sed roboris ac venustatis expressio est, arbitraremur. at in huius oro & ornamenta & res figulantur, & quæ nusquam sunt, esse incipiunt. Omnis deinde veneratio in Superiorem perit: nam cuius semel orationi fides detracta est, etiam venerationi cultus omnis ademptus est.

Multum deinde illi, quicunque hoc vitio laborat, apud externos de fide, de sanctitatis opinione, adeoque etiam de sperato animarum fructu decedit: nam ubi semel hæc de illo opinio inualuit, quod ferè euenire solet; omnia propè illius dicta, aut supra aut infra verum esse, non immeritò suspicantur. laudat? crescere credunt rem dictione. vituperat? detrahi fidem laudemque rebus, verbis arbitrantur. exempla adfert in terrorem, in diuini nominis amorem impellentia? plurimum hîc additij subesse coloris putant; nec tam rem ostendi, quàm ornatum, remque ipsam cultu tegi. omnia denique eiusdem generis dicta illius esse, etiam dum testatissima, & ab omni fucò alienissima narrat, sibi persuadent, è consuetò nimirum illius more omnia metientes. Et dum prodesse, aut obesse student pro vario suo affectu alijs; apud cordatos carent sæpe effectù sperato: cum nullam in laude fidem, nullam in vituperatione inueniant, & contrariam non rarò aliorum animis opinionem ingerant; ut quos laudant, vituperatione dignos; quos vituperant, laude dignissimos alij arbitrentur.

Remedia.

E Crebris ferè scrijsque Superiorum monitis petenda sunt. vt quos viderint hac ægritudine teneri, quoties labentes repererint, toties seriò moneant.

Iuuerit, illis etiam aliquem è magis scrijs maturisque Patribus designare, quem non illibentes audiunt: qui si quid in hoc genere monitione dignum obseruauerit, non parcat. proderitque publicis nonnunquam monitis ab his terrere.

Sin ipsi Superiores obnoxij malo huic sunt: videndum an aliquem habeant, quem pro priuata necessitudine non grauata audiant, cuique ad religiosè monendum non desit animus; si modò sperari prudenter emendatio possit.

Ipsa denique consideratio labantis apud omnes fidei, & Superiores & reliquos merito terrere ab hac consuetudine deberet; eo magis quòd semel imbibita hæc ratio vbi inter domesticos conualuerit, abeat etiam ad externos: vt qui his moribus domi fuerit, ijsdem extra domum futurus sit, etiam in concionibus ad populum, in priuatis colloquijs, in ipsoque adeò sancto confessionum audiendarum munere. quod

vbi fit, omnis necesse speratus spiritualis fructus collabascit. semel enim extincta protritaque fide, spei nihil reliquum esse potest.

Proderitque priuatim hac de re examen instituere, ac in rerum narrationibus, familiarique colloquio attentum in omnem partem animum habere, verbisque suis præsentem, ac quasi monitorem sui. certis etiam sibi pœnitentijs in omnem manifestum lapsum propositis.

CAPVT XLIX.

Apprehensiones, suspiciones.

Periculis hîc omnia plena sunt, & magnorum etiam infelici & præpropere exitu comprobata. Hinc enim mœores cor exedentes, ipsaque adeò ossa emedullantes, sequuntur animorum alienationes, ac in vltimam sæpe desperationem vergentia mala: spiritalis dein quædam succedit nausea, & ab omni omnino munere auersiones, laborum fuga, piarumque exercitationum neglectus; ac quasi quidam languentis animi contemptus, inquietudo insuper quædam mentis: & iam omnis illi locus, focij, munia molesta sunt,

ac

ac leuissima quæque grauissima, mollia dura, suauius acerba videntur: monita deinde, blandæque Superiorum aut aliorum compellationes, dolo & fallacijs plenæ. si benignè omnia pollicearis, rideri se arbitrantur; si maturiùs egeris, indignantur; si fortiùs, exurgunt in iras; ac vix nisi cum vita deponunt hoc malum, vbi semel inuault, ac radices egit.

Accedit, tales in perpetua quadam mentis inquietudine viuere, in perenni nocte dieque animorum iactatione, vt nulla illis quies menti, nulla animo pax sit, sed æterna quædam lucta, & ærugo pectoris, cordis contortiones, ac intima quasi mentis cuiusceratio; dum continuis doloribus, tanquam immanissimis furentis Oceani fluctibus in omnem partem iactantur, omni interiori malacia ac tranquillitate pulsa, ac quasi in exilium missa. *Sicut enim tineæ* Prov. 25
vestimento, & vermis ligno: ita tristitia viri nocet cordi.

Neque soli impotenti hac inquietudine aguntur, sed & alios in naufragij sui partem secum trahunt, malorum maximè & Oceani illius inexpertes, qui fluctuum illius rabiem nunquam tulerunt: vt non mirum sit, in suspicionum aliquem scopulum illidi; illos maximè quos aliqua animo-

rum scabies tenet ; cùm minimo affrictu exasperatur malum, & vulnere locum præbet. Periculis planè res plenissima, quando mutuum exacuant morbum . nam & in murmurationum, & in latissimum detractionum campum excurrunt : damnant omnia ; nec ingenio quisquam illorum facit satis, dum nulli fidunt, diffidunt omnibus, tuta etiam omnia timentes ; cùm fraudibus dolisque plena arbitrentur omnia ; nullius amicitiam veram, nullius fidem securam, nullius sponfiones certas sibi persuadeant. hostium illis loco omnes, & in omnium frontibus inimica legunt arma : in omnium verbis hostilia reperiunt agmina, in omnium oculis structas vident insidias : sociæ & amica illis consilia pro aduersantibus & perimentibus ; auxiliares copię pro oppugnantibus habentur. nusquam denique illis fides, nec in optimo, probissimo, sanctissimo. adeò remedium propè omne, malum hoc superat, cùm medicam nullius admittat manum, aspernetur omnium, ac tanquam hostilem fugiat.

Si Superior suspicionibus hisce teneatur, vniuersam domesticam gubernationem euertet, inuisus grauisque suis. neque apud talè subditorum virtus probitasque annis plurimis testata, nec probata innocentia,

centia, nec ratio locum habent: sed ex altè impressarum suspicionum umbris, omnis inferior fit nocens, omnis reus. cumque perpetuò tanquam fluctibus mentis iactetur anxietate, mille se suosque cogitationibus rebusque cruciat. & ut ingeniosa suspicio est, in vna mille difficultates inuenit, quibus & se suosque inuoluat. Sed neque ad magna conatum extēdet, & impedimento etiam erit aliis, ne generoso ausu ad magna tendant: causamque sæpè dabit ad præclara & illustria natis, ut in ignauo otio decurrant annos, excludanturque ab ijs muneribus, in quibus ingenti nominis diuini propagatione, proximorumque salute occupari poterant. Si inferior his laborat, omnia Superioris consilia etiam amicissima & à paterna manu profecta, ut inimica & hostilia auersabitur. Nascuntur inde subdolæ utrimque, in mutuam euerfionem molitiones, cum perire cupimus, aut spe excidere, aut sanè ad maiora non contendere quos aduersarios arbitramur. hinc mutuarum offensionum validæ exurgunt causæ, nulla arte & industria ponendæ. erumpuntque hæc faciliè ad externos, magno familiæ damno, & conceptæ opinionis bonæ graui iactura. Ingens malum, quod aut è pusillanimitate profectum, aut

è ta-

è tacito fastu , aut alienæ virtutis inuiden-
tia, aut ex indignatione , è negato aut fru-
strato munere , concepta, maximè si alio-
rum consiliis studioque impedimentum
iniectum; aut sanè , falsis licet nixa princi-
piis, suspicio talis, nata fuerit.

Tollitur denique domui libertas omnis,
cùm nemo tutò audeat illis præsentibus
sermonē miscere , veritus ne quid sinistra
opinionis nascatur, ne malignior interpre-
tatio. fugiunt proinde talium consuetudi-
nem, apud quos vident, non dicta factaque
dicta factaque esse. è qua re ingens fami-
liam turbatio occupat, quæ solo auctore
semoto conquiescit.

Remedia.

QUòd si quis suspicionibus his agatur,
& in aliorum moribus vitaque tan-
quam in Oceano fluctibus iactetur; cogi-
tet quàm falsis aliàs suspicionibus, quàm
ingeniosis, & ad fidem faciendam aptè ex-
cogitatis, certoque sibi persuasis, in erro-
rem inductus fuerit : quàm fortiter sæpe
& tanquam ab oculatis testibus narrata
dies detexerit, & victrix simplex veritas
subdolam improbitatem prostrauerit. ea-
dem in præsentiarum aliisque suspicioni-
bus

bus euenire posse arbitretur. iam si quales in se reliquos insurgentibus ex quacunque causa suspicionibus esse optauerit, talem se præbuerit aliis; non magno negotio, suspensiones reponet. cogitet quid incurstantibus illis statui in se vellet, quantam fidem adhiberi, quæ consilia iniri, quid decerni. eademque ipse in aliis statuatur. prudens regula est, quæ ab animo suo in paribus constituto, aliquid in aliis decernit.

Si è nulla certa causa natæ noxiæ hæ apprehensiones sunt; magis à medico, quàm aliunde remedia poscenda, aut speranda sunt, & à locorum muniumque varia mutatione. fortè enim hac quasi iactatione leuabitur æger, incidetque in Superiorem naturæ suæ conuenientem.

Si mala hæc quis patiat ab aliis, quod frequenter euenire solet, ex dissentientiū iudiciorum varietate, vel ex sinistra aliorum de nobis opinionum formatione, ex muneris priuatione, ex neglectu, aut nominis detractio, falsò plurimùm irrogata; armandum pectus his similibusque cogitationibus malū lenientibus erit: *Omnis homo ex se aestimat alterum. fornicarius neminem putat castum, castus de fornicario non facile suspicatur: superbus neminem putat humilem. humilis neminem putat esse superbum.*

Chrys.
super
Matth.

Libera hominum ingenia & iudicia sunt, & ferè tot in his discrimina, quot capita. quid te torques in non emendanda varietate, & quæ non est in manu tua? quæ flecti imperio & voluntate possunt, tua sunt: in alieno speranda potiùs, quàm cogenda emendatio est: coactio in proprio valet, suasio in alieno. neque prudens sperare debet aut potest, aliorum omnium iudiciorum cum suo consensum; maximè cum pars maxima nudis plerumque opinionibus à suspitione natis moueatur, à quibus ob innatam iudiciorum tenacitatem, non facilè plerosque dimoueas. feret ergo prudens quæ emendare aut mutare non potest, nec mœrore se macerabit in ijs, quorum euentus ab alieno imperio & voluntate pendet.

Cogita, si calumniator est, errore duci. quid faceres aberranti? non in viam reduceres? facies hoc in iudiciorum errore: reducaberrantem factis è virtute natis, ut videat alium te esse, quàm errore ductus arbitrabatur. & te ipsum intueri: vide quoties hoc æstu abreptus fueris, quàm fecundis ingeniosisque in aliorum factis suspicionibus in errorem inductus. nec miraberis alios paribus iactari. tuo malo aliis mederi disce.

Cogi-

Cogita talem morbo laborare, & misereberis potiùs, quàm indignaberis. quis indignatur febricitanti, & maledicenti ac conspuenti? abstergit potiùs hæc sputa benevolentia: etiam aliquando ostentatione, quasi ex iniuria beneficia acceperit, mulcetque eo magis ægrum, quo ille furit magis. febris, adeoque phrenesis calumniatorẽ occupauit; compatere, & morbo calumniam tribue. Vis vinci ad ima calumniam demitte, & tanquã ignaulo mœrore protritum te calumniator videat. Sed grauis calumnia est, non meliùs innocentem, quàm nocentem pati?

Vis calumniam vincere? contemne. maior omni contumelia qui contempsit est: nec vlla re alia nobiliorem de calumniatore triumphum duces, quàm cùm te viderit generoso calcatu transeuntem hæc vt folia vento rapta, vt stillicidia vanè sparsa, vt grandinem tecto illisam. nec grauior vlla vindicta est, quàm cùm se calumniator viderit solo contemptu superatum. Vis etiam triumphum illustriorem? beneficiis calumniatorem obstringe: nulla re magis etiam barbarũ pectus franges. Monuit hoc olim Sapiens: *Si esurierit inimicus* *Prou. 25*
tuus, ciba illũ: si sitierit, da ei aquam bibere. prunas enim congregabis super caput eius, & Do-
minus

L. Pet. 3. *minus reddet tibi. & Apostolus: Non reddentes malum pro malo, nec maledictum pro maledicto, sed contrà benedicentes, quia in hoc vocati estis.*

Percurre quotquot orbe toto fuerunt magni, & intuerè num quem à calumnia reperies immunem: neminem inuenies tanta innocētia, vitæque sanctitate, quem non hac grandine, tanquam faxeo imbre videas complutum. & ferè quo quisque maior, eo pluribus fuit iactatus. Quāta regna iacent, è nudis suspicionibus calcata? quanti Reges ductoresque exercituum hostibus inuicti, ad hos suspicionū scopulos illisi, naufragium fecerunt? Magna etiam necessum est esse, quæ æmulationem & odia prouocant. humi iacentibus nemo inuidet, ad alta consurgimus, & cū non possimus paria, deiecta & prostrata cupimus. Non egrediamur Religionem. quāta primi omnium Ordinum parētes tulerint, nemo ignorare potest; vt audeam dicere, Da mihi virum in Religione magnum, dabo tibi calumniis non semel tantum non oppressum.

Cogita euenire hæc tibi à Domino ad expiationem culparum, & hilari oculo atque animo suscipies, ageſq; ingentes Deo gratias, pro tam suaui pœnarum in inferno
aut

aut Purgatorio debitarum, in calumnias commutatione.

Cogita à Deo hæc immitti aut permitti, vt variarum calumniarum iactatione durioribus assuescas: vt difficultatum harum consuetudine, ac quasi familiaritate discas minima dedignari, ad magna assurgere. ita leo vulpeculam, aut ouem contemnit: at si elephas contrà steterit, excutit generosas iubas, tanquam lætitiæ imbribus de cælo perplutas: gaudet enim magnis magnus animus componi, vilia dedignatur. facit hoc mens omnis incommodis & aduersitatibus roborata, & quæ assiduitate ac frequentatione callum obduxit. Et sanè neglexisse, ac quasi ignauum transisse videtur Deus, quem non dignatus est durioribus ad maiora parare. de cuius virtute magna sibi promittit, illum audet componere magnis. ita militiæ duces ad difficillima quæq; promptissimū quemque vocant, ignauos in medium coniiciūt agmen, aut sarcinis destinant.

Permittit hæc Dominus, vt in animi submissione nos contineat. ne muneribus, ne felicioribus rerum successibus, populi fauoribus, ne cælestibus gratuitis donis, eruditione, prudentia, eloquentia extolamur.

Docemur hîc decurrere ad Deum, illi soli fidere, in eo spem omnem reponere, humana contemnere, vt incerta, intuta, infida, fraudibusque etiam in fratribus obnoxia; cùm ab vno vtero sæpe insurgunt calumniæ, etiam ab amicissimis. quare nemo paulò prudentior ad ea descendat, quorum propalatio noxia auctori esse possit. ille securus degit, qui nihil poenitendum committit, quique ea etiam coniunctissimo credit, ad quorum euulgationem non erubescit.

Plerumque etiam Dominus, quos gubernationi destinauit, antè per aspera & aduersa roborat. nam quid faciet tempestatum inexpertus fluctibus insurgentibus? quæ consilia aut remedia dabit malis properantibus? eueniet illi quod militiam inexperto, pugnam aggredienti, trepidabit ad omnem hostium occursum, & antè corruet, quàm consilia explicabit.

Et ferè durissima, durioribus non assuetorum, imperia sunt: qui cùm non didicerint pati, nec compati sciunt. ille suauius plurimùm imperat, qui in se aduersantium rabiem expertus, periculo suo aliena didicit metiri, magnorumque etiamnum vulnerum cicatrices circumfert: quique non alieno tantùm exemplo, sed & suo didicit
quid

quid possint calumniæ. ille enim experientia didicit, quæ occurrentibus his malis remedia admouenda sunt. inexpertus miscebit omnia; experiri in vnoquoque remedia volet, quid possint, aliorum nimirum edocendus malo. ille securus manum admouet, qui longa experientia vim mali didicit, & mitioribus primùm inualetudinem tentare, nec ad duriora, nisi in extremis, & quæ reliqua omnia aspernantur, descendere.

Cogita demum præmia cælo promissa, si forti animo calumniam tuleris. nulla re alia magis mitescit labor, adeoque dulcescit, vt & ipsa iam verbera mollescant, si præmia adiunxeris: quæ qui cogitat, hilari vultu calumnias & aduersantia quæque amplexabitur, vt semina fructuum cælo reponendorum, vt messem Dominico horreo inferendam, vt diuinæ in nos beneuolentiæ signa. memores illius, Quos pariauit cælestis Pater Filius, laboribus, calumniis, verbere, sanguine; hos etiam, quantum humana cælestibus componi possunt, pariabit & præmiis. nec certior in hac vita diuinæ in nos beneficentiæ testatio est, quàm si variorum in hac vita iudiciis, linguis, calamis iactari nos permittat.

Iuuabit, se suspensionesque suas, pulsa si-

mulatione, candidè Superiori, & domestico Confessario aperire. nihil deinde in hac vita ab humana manu ambire, nihil sperare. non timuit qui non sperauit : nec abreptus suspicionibus est qui non timuit. semper enim mistus suspicioni metus est, dux illi & perpetuus comes. humanas verò laudes negligere. cùm deterrimi ferè ampla harum materia sint. sanè nec optimus, nec prudentissimus ad magna tollitur : vltima ferè in humano delectu prudentia est, fauor & propensio quædam animi primum locum tenent. beatus qui hæc risit, & humanis omnibus maior sola cælestia sperauit, sola amauit: contempsit reliqua, vt indigna cælis Deoque, cui natus, & cui vni omnis viri prudentis, viri boni labor desudat, felixque fœcundusq; sudor profunditur.

CAPVT L.

Pusillanimitas.

Varijs è causis hæc nascitur : naturæ tamen plerumque vitium est, omnia metuentis, omnia viribus maiora arbitrantis. hinc in ignauo quodam timore confitefcit animus, nec ad magna aut ardua,

exten-

extendit manum, semper pavidus; generosa & excelsa nec auribus quidem admittit vilissimis se pascens. siquid in aliorum gratiam agat, contentus rem proposuisse est: ut si excitet, & ad grandia prouocet ac inflammet, viroque ac posteritate digna meditetur; frustra speres. ut verò difficultates perfringat, obices repellat, arma armis pulset, ferroque ferrum excutiat, sudorem fundat, sanguinem gloriæ in posteros semen spargat; nequidquam expectes. amat infima cum desperet magna, deligitque sordescere in illis, ne in his laborum miles vias patiatur. hinc etiam viribus suis non raro inferiora, ne attingit quidem, & oblata ac ultro obtrusa magna negligit, desperans de consecutione, omniaque tuta timens, ad sola ignobilia, timori que suo inferiora, aut ut summum paria dexteram extendit.

Prouenit sæpe pusillanimitas hæc ex innato quodam fastu & arrogantia. dum enim aut nomen venamur, quod non consequimur, aut dignitatibus inhiamus negatis, aut antelatum aliū cernimus, aut speratis frustramur opibus, aut à cogitato munere repulsam patimur, aut denique à quo laudem expectabamus, dedecus referimus; labimur animo, succiduntque tan-

S s 3

quam

quam lassato genua, & aut ab indignatione non consecuti voti, ab ignominia relata, à concepta acerbitate, à reportata verecundia, ab ipsa denique desperatione, similibusque à superbia natis, totis animis corruimus; vertunturque desiderata in timorem, mœrorem, suspiciones varias, temeraria iudicia, animorum alienationes, in quoddam mentis frigus, vt tanquam glacie constrictus, aut quodam pigro torpore perfusus, totus ignauescat animus.

Exoritur sæpe eadem è melancholia quadam altiùs impressa & fota, quàm vt leuibus remedijs discuti possit; dum quedam præter spem obuenientia, aut opinionibus nostris aduersantia, aut cum iudicio nostro pugnantia profundius demittimus: & nudis sæpe mœrores, illi opinionibus innituntur, quæ maximarum intus turbarum causam probent. videmus tempestates & plusquàm decumanos fluctus pectori obuersantes, & causâ nulla, totque procellarum fluctuumque cælo propè minitantium, sola è suspicionibus opinio nata causam dedit. nec eximendi illam spes vlla, nisi qui patitur iactationum suarum causam prodat. & ferè seriùs se reteggit, malaque quibus opprimitur & sorbetur. atque nimirum oportuit, & principiis occurr-

currendum fuerat. frustra medicina extremis seruatur, cùm inualuit ægritudo, & intima depasta est.

Nec rarò hæc à concepta quadam animi indignatione originem ducit. benefecit aliquis amico, quantaque potuit in eum beneficia contulit, vt natare possit in immenso quodam beneficiorum Oceano; & post tot benefacta ex amico inimicum patitur. Alius pectoris sui intima alterius commisit fidei, vt nihil celauerit, nihil clausarit, reclusit omnia, & tanquam cum mente sua prolocutus omnia referarit claustra; & post patitur infidum, & sanctè commissorum violatorem. Tertius eduxit, ac quasi manibus ac genibus suis alunatus est aliquem, parens illi & mater, nec non nisi multorum inuidia protrusit ad magna; consequitur deinde hunc Superiorem & simul hostem. Dura omnino conditio, & quæ satis sit ad valentem & robore plenum deturbandum & eneruandum.

Sunt harum rerum innumera passim exempla, & subita sæpe morte, aut lenta ac miseranda tabe confirmata: è quibus inijs in vnoquoque hominum genere cecidisse vidimus primos in omni fortuna viros, meliori exitu dignissimos: quos concepta mentis ægritudo, dum ad repellenda

procurfantiâ, aut calcanda aduerfa non fatis fuit animi, præproprio cafu, infelici fine, vitam robore adhuc & annis plenam intempeſta morte præcidere fecit, totaſq; familias inexpectato lapſu funeſtauit.

Expectari ab his magna poterant, & ingeniorum prudentiæque raræ dotes ſumma ſpondebant: gratia & eloquentia, totuſque corporis habitus, ac in agendo ſolertia dexteritaſque indefeſſo ſtudio coniuncta, nihil non promittebat. acceſſit animi quidam mœror, è quacûque cauſa vera an falſa natus, & tanquam vna falce vniuerſam ſpem ſecuit: aut tanquam venenaria ptuina, aut inimicũ frugibus gelu, diuitem meſſem fæcundo ſolo ridentem penitus decoxit, ſolaque, exſpectatione ſua locupletem dominum fruſtratus eſt. Et ille non vna in aduerſis victoria illuſtris animo fractus corruit, tantaſque ſpes ad ſumma ſurgentes, momento protriuit, fabulaque iam factus orbi eſt, qui miraculum fuerat. & cadit illi nõ rarò totius Religionis damno, totius familiæ interitu, ſecumque trahit vna nimirum ruina domum totam. crederes Philiſtea agmina roboraque vna columnarum concuſſione coruiſſe, cæcoque Samſone puſillanimitate è mœrore quopiam nata, tantam cælo ſurgentem mo-

molem vno impulsu decinerante.

Innumerae propè rerum harum causæ sunt: Superiorū imprudentia, seuerior correctio, credulitas à falsa delatione nata, diffidentia, amicus infidus, dolosa circumuentio, obtrectationes, suspiciones altiùs depressæ, inopinata infeliciū euentuum successio, inexpectata secundorum in aduersa commutatio, è digniore gradu deiectio, inimici ad maiora euectio, maximè si illius potestati submitatur; innocentia calūnijs petita, fides criminationibus habita, defensionī locus negatus, inauditi dāmnatio, ingrātus animus, beneficiorum immemor, qui pro benefactis hostilia reponat; cūm remunerare debuit, & grata beneficia prosequi memoria, inimicum ostendit pectus: secreti criminis insperata reiectio, innumeraque propè, pro cuiusq; ingenio alia atque alia: quæ cūm in animum nō omnino præualidum inciderint, aut in pectus aduersantibus inassuetum, aut secundo lætoque perpetuò prosperioris fortunæ successū elatum & assuetum; facile ad mœrores & pusillanimitatem mœroribus comitem propellunt, inde in malorum vltimum desperationem.

Languet in talibus primò animus, tepetque, vt arbitrari possis alto quodam

sopore depressam mentē iacere, putes lethargo oppressam; fastidit deinde omnia, ac spiritali quadam nausea delassatus, dormienti, somnoque è diuturna vigilia prægrauato similis, in supina quadam ignauia procumbit: abhorret à lætioribus, delectatur tristibus, amœna refugit, sectatur horrida, congressum aliorum auersatur, amat solitudinem, labores refugit, captat otia mœroribus amica: mille suspicionibus diem noctemque fatigat, nulli magisquàm sibi grauis. siquid benefeceris, fraudem veretur: si serias admonitiones adhibueris, hostem arbitratur. læta narras? rideri se putat. tristia? ab inimico pectore profecta credit; vt à solo propè Deo remedia speranda sint.

Si Superiorem pusillanimitas hæc tenet, miserationibus vbique digna res est. ferè enim talis concreditum sibi munus vniuersum negligit, & è timore fastidio plenus, nauseabundoque in omnibus similis, ingenti in res omnes fertur displicentia. nihil serium magnumque aggreditur, nullamque rem posteritate laudeque dignam, nihil denique quod animos generosos præferat, cùm omnia viribus suis maiora arbitretur. quare nec ad ardua aut victura dexteram audet extendere, similis illi

illi quem Sapiens mittit ad formicam.

Ac licet dignissimus munere sit quod obit, nec quidquam illi necessariarum rerum ad magna desit; minùs tamẽ idoneum metus facit, & conceptus semel animo timor, & diffidentia sui, vt vix quidquam à tali sperari possit: tanquam si quis viribus diffidens, abiectis armis, inermem se nudumque imbelli aduersario obiiciat. facit hoc omnis pusillanimus. præsidis licet maximis suffultus, omnibus vltro se exuit, spoliaturque.

Quin & nescio quid diffidentiẽ in Deum puido semper pectore circumferat quisque hoc malo tenetur. neque enim fieri potest, vt qui spem suam in illum coniecit, tot vndiq; timoribus circumsepiatur; cum dubitare nec prudenter nec christianè, de illius potentia, ac in nos omnes affectu post tot diuites sponsiones, totque testatissima amoris signa, tot pro vberibus vulnera, prodigumque pro lacte sanguinẽ, quisquã possit. Iam cum post tot tantaq; perstet in vano Superior metu, perpetuoq; timore pulsetur, plurimum necesse de diuinorum sponsionũ fide, deque fiducia innumeris Deo nominibus debita, remiserit. aut sanè occulto aliquo quicunq; hoc malo possidetur, fastu rapitur. cum enim res viribus

ribus tantum suis metiatur, videatque has
impares rebus magnis; de felici executione
desperat, spemque omnem abijcit, tor-
porique indormiens, in ignauo imperio
consenescit, vitamque in inglorio otio trans-
igit, omnium domi forisque libertatum,
dissolutionum, morumque à Religione
alienissimorum causa. qui si tot diuinis spon-
sionibus oneratus, tot maximorum omni-
um exemplo prouocatus, Domini poten-
tiæ innixus ad imposita sibi dexteram pro-
tenderet; non magno negotio, fortunatis-
simo successu concredita sibi perageret.
nunc prostrata miserè iacent omnia, nul-
lus, pulsa in solidum vigilantia; disciplinæ
vigor, nulla regularum obseruatio, nusquam
æmula piarum exercitationum se ostendit
cupiditas. frigent omnia, calor nullus, pul-
soque pio interiorum æstu, congelascit
animus, & in Superioris tepore ignauescunt
domestici, in illius metu timoribus pulsan-
tur, & ad solum magni nomen cum duce
suo perhorrescunt; quasi si quem fulmine
percusseris, aut immani rupe oppresseris,
arbitreris in Superiore suo mente destitu-
tos: ita inter ignaua animæ illius deliquia,
fastidio metuque plenam vitam trahunt,
lentoque infamique concharum more ve-
stigio terram signant, pigra ubique post se
signa

signa ignauissimi pectoris relinquentes, ad omnem magnitudinem pauidi, ad omnē illustrium molitionem trepidi: è quibus ignauissima Religioso vita moresque vomitum Domini prouocantia nascuntur. ac tandē è religiosa disciplina, in perpetuum spiritualium neglectum prolabimur, infelici plurimū exitu bene inchoata, æternū deueniunturi.

Remedia.

Superiorum industria plurimū in hac re iuuabit. credi enim vix potest, quantos animos suggerere valeant, quā validē iacentem mentem erigere, dum magnis ipsi animis audaciæ viam sternunt, lætoq; hilariq; vultu suos ad magna prouocant. etiam tirones & bellorum inexpertes, inassueti armorum, veterana perferunt arma, ferrum, impetum duce præeunte. audax nimirum ductoris animus, metum trepidantibus excutit; & experiri cominus iuuat, cuius vel solum nomen latè terrorem incutiebat.

Proderit deinde, si in Superiori patrem fenserint, matris viscera, si sollicitam vigilemque in suorum necessitatibus, in ægritudine potissimū, curam; si liberalem manum,

num, si vltro suos in fiduciam prouocantem, si expandentem pectus, si remotam à politica & aulica rationem, si plura rebus præstantem, quàm verbis spondentem.

Occupandi tales ac variis distimendi, ac à minoribus paulatim ad maiora audenda propellendi, laudādi, factaque eorum mediocria in maius extollenda, consiliis vltro admouendi, magnanimis adiungendi, vt horum consortio audere incipiant, timere desinant.

Spiritualibus exercitationibus, piorūque librorū lectionibus iuuādi, locorum etiam ac munium mutationibus, maximè si in familiam aliquam munusque propendeant, è quo meritò damna timeri non possint.

Past. p. 3. cap. 9. Gregorius Magnus modum ingenia hæc pertractandi præscribit: *Pusillanimes amplius ad iter bene agendi reducimus, si quædam bona illorum ex latere requiramus, vt dum in eis alia reprehendendo corripimus, alia amplectendo laudemus: quatenus eorum teneritudinem laus audita nutriat, quam culpa increpata castigat. plerumque autem utiliùs apud illos proficimus, si & eorum gesta memoramus; & si quæ ab eis inordinatè gesta sunt, non iam tanquam perpetrata corripimus, sed quasi adhuc ne perpetrari debeant, prohibemus. vt & illa quæ approbamus illatus fauor augeat, & contra ea quæ re-*
pre-

*prehendimus, magis ad pusillanimes exhortatio
verecunda conualeſcat.*

Ingens in hoc malo certumque remedium à diuinæ bonitatis ac potentiæ consideratione, ac à validis illius promiſſis, & testata omnibus retrò ſæculis inſperantes in ſe munificentia, adeoque à prodiga illius inſidentes manu, peti poteſt. audeat proinde ſperare homo, maiora largietur Deus. neſcit enim ab homine vinci Deus, omni humana confidentia & ſpe maior. prouocabit ergo ſe quiſquis malo hoc tenetur, diuinæ bonitatis ac potentiæ immenſitate, profuſaque in ſupplices fidentēſque ſibi largitate.

In Superiore verò fortiter iuuabit, ſi certò ſibi perſuaſerit, munus ſibi à Domino impositum. errare autem, aut fallere, aut falli nō poſſe in delectu ſuo Deum, nec in interitum ſed in ſalutē imponere, tantumque ſemper virium conceſſurū, quantum oneris imponit; nec munificam antè dexteram contrahere, quàm benignitatis ac potentiæ ſuæ diffidentia laborare viderit hominem. quod ubi ſenſerit, auxilia retrahit, quibus indignam diffidentē mentem, & de diuina potentia, aut promiſſorum certitudine dubitantem, tanquam aut non poſſit Deus, aut datam fidem fallat, arbitrat.

tratur. cùm vtrumque alienissimum à bonitatis ac potentiae infinitate sit. quo fit vt iustam illius iram, auxiliorumque destitutionem meritò prouocet. medebitur huic malo pusillanimus, si in magnam se spem potentiae ac diuinarum sponsonum erexerit, tam certus de cōsecutione, quàm fortis de fiducia fuerit.

Dicet fors ex hoc numero Superior aliquis, cùm se vndique senserit innumeris propè difficultatibus circūfessum, ac tantum-non insepultū, Quis tantis vno tempore occurrentibus, cùm noua veteribus foecundo malorum germine innascantur, sufficiat? mille modis temporalium sollicitudine discrucior, mensque spiritualibus intenta in diuersum & ad orationum alienissima, rapitur. additur comparandarum facultatum sollicitudini, amittendarū maior etiam metus. sed & domesticæ non raro angustiae implexam mentem tenent, semper dubiam, semper incertam, pendulam, & ad non pauca minùs religiosa impellunt. potens suada necessitas, fortis orator inopia est, nec minor egestatis metus. Accedunt priuatę difficultates: multorum à recto bonoque, veterique instituto, moribusque, & à primæuo maiorum spiritu deflexio. hic iudicem ignemque ferrum-
que

que etiam in extremis & perimentibus perhorrescit: ille medicam omnem Superioris manum auersatur: iste non tantum medicam, sed & clementissimi patris dexteram indignabundus repellit, non vinum, non oleum à Samaritano propinatū admittens. alius nec matris quidem vbera solo lacte manantia suscipit. sunt qui mansuetudine iuxta ac seueritate indurescant. exasperantur nimirum in his à quacunque manu vulnera morbi que.

Quid agat Superior tot vno tempore malis obsessus, cum in triginta inferioribus triginta diuersorum morborum genera numeret? quis vnus tot mutuò aduersantibus medebitur, aut in tam pugnantes formas vertat? hinc hilaritatem, ibi mœrorem, alibi maturitatem, seueritatem, & exinde amœnitatem ac lepores præ se ferat? mollia duris, læta tristibus, calida frigidis, amara suauibus, mella nimirum felle, quis docta malis mederi manu misceat? aut adeò inuicem aduersantium quis vnus vno non rarò die hora que conditiones induat? quis verò non indignetur tot sæpe laboribus, vigiliis, monitis, studiis, precibus, lacrymis, optatos speratosque non respondere euentus? è semente bona tot zizaniorum acervos, tot è cultissima vite labrus-

scas, totè fœcundo germinis boni trunco spuria vitulamina non actura radices, nec in posteritatē itura, sed & infortunato ferè exitu fusos labores claudi? & ingratiſſima ſpongia detergi? nulloque ſpiritualium emolumento annos annis tanquam infelicitis matris infortunatam ſobolem ſuccedere? & cùm in orbem recurrant labores, frustrari ſemper optatis? toties eadem inculcari, mollibus, acribus, lenibus, fortibus nec meliore euentu, quàm ſi Æthiopus laues? Adde, poſt hæc omnia, pro meſſe horreo Dominico inferenda, pro laude, & gratiarū actione, pro gratulatione, & mutui amoris ac beneuolentiæ redhibitione, oblocutionum ac detractiōnum plena plauſtra, animumque ingratum, odioque, dolo ac maleuolentia plenum, inuidiaque natantem.

Grauiæ hæc ſunt, ſi ſe viresque ſuas Superior intueatur. vt non immeritò deſperet de euentu, & poſt nequidquam tentata remedia, deponat ægri ſui curam, committatque fortuitis naturæque morbum, nec vltrà manum extēdat in curationem: ſeq̃ue etiam adeò, ſi alia omnis elabendi via deſit, in alta recondat eremo, vt ſibi Deoque viuat.

Verùm ſi oculos coniecerit in Deum,
pude-

pudebit illum cogitationum harum. conferat proinde sudores, lacrymas, Christi sui sanguinem cum suo. videat quàm prodigè illa Christus fuderit, quoties calcata ingrata humano pede, quòt millibus frustra fluxerint, quoties totis regnis irrita crucis vulnera steterint.

Seipsum deinde Superior intueatur, adolescentiæ, ac fòrs maturioris etiam ætatis crimina, teporem, ignauam negligentiam, prostratamq; ac supinam socordiam; quoties pulsantem monentemq; Dominum neglexerit; quàm male innumeris in se nullo suo merito collatis beneficiis responderit; quoties illius immemor sanguinis per varia vitiorum genera volutatus, nequidquam minitante, increpante, inuitanteq; ad meliora Deo, promissis etiam nouis vetera donâ sua onerante, surdas aures præbuerit; & erubescet ad ingrati animi sui, cælo terrisq; testata documenta. & non mirabitur suorum ad monita sua ignauum neglectum, qui dura toties ceruice Dei monita excusserit.

Cogitet etiam nihil sibi de labore desperire. se quantur, impugnentûe monita inferiores; manet Superiori cælo merces reposita magna nimis, tantoq; manet maior, quanto difficilioribus colluctatur.

neque enim ab euentu, sed à voluntatis & amoris magnitudine merita donaqué metiri sua solet Deus.

Denique magnam se in spem erigat bonitatis diuinæ, certus pro fidei ac sp̃ei magnitudine cogitationes cessuras. gaudet humana fiducia Deus, & complacet etiam sibi in illa, delectaturque prouocari in dona, & munificentia suæ nubes magnæ fiduciæ impulsu concuti, quò illas resoluat in imbres, & lata liberalitatis suæ maria.

CAPVT LI.

Impatientia in aduersis.

Sive è laboris tædio, ex innata ignauia & torpore, siue è mali magnitudine, aut è desperatione profectus ac felicioris exitus, aut victoriæ consequendæ, siue è fiduciæ in diuites Dei sponfiones languore; aut virium denique suarum, aut cælestis auxiliij diffidentia nascatur; non vltimum malorum est. Hinc enim indignationes exurgunt, odiaqué siue in eos quos scimus, siue quos auctores arbitramur, & sæpe innocentiam impetimus, & ea in innoxia capita struimus, quorum meritò æternum poeniteat. qui error nulla plerumque indu-

stria

stria corrigi potest, cùm damna ea data sint, in quibus sera omnis emendationum cogitatio est, quæque nulla poenitudine ac lacrymis elui, nullo pretio reparari possunt.

Iam si damni illati auctor innotuit, grauius etiam insurgimus. nec iure an iniuria acceperimus, examinamus; satis in vindictam & fouenda odia est accepisse. ita ferè omni ratione viduata impatientia est. atque hinc temerarij profiliunt ausus. pericula damnaque nulla sunt, si vindictæ locus cõceditur. etiam per latus proprium, quis hoc malo tenetur, gaudebit alterius peti posse: & suaue illi ferrum est, si eodem cadat hostis; molle telum, si vtriusque configat pectus.

Quid? quòd furori proxima omnis impatientia sit, & belluarum veriùs more quàm humano fertur in præceps, vt præcipitia & surgentia cælo saxa planities illi sint, si hostẽ in valle viderit; maria torrentes, si in litore aduersarius steterit. ita non suo ducitur, sed alieno rapitur impetu: neque talis in aduersarium it, sed ventorum more cæco proruit impetu.

Accedit impatientiæ non rarò comitemesse pusillanimitatem. cùm enim aut mali magnitudine vincitur qui patitur, aut

ignoratus damni illator, aut vindicta maior, aut nullus vindictæ modus; labimur ferè in mœrorem & languorem, in vitæ tædium, in mortis cupiditatem. mori enim delectat, cùm viuere pigeat: hinc morbi intima quæque & robustissima depascentes. sed neque ferro parcimus, bis impij, aut sanè contabescit homo, & nullum iam corpus, sed corporis sui vmbra quædã est.

Perpetuis deinde cor pulsatur anxietatibus, hæretque ad omnia pavidus animus, & ad tutissima quæque contremiscit. nec sibi satis fidit: carissimos quosque & antè amicissimos inter hostes numerat: vt nusquam tuta sit illi fides, nulli se credat, cùm in omnium oculis fraudes legat, in omnium ore venena, in omnium manibus ferrum, in omnium fronte hostem.

Perit exhinc illi omnis meriti corona, omnis præmij brauium, omnis triumphii gloria. æterna an peritura proponas, iuxta habet. mercedem sponde; mercedis omnis contemptor est. æternaturæ propone gaudia; somnium illi gaudia sunt, & omnes cælestium diuites sponsones: cùm nihil videat præter malum suum, nihilque cogitet præter vindictæ modum. quin adeò, propone Deum; credes maioris illum facere grauitatem qua premitur mali, quàm aut
illius

illius offensam, minas, pœnas; aut præmia & gloriam. Imò cum è re nulla alia maior honor quàm ex aduersantibus pareretur; quod illi in salutem cœlitus concessum erat, vertit in interitum, medicamentum in venenum. misera omnino conditio, cum quæ in vitam diuite Dei manu porrecta erant, in mortem commutantur.

Omnis etiam se talis prudentia spoliât, prouidentia nudat. neque enim statui prudenter prouideque aliquid potest, quàm diu impatientia occupauit mentem; non anteuerti mala, non præsentia excuti, non futura præcaueri possunt. quare in mille se talis conijcit discrimina, quorum fuga & euitatio compositam præsentemque sibi animum iactationibus vacuum deposcit.

Remedia.

PRoderit in primis frequenter secum meditari, magna illū sperare aut promittere non posse, quæ aduersa non erudierunt. lecto, puluinaribus, mollibusque assuetus, mollia dabit, nec manum ad magna extendet. ardua virtus poscit, & extritum per aduersa pectus. vis viro & cælo digna? duris, inamœnis, difficilibus assuesce. callum nimirum antè per aduersantia ob-

ducat quisquis æternà natura cogitat. adeoque quisquis pacatam vitam desiderat, durioribus antè mentem exerceat, ne fortuitis turbetur, ne incurrentibus obteratur, ne cedat malis, sed contrà audentior eat. vt nimirum animos ab aduersis mutuetur, audeatque vltrò prouocare fortunam, ab amica illa, aut inimica manu veniat. nam quid refert ad gloriam & laudem, hostis oppugnet apertus an tacitus? qui inimicitiam factis verbisque, an qui amicitiam verbo, hostilitatē rebus profitetur? vtrimque vulnera sunt, fluit ab vtroque ferro sanguis. nisi quòd grauiora ex insidijs, & amica manu cadant; quia inopinata, & inermi ferè pectore accepta. eo laudis & meriti materies maior. Nam illa, Non putabam, non expectabam ab hac manu, post tot amicas dexteras inimica exurgere arma, hostilia tela ab amica pharetra; ab ignauo pectore & ore veniunt. & quid refert à qua manu veniant mala? animum antè para, & cogita ab omni posse euenire quod ab hoste venit, posse tibi accidere quod Amasæ loabi ferro. & quot iam inde à Iudæ osculo in Domini iugulum surrexerunt?

Quid si Superior sit qui infert, quid si inferior? à patre in filium, à filio in patrem?

&

& quoties à primordio creaturæ in creatorem insurgunt? quoties tu in Dominū, Iudicē, Regem, Patrem? in Conditorē, Redemptorē, in Deum? teipsum proinde in tuere, post tot beneficia creatis, cōseruantis, redimentis, sanguinem fundentis, amantis, adoptantis, cēlorum hereditatem spondentis Dei: post omnibus retrò sæculis pœnas minitantis, & æternū inter perennantes flammās minitantis Dei. post cēlorum excidia, ignium sæuitiam, dæmonum carnificinam nullō æuo ponendam, nullo mitigandam. & insurgis tamen, & ferrum audes stringere, & iterum flagra, columnam, spinas, crucem, clauos, vulnera intentare. facit hoc quisquis calcata Dei voluntate, imperio spreto, letali se scelere inuoluit: & toties facit quoties se illo inuoluit.

Quid si Superior sit qui patiat, à quacunque manu; cogitet illud Bonauēturæ: *Per has aduersitates Prælati à pulvere peccatorum purgatur, quem contraxit ex humana infirmitatis surreptione. In multis enim offendimus omnes, & in pluribus negotijs, plures negligentia sæpe fiunt, à quibus necessum habent hic purgari Prælati, ne illic durius puniantur; iuxta illud, Si iniquè aliquid gesserit, corripiam eum in virga virorum, & in plagis filiorum hominum:*

De 6.
alis c. 5.

1ac. 3.

2. Reg. 7

per has etiam dum deprimitur, à tumore superbia custoditur: quæ potentibus periculosius insidiatur, dum & sublimitas officij, & libertatis licentia, & boni operis placentia, facile mentem eius extollerent; nisi aduersitatis iugum collum præsumptionis eius humiliaret, & sic à superbia voragine defensaret. custos enim salutis & profectus boni rectoris est humiliatio aduersitatis, sine qua cum successus prosperitatis citò eleuasset in ventum præsumptionis. Vnde Dauid secundum cor Dei electus, quando premebatur aduersis, deuotissimus fuit & humilis; quando autem extollebatur prosperis, incidit in culpam elationis, ipso attestante cum dicit, Bonum mihi, quia humiliasti me, ut discam iustificationes tuas.

Psal.
112.

Si inferior est qui impugnatur, cogitet Primò, per hæc viam sterna ad magna. Secundò, parari animum in aliorum subsidium & inærentium solamen, iacentium ac prostratorum erectionem. Tertiò, magni meriti materiam subministrari. Quartò, magnam animo tranquillitatem ac malaciam parari, dum per has iactationes roboratur, & assuescit duris, & vsu ac consuetudine quædã paullatim familiaritas cum aduersantibus intercedit. Quintò, crescere his tacitè spiritum ac roborari, iuxta illud: *Sic est regnum Dei, quemadmodum si homo iaciat sementem in terram, & dormiat, & exurgat*

Mat. 4.

exurgat nocte & die, & semen germinet, & crescat dum nescit ille.

Iuuerit verò plurimū, Christi, Diuæ Virginis, Sanctorum cælo ascriptorum mores vitaque sæpius repetita. hæc enim animos firmabit, & aduersantibus maiores dabit. sperata etiam promissaque cælo præmia. quare cū aut aduersi aliquid intercurrit, aut impatiētiae motus insurrexerint, Christi tui fusum pro te sanguinem, verbera, vulnera crucemque cogita; & non magno negotio sæuientes animorum fluctus cōpesces: maximè cū ab orbe toto delectam sibi gentem tot beneficiorū prærogatiuis, iam inde ab exordio cumulatam, crudelissima pati videris. quin adeò, post tot benefica in te manu collata, vt opprimi ac insepeliri beneficiis potueris, non cessas diurnis diuinorum mandatorum transgressionibus, vindicem in te Dei dexteram prouocare; & parcit ille tamen, & perfert scelera, nec iudicem statim manum extendit. miseretur potiùs, & meliora exspectat parcere facilis, ac maioribus etiam post sciam pœnitudinem bonis exornat.

Consultum fuerit sæpius illud memoria repetere: *Confortamini, & non dissoluantur* *Paral.*
manus vestrae: erit enim merces operi vestro. 15.

Quæ

*De 6. Quæ manus, Bonauentura teste, instantia
 alis 6. 5. sunt in agendo, & patientia in sufferendo quod
 grauat. quæ si non dissoluantur per desidiâ sen
 intolerantiam, merces aterna ei cumulabitur.*

*† Referendum hoc caput ad librum secundum,
 post caput 2. folio 172.*

*Curiosior inuestigatio imperfectionum
 Superiorum.*

QUÆ res magnam animi inquietudi-
 nem ingenerat, ingentium turba-
 rum caussa; cùm curiosior hæc inuestiga-
 tio, tanquam validis aduersantibusque
 ventis, mentis malaciam ac tranquillita-
 tem euertat, perpetuisque quibusdam fla-
 tibus fluctibusque serenitatem turbet, ac
 è sede sua depellat. neque enim stare in il-
 la mente tranquillitas potest, quæ peren-
 nibus iactatur motibus, curiosioreque in-
 uestigatone continua iactatione concuti-
 tur. vt taceam contemptum paullatim Su-
 periorum nasci. Neque enim fieri potest,
 quin aliqua nonnunquam minùs per om-
 nia laudanda, quædam fors etiam dam-
 nanda solers disquisitio, ingeniosa semper
 in

in malum, repertura sit. neque enim adeò numeris omnibus quemquam absolutum reperiās, quin aliquid emendandum deprehendas. vt nulla fuerit ætas, quæ non in maximis etiam viris aliquid semper putauerit ignoscendum, tanquam in medio die pertenuem subterlabentem soli vaporem qui nec illius repercutiat radios, nec lumen obnubilet. Nam illam omnium perfectionum accurationem quæ nullam veniam mereatur, nulloque næuo aut puluere aspersa sit, vouere possumus, sperare prudenter homines non possumus, & alterius illa, non huius vitæ exempla sunt.

Iam ita ferè natura comparatum est, vt cùm è curiosiore indagatione, in intima Superiorum adyta assidui scrutatores deuenimus; plus possint ad contemptum modica vitia, quàm magnæ ad venerationem virtutes: cùm ferè deterrima quæque fortiùs oculos repercutiant, altiusque in animum dimittantur.

Ac primò, aliquid antè conceptæ venerationis deponimus, inde augustissimè priùs laudata, tenuiter ac quasi per capillum tangimus: ad aliorum exinde laudes silentio mentem prodimus, damnamus denique, & in apertas progredimur detractiones. ita non contenti sumus improbanda

banda vidisse, spargimus, adeoque sub lingua calamiſque crescunt vitia, & in elephantem culices abeunt, in gigantes exurgunt pygmæi. Vnde fit vt omnis Superiorum auctoritas corruat, & pro veneratione contemptus sequatur, pro obsequii studio, quod plurimum opinionibus innitur, obediencię neglectus suboriatur. cumque nihil tam potentes obediencię stimulos addat, quàm altè imbibita animo Superiorum veneratio; hanc autem nihil ad eò minuat, atque curiosior abditissimarum imperfectionum perſcrutatio; fit vt hac vna obediencię nerui penitus ſecentur, vtque ſua iam cuique voluntas pro maiorum imperio ſit. quod vbi fit, quidquid in Religione ſummum erat, & obedienciæ viuientis, in mutuum robur contra procuſantes inimicas acies ſtringebatur ac firmabatur, dilabitur, & magnum illud Religionis propugnaculum, tanquam diſruptis aggeribus, diffluit. Sed neque domeſticis hæc parietibus continentur, cum nihil prouiùs elabatur, quàm ſi quid imperfectionis in Superiore notatum fuerit: & gloriatur etiam interdum, tanquam ſolertes vitiorum quæ alios latuerant, reſectores. præmiumque noxiæ huius indagationis, euulgatio vitiorum eſt: quæ vniuerſæ

sæ familiæ quantum damnorum adferat, nemo paullo prudentior non videt. cùm æstimationis famæque in Superiore diminutio, omnia simul metuenda secum trahat. Nam ubiquæ latebant, aut magnarum virtutum vmbra vitia tegebantur, produntur, & in omnium ore calamoque incrementa sumunt; nequidquam magna speraueris, cùm opinionibus ferè humana peragantur: quam qui sustulerit, proditor factus secretorum, omnem bene feliciterque agendæ rei occasionem ademerit; cùm fidem, auctoritatem, venerationem, prosperioris imperij fulcimenta, tanquam vna falce demetat, spemque in his omnem non in herba tantùm, sed in radice præscindat.

Huc accedit quædam in Superioribus animorum deiectio ac pusillanimitas. cùm enim minutissima abditissimaque sua solisque parietibus nota obseruari studiosius vident, ac in ingentes montes tenuissimas attolli verrucas, virtutes tegi, aut æmula simulatione transiri, ingentiaque naturæ ac Dei dona æmulationibus liuoribusque insepeliri, minima vitia in immensum supra verum tolli, perque omnium linguas chartasque spargi, infelicibusque augmentis indensa nemora, noxiorum zizaniorum more,

re, raros frutices succrescere; cadunt animis, concreditaque sibi domestica externaque negligunt, ac in ignauam quandam, ex alacri accensaque degenerant vitæ rationem, sibi iam ipsis dissimiles: vt prior ille ignis pectoribus clausus, magnarumque cogitationum succentor concreseat in densam glaciem, in Noricum quoddam frigus: & prior illa animorum alacritas, fortes ausus, mentis erectio, generosi pectoris flammæ, in ignobiles delabantur cineres, in languidum teporem, in umbras, in fumum, & pro dignissimis posteritate cogitationibus, ingens animi mœror & melancholia succedat, illustrium inimica moliminum, qua quidquid generosioris erat mentis emedullatur, ac tanquam succis ad viuum nervis delumbatur.

Graua hæc sunt, & ad vltima vltimæ desperationis recta via impellentia. è tam tenuibus initijs tam magna, tam Religionibus noxia, tam nulla postmodum arte emendanda. nihil hîc nouum. nam & vulpeculæ paruulæ demoliuntur vineam Dei Sabaoth, & validissimarum fundamenta vrbium non semel à muribus euersa legimus, etiam à formicis. & tineæ quanta robora exedunt: erugine sanè ferrum exeditur quod ignibus stabat illæ sum. ita à minimis

mis maxima corruunt. à molli stillicidio
ingentes fatiscunt rupes, à tam lenta mol-
litudine Oceani propugnacula & claustra.
quis credat, ni res ipsæ loquantur? quare
nisi curiosiores hi minutissimorum in Su-
periore scrutatores, in robustissimum inci-
derint, & Hercule aut Samsone natum
pectus, quod aduersantibus indurescat,
roboretur, ac seipso fiat maius, quod quæ in
non postrema felicitate ponat, tales nacti
se fuisse, ac uedis viribus cotes; quod deni-
que ita mores vitamque omnem compo-
suerit, tanquam in solis inimicorum ocu-
lis, ac inter hostilia arma uiueret; omnis
omnino magnarum rerum spes funditus
euanesceret. Tales verò quanti sunt? nescio
an centesimus quisque contemnat scor-
piacas has caudas, viperarum ex insidijs
dentes; aut arborum instar aquilonibus
misce firmetur; aut præualidarum rupium
more irata hæc contemnat maria, & pro-
cursantes fluctus, cogatque interritus iras
ninasque suas bibere. rara ô nimum in
humanis pectora, chalybe aut adamante
tata! cum plerumque omnes æmuli his
observationibus, prostratis prolapsisque
in solidum viribus, corruant, ac animam
etiam mœroribus tanquam torcularibus
expressam, per ignaua vestigia ponant. ad-

eò nec robore pleni, viridi etiamnum iu-
uenta, aut ætate & prudentia firmati, his
optimorum quorumcunque blattis ac ti-
neis diu resistere possunt, aut stare incolu-
mes; ac inambusti, integraque fama & pe-
ctore per calcatas hæc venenarias curio-
sitates vitam tolerare. eo magis quo cu-
rioli hi disquisitores plerumque de corde
& cerebro suo mutuuntur quod Superiori
adnectant. premuntur occultis vitijs; iisdem
teneri Superiorem quia vellent, arbitran-
tur: innatant abditis animorum imperfe-
ctionibus; iisdem innatare fluctibus quia
vellent, putant Superiorem. infelices na-
tatores socios sibi quia vouent, inuenisse
credunt: at in nullos magis quàm in Supe-
riores feruntur; excusatione nimirum di-
gni, si suis vitijs Superiores inuoluerint. Et
cùm non rarò quæ præferuidè valideque
facta vellemus, euenisse credamus; fit vt
vitia nostra in Superiorum frontibus lega-
mus. non quòd insepulta illi sint vestibulo,
sed quòd è nemore nostro decerpta, in
alienum agrum zizaniorum talium inas-
fuetum, noxia hæc semina transferamus.
quòd si quæ externa in Superiore licet te-
nuissima vitiorum quorundam domesti-
ca nobis signa vidisse in animum induxeri-
mus; à decem passuum millibus damnan-
da

da euocamus, & è nostro illos ingenio moribusque metimur. quid? quòd frequenter in sinistram omnino partem & alienissimam ab auctoris mente verba resque flectamus. ita in alieno ore, manu, sanguine, vita, fama ludimus, & quidquid vel capillo vitia nostra refert, in testatissimam alienorū vitiorum seriem transcribimus. Grauis omnino res, molestiarumque ac periculorum plenissima, quæ ingentes deponcat animos, ac humanis prope maiores, ac non nisi præualida Dei manu suffultos.

Remedia.

Non hominem in Superiore vitij obnoxium, sed Dei cuius vices gerit personam intueri. hanc in illo venerari, & hanc solam. Qua in re imitandi sæculi mores. neque enim in regio legato priuata vitia quidquā de veneratione adimunt: cū in hoc non Petrum aut Paulum domesticis vitij inuolutum, sed Regem intueamur, cuius vicarias vices cū obeat, regio illum cultu & obsequijs dignamur.

Hominem illum cogitare, errare posse. neque dignitates vitia minuunt aut tollunt, augent magis & ostentant quæ antè latebant. nam quæ priuata vita tegebat

tanquam abdita aut altè recondita terris, ea publica omnium oculis prospectanda proponit. quin imò ipsa munia amplam vitiorum materiam suppetunt: & quæ in semine suo mortuis similia torpebant, aut ignauo quodam sopore elisa iacebant; accedente dignitate exurgunt in herbam, in frutices, in arbores, in plenam patulamque vitam.

Ad omne Superioris vitium, sua propiùs intueri. graviora diligens seriùsque disquisitor reperiet domi suæ: quæ fors si composuerit cum illius, festucas in illo, trabes in se reperiet.

Statuat apud animum suum vnusquisque in Superiore, quod ab alijs in re sua vellet. ignosci vitijs suis desiderat? eadem vtatur regula in Superiore: maximè cum maior dignitas ac potestas maiorem malorum materiam suggerat. ferè enim plus potuisse, plus fecisse fuit.

Nisi apertissima in Superiore viderit, nunquam firmet iudicium, ac illa ipsa in benigniorem semper partem interpretetur. cum plurima in humanis occurrant prima fronte damnanda: quæ si penitiùs deposito in alterutram partem affectu introspiciantur, probanda non rarò erunt, aut sanè clementiore longè censura notanda;

tanda; si non crudè dicta factaque, sed auctoris mentem intueamur. quòd si res excusationem non admittat, ad humanam naturam pronam ad vitia decurrendum, & è nostra ad varios lapsus facilitate, aliquid indulgendum alijs: dignissimi futuri cui reliqui ignoscant, si nos erroribus ignoscamus aliorum.

In testatis Superiorum vitijs, ad Deum per frequentatas calidasque preces decurrendum, vltionis etiam sibi irrogatis poenis illi placendo, vt pulsus vitijs errorumque tenebris, veris solidisque mentem illius virtutibus ornet illustretque, totumque hominem zizanijs in plenum radicatus euulsis, melioribus cæloque ac munere quod tuetur dignis instruat.

Cogitet deinde quanta Superior in illo perferat, quanta molli spongia eluat, quanta prudenti simulatione transeat, quanta leui manu tangat, quanta mitiget & eleuet; cùm hominibus imperare se sciat non angelis. maiore etiam facilitate in Superiore vtatur: cùm æquius sit filium parentum ignoscere erroribus, quàm parentes filiorum indulgere vitijs.

F I N I S.



Errata sic corrige.

Pag. 284. v. 7. à *sine lege* tantum.

298. v. *antepon.* pramiator.

299. v. 18. ingentem Dei & vocationis.

334. v. 2. à *sine* intuentur.

354. v. 4. à *sine* rex.

357. v. 11. consequuntur.













8 -

